

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR NINTH SITTING ON WEDNESDAY THE 12th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **PU F. RODINGLIANA**, Minister to lay on the Table of the House a copy of the Mizoram Electricity Regulatory Commission (Renewable Purchase Obligation and its Compliance) Regulations, 2024.
3. **PI BARYL VANNEIHSANGI** to lay on the Table of the House a copy each of the following :
- i) Statement on Actions Taken by the Government on the Further Recommendations of Subject Committee-V contained in the 1st Report, 2024 relating to Mizoram Building & Other Construction Workers' Welfare Board under Labour, Employment, Skill Development & Entrepreneurship Department.
- ii) Statement on Actions Taken by the Government on the Further Recommendations of Subject Committee-V contained in the 2nd Report, 2024 relating to Land Revenue & Settlement Department.

FINANCIAL BUSINESS

Discussion and Voting on Demands

4. **PU K. SAPDANGA**, Minister to submit the following to the Vote of the House on 12.03.2025 (Wednesday). Demand No. –

Demand No.	Purpose	Amount	<i>Demands for Grants page No.</i>
13	Personnel & Administrative Reforms	4,35,05,000.00	102-105
16	Home	8,60,76,50,000.00	162-200
30	Disaster Management & Rehabilitation	78,37,31,000.00	367-374
46	Urban Development & Poverty Alleviation	3,30,25,94,000.00	527-541
TOTAL		12,73,74,80,000.00	

5. **PU PC. VANLALRUATA**, Minister to submit the following to the Vote of the House on 12.03.2025 (Wednesday).

Demand No.	Purpose	Amount	<i>Demands for Grants page No.</i>
31	Agriculture & Farmers' Welfare	1,91,10,70,000.00	375-393
37	Co-operation	17,77,24,000.00	436-442
47	Irrigation & Water Resources	91,26,70,000.00	542-549
TOTAL		3,00,14,64,000.00	

VANLALTHANTLINGI
Commissioner & Secretary

Day-9, 12th March, 2025 (Wednesday)

SPEAKER : “*Lalpa ñih chu finna bul a ni a; Chutianga ti apiangte chuan hriatthiamna ñha an nei. Amah fakna chu kumkhuaa awm tur a ni.*”

- Sam 111: 10

QUESTIONS & ANSWERS:

Starred Question No. 121: Hydro-electric power chungchang.

Zawhna Neitu: Pu Lalchhuanthanga, Aizawl South-II Bialtu.

PU LALCHHUANTHANGA: Pu Speaker, Starred Question No. 121, P&E Minister zahawm tak chhan atân -

“Mizoram power-a kan intodelh theihna tura kan sorkarin Turini Hydro-electric Power (THEP), Tlawng Hydro-electric Power (THP) leh Tuivai Hydro-electric Power (TEP) te tun dinhmunah engnge kan thlen tawh?”

SPEAKER : A chhang turin, Power & Electricity Department changtu Minister, Pu F. Rodingliana.

PU F. RODINGLIANA, MINISTER: Pu Speaker, ka lawm e.

Ka chhanna chu -

- i) Tuirini HEP - 24MW DPR siam zawh a ni tawh a. Hei hi kalpui mêk a ni a.
- ii) Tuivai HEP - 210MW DPR hi revise a ni a, tunah hian hma lak mêk a ni.
- iii) Tlawng Lui NEP hi Lungleng bulah 210 megawatts DPR siam mêk a ni a, 2025 chhunga zawh hman beisei a ni.

Ka lawm e.

SPEAKER : *Zawhbelhna* kan la ang a –

1. Pu Lalchhuanthanga, (Zawhna neitu),
2. Pu Rasik Mohan Chakma,
3. Pu W. Chhuanawma,
4. Pu Lalrinsanga Ralte.

PU LALCHHUANTHANGA: Pu Speaker, ka lawm e.

- i) Tunhnai ah Central atangin Tuirini Hydel Project hi a pull-over hmuh tawh niin kan lo hria a. A pull-over hi lo chhuak ta ang ni sela, he project hi Mizoram ta tur a ni em?
- ii) Project estimate amount hi eng zât nge?
- iii) Megawatt engzât pechhuak thei tur nge a nih?
- iv) Hmalak chhoh zêl dân tur min hrilh thei em?

PU RASIK MOHAN CHAKMA: Pu Speaker, ka lawm e. Power & Electricity Minister chhan atân ka zawh belhna chu –

- i) Lawngtlai District-ah hian khaw engzât nge *unelectrified-village* awm?
- ii) Electricity pêkna tur ruahmanna a awm em? Awm ni se, eng scheme atangin nge?
- iii) Khawi kuaah te nge hma lak a nih dân?
- iv) Engtikah nge ñan theih a ni ang?

PU W. CHHUANAWMA: Pu Speaker, ka lawm e. Ka *Zawhbelhna* chu:

- i) “Sorkar hmasaah khan current bill hi engzât chiah nge kan bata, chung chu rulh a ni hlawm em?”
- ii) Rulh ni se, eng zât nge kan rulha, rebate te a awm em?”
- iii) Tunah hian ba kan la nei em?”

PU LALRINSANGA RALTE: Pu Speaker, ka lawm e. Serlui-B hydel project hi 12 megawatt pechhuak thei a ni a, khawl pathum 4 megawatt theuh dah a ni a. A vai 12 megawatt hi Mizoram ta ni a. Kan Minister pawh hian a ngaihven hlein a, department-in a hmun te pawh an tlawh tawhin ka hria a. Ka *Zawhbelhna* chu –

- i) Hei hi sawi that leh theih deuh dân a awm ang em? Tin, hlâwk zâwka a rawn tharchhuah theihna tura thuum that ngaite thuum that tir theih dân a awm ang em?”
- ii) Serlui-B hydel project hi mimal emaw, corporation hnenah emaw hlan tumna a awm em?”
- iii) Mizoram-a current line pawh-luhna upa ber pawl, Vairengte kaltlang line, Vairengte - Bawktlang line hi a hlui tawhin, a tha lo hle mai a. He line hi a thara thlâk theih dân a awm ang em?”

SPEAKER : A lawmawm e. Nimin lam khan Member zahawm tak Pu Clement Lalhmingthanga khan, “*Senior-te tih dân*” ati a, zawhna ah khan sei em emin a han ti a, “I zawhna ah i lut thei tawh em?” tih hial ngai kha a ni a. Chuvângin, zawhna kan zawh chuan, zawhnaah khan chêng mai ila. Statement kan siam emaw tih mai tur khawpa thui deuha hêl kual lovin. Tin, kan inngen tawh ang khan, zawhna te hi tam tak, tlar thui tak lo deuh pahnih pathumah te khan reh bun hram tum ila.

A theih ang anga chhang turin, Power & Electricity Department changtu Minister, Pu F. Rodingliana ilo sawm ang.

PU F. RODINGLIANA, MINISTER: Pu Speaker, zawhbelhtu Pu Chhuana rawn zawhna kha, hmalâkna a awm mêk a, tunah hian DAL lam atangin approval te pawh kan hmu tawh a. Chu chu a finance lam chhuttu turte pawhin an lo hre tawh a. Tunah hian he tuikhuah hi kan lo khuap thei a nih chuan kan ram ta tur a ni a. Finance lam chhut tur hi New Development Bank a ni a, chungho nen chuan Delhi-ah kan inhmukhawm tawh a.

Sorkar hmasa lama lo hnawl tawh kha a nih avângin hei hi kan han thar thawh leh a, sorkar tharin kan policy-a kan dah dân te kan sawi a. Chu chu, tunah hian anmahni pawhin an tih theih kan ring ngei a. Anni pawhin min phurpui thu te tawngka chuan kan hre tawh a ni. Hei hi kan hmalâkna pawimawh a ni a, reilo te ah chuan a chhanna changtlung leh phuisui zâwk kan dawn ngei kan beisei a. 24 mW a ni a, a DPR 2023-2024 a mi ₹676.78 crores a ni.

Pu RM Chakma zawhna kha, Lawngtlai District-ah tunah hian unelectrified village 48 awm angin kan chhinchhiah a, chu chu March 2024 thleng khan a ni a. Tunah hian central ah scheme kan thehlût mêk a, kan hmuh ngei te pawh kan beisei a. Hmalâkna a kal mek a ni.

Pu W. Chhuanawma rawn zawhna - “Sorkar hmasain bill ba a nei em?” tih kha, Ni e, sorkar hmasa khan bill ba crore ₹200 dawn min hnutchhiah a, chungte chu tunah chuan kan rûl vek tawh a, Pu Speaker, a lawmawm khawpin ka hria a. Tin, rebate crore 2.60 kan nei a ni. Hei hi kan sorkar hnu wawiin ni thlenga kan dinhmun a ni.

Tin, Pu Rinsanga rawn zawhna kha, Serlui B hi thumthat turin kan sorkar tirh khan hma kan la a. Ni 6th July khan study team officer 6 te tirin, an zu kal a. Chuta an thil hmuh dan hi vawiinah hian ka rawn inring chiah lova, a tlangpuia ka hriat dan kan sawi ang a.

A pawimawh ber chu, a pen-stock line a chhe tawh a, a plate thir chhah pui 16 mm laia chhah khawr tawh a ni a, chu chuan cement block te pawh tichhiain, chu chu harsatna lian tak kan neih a ni a. Sum tam tak sen a ngaih mai bakah a siamtha tur chuan a tuikhuah zawng zawng sah kang veka, a bul atanga tih that leh a ngai a. Kan han ngaihtuah a, a huphurhawm khawpin kan hria a ni.

Tin, sawi ang khan, khawl pathum a ni a. Tichuan, a khawl 3 hi engtin tin emaw ni kan *run* a, a lehlama mi a tha kan la a, tunah hian khawl 1 kan *run* thei tawk a, kan theih ang angin kan ti a. A khawl te a lo hlui tawh a, a company kan zu biak khan midangah an lo hlanchhawng tawh a, a part hmuh pawh a har tawh khap mai a. A khawl hi collaboration 'Belgium' tih a niin ka hria, India ramah a part hmuh a har tawh a, a buaithlak ang reng khawp a. Tute emaw ni motor nei ang deuhin - a lehlama a mi kan va la a, a lehlamah kan va vuah a, chutiang chuan kan la tlan naw naw a ni.

Tin, khang hmalakna zinga pawimawh tak mai pakhat chu - Powerhouse, lei hnuai ft 49 hnuai lama awm a bang atangin tui a rawn put nasa em em mai a, nunna atan pawh a hlauhawm khawp mai a. A tihngaihna tak kan hre lo a, a pump chhuahna khawl te kan han dah a, kan buaipui ang reng khawp mai a. Chu chuan harsatna min siam avangin, a power siamchhuah chungchangah te pawh harsatna a awm a. A vaia siamtha turin ruahmanna te kan han siam chhin a. A powerhouse chung te pawh kum 10 tam a lo nih tawh avang leh staff-quarters zawng zawngte repair a ngaih avangin harsatna lian tak kan tawk a ni, khulai ah khuan.

Tunah hianin ngaihtuahna thar kan siam mek a, a khawl ringawt siamtha tur chuan crore ₹12 vel a ngai niin kan hotute chuan an rawn chhut a. Chu mai nilovin, a pen-stock line siamtha turin hun leh tha mai baksah a crore tel sum leh pai a ngai dawn bawk a. Tin, a powerhouse chhunga tui leak kha a ngaihtuahawmin, mihring tan pawh a hlauhawm a ni. Hei hi a chhan kan hre chiah lo a, a hunlaia siamthat loh vang nge nia, tui pressure a na ta lutuk tih pawh kan hre chiah lova.

Khang thil harsa zual lian tham tak takte han hma tur khan crore tam tak a ngaih avangin, tun kan sorkar sum dinhmun en hian chei that leh duh ang tawka hma la turin kan sum dinhmunin a zir lo a. Chuvang chuan, tunah chuan a theih ang angin kan ti a, mega-watt tam vak lo kan la *run* mek a ni. Ka lawm e.

SPEAKER : Hei, kan hmaah khan tablet a awm theuh a, digitalize deuh-deuh tum a ni a. Vawiin hi absent ka nei nual a, *sitting allowances* thleng khan awmzia a awm dawn a ni, record vek a ni hei hi. Pu H. Ginzalala, Pu Lalfamkima, Pu Lalnghinglova Hmar, Pu Rasik Mohan Chakma, Pu V. Malsawmtluanga te kha han present ve hram teh u. (*Server problem*)

A tha lo a ni maw? Aw le, kan NeVA te lam khan khawngaihin rawn ensak teh u khai. NeVA lamin an rawn en nghal ang.

Starred Question No. 122: Bana-kaih Policy chungchang.
Zawhna Neitu: Pu V. Malsawmtluanga, Lunglei North Bialtu.

PU V. MALSAWMTLUANGA: Pu Speaker, ka lawm e. Hei, ka bula thu nen hian kan log-in thei tlat lo mai tih kha ka han sawi nawn leh a ni e. Sports & Youth Services zahawm tak Pu Lalnghinglova Hmar chhan atana ka zawhna chu –

“Bana Kaih Policy hnuaiyah Sorkarin ‘*Empowering Mizoram Sports*’ bul a tan hi Lunglei District tana chhawr theih tura kalpui tum a ni ve em?” tih a ni e.

SPEAKER : Chhang turin Sports & Youth Services Separtment changtu Minister Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, a chhanna chu hetiang hi a ni e –

‘Bana Kaih – Empowering Mizoram Sports’ hi Mizoram chhunga khaw tinin an chhawr theih ngei tura kalpui tum a ni” tih a ni e.

SPEAKER : *Zawhbelhna* kan la ang a –

1. Pu V. Malsawmtluanga, (Zawhna neitu),
2. Pu Robert Romawia Royte,
3. Pu Jeje Lalpekhlua.

PU V. MALSAWMTLUANGA: Pu Speaker, ka zawhbelhna chu -

- i) EMS kaltlang hian ka bial chhungah Coach ruai duh ta ila, engtin nge kan kalpui ang?
- ii) Coach hlawh senso tunge tum ang?
- iii) Coaching pe tur Coach ten hmanrua (coach equipment) an keng tel dawn nge, a khua/vengin kan lo neisaa kan lo inruahman a ngai dawn?

PU ROBERT ROMAWIA ROYTE: Pu Speaker, ka lawm e. Keini ‘Sports Lovers’ ten (han inti ve khanglang ila), ‘Sports minister-ah nei ila’ kan tih ang chi kha tuna kan Sports minister hi (kan thianpa te pawh a nihna laiah leh football thian te pawh a ni a), a lakah beiseina sang tak pawh kan nei a ni. Tin, ka zawh hmain lawmthu te pawh he House kaltlang hian ka sawi duh a. Aizawl Football Club-ah hian kan Adviser te pawh a ni thin a, sum leh paiah te kan harsa nasa a, tihtawp tum te pawhin kum 4-5 kan titawp dawn kan ti thin a, kan titawp hleitheih lova, tihian kan han kal nawk nawk a. Vanneithlak takin kan sorkar ve lai khan Power Finance Corpotation atangin CSR fund ₹500/- lakh leh tih lai mai kha kan han hmu a, chung chu a beneficiary organization kan nih angin kan parent organization emaw, keimahni Aizawl FC emaw hi a implement tu ah te tang ila kan han ti a. Harsatna a han awm nak nak a, thil te pawh a in delay deuh a. Mahse, tun hnai khan N. Lungleng ah Aizawl FC-in football field kan siam tur kha a mawhphurhna thlengin kan minister hmalakna hian kan kutah a awm a, kan lawm viau a ni. Tichuan ka zawhna chu hei hi a ni –

MNF hunlai khan Champhai Chhangphut field leh Lunglei Thuamluaia Mual-a flood light siam nan sum ruahman a ni a, SASCI Part-I hnuaiyah. Chhangphut field, Champhai-ah tha takin an zo tawh niin ka hria a, Lunglei lam hi a reh vung vung mai a. ‘*SASCI sum lapse*’ kan tih fo ah khan Lunglei Thuamluaia Muala flood light siamna tur, Lunglei khawpuiin an nghahleh ve em em kha a tel ta mai em ni? Ka lawm e.

PU JEJE LALPEKHLUA: Pu Speaker, ka lawm e. Sports & Youth Services changtu Minister Pu Lalnghinglova Hmar min chhan tana ka zawhbelhna chu –

- i) Tuichangral Games a awm dawn a, MLA te pawhin thawhlawm te kan lo thawh ve dawn nghe nghe a. Tuichangral Games leh Vision-Olympics, 2036 in kalpui a tum dan media a kan hmuh hi sawichian deuh theih a ni em?
- ii) Tun Zirtawpni leh Inrinni khan Sports Minister Conference Hyderabad lamah khan kan lo hmu che a, Gopichand-a te nena in thlalak te pawh khan kan lo hmu a. Khatah khan Olympic, 2036 hi India hian eng ang takin nge a buaipui tawh tih kha House ah hian min hrilh thei em? Mizorma Olympic Vision kan kalpui ve ringawt te hi awmzia a awm dawn em?

SPEAKER : A lawmawm e. A theih ang ang chhang turin Sports & Youth Services Minister Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, zawhna neitu Pu Malsawmtluanga zawhbelhna kha, hemi 'Empowering Mizoram Sports' hnuai coach rawih dan turah hian a hmasa berah chuan, 2036-ah India in Olympic a thlen turah hian Mizote an tel ve theihna tur Vision Olympic, 2036 kan tih hi kan buaipui ber chu a ni a. Chutah chuan Mizo infiam-mi tel ve ngei se kan duh a ni. Zep tur a awm lo a, medal pawh kan la sawi ngam lo a; a participation kha a ni a kan tum ber hi chu. Tun thleng hian India aiawha Olympic a tel thei hi mi pahnih bak kan la nei lo a ni. Sports hi kan buaipuiin, kan sawi nasa a, kan la sang lo a ni tih hi chu kan hriat ngam hi a ngaiin ka hria a. Chuvang chuan, 2036-ah hian India in Olympic thlen a tum si a, chutah chuan Mizo infiam mite hi tel ve ngei kan duh avangin kum 8 - 18 inkar, a aia naupang kan tih loh chhan pawh 36 hi a hnai tawh ang reng si a, kum 11 lek a ni tawh si a. Chuvang chuan, kum 8-18 inkar training pekna turin he EMS hi duan a ni.

Tichuan, coach hi Mizoram khaw tin atanga dil theih a ni. Tichuan, Coach an rawn dila kan thliar danah chuan, *popular sports* a awm a; amaherawhchu, Olympic vision sports discipline kan duat bik tura kha a awm a ni. *Entirnan:* Popular sports chu kan ngaihven em em football, volleyball, basket ball leh a dang te pawh a awm ang a, a kal zel ang. Amaherawhchu, 2036 Olympic-ah chuan khang discipline te khan medal min pe lo palh ang tih kan hlau deuh a. Tin, kan tan chuan a la har deuh a, a ram angin. Chuvang chuan, henge hi chu kal pangngaiin a kal ang a, duat bik sports kha a awm dawn ta a ni. *Entirnan:* wrestling, boxing, weight lifting, judo, archery tih te a hrang hrang kha a awm ta a. Chung leh, popular sports-ah pawh coach a dil theih ang, EMS hnuai. Amaherawhchu, Olympic Vision Sports hi kan duat bik dawn a.

Tichuan, PPP (public-private partnership) mode a kalpui tur a ni a. A sawmtu khuate khan a coach kal leh haw man Maxi Cab rate tum ve se kan duh a ni. *Entirnan:* Pukpui, Pu V. Malsawmtluanga bial khan rawn dil dawn se, Pukpui khawtlang khan a coach kal leh haw man kha chu lo tum ve se kan ti a ni, kan zavaia tan tlanna a tan; a bak zawng sorkarin a tum ang. Tin, sports equipment pawh kha a theih ang ang sorkarin a tum ang kan ti a. Chuta tan chuan hand-holding hnuai atang hian crore ₹2.50 kan dawng tawh a, a hmandan tur pawh kan ruahman tawh a, kan ti thei thuai dawn a. Chumi hma chuan Trainers Training, kan Coach te tuai-hriamna hun kha hman kan tum chho mek a, training min pe tu tur hian phai lama mithiamte kan duh si a, kan indawrna a kal mek a ni. Tichuan, a senso leh a equipment lama kha chu a theih ang ang sorkarin a tum dawn a, thenkhat erawh chu tum vek theih loh equipment man to te a ni a. Chuti chung chuan training peknaah hian an thawmhaw hak tur thlenga pek tumin kan inbuatsaih mek a ni.

Pu Robert Romawia Royte zawhna Chhangphut Field leh Thuamluaia Mual chungchang kha, Pu Speaker, hei hi SASCI hnuai ah MNF hunlaia an pawisa dah a ni a. Amaherawhchu, 1st installment min pek (2nd installment lo la chhuak lo a nih avangin) pawisa kha a zahve vel a ni a, Thuamluaia Mual tan leh Chhangphut Field atan dah a ni. Pakhat zawk thlan a ngai a, Chhangphut Field leh Thuamluaia Mual te hi tunhnaiah a grass te han siamthat a ni a. Chhangphut Field lam hi flood light dah hmasak turin kan han thleng ta a. Chu chu December, Ni 12 (ni tain kan hria) khan kan Chief Minister-in a hawng nghe nghe a. Tunah hian Champhai - Chhangphut Field-ah hian flood light tha tak mai a awm a, tunah pawh hman mek a ni tawh a ni. Chutihlai chuan SASCI kha a ni a, Thuamluaia Mual tana pawisa pawh hi a thua dah a ni a; a tak a pawisa a lo thlen loh avangin tunah rih chuan Thuamluaia Mual hi hna kan la tan ve thei rih lo a ni.

Tichuan, Pu Jeje Lalpekhluah zawhna Tuichangchang Games chungchang kha, Tuichang Games hi hun rei tak chhung lokal pui tawh a ni a, Tuipuiral Games nen hian. Pu Speaker, khua leh khua infiamna mah nise, hei hian talent tam tak a haichhuak a. Chu chu, 'awmze neiin a kalpui theih ang a' tih kha kan ngaihdan a ni a. Nichina kan sawi tak 'Olympic Vision, 2036 nen khan i kaikawp ang u', kan ti a, Tuichang GSA leh Tuipuiral GSA te nen pawh joint meeting kan nei a. Tin, department chungah internal meeting pawh kan nei a ni.

Tichuan, January thla khan Tuipuiral lam hi chu an zo tawh a, discipline 2 (ka hresual lo turah ngai ila) weight lifting leh boxing-ah sorkarin kan pui a, training te kan neihpui a. Hetah hian a hmaa la awm ngai lo te kan introduce a, talent haichhuahna a tan kan ti a. Tichuan, Tuipuiral Games chu January ni 25 khan zawh a ni. Tichuan, Tuichang Games bik hi March Ni 31-ah tan a ni dawn a, chutah chuan, hei kan MLA zahawm tak tak te hian an fund atangin Tuichang Games atan puihna te pawh an pe a. Tin, sorkar atangin discipline 3 kan thlan bikah hian Association kaltlangin ₹1 lakh theuh puihna kan pe a. Tuichang ah hi chuan weight lifting, wrestling leh boxing te a ni ve thung a, archery kha a tel ta lo a, anmahni thlan a ni a. Tichuan, kumin January atang khan training kan pe tan tawh a, tunah hian weight lifting leh boxing training a kal mek a. Wrestling hi an neih hnuah exam avangin an chawl a, March, Ni 15-ah an chhonzawm leh dawn a. Tin, a puihna ₹50,000/- GSA hnenah sorkar in a pe bawh a ni.

Pu Speaker, kan han tum ber a chu, a khua leh khua infiamna a tawpa, champion team in chibai emaw, vawk talh emawa tawp ringawt lo deuh khan, *talent hunt*-ah nei ila kan ti a. Kan coach-te an han awm a, training an pe mek a. A training mai ni lo, a competition-ah pawh an awmchilh ang a. Heng a player thate tun atangin naupang an ineltir dawn a. Hengho hi an chhinchhiah anga kal zel tur, kal zel tlak an awm chuan a special-in training kan pe chho ang kan ti a.

Tichuan, Tuipuiral Games leh Tuichang Games hi *talent identification programme* a tan kan han hmang tan ta a, hei hi region dangah pawh tih len zel kan tum a ni. A khuate nen tang hovin kan duh danah chuan, sorkar ban tha chu ti hi a ni mai a, kan sum neih te pawh heti hi a ni. Amaherawhchu, public-private partnership, anni nen tangkawpin sports tih hmasawna a tan a tangkai dawn hlein kan hria a. Hetianga kan kal ngat chuan tun atanga kum 5-ah chuan Northeast Games-ah emaw, National Games-ah pawh medal tally-ah hma kan sawn ngei kan beisei a ni. Tunah hi chuan zep thu a cheng lo; ram pum huap emaw, hmarchhak huap emaw intihsiakna a awm apiangin a medal nei tlem pawl kan ni a, kan

zak ziah a. *Sports* kan ti a nih chuan, hei hi tih hmasawn kan tum lai tak chu a ni a. Tuichangral Games pawh hi tuna an kalpui mek piah lamah, heng hote hi kan han introduce a, lian zawka kalpui hi khawtlang nen tangho zelin kan tum dan a ni a.

A zawhna pakhat leh 'Sports-Ministers' Meeting' tih kha Ni 7 leh 8 (Zirtawpni leh Inrinni) khan Hyderabad-ah neih a ni a. A hmingah hian 'Chintan Shivir of Sports Ministers' an ti a. Chu chu, hmunkhatah camp-a awma, reflection ngaihtuahna sawrbinga India sports hmasawwna tur ngaihtuahna hum kha a ni a. Kan Union Sports Minister Dr. Mansukh Mandaviya'n a tir atanga a tawp thleng min uap a. Tichuan, kan ngaihdan te kan sawi a; Sports Secretary emaw, high officials - Sports Authority of India te nen India ram *sports policy* kal zel turah, a bikin Olympic, 2036 India-in thlen a tum chungchang kha kan sawi ho a ni.

Pu Speaker, kan pawisa sawi hi a intiat lova, an pawisa sawi a lian thei khawp a. Chutihruah chuan, keiniin advantage kan neih ve chu - kan infiam-mite train tha ta ila, tih lama kha kanrawn hawn lian tak chu a ni a. India hian Summer Olympic, 2036 hi thlen ngei a tum a, a bid tawh a, chu chu kan Prime Minister ten tunhnaiah vawi tam tak an sawi a. Niminpih mai khan Home Minister Amit Shah pawhin Gujarat-ah thlen tir tum a ni a; Stadium lian, multi-million pawisa hmanna tur ang chi 10 din anih tur thu kha a puang chhonzawm a. Tikhan, keiniin a infiam-mi kan thawh ang kan ti a, kan theihna ve chin te ah. Tin, he infiamna lian han thlena a games thenkhat bik hi 'keinin kan thleng ve thei em' tih te kha kan han sawiho a. Chutiang tur chuan thil hre tam loh mah ila, tlem kan lo hriat ve chhun-chhun awmna subject lam a nih avangin ka'n zuk participate ve a, kan zuk sawi ve nual a ni. A pawimawh ta ber chu, a zawhna chhannaah chuan - India hian Olympic, 2036 hi thlen a tum tak tak a, sum leh pai leh thildangah pawh a inbuatsaih mek a. Chutah chuan, Mizo infiam-mite an tel ve ngei hi kan duh a, chuta tan chuan theihtawp kan chhuah a ni. Ka lawm e.

PU ROBERT ROMAWIA ROYTE: Pu Speaker, a sawi lai khan ka lo interrupt duh lo a. Khawngaihin kan Sports Minister zahawm tak khan a hre thoin ka ring a, ka zawhna tak kha a chhang Chiang lo deuh a. Kha SASCI sum, Thuamluaia Mual-a floodlight dahna tur kha, 2nd installment sum lapse ah khan a tel ve em ni? tih kha a ni a, Finance Minister a ni lova, a sawi hreh deuh chu a ni maithei a. Mahse, Assembly ah mamberte'n kan zawh hi chuan thu dik khan min chhang hreh lo sela. A lamah kan lo tang ang a, kan lo support tlat dawn a ni. Han sawi bawl mai rawh se.

PU LALNGHINGLOVA HMAR, MINISTER: Pu Speaker, ka chhangin ka hria a, 'first installment chiah a lo chhuak a', ka ti a, *first installment* a nih chuan, pahnih atan dah a ni a. Pakhat zawk Champhai ah light chanve daha, pakhat zawk Lunglei-a dah kha a remchang vak baw si lova. Stadium pakhat zawk zawk tih en phawta, second installment a lo chhuah hun nghak ila, chutah chuan Thuamluaia Mual pawh ti leh mai ila, tih kha kan dah dan a ni a. Second installment hi kan la nghak zel a ni, Pu Speaker.

SPEAKER : A lawmawm e.

Starred Question No. 123: Sawhthing chungchang.

Zawhna Neitu: Pu C. Ngunlianchnaga, Lawngtlai West Bialtu.

PU C. NGUNLIANCHUNGA: Pu Speaker, Starred Question No. 123, Agriculture Minister zahawm tak, Pu PC Vanlalruata min chhan atan –

“Kut-hnathawktute’n sawhthing an tharna hmun atanga collection centre-a an phurh thlen man hi sorkar tum tur nge sawhthing neitute tum tur?” tih a ni e.

SPEAKER : Chhang turin Agriculture & Farmers’ Welfare Department changtu Minister, Pu PC Vanlalruata ilo sawm ang.

PU PC VANLALRUATA, MINISTER: Pu Speaker, Pu Nguna hian kar kalta zawhbelhnaah khan arawn zawt tawh a, hei, tunah zawhna arawn chhuak leh a, ka’n chhang leh ang e.

Kut-hnathawktute’n sawhthing an tharna hmun atanga collection centre (hetah hian ‘secondary collection centre’ tih tur a ni a) an phurh thlen man hi sawhthing neitute emaw, society te emaw tum tur a ni a. Helai hi primary collection centre-a society te khan anrawn intum ve a ni.

SPEAKER : Zawhbelhna zawt turin—

1. Pu C. Ngunlianchunga, (Zawhna neitu)
2. Pu Lalmuanpuia Punte,
3. Pu R. Rohmingliana.

PU C. NGUNLIANCHUNGA: Pu Speaker, ka *Zawhbelhna* chu –

- i) ‘Sawhthing man hi pek kim a ni tawh em?’ tih a ni a. Mi ka’n zawh ve ah chuan, ‘kar hnih chuang kan pawisa a larawn lut lo’ tih te a ni a.
- ii) Sawhthing neitute account a thun tur nge ni a, mi dang society te account-a thun sak tur zawk? Sawhthing neitute account number kha lak vek a ni si a.
- iii) Sawhthing thunna tur buara-ip kha, sorkar hmasa lama kan House Leader khan, “kan lei sak vek; kan tum sak vek” tih kha a sawi a. A hnu ah thingtlang atangin phone call te kan dawng ve a. Pu V. Malsawmtluanga bial Lunglei North, Haulawng bawr vela khaw thenkhatah chuan ip khat 10/- te, 20/- tea leitir te a awm a. Khang an lo leitir tak sawhthing neitute hnenah khan sorkar hian an lo leina kha a pe let leh thei ang em?
- iv) Sorkarin sawthing a leina kg-ah engzah nge? Cheng engzahin nge a hralh chhuah leh? Pu Speaker, ka lawm e.

PU LALMUANPUIA PUNTE: Pu Speaker, ka lawm e, waviinniah hei, ka diar khim hi *Mara hnam* diar a ni a. Palak bialtu zahawm tak Pu K. Hrahmo min present hi a ni nghe nghe a ni. Ka zawhbelhna chu – “Hmunphiah hralh leh lei chungchangah hian harsatna a awm em?” tih a ni e.

PU R. ROHMINGLIANA: Pu Speaker, collection centre hi a dah tam theih deuh ang em? Ka zawhna chhan chu, bial thenkhatah chuan collection centre a tlem em em a, kawng a chhe si a, collection centre-a phurh thlen a harsa em em a, motor a tlem bawk si nen.

SPEAKER : Chhang turin, Agriculture & Farmers’ Welfare Department changtu Minister Pu PC Vanlalruat ilo sawm ang.

PU PC VANLALRUATA, MINISTER: Pu Speaker, zawhna neitu Member zahawm tak, Pu Nguna zawhna kha - Sawhthing kan han buk chin eng emaw zat hi chu a man ni 7 chhungin pek vek a ni a. Amaherawhchu, secondary collection centre ah tunah hian sawhthing eng emaw zat buk tawh si, mahse, a invoice kan ti mai a, (Sawhthing secondary collection centre-a kan va buk khan felfai taka record-a lo vawn a ni a, chung an record vawnte chu District Agriculture Marketing Committee folder ah upload tur a ni) khatiang kha kan naute thenkhatin upload loh an la nei a, chu chu nimin piah khan a rang thei ang bera upload turin kan ti a, an upload zo thawkhatin kan hria a. Chuvang chuan, tuna sawhthing lei tawhna a man la pek lohte hi tun ni hnih-khat chhung hian a lut mai turah kan ngai a ni. A pek dan tur kha a inang lova. bul kan han tan a, tun tum hi tuilet hnuh Mizoram-a thil thleng vawikhat ve na a ni a, a buaithlak khawp mai a. Sawhthing kan buaipui a, kan farmers te hi *regulated market*-a luhpui kan tum avangin tunah hian society 600 chuang kan nei tawh a, heng society kan neih te hi account lo nei turin kan inzirtir mawlh mawlh a, amaherawhchu, inzirtir theih loh chin pawh kan nei a ni, tunah hian.

Chuvang chuan, payment reng reng hi Nakina sorkar a inrawlh loh hunah pawh he payment mode engkim hi *direct benefit transfer*-a kalpui hi kan duh avangin tun atang hian kan inzirtir chho a. Chu chuan thil eng emaw harsatna min la thlen palha a neitute account-a a luh vek thei lo lai a la awm a; a luh loh pawhin anmahni society account ah khan a lut ta thin a ni.

Mess-bag chungchang hi sawi thui deuh hlek a ngai a, Speaker. Kan hriat theuh angin kalphung-thar sorkar chuan kut-hnathawktute thlaithar *notified crop* pali-ah support prize in kan kalpui ang kan ti a. Chumi kal zel chuan support prize a luhpui kan tum avangin, tunah hian sawhthing man India ramah a hniam lutuk avangin a sang hlei thei si lova, sorkar ang pawhin kan mangang ve a ni. Chuvang chuan, support prize-a wawi lehkhata kan luhpui dawn chuan sumdawng ho an rawn lut tha duh lo ang a, a rate an rawn tihnam dawn lutuk a. Chuvang chuan, sorkarin helaiah hian support prize pe thei reng mah ila kan farmer ten cheng 50/- ai tova an hralh theih beiseina avangin, buffer stock an ti a, kan *supply chain*-a kha tlemin i hnuk muang deuh ang kan ti a ni.

Chuvang chuan, February Ni 20 atangin sorkarin sawhthing kan lei ang kan ti a; sorkar hian sawhthing hi lei tak tak kan tum lo a ni, kan policy ah chuan. Support prize-a luhpui kan tum a, support prize-a luhpui kan tum avang khan sorkar hi chuti lutuka inrawlh lovin support prize-ah chiah kan inrawlh ang kan ti a. Amaherawhchu, kuminah India ramah sawhthing rate a tlakhniam tak em avangin, loh theih lohvin sorkar kan inrawlh a ngai ta a. Tunah hian kut-hnathawktute hnenah cheng 50/-in sorkarin sawhthing a lei ta a ni. ‘Sorkarin a lei’ kan tih chuan, support prize pe nghalin, a man a pe nghal tihna anih chu.

Tichuan, tunah hian kan entrepreneur te leh kan marketing Committee ten auction te an siam a, India ram hmun hrang hrangah an auction a. Tunah hian an rawn chhang mek a, 1000 metric tonn, 500 metric tonn, 300 metric tonn duh te, a inang lova, an duh zat pawh kha. Chutianga chuan tunah hian sorkarin auction a kalpui rih a ni. Chutianga kan tih taka vang chuan, sawhthing reng reng hi a leitu reng reng, vai sumdawng pawhin lei se, a bag an intum thin a ni. Keini pawhin kan lak lai chuan bag kan chah khawm a, kan sem kual thin a. Sorkar buyer-a kan tan tak avang khan keini pawhin mesh bag hi 10/- in kan lei a, (ka hriatsual loh chuan) kha kha kan sem ta a ni. Kan sem dan pawh hi hun a lo kal chho ang a, March thla tawp ‘April thla te a lo kai chuan sawhthing rate pawh India ramah a lo tha ve ang a’ tih beiseina avangin kan sawhthing chawh tur te kan bituk a ni, kan Society

hrang hrang kha. Secondary collection centre area pakhtah Primary Society 5 an awm chuan, nangniin quintal chuti zat in cho ang' tia rotation siamin tunah hian kan kalpui mek a ni. Tunah hian kan buffer stock Sairang ah leh kan secondary collection centre ah te a lo khah tak avangin tunah hian a chawh lam pawh muang deuh turin kan inhrilh mek a ni.

Tunah hian sawhthing hi sorkarin kg ah 50/- in a lei a, a hralh chhuah rate erawh chu a inang ta lo a ni. Tunah hian sorkarin support price pek kan tum ang ngei khan a thenah a leitute khan 35/-in an chhang a, a thenah 30/- te, 27/- tein; a hralh chhuahna rate kha a inang ta lo a ni. 30/- a kan lo hralh chhuak anih chuan, sorkarin support price 20/- a pe tihna a ni mai a, 27/-a hralh chhuah a nih chuan, 23/- support price a pe tihnaah kan ngai mai a, 25/-a hralh chhuah a nih chuan, 25/- support price a pe tihnaah kan ngai leh mai a. Chuvang chuan, a rate kha a inrual khera kha tha kan ti chuang lo a, sorkarin support price a pe ah kan ngai mai a ni. Chutiang chuan kan kalpui a ni.

Tunah hian kan buffer stock te, kan secondary collection centre te hi a rang thei ang bera dispose kan tum a, kan zuar kual mek a. Saitual-ah chuan an stock zawng zawng te 'cheng chuti zat chuan kan rawn la ang' ti te pawh an awm a, an lo kal dawn mek a. Khatiang khan kan han hralh ruak ang a, a ruahna apiangah khan auction kan kal pui zel ang a, farmer ten an cho zel ang.

Kan farmers te hlauthawng taka an awm laiin, hlauthawng lo te pawh an awm a ni. A chhan chu, sawhthing lo cho thang hi chuan a to hun an nghak thiam khawp mai a. Mahse, kuminah 'ZPM-sorkarin sawhthing an lei dawn' an ti a, kan kut-hnathawktute an phur a, nikuma kan thar chhuah let 4 dawn lai hi kuminah hian tharchhuah kan beisei a ni. Chutiang chuan, production a lo pung ta thut mai a, chu chuan harsatna te pawh min thlen ve bawk a ni. Mi-thar sawhthing la ching ngai lo ten an chin khan, sawhthing chawh thuai thuai an nghakhlel a, chu chuan tlemin min tibuai lek lek a. Mahse, kan han ti chho a, kan in-control thei turah kan ngai a. India ramah pawh sawhthing rate nitin.... (*interruption*)

PU C. NGUNLIANCHUNGA: Pu Speaker, ka zawhna - mesh bag 'a thlawnin kan pe' tih a ni si a, khaw thenkhatah an leitir a, a thenah 10/- te, 12/- te in an lei a. Sawi kual teuh lovin, ka zawhna kha min chhang mai se la. Mesg bag leitute khan an hmu let leh thei ang em?

PC VANLALRUATA, MINISTER: Kan sawi tak ang khan mesh bag hi tunah chuan sorkar hi buyer-a kan tan avangin, a thlawnin kan sem rih a ni. Chutih lai chuan, khawi emaw laiah vai-sumdawng thenkhatte pawh an lut ve tho a, vai-sumdawng agent tu, tute emaw pawh Tlabung, khulam Bangladesh lama hralh tur te, Tripura lama hralh tur te pawh an lut ve tho a ni. Khang hote khan a thenah chuan an lo ti mai thei a. Keimahni, sorkarin hma kan lakna chinah chuan a thlawn vekin kan pe a ni.

PU C. NGUNLIANCHUNGA: Pu Speaker, khawngaih takin, khami lai taka kha a nia kan zawh laia kha. Sorkarin a leiah khan a ip kha an leitir ta a, an lei tawha kha an pe let leh thei ang em?

PC VANLALRUATA, MINISTER: Sorkarin kan lei chinah chuan a thlawnin kan pe vek.

SPEAKER : 'Sorkarin a lei tir lo' a ti a nih kha, Minister khan.

PU C. NGUNLIANCHUNGA: Pu Speaker, min hrilh dan chuan, sorkarin a lei chuta tang chuan Haulawng leh a chheh velah khaw thenkhatah 10/-in an lei a, sorkar hralh tho a kha, thenkhatin 12/-in. Kha kha a ni ka zawhna chu.

PU V. MALSAWMTLUANGA: Pu Speaker, kha kha ka bial chhung a ni a, sorkar hmalakna chinah chuan khatiang a awm awm ka hre lo a ni.

PC VANLALRUATA, MINISTER: Kan hriatpui chinah chuan a awm lova, kan hriatpui loh chinah chuan a awm thei tho a ni, sawi tawh ang deuh khan. In lo ngaithla fuh ang chu maw.

Member zahawm tak, Pu Lalmuanpuia Punte khan ‘hmunphiah hralh leh lei chungchangah harsatna a awm em’ a ti a. Hmunphiah hi kan sorkarin chuan Grade A - 100/-, Grade B - 80/- kan ti a, a ro a ni. Hemi kan tih chhan pawh hi, a hma kum eng emaw zat atang tawh khan hmunphiah research team te’n uluk takin an survey a, hmunphiah market ngun takin an zir Chiang a ni. Chuvangin, an vai duh dan ang hian Grade A leh B an thliar theih chuan, Grade A - 100/-, Grade B - 80 /-a ni chuan, sorkar tan chuan, ‘kuthnathawktu ten hei aia to hian an hralh thei ang a’ tih kha a ni. Chumi ngaihtuahna atanga lo chhuak chu a ni a. Amaherawhchu, kan sawi tawh fo angin, kan kut-hnathawktute hi mi-harsa ve te-te, hmunphiah pawh pho ro hman lo khawpa sum leh pai dinhmun chhiate annih avangin, kan hmunphiah chingtu leh kektu tam zawk hian a hringa hralh an duh thin a ni. A ro kha keiniin kan lo sawi tawh si a; a hring kan sawi ta si lo kha, kan farmers te an hmanhmawh thin em avang leh hmunphiah pho ro hi thil namai a ni lo a, hmun zau tha te neih a ngaih avangin, hmunphiah pho ro hi mi nazawng tih chi a nih loh avangin, a hringin an hralh thin a.

Chumi a nih avang chuan a rate pawh khawi lai hmun hmunah emaw chuan ‘ZPM-sorkar avangin hmunphiah rate a chhe vek’ tih pawh kan dawng a ni, social media-ah te pawh kan lo hmu a. Amaherawhchu, hei hi a ni lem lo a ni. Farmers te hian Grade A leh B hian lo thliar thei sela chuan, India rama hmunphiaha sumdawng lian kum 70-80 lo sumdawng tawh te pawh kan ko lut a ni. ‘India ramah Mizoram hmunphiah a tha ber no. 1’ an ti lawm lawm a ni. Amaherawhchu, an duh anga kan la tih theih loh avangin, kan neih ang zat pawh hi an lei zo vek duh a ni. Amaherawhchu, farmers te ah hi inzirtir kan la ngai a, kuminah hian inzirtirna pawh kal chhohpui kan tum leh a. Grading tha tak kan neih theih chuan kan hmunphiah quality hi a tha tawh a, kan induh thei a ni; a buyers te lakah pawh hian kan hawi ve larh larh thei a ni.

Chuti khawpa hmunphiah quality tha kan nei hi develop kan tum a, tuna kan kalphungah hi chuan kan la fail deuh hlek a, kan farmer te pawh kan in zirtir a. Chuting a nih tak avang chuan, ‘empanel buyers’ kan tihte khan kan farmers te leh kan society te hnenah an va kal a, ‘in Grade A tih leh kan Grade A tih a inang lo,’ an to ti leh thin a ni. Chuvang chuan, kan society ho pawh kha an mangang a, buyers te khan kan society te hnenah khan an Grade A tih a inan tak loh avang khan tlemin buaina awm a, chuvang chuan, ‘ngaihtuahna thar i hmang ang u,’ kan ti a. Tunah hian hmunphiah hi March thla chhung hian, January leh February-a keh zawng zawng hi sorkarin grading lovin, ungrade 80/-in ZOHANCO Corporation kaltlangin kan lei mek a. Hmunphiah collection centre hi hmun 7 - Tlabung, Phairuankai, Marpara, West Phaileng, Saipum, Vairengte leh Sakawrdai ah te dah a ni a.

Kan Opposition Leader bial Sakawrdai ah hian kan dah lo zet a, tun hnai mai khan khilamah hmunphiah kan han survey a, a lo la tam avangin Sakawrdai ah kan dah thar leh a ni. Tunah hian kg ah 80/-in an buk mek a. A dik tak chuan, kan farmers te hian tlema lo nghah hret hi an thei lo ve bawk a ni. Hmun tam takah chuan 60/-in an lo hralh a, 80/-a kan han lei leh takah hian an ui leh hnuhnawh a, sorkar kha lo nghak ila tha tur' te pawh an ti ve a ni. Kan farmers te hi a lehlamah chuan an dinhmun a chhiat avangin kan khawngaih a, kumin atang hi chuan fel fai takin ruahmanna kan siam a, training pawh pek kan tum a ni. Chu chu kan kalpui dan tur a ni e.

Tin, Member zahawm tak Er. Rohmingliana zawhna - collection center dahbelh chungchang kha, Society te kan han din a, a hnuah a khaikhawm tur secondary collection centre an siam leh a, chutah chuan cluster society kan dah leh ta a ni. Tunah hian sawhthing kan han tikhawm a, Tarpho khi secondary collection centre-ah kan dah a ni. An han bun khawm a, mahse sawhthing load tak tak tur chuan truck lian a lo ngai a, Tarpho-ah khan truck lian a lo lut thei si lova, kan mangang ta a ni. **(Pu Lalchhandama Ralte, Opp. Leader:** Pu Speaker, wawiinah a demand kan sawi dawn tho a. Tin, zawhna dawt leh pawh kan Agriculture Minister zawhna tho niin ka hria a; titawi deuh sela a tha awm mang e.)

Aw le, a tawi deuhin kan chhang ang e. Collection centre hi dah belh chungchangah khan, Tarpho-a secondary collection centre pawh hmanni lawk khan kan cancel a ni. A chhan chu, sawhthing an lo buk a, an lo dah khawm a, truck lian a lo lut thei si lo a, kan buai ta der a ni, keimahni zawk kha. Primary collection centre ah society-ten an lo buaipui a, secondary collection centre 62 sawhthing bika kan dah hi chu a reliable a ni. Dah belh leh ai chuan chuan a then kan cancel leh ta zawk a ni. Kan han dah khawm char char chuan truck ke 12 nei te, ke 14 neite'n an phurh a ngai si a, khatiang luh theihna khua lohah kha chuan secondary collection centre hi dah a rem lem lo a ni e. Pu Speaker, ka lawm e.

SPEAKER : A lawmawm e. Demand sawi hun ami tur a sawi zawh mai kha a hlauhawm lek lek mai a. A tui a, kan Minister hi.

Starred Question No. 124: Thlathar lei chungchang.
Zawhna Neitu: Pu H. Lalzirliana, mamit Bialtu.

PU H. LALZIRLIANA: Pu Speaker, Starred Question No. 124, Agriculture Minister zahawm tak chhan atan –

- a) Thlai thar leina tur pawisa hi kumin Financial Year 2024-2025 chhunga hman tur engzat nge sorkar-in a ruahman? Hetah hian 'D-A-H' kan tih kha engzah chiah nge?
- b) Aieng hi engtik atanga lei tan turin nge sorkarin a ruahman?
- c) Aieng hring hi sorkarin a lei ve dawn em?

SPEAKER : Chhang turin Agriculture & Farmers' Welfare Department changtu Minister zahawm tak Pu PC Vanlalruata ilo sawm ang.

PU PC VANLALRUATA, MINISTER: Pu Speaker, Starred Question No. 124 chhanna chu –

- a) Thlai thar leina tur pawisa hi kumin Financial Year 2024-2025 chhung hian ruahmanna hran siam a ni lo. A chhan chu Financial Year 2023-2024 kum tawp dawnah ₹110/- crore dah kha hman zawh a la nih loh vang a ni.

- b) Sorkarin aieng hi a tharchhuaktuten a sawngbawltute (entrepreneur/processor) hnena an hralh theih hun atan January-May 2025 inkar hi a ruahman a ni.
- c) A chingtuten an aieng hring hi a sawngbawltu (entrepreneur/processor) hnena kg ah ₹20/- a an hralh theihna turin ruahmanna a siam a, a tul chuan support price a pe ang. Helai hi kan siam danah chuan ₹15/- in processor-ten an lei ang a, ₹5/-in sorkarin farmer-te hnenah a pe ve ang.

SPEAKER : *Zawhbelhna* -

1. Pu H. Lalzirliana, (Zawhna neitu)
2. Pu T. Lalhlimpua,
3. Pu Lalchhandama Ralte,
4. Pu VL Zaithanzama.

PU H. LALZIRLIANA: Pu Speaker, ka zawhbelhna te chu:

- i) 2023-2024 a vaibelchhe 110 awm tuna rin chhoh mek hi, heta tang hian engzahnge hman a nih tawh?
- ii) Tun kum thar tur 2025-2026 ah hian thlaithar leina tur bik pawisa hi dah a awm em? Vaibelchhe 350 *Bana-kaih* atanga pawh pen mai tur nge, a pumpui atanga nakina la pek zawk tur?
- ii) Heng thlaithar 4 (pali) teah hian tunah chuan hmarchate hi chu buaipui ngai em em lo anih hmel a; hengte hi sorkar kum a lo thar chhoh chuan thlai thar dang, entirnan iskut te, khawtlang lamin kan han thar chhuah tam ve chhun kuhva te, oil palm tih vel te hi support price pek ve tumna a awm em? tihte a ni e.

PU T. LALHLIMPUA: Pu Speaker, ka lawm e. Agriculture & Farmers' Welfare Minister Pu PC Vanlalruata hnena ka zawhbelhna chu - Mission Organic Value Change for North East Region (MOVCNER) hmar chhak ramtea organic thlai lama Central sorkar hmalakna awm mek phase IV-ah hian Mizoram sorkar hian hmalakna a nei ve em? Hmalakna a neih chuan, hemi hnuaiyah hian eng thlaite nge kan chin ve?

PU LALCHHANDAMA RALTE, OPP. LEADER: Pu Speaker, ka lawm e. Ka zawhbelhna chu:

- i) Kan sorkar lai hian thlai thar leitur 4 (pali) an thlan tharte hi 'mithiamte research base vekin engkim kan ruahman e' an ti a. Vawiiinah research base boruak kan han hria a. Tarpho-a sawhthing collection centre-ah a phurtu tur truck leng lo tih hriat a ni lo kha, an research kha a hlawhchhamah an ngai em?
- ii) Sawhthing te, hmunphiah te a lei hun tur January - March tih te, January - May tih te a ni a. Hmunphiah hi January leh February thlaah lei/seng a ni tlangpui a, seng zawh vek hnuah March-ah lei an tum chauh mai hi, reseach base hlawhchhamna niah an pawm em? Research base-a an tihah khan Mizoram-a hmunphiah hi a tlangpuiin a hring veka hralh thin a ni tih hre reng chung a roa lei an tum tlat hi, research base-ah khan engnge an hmuhchhuah? Khatiang kha engnge a awmzia?

PU VL ZAITHANZAMA: Pu Speaker, ka lawm e. Agriculture & Farmers' Welfare Minister zahawm tak chhan atan ka zawhna chu – notified crop zingah hmarcha hralh kawngah harsatna a awm em?

SPEAKER : Aw le, a theih ang anga chhang turin kan Minister zahawm tak ilo sawm ang.

PU PC VANLALRUATA, MINISTER: Pu Speaker, zawhna neitu Pu Zira zawhna kha, kum 2023-2024-a crore ₹110/- dah atangin crore 28/- kan hman chu ka hria a. A bak kan hman zel kha sorkar account atangin Marketing Board-ah minrawn pek tawh avangin, kha kha chu nitinin DMC lamah an transfer a. Khalai a figure tak kha chu darkar tina danglam anih avangin, tun dinhmunah chuan ka chhang thei mai lo a.

Kum 2025-2026-ah thlaithar leina tur dah chungchang hi, tuna ₹110/- crore kan corpus fund-a kan dah hi market assurance fund tur a ni a. Chu chu la hman loh anih avangin, kum 2024-2025-ah kan dah lo chungkhan tunah hian kan hmang mek a ni a, chuang chuan, helaiyah hian dah ngai loah kan ngai a. Kum tharah chuan sorkar a inbuatsaih chho ang a, hand-holding policy-a ₹350/- crore pawh kha kan mamawhna a zir zelin la pawh pen theih a ni a. ZPM sorkar hi chuan *khawnpui* kan la nei ve lo a ni, a pangngai ang chuan. Amaherawh chu, kan budget hi sorkarin a mamawh ang zelin kan hand-holding policy pawh hi kan hmang thei dawn a ni.

SPEAKER : *Zawhna leh Chhanna* hun a tawp a. Kan Minister hi kan chhan zawh tir law law dawn nge? (*House-in chhan zawh tir a remti a.*) Aw le, chhunzawm rawh le.

PU PC VANLALRUATA, MINISTER: Pu Speaker, thlaithar dang Iskut, oil palm leh kuhva tana support price chungchangah hian, hmanni lawk khan Sihphir-ah iskut growers te nen kan inkawm a, engvangin nge Sihphir ah hian iskut hi a rem tak duak, tih te ngaihtuahna ah chuan a awm a. ‘Mission Foundation Movement’ an ti a, Pu R. Vanlalzauva te hian an lo buaipui tan a lo ni a; chungah pawh chuan ka han telpui a. Kan iskut tharchhuah a tlak hniamna chhan chu, a tam hriin a lo bawm ni awm tak a ni a, a zik a vial te an ti a. Heng te pawh hi Agriculture Department-in kan buaipui chho ang a, iskut production pawh a pung chho turah ngai ila.

Kuhva-ah hian harsatna kan tawk a, oil palm pawh a rate tunah a lo sang chho a, kan buai vak lova. Thlai thar pali ‘notified crops’ kan tih bikte hi kan farmers ten an buaipui a, a chingtu tam avanga buaina kan nei kha a ni a. Chutiang anih avang chuan, tunah hian sawngbawlina tur hmun 3 ah sorkarin a buaipui mek a. Kuhva pawh a rate a that chhoh chuan, sorkarin buaipui ngai lovin a awm theih kan beisei a ni.

Tichuan, Member zahawm tak Pu T. Lalhlimpua zawhna kha, tunah hian MOVCNER phase-4 ah hian hma kan la mek a, service providers 3 thlangin, FPO 11 nen district hrang hrangah kan kalpui a. Chutah chuan mizo-hmarcha, sawhthing, aieng, lakhuihthei leh sapthei te kalpui mek a ni.

Tichuan, Pu Chhantea zawhna reserch-base chungchang kha, research base kan tih khan helama collection centre pawh kha kan va ngaihtuah tawh chuang lova, a market zawk – ‘engtin nge kan hralh ang; kut-hnathawktute’n harsatna an tawk em’ tih lai kha research-base kan tih zawk chu a ni a. A collection centre kha chu marketing board-in kan lo ruahman ve mai mai a ni e. Hmunphiah keh hun chungchanga a zawhna kha chu, a keh hun kha kan hre teh meuh mai a, January - February ami kha grade-in kan then ang kan tih kha. A chhan chu, Hmunphiah hi a tlangpui thuin vai-sumdawng chuan a par hma, a no an

duh a ni. Chuvang chuan, January a keh hi a tha tlangpui ber a, February-ah pawh ni 20th thleng hi chu a la tha turah kan ngai a ni. Chutiang anih avang chuan, January -February thlaa kehte leitu tur *empanelled bale* kan siam a. Amaherawh chu kan empanelled bale siam te leh kan society grade chungchangah inhmuh thiamlohna a awm avangin, tunah hian sorkarin ungrade-in, an lo lak khawm tawh te pawh March thla chhunga lei zawh vek kan tum a ni.

Tichuan, ‘a hringa hralh thin a ni’ tih research base-in a hriat leh kan hriatloh chungchanga a zawhna kha, kan researchers te hian an hre teh meuh mai a. Amaherawh chu, harsatna an tawh lai ber chu, *bargaining-power* lai hi a ni a. Hmunphiahrawn latute hian an nei sang lutuk hi kan kut-hnathawktute hian an tlin lo tih chu kan hria a. Amaherawhchu, a hring zel chuan tihngaihna a awm lo, kan farmer te an rethei lutuk a ni. Kan farmers ten a phona hmun tur an nei lo a, khalai va control vak kha chu kan tan a buaithlak ve deuh a ni. Chuvang chuan, khatiing khan a hmawr kan bawk ta a ni, Pu Speaker.

LAYING OF PAPERS

SPEAKER : Tunah chuan, *Laying of Paper* ah kan kal ang a.

Heng Member zahawmtakte hian House Dawhkanah an paper-te an rawn lay a -

1. **Pu F. Rodingliana**, Minister zahawm takin - The Electricity Regulatory Commission (Renewable Purchase Obligation and its Compliance) Regulations, 2024;
2. **Pi Baryl Vanneihsang**, kan Member zahawm tak leh Subject Committee-V Chairman ni bawkin heng –
 - i) Statement on Actions Taken by the Government on the Further Recommendations of Subject Committee-V contained in the 1st Report, 2024 relating to Mizoram Building & Other Construction Workers’ Welfare Board under Labour, Employment, Skill Development & Entrepreneurship Department.
 - ii) Statement on Actions Taken by the Government on the Further Recommendations of Subject Committee-V contained in the 2nd Report, 2024 relating to Land Revenue & Settlement Department.

(Memberte hnenah a copy sem a ni a.)

SPEAKER : A lawmawm e. A copy te sem chhungin - nichin khan kan member thenkhatte an absent emaw ka han tih zeuh kha, NeVA khawlam lo fel loh palh vang a ni a, an rawn tifel tawh turah ka ngai a. Ka lo hriat fuh lohnaah ngaihdam ka’n dil nghal a. Tun hnu-ah chuan kan lo fimkhur leh zual dawn nia.

Kan House Leader hi vawiin ni-ah kan zingah a awm lo a. Union Home Minister-in thil tul pawimawhah Delhi a kal turin a sawm a; vawiina chhuaka naktukah meeting nei tur a ni a. Kha kha memberte hriatah ka’n sawi ni se.

FINANCIAL BUSINESS

Tunah chuan, Financial Business-ah kan kal ang a. Vawiin hian Minister zahawmtak takte pahnih - Pu K. Sapdanga leh Pu PC Vanlalruata te demand kan sawiho ang a, pass nghal kan tum dawn a ni. Hun kaltaa kan lo tih thin angin, minister pahnihte demand hi a rualin

kan la ang a. Tunah Minister zahawm tak Pu K. Sapdanga House-ah a demand-te rawn lay turin kan sawm e –

PU K. SAPDANGA, MINISTER: Pu Speaker, Governor of Mizoram leh i phalnain, heng –

<i>Demand No.</i>	<i>Department</i>	<i>Amount in ₹</i>
13	Personnel & Administrative Reforms	4,35,05,000.00
16	Home	8,60,76,50,000.00
30	Disaster Management & Rehabilitation	78,37,31,000.00
46	Urban Development & Poverty Alleviation	3,30,25,94,000.00
TOTAL		12,73,74,80,000.00

Kum 2025-2026 chhunga heng ka Department chante inrelbawlinaa hman atan he House zahawm takah hian ka rawn submit a, sawiho atan ka rawn move nghal e. Ka lawm e.

SPEAKER : A lawmawm e. Tunah chuan Minister zahawm tak Pu PC Vanlalruata'n House-ah a Demand-te lay turin kan sawm e.

PU PC VANLALRUATA, MINISTER: Pu Speaker, Governor of Mizoram recommendation leh i phalnain, heng –

<i>Demand No.</i>	<i>Purpose</i>	<i>Amount in ₹</i>
31	Agriculture & Farmers' Welfare	1,91,10,70,000.00
37	Co-operation	17,77,24,000.00
47	Irrigation & Water Resources	91,26,70,000.00
TOTAL		3,00,14,64,000.00

Kum 2025-2026 chhunga heng ka Department chante inrelbawlinaa hman atan he House zahawm takah hian ka rawn pharh a, sawiho turin ka rawn move nghal e. Ka lawm e.

SPEAKER : A lawmawm e. Tikhan, kan Minister zahawm takte'n an Demand-te an rawn submit ta a, sawihona kan nei tan dawn ang a. Member pakhat tan hun engtia rei nge kan inpek ang le? (*House-in minute 10 tha a ti a.*) Minutes 8 ah warning bell ka rawn ti ri ang a, tichuan, 10 minutes-ah khung len hram kan tum dawn nia.

Tunge han sawi hmasa ang le? Aw le, Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, vawiinah kan Minister zahawm tak takte Demand sawihona hun kan nei hi a lawmawm ka ti a. Pakhatnaa ka sawi duh chu - Home Department hi a ni a.

Demand No. 16 - Home Department:

Kan hriat theuh angin Police-te kan indaih lo a. Kan Minister hnen atang pawha kan ngaihthlak angin post fill-up loh ringawt pawh 4000 (sang li) chuang a awm tih te kan hria a. Tu Sorkar pawh ni sela, he laia sorkar hmasa lam indem vak vak ang chi hi ti lo deuh a ila tha ka ti a. A House Leader ber atang pawh hian kan inhlum vak vak mai hi, hei hi rorelna atan a tha ber em le? Eng emaw thu inchuha han inhnial chang deuh te pawh a

awm ang a, nupa karah pawh a awm thin a. Chuti ni lova a englai mai pawha sorkar han demna tawngkam te House Leader ber tan phei chuan a fel lovin ka hria a ni. Hemi chungchangah hian tuna kan House kalphung-thar practice hi tha lo riaua hriatna ka nei a. Hei, Home Minister zahawm tak hi a patling a. A demand kan sawi ni a ni bawk a, helam atang hian keini chuan kan rawn vawm bawrh-bawrh che u ang a, nangni khan inlo tuai darh dawn alawm; inlo ti nem ang a.

Heng kawngah hian kan hotu hmasate an fakawm ka ti thin a. A bik takin sorkar liam taa Pu Zoramthanga kha a ropui ka ti thin. Helam atangin kan vawm bawrh-bawrh a, nuihza nen, House hlim takin min chawh thin a. Khatiang tur anih laiin, opposition lam ang ziazanga ruling atanga rawn tih vak vak thina hi chu a nalh chiah lo a. Khalamah khan kan lo thu ve tawh a, keini pawh. Opposition lamin an rawn ti a, opposition te pawm dam dan tur te pawh kan lo ngaihtuah ve ngai a. Min rawn pir let sak-sak thin laia hi; a sorkar neitu zawk kan nihna hi kan hriatthiam fo a thain ka hria a. (**Speaker:** Khai le, demand lamah i lut dawn ang aw..) Demand chung tho anih chu, Pu Speaker. Nangmah ang hian cool dap vek sela, Pu Speaker, a tha lehzual tur a ni a.

Home Department-ah hian, abik takin Governor thusawia *Motion of Thanks* kan sawi tumah te pawh khan sawilan a ni tawh a. Keini lam hi international border area-a awm te kan nih hlawm avangin, ruihhlo te a tam em em mai a. Saisihchhuah, Sangau police station hnuai a awmah sawn mi an zalen hle a; mi tha tam tak an lo luh laiin, mi thalote pawh an lo lut a ve bawk a. Chung avang chuan, Sangau police station hi tih changtluna, a thawktute pawh tam deuh zawk dah ni thei se. Tin, Saisihchhuah ah beat-post kan dah thei lo anih pawhin, transit-camp emaw tal dah theih ni sela. Khatiang duty an lo awm na na na chuan, a lo ziaawm ve turah ka ngai a.

Tin, Archhuangkai hi Burma ram nena inkalpawhna hnai te, kawng awlsam tak a ni a. Hei hi Bualpui police station hnuai a awm nge a nih ka hre chiah lova, Bualpui 'NG' area chung a ni a. Helai te pawh khi ngaihpawimawh a tha khawp mai a. SASCI lam atangin pawisa te pawh kan hmu mek zel a, tun kan budget session lai pawhin pawisa te pawh a lo thlen belh chur chur niin Finance Minister hnen atang te pawhin kan hria a. He kan sorkar hian Home Department hnuai a kan police-te thumthatna atan hian sum dan tam deuh thei sela.

Tin, Lawngtlai ah IR 3rd Battalion headquarters a awm a, aan khawngaih thlak khawp mai a. An kalkawng te pawh waviin thlengin black-topping a la ni lova, furah phei chuan innam kal a ngai a ni. Zawnhaah te pawh khan ka zawt a, a la chhuak lo chu a ni a. Battalion Headquarters leh National Highway inkar hi thui a ni lova, ka hriat danin ram neitute nen eng emaw intih fellohna, harsatna a awm ni awm tak a ni a. Hei hi kan Home Minister chak tak hian tuna SASCI sum remchang hmang hian siamfel dan kawng awm sela. Rikrum thilah pawh police ho tan pawh buaithlakna chin a awm tlat. Hei hi ngaihpawimawh zingah awm sela, Battalion headquarters hmun hi tih kha.

Tin, Bungtlang te, Vaseikai te, Zochachhuah te, Vathuampui te hian, kan Home Minister hnenah hian beat-post emaw, outpost emaw an dil a. Kan Hmome Minister pawhin polite takin, 'kan lo zirchiang ang a, tih hlawhtlin kan tum dawn nia' ti te pawhin a lo chhang ni tur a ni. Vathuampui leh Zochachhuah te hi a pawimawh khawp mai a. Zachachhuah hi kan sawi tawh angin hei 'KMMTP Road' kan tih, Myanmar nena kan inkalpawhna kawngpui eng emaw chen kaltlang tawh, hmun pawimawh tak a ni a. =

Demand No. 30 - Disaster Management & Rehabilitation:

Tin, Disaster, Management & Rehabilitation department-ah hi tun hmaa ka lo enkawl ve tawh department a ni a. Ka enkawl lai khan GRF fund crore 18 kan hmu a. Tunah hian crore 50 chuang an hmuh tawh niin ka hria a, an lawmpuiawm pawh ka ti khawp mai. Lawngtlai ah khian leimin kumhlun kan nei a. District Council-a kan awm ve lai khan 'Upgradation of Lawngtlai town' tih hmangin kawrpuihah check-dam te kan siam a, a zia viau a. Amaherawhchu, hun a lo kal rei a, tunah hian Lawngtlai-III kawngpui, national highway pawh a kak leh ruah tawh a. Heng te pawh hi ngaih pawimawh ni thei se; a veng chima chim thei mai tur a ni a.

Tin, Siaha bialtu a awm lova, ka'n sawi kep mai ang a. Siaha New Colony veng mawngah lei che a awm avangin inte pawh a then chu a zatve bun ngai te a ni a. Hei pawh hi ngaih pawimawh a tha khawp mai. Tin, KMMTP Road, AOC - Zochachhuah kawng AOC petrol pump piah lawka kawng laihna avangin leimin nasa tak a awm a. A chungga Civil Hospital awm tan pawh hlauhawm thei dinhmunah a ding a. A hming deuh chauhvinn tunah khian retaining wall siam a ni a. Helai te pawh hi sum kan hmuh tamna a ni deuh bawkn nen Pu Speaker, dah ni se tha ka ti a.

Demand No. 46 - Urban Development & Poverty Alleviation:

Tin, Urban Development & Poverty Alleviation-ah hian Lawngtlai lam hi Congress sorkar lai khan a ngaipawimawh a. Khawpui chung kawngte zauh a ni a, nala-te an sorkarin a siam a, hmasawna tam tak kan hmu a; MNF sorkar kal ta khan a ngaihthah deuh em aw kan ti a. Lawngtlai khawpui hi chhan ngai leh 1995-ah vela leimin na taka tuar tawhte kan nih avangin, UD&PA lam hian min hriatsak ve deuh a va tha em.

Demand No. 31 - Agriculture & Farmers' Welfare:

Tin, Agriculture & Farmers' Welfare Deptt. hi chawhma lamah kan inzawt a, sawhthing bag chungchang kha a bialtu, Lunglei North bialtu khan, 'a awm awm ka hre lo' a ti a. Hei, tunah ngei pawh message ka hmu a, Mualthuam te, Haulawng te, Thenzawl velah te chuan, 'kan lei a ni' an la rawn ti tlat a. A bial kha a hrechiang lo viauin ka hria. Khalai kha ngaih pawimawh a tha ka ti a.

Tin, keini Lawngtlai West bik hi WRC leilet chungchangah *potential area* dik tak kan ni a. Kan Chamdur phaizawl vel zawng zawng hi leilet atana siam a pawimawh em em a. District council-a kan awm ve lai khan central-ah project crore 58 man kan siama kha hlawhtling mai tura kan ngaih laiin, kan hlawhtling zo ta lova. Heng te hi Mizoram eibel em chu a ni thei lo ang a. Tuichawng dung te pawh kan hmang tangkai a nih chuan, a chhim lamah Phura zawl nen tangkawpin kan ei tur hi chu, buhfai vai ram atanga lo kal ngai lo hian kan tharchhuak thei mai awm mang e, tih hi mithiamte chhut dan leh ngaihdan a ni a. Heng te pawh hi ngaih pawimawh a tha khawp mai.

Pu Speaker, vawiin ah hian Agriculture Department leh Irrigation & Water Resources Deptt. hmalakna turah te pawh hian kan mamawh khawp mai a. Diltlang leh Tuichawng dunga tui pawha irrigation han siamsak chuan, leilet tha tak tak, buh thar tur an ni a. Hei, tun sorkar tharah pheichuan zo-buh te pawh kan lei niin ka hria a, zo-buh leitur tam tak a awm thei dawn a ni. Chutiang chuan, chhimlam hawi deuh hian lo kal sela; kha, Liquor-total prohibition bill chungchangah pawh khan ka sawi chhuak a.

Ni e, ‘Minister pakhat pawh min pe duh lovin, wine leh beer min zawrhsak dawn’ ka ti a, kha kha thleng ve lo se ka ti a ni. Potential area-a kan awm ang ngeiin, hmun tha tak kan neih hi irrigation emaw, agriculture-ah emaw chhim lam hawi hian lo kal thei sela, Zoram hi khairual sela. Tichuan, Zoram-a a tlak ruala buh te kan lo thar theihna tur leh, agriculture chungchang pawh ni se hma kan lak a tha hlein ka hria a.

Tin, oil palm chungchang hi a hmam ka sawi a, mi thenkhat, ‘a hriak hi thil tichhe thei a ni’ ti pawl an awmin ka hria a, kan minister pawhin a hria ang a. Hmana sorkar kal taa tung an chin kha oil tam tak produce thei a nih lai khan, a hman tangkai theihna kan la neih loh avangin ‘*thing anchhe dawng*’ an lo ti tawh bawk a; tunah hian ka bialah a tha duh em em a ni. Chutih rual chuan, a tharchhuah hralhna mumal kha awm tlat lo. Kei ngei pawhin hmun thum laiah ka siam ve a, mahse pakhatmah kan enkawl lo. (**Speaker:** Minute 2-in a pel ta e.) Chuvang chuan, keini lama oil palm te pawh ‘*anchhe dawng*’ tih ve mai tur nge ni. A tha duh a, a kau a sang si a; a rah lawh a har khawp mai a. Helai hi kan enkawl zui zel dawn a nih loh chuan tih tak tak chi zel pawh hi a ni dawn em maw ni le. A herna tur pawh *entirnan*: Lawngtlai District a potential area ah pawh bul hnai takah a phurna khawl kan dah thei anih si loh chuan; tun dinhmunah chuan Vaseikai atanga Kolasib lam daiha phurh kha a hautak lutuk. Chuvang chuan, a herna/sawrna khawl te min tih sak thei dawn lo a nih chuan, tih zui zel loh a tha aw mang e ka ti a. Khang khawlte kha min dahsak thei dawn a nih chuan, keini lam hi a dahna tur tak hmun kan ni a.

Pu Speaker, A tawpna atan chuan, sawhthing dahna tur mesh bag kha Mualthuam te, Haulawng te, Thenzawl te ah chuan ‘an lei ngei a ni’ tih kha ka han sawinawn a ni e.

PU V. MALSAWMTLUANGA: Pu Speaker, ka bial chung te kha arawn hre chiang viau mai a. Helai House-ah kan senior member a ni a, kan lo entawn thin ang kan ti a. Amaherawhchu, phone call satliah te, press-statement satliah te thu tlingah kan ngai zel dawn a nih chuan Pu Speaker, he House zahawmna hi a bo hle dawnin ka hria a. Khawngaihin, Member zahawmtak Pu Ngunlianchnunga khan engtik hunah nge.... (*interruption*)

PU LALCHHANDAMA RALTE, OPP. LEADER: Pu Speaker, kan House hian kalphung a nei a; member-in information a dawn te a sawi a. Lunglei North bialtu khan khang demand sawi hunah a duh chuan rawn sawifiah mai se. Demand sawi hunah hetiana *point of order* in tihsak tak hi chu kan ti lutuk lo deuh a. Khalai te kha inhrilhriatna atan ka han sawi lawk a nih chu. (**Pu V. Malsawmtluanga:** Pu Speaker, kan senior-te tih dan ka han la ve lawk a ni, kha kha chu.)

PU C. NGUNLIANCHUNGA: Pu Speaker, ka sawinnaah pawh khan phone call-a kan dawn a nih thu ka sawi a ni. Keiin ka hmu ka ti a ni lova. ‘*Satliah*’ tih kha press statement pawh signature nen a awm a...

PU V. MALSAWMTLUANGA: Pu Speaker, helai hmun zahawm takah hian thu tlinga rawn sawi tur atan chuan a darkar te, tu hnenah nge a kala, tu hnen atangin nge a lei tih te a sawi thei lo a nih chuan, Pu Speaker helai hmunah hian... (**Speaker:** I duh tawk ang u le. I thu ang u; i thu ang u..)

PU C. NGUNLIANCHUNGA: Pu Speaker, engpawh chu nise, House-ah thil kan lo sawi a nih pawhin, a senior emaw, a senior lo emaw pawhin document a awm a nih chuan, ‘satliah’ intihsak kha chu a mawi ber em maw ni le? Parliament practice a ni a. Tin, phone call ka dawn leh phone message ka dawn thu ka sawi mai a ni a, chu chu tunah hian en theihin a awm a. Pu Speaker, kei chu, min thlang tlingtu mipuite ka ngaihtuah chuan, ‘satliah’ ka ti lo a ni. ‘Satliah’ intihsak ringawta kha chu, Pu Speaker, a kalphung a ni dawn em maw ni le ka ti a ni.

SPEAKER : Ni e, kan inhmuhthiampui a ngai a. Helai kan member zahawmtakin a sawi kha chu information rintlak leh inngahna tlak ni chiah lova lang deuh hetia House chhunga a han lang te; ‘ram leh mipui tana rorel kan nih avangin heng thilah hian kan information source te hi rintlak leh zual ni thei se a va han tha ve,’ a tihna angah ngai ta ila.

Tin, kan member khan, ‘a phone call ka dawng e’ a ti mai a. Kha phone call kha a dik nge dik lo tih finfiah a la ni chuang lova; a dawn thu a rawn sawi ve a ni mai bawk a. Tikhan duh tawk ila a tha ang e. Tunge han sawi leh ang? Aw, Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawiinnia kan Minister chhuanawm pahnih Pu K. Sapdanga leh Pu PC Vanlalruata te demand kan sawiho tur hi a lawmawm ka ti a.

Demand No. 16 - Home Department:

A hmasa berah chuan Demand No. 16, Home Department chungchangah a changtu Minister Pu K. Sapdanga hi a chhuanawm ka ti hle a, kawng hrang hrangah theihtawp a chhuah nasa hlein ka hria a. Kan hriat theuh angin kristmas leh kumthar vuak vetah khan thahnemngaihna avangin Zoram hmun hrang hrangah nu-nau an ral muang hle ni te pawhin kan hria a. Zan rei tak taka bike tlan ring tak takte avangin duty hmun hrang hrangan an awm tih te pawh ka hria a, a lawmawm ka ti a.

Tin, he House zahawmtak kaltlang hian Mizoram Police-te chungah lawmthu han sawi ka duh bawk a. Pu Speaker, Session hmasa lamah khan Home Department hi miputen kan thlamuanpui ber anih thu leh Police kan indaihloh thu te ka lo sawi lang tawh a. Kan Chief Minister leh changtu Minster zarah tunah hian Police lak runpui kan nei thei mek te hi lawmawm ka ti a ni. Tin, Hnahtial District-ah kangthelh motor lam hi fire tender kan la neih loh avangin a buaithlak thin khawp mai a. Thla hmasa lawk pawh khan Hnahtial Electric Veng-ah in leh lo, bungrua engmah chuh hman lovin a kang ral vek a. Pu Speaker, he House zahawmtak kaltlang hian ka tawrhpuina thu pawh ka rawn sawi duh bawk a. Thla khat chhungin YMA sub-Headquarters Hnahtial hmalaknain, in kang chhungkuate khan in tha tak an nei leh nghal thei a. He House zahawmtak kal tlang hian, in tha tak an neih theihna tura hma latu zawng zawngte chungah pawh lawmthu ka sawi nghal bawk a ni.

Pu Speaker, Session hma lamah khan kan Home Minster hi Hnahtial SP Office leh Fire Deptt. staff-quarters leh a hmun hmata min hmuhpui tura ka sawm angin a hmun ngeiah min lo hmuhpui a, a chungah lawmthu ka sawi a. Hnahtial District-ah hian fire station hawn a nih thuai theih nan leh fire tender-te a rang thei ang bera min pe turin a changtu Minister kha ka han ngen leh duh a. Tin, Hnahtial SP Office hi engtikah nge sak theih a nih ang tih kha kan Minster-in a wind-up hunah min hrilh thei se ka lawm hle ang.

Tin, Thingsai Police Station hi border-a awm kan nih avangin ngaihsak a ngai khawp mai a. Police check-gate tangkai taka hmang turin a gate bera hi khaw chhungah a awm tlat mai a. Helai hi ramri dep a nih avangin ruihhlo leh dan phal loh thil paltlangna hmun a ni a. A changtu minister hnenah pawh kan thlen tawh a, heng te pawh hi min ngaihtuah ran sak nghal turin ka ngen nghal duh bawk a. Tin, Police staff-quarters dilna pawh vawi tam kan theh lut tawh a, khangte kha a rang lama min ngaihtuhsak turin ka ngen nghal bawk ni sela. Tin, New Ngharchhip khua hi ramri dep tho a ni a, kan bial Hnahtial District-ah hian ramri depa awm khua tam tak kan nei avangin, helai leh a chheh vel khuate chhawr theih turin Police beat-post Cherhlun ah dah dan awm bawk sela chuan, tun ai nasa zawk hian dan phal loh thil lakluh kawngah kan inkhuahkhirh thei ang tih te ka sawi duh bawk a ni. Tin, ka bial chhung tho, South Vanlaiphai Police outpostte pawh hi kawng hrang hranga min ti changtlun sak turin ka ngen duh bawk a.

Demand No. 46 - Urban Development & Poverty Alleviation:

Pu Speaker Demand No. 46, UD&PA Department chungchangah hian, Hnahtial khawpui kan bawlhhlawh paihna a min a, a paih lailawknaa kan hman a fuh chiah lo a avangin bawlhhlawh paihna chungchangah hian kan buai hle mai a. UD&PA changtu Minster hian a hmunah min lo hmuhpui a, a rang thei ang berin hma min lakpui a, kan bawhlawh paihna lei min danna te pawh siam a ni nghal a. Amaherawhchu, district te kan lo ni tawh a, kan nihat-bawlhhlawh paih te pawh a tam tawh em em a, kan hmun hma ten min dawl zo lo vat dawn a. . Chutiang a nih avang chuan Hnahtial Solid-Waste Management hmun siam tumna a awm a, mahse, duh angin thil a kal chak hlei thei lova. Hemi kawngah hian chak zawka hma min laksak turin ka ngen nghal bawk a ni.

Demand No. 30 - Disaster Management & Rehabilitation Department:

Pu Speaker, Demand No. 30, Disaster Management & Rehabilitation Department chungchangah hian, kan Chief Minister leh a changtu Minister zarah kan thu thlen te min ngaihpawimawh sak a, Hnahtial khaw chhung hmun hrang hrangah side-drain siamna tur SASCI-ah min thunsak hi a lawmawm ka ti a, he House zahawm tak kaltlang pawhin lawmthu ka sawi a. Hnahtial khawchhung hmun hrang hrangah ah side-drain a awm mumal loh avangin a buaithlak thin a. Hnahtial tlak lam phei chu bypass road a kal a, eng emaw palh thleng se chhiat rup thleng thei khawp kan ni a. Chumi hre reng chung chuan khawchhung side-drain siamna tur SASCI hnuiaia min dah sak hi House zahawm kaltlang pawh hian lawmthu ka sawi a.

Demand No. 31 - Agriculture:

Pu Speaker, Demand No. 31, Agriculture chungchangah hian kan Chief Minister leh Agriculture Minister Pu PC Vanlalruata hmalaknain sorkarna kan chelh hmaa kan intiamna ang ngeiin sorkarin sawhthing rate mumala a lei thei te hi ropui ka ti hle mai a. Ni 27th February khan ZPM thalaiten Sairang sawhthing dahkhawmna hmun kan zuk hmu a, Mizoram sorkar chuan sawhthing chingtute atangin sawhthing qntl. 14,000 vel kg ah ₹50/-in a lei tawh a. Kan bialah pawh sawhthing thahnem tak hralh chhuah a ni a, loneitute'n an thawh hah phu tawh hlawkna an hmuh hi a lawmawm ka ti hle a, kalphung-thar sorkar kan hmu chho zel a ni te pawhin ka hria. Sorkar project hmachhawn lian tak pakhat - Mizoram chhunga kan buh tharte a pun zel theih nan man man zawka a chingtute'n hlawkna an hmuh theihna tura sorkar hmalakna OM OM Rice Meal, Pangbalkawn ami chu ni 17th February khan kan tlawh a. He hmunah hian Kolasib leh Mamit District chhunga buhum thartute atangin kg ah 30/- in lei a ni a, he project hi mizoram tan mel

lung pawimawh tak pakhat a ni a. Kolasib leh Mamit mai ni lovin, Mizoram pumah he project hi kalpui thuai a nih ka beisei a.

Tun tumah hian quintal 11,399.61 lai farmers-te buhhum sorkarin a leisak a, OM OM Modern Rice Meal ah hian darkar 1 ah tonne 5 buhhum her thei tura ruahmanna niin, a her daih khawp buhhum an hmu zo lo zawk te a ni a; he House kaltlangin kut-hnathawktute buh chin uar leh zual turin ka sawm nghal bawk a ni.

Pu Speaker, Hnahtial-ah School of Agriculture Science kan nei a. Tunah hian Mizoram hmun hrang hrang atangin zirlai 60 vel an awm mek a, zirtirtu an indaih lo khawp mai a. Hemi chungchangah hian hma min laksakin theihtawp min chhuahpui na chungin, min ngaihtuah leh zual turin a changtu minister chhuanawm tak kha kan ngen nghal duh bawk a.

Demand No. 37 - Cooperation Department:

Demand No. 37, Cooperation Department chungchang hi sawilan leh ka duh a. Hnahtial ah hian kan la nei chiah lova, district capital te kan nih ve takah chuan kan mamawhna a sang ve tawh khawp mai a. A changtu minister chhuanawm tak Pu PC Vanlalruata hian kan neih ve ngei theihna turin hma min lak sak thei sela chuan Hnahtial District mipuite a chungah hian kan lawm dawn hle a ni.

Demand No. 47 - Irrigation & Water Resources Department:

Demand No. 47, Irrigation & Water Resources Department hma lakna, ka bial Vanlalpai khua leilet ah hian solar hmangin lei hnuai tui pump chhuah a ni a, hei hi sorkar hmasa hmalakna a ni a, lawmawm ka ti hle a. Khilai kut-hnathawktute'n hei hi kan chhawr em em a, he hmalakna hi chhunzawm zel a nih chuan, kut-hnathawka eizawngte'n an thlai te, an buh te tun ai tam zawkin an thar chhuak thei dawn a ni.

A tawp berah chuan, kan Minister te pahnih - Pu K. Sapdanga leh Pu PC Vanlalruata te demand hi ka pawmpui a, he House-ah hian pass ngei ni se tha ka ti e. Ka lawm e.

SPEAKER : Member zahawm tak Pu RM Chakma ilo sawm ang.

PU RASIK MOHAN CHAKMA: Pu Speaker, ka lawm e.

Demand No. 16 - Home Department:

Kan minsiter te pahnih demand pawimawh tak sawihonaah hian a hmasa bera ka sawi duh chu, Home Department hi a ni a. Sorkar policy ah hian prison hi engtia nei theih nge? Sub-Division Headquarters apiangah nei tur tih kha a awm em? A awm anih chuan, khawi division te nge tun thlenga prison la awmlohna kan tih chuan, Chawngte hi kan sub-division zinga upa ber pawl a ni a, amaherawhchu, tun thlengin sub-jail emaw, prison emaw pawh a la awm lo a ni. Nikumah pawh kan sawi tawh a, hmalakna engmah awmin kan hre lo a. Session hmasa ah te pawh kan prison te tihchangtlunna tur *Dan* te kan siam a, central-sorkar duh dan angin accused-person te court ah an inlan hma loh chuan *misual* kan ti thei lo a ni. Chawngte ah pawh prison kan neih loh vangin police station-ah hian Dan-in a phal bak rei te kan inkawl thin a, hei hi *Human Rights* bawhchhiatna a ni. Magistrate thuthmun te a ni vena chungin, hetiang facility nei tur hian sub-jail emaw tal kan mamawh em em a, chu chu tih tak zetin ka ngen a ni.

Sub-Division kan neih zinga a lian ber pawl Chawngte sub-division hian khaw 98 neiin, police station pathum chiah kan nei a. Chutiang anih laiin Parva-international boundary hi Myanmar, Bangladesh leh India inzawmna a ni a, hmun pawimawh tak a ni a. Sorkar hmasa tawp lamah khan police station dah tura tih a ni a, District Council-in ram te kan pe a. Nimahsela, kum khat kal ta chhung khan hmalakna engmah a awm zui lova. Chuvangin, Pu Speaker, helai hmun pawimawhna hi he House-ah hian ka sawinawn duh a.

Tin, Chawngte-a police-quarters hi a khawngaihthlak khawp mai a. Kan Home Minsiter hian program te siamin min hmuhpui se chuan, chawp leh chilhin a siam that duh ka ring a ni. Helai hi hard-posting dik tak a ni a, tunah hi chuan. Chuvangin, min ngaihven deuh chu kan ngai a ni tih kha, Pu Speaker, ka sawi duh a. Kan sorkar-hnathawkte hi duhsak an ngai a, chuvangin khang te kha min enpui sela ka ti ngawih ngawih a ni e. Kan hriat angin police recruitment a awm teuh dawn a, sorkar-hnathawkte chu transfer & posting an nihna apianga awm tur ni mahse, tui lo leh chak lo deuha an awm hian an hnathawhah te eng emaw chen a effect thin a. Chuvangin, tun police recruitment-ah hi chuan a district-quota zawngin tih theih dan awm se. Kan awmna leh kan zirna te a inan loh avangin, Aizawl District nena in compete tur chuan kan tlin loh palh a hlauhawm a. Police ngat phei chu regional balance angin awm thei se chuan nakin atan pawh a tangkai zel ang a. Chuvangin, district-quota siam thei se tih hi ka ngenna a ni.

Tin, Chawngte khawpui hi fast-growing town a ni a. A mipui chengte leh in te pawh kan tam ngaihtuahin, fire sub-station tun thlengin a la awm lova. Vawi eng emaw zat devastating fire incident kan nei tawh a, a khaw pumpui pawh vawi-thum lai hal tawh a ni a. Chuti chung chuan tun thlenga fire sub-station a la awm lo hi engnge a chhan tih te rilru ah a awm a. Chung te chu kan Home Minister zahawm tak hian min ngaihtuah sak se tiin ka ngen a ni.

Demand No. 30 - Disaster Management & Rehabilitation Department:

Tin, Disaster & Rehabilitation Management-ah hian kawng chhia emaw a awmin publicity a nasa a, sorkar pawhin rang takin hma a la thin a. Keini lamah erawh chuan disaster avangin kawng emaw, leilawn emaw pawh chhia a awmin publicity kan nei loh avangin siam that lohina awm thin a, a buaihlak khawp mai a. Nikum khan Longpuighat khaw chhungah leihlawn pakhat a chhia a, siamtu tur reng reng an awm lova. PWD hnenah kan sawi pawhin 'kan kawng, kan bridge a ni lo' tiin min chhang a. A tawpah DC-ah kan thlen a, mipuite an harsat em avangin a ba in a siamtir ta niin ka hria, risk a la sang khawp mai a. Chu chu disaster management funded turin Aizawl-ah pawh proposal thawn a ni a, khang te kha a tihfel dan awm sela.

Demand No. 46 - Urban Development & Poverty Alleviation Department:

Tin, Urban Development & Poverty Alleviation hnuaiah Chawngte hi town-a declare theih tawh a ni a. Hei hi census town-a declare turin a tling em tiin guidelines ka'n en a, engkimah a tling vek a ni. Town atana declare tur chuan population engzat nge ngai, employment engzat nge ngai tih te kha a ni a. Chuvangin, engkimah a qualified a ni. Hmanni lawkah pawh Urban Development & Regional Development Rules kan siam a, chumi rual chuan census town-ah min declare loh chuan GAD-ah ziaak tawh mah ila, census neih hunah min declare ve lo palh a hlauhawm a. Engpawh ni sela, GAD demand ah pawh sawi tho ka tum a, hei hi kan Minister pawhin min hriatpui se. Tin, khaw chhung kawng siam nan PWD hian sum an nei thei ngai lova, Urban Development & Poverty Alleviation atangin ₹40.00 lakhs

vawikhat min pe a ni. Khatih hunlaia pek kan ni lo kha, a pek theih dan a awm tihna a ni a. Chuvangin, kum lo awm turah hi chuan hetiang ruahmanna hi awm leh thei se tih ka propose duh bawka ni.

Demand No. 31 - Agriculture Department:

A dawt lelah chuan, Pu PC Vanlalruata chan - Agriculture and Farmers' Welfare, Cooperation leh Irrigation & Water Resources ah te hian kan sorkarin policy mumal tak a neih a ngai a. Tlang sanga leilet siam kha chu a fail dawn tih a chiang a ni. Potential area bik a awm a, southern belt leh western belt te, *entirnan*: Eastern belt-a Champhai te hi potential area a ni a. Chung potential area angah chuan UT kan nih lai atangin agriculture lamah hmalakna engmah kan nei lo hi a mak ka ti a. Ei leh bara intodelh hi tul kan ti lo zawk nge, hei hi engnge a chhan ni ang? Awlsam deuha develop theih irrigation te hi buh leh bal bakah thlai tan a tul si a. Kan biala Parva saw an rethei em em chungin Council atangin tanpuina tlem an dawn thin hmangin tan an la a, coconut-ah phei chuan kan intodelhin ka hria. Tun hma angin phailam atanga coconut zuar an awm tawh lova, Silchar coconut kan ei tawh lo; Lawngtlai lamah pawh tlem tlem chu an hralh tawh a ni. Chakma te phei chuan leileh hi kan tradition a ni a, hmanah British hunlai atang tawh khan leilet-buh an thar tawh a ni. Traditional knowledge an neih tawh avangin zirtir an ngai lo. Chuvangin, sorkar atanga tanpuina sum tlem te an dawn pawh an hmang tangkai a. Tunah te phei chuan technical thilah chawp leh chilhin changkanna a awm tawh a, leilet phei chu kuminah hian hma la ta ila, nakumah a thar chhuah theih. Long-term policy pawh a ngai lova, short-term a ni a produce turin. Chungah te chuan mumal tak leh awmze nei takin ti ve ta ila, Delhi-ah pawh 'Mizoram chuan buh leh balah kan intodelh a ni' tih sawina chance te pawh a awm dawn a ni. State khat ve lem tan chuan buh kan neihloh sawi reng pawh hi a zahthlak a lawm maw le, Pu Speaker. Chuvangin, tun kalphung thar sorkarah hi chuan ngaihtuahna thar nei ila, sawlam ah sawn irrigation leh agriculture ah hian hma ila ho teh ang u. Kan ram, Mizoram hmingthat nan i tangho teh ang u. Pu Speaker, ka lawm e.

SPEAKER : A lawmawm e. Tunah chuan member zahawm tak Pu H. Ginzalala ilo sawm ang.

PU H. GINZALALA: Pu Speaker, Minister zahawm tak takte pahnih - Pu K. Sapdanga leh Pu PC Vanlalruata te demand kan sawiho dawn a ni a. A hmasain Home Deptt. chana halpuah hal chungchang hian tan ila.

Demand No. 16 - Home Department:

Kuminah kumthar lawmna halpuah hal kan khapna a hlawhtling khawp mai a, a lawmawm ka ti a. Mizo mipuite hian discipline kan nei tha, hruaitu kan neih that chuan, tih hi a chiang reng mai. Aamaherawhchu, Pu Speaker, hun lo kal zelah turah pawh residential area ah hian strict lutukin halpuah hi khap chhunzawm zel ila, a halna tur bik residential area atanga hla tawkah, *entirnan*: Aizawl west lama Maumua-ah te emaw, Aizawl East lamah chuan Hangi Lunglenglang lamah te emaw hla vek vawkah ni se, minute 20 emaw vel chiah phalsak ila tiin ka han rawt duh deuh a ni.

Pu Speaker, hei, police te kan la dawn a ni a. Kan bial lam te pawh hi zawlneite'n an sawi an sawi thin a, tak tak ni turah ka ngai deuh a, 'Khawchhak lam atangin hmaisain hnam an lo lian dawn a ni' tih te kha an sawi a. Tak tak a nih chuan khawchhak lamah hian police kan dah teuh ava ngai mai dawn ve, kan ti deuh a ni, Pu Speaker. Hei, tunah hian forward

IR Battalion Headquarters hi Zote-a awm turin rawtna kan rawn siam chhin a. Pu Speaker, rem min tihsak se kan Minister zahawm tak hian, khilam pang khi law and order situation-ah pawh duhthu a sam lo hle a ni tih chu hriatsa a ni a. Hei, sawi ta mai ila, smuggling thil te pawh a awm ve bawh thin niin an sawi a, chung atan te pawh chuan inbuatsaih hi a tha khawp mai a. Hnahhlan leh Champhai ah te pawh forward IR Battalion Headquarters dah theih ngei a chakawm khawp mai a, a main battalion headquarters tak kha chu Khawzawl-ah a awm a ni. Champhai hian branch angreng deuh headquarters tenau mi 20 vel awm theihna chu kan beisei khawp mai tih kha ka'n sawi duh bawh a.

Tin, Indo-Myanmar border issue te kan hria a. Pu Speaker, hemi chungchangah hian kan sorkar hian ngaihdan zau tak kan put hi a va tha em. Kan zo-hnahthlak unaute chungchangah thil tam tak sawi tur a awm ang a. Keini chu *fa-u* kan ni a, fa-u kan nih angin rilru zau takin kan lo dawng sawng thiam tur a ni. Tih bik kan nei tur a ni lova, thlei bik pawh kan neitur a ni hek lo. Chutianga kan unaute kan lo enthiam hi Pu Speaker, a va tul em.

Champhai Vengsang ah SDPO office niin ka hria a, khatah khan hmun ruak deuh hlek kawngkam kha kan hmu fuh a, rawtna pawh Pu Speaker, Home Minister hnenah kan siam tawh a; Bazar atan kan it khawp mai a, kha kha min lo hriat sak sela. Bazar tha tak kan neih theih chuan Champhai Vengsang economy hi nasa takin a chawikang dawn a ni.

Demand No. 30 - Disaster Management & Rehabilitation Department:

Pu Speaker, Disaster lamah hian tlem sawi tur ka nei ve a. Disaster kan hmachhawn dan hi a dik viau a, mahse hmasawmna tur tlem a la awmin ka hria a. Chhiatna a lo thlenin kan buai thin a, a nihna takah chuan chhiatna lo thlen hmain lo inbuatsaih lawk a hi a strategy chu a ni hrim hrim mai a. *Entirnan*: kawngkamah lung tla thei tur te, leimin thei tur te a awm em; powerline transmission line chhe tur te a awm em, tih te kha tun ang hunah hian kan inbuatsaih lawk a ngai a ni. A lo chhiat hunah kan tlankhawm a, a tha reng mai; a thalo chu ka ti lo. Amaherawhchu inbuatsaih lawkna tun aia tha awm thei se ava tha dawn em.

Demand No. 31 - Agriculture & Farmers' Welfare Department:

A dawt lehah chuan agriculture marketing chung changah hian Pu Speaker, i veilama mite hi an tui khawp a, sawi an ngah tawh khawp mai a; keini aimah hian an tui zawk ta emaw ni tih tur hi an ni a, zawhna pawh an ngah a. Hmuhphiah a ni emaw, hmarcha a ni emaw, sawhthing emaw pawh; a dik reng mai a. Kan vawikhat tih vena a ni a, kan bultan vena a ni a, kan chhang chhe lo thei lo a ni. Vawiina agriculture marketing-a kan chhangchhiat chhan chu, 'a bul kan tan tlai vang zawk a ni' tih hi. Sorkar hmasa lamah khan lo tan daih tawh chu ni ila, tunah chuan a kal par-par tawh zawk tur hi a ni a. Kan inzirtir a ni; 'research wing lam hian an zir fuh lo em ni' tih mai mai te, 'an fail em ni' tih mai te hi zawhna a tam a. Ni e, a dik a ni. A hlimchhawn ve em mai a, kan la buai rih a, kan la chhangchhia a ni.

Israel fate pawh Aigupta atanga an chhuak tur kha an chhangchhe khawp a. Arbawm nen saum-bur nen an inpubawr luk mai a, chhangchhe ho deuh phei chu ekchhuak nen kawngkama daikal lah bo lo; pa-pakhat phei chuan a ti alawm, 'an beram-pa te kha kalpah hian an insi phei nawk nawk mai a ni' a ti a, chutiang khawp chuan an chhang chhe ve a ni a tirah chuan. Chuvangin, kan agriculture sector pawh hi kan chhang chhe lo thei lo a ni. Pu Speaker, engpawh nise, tuna kan in mobilise chho mek hi a lawmawm ka ti a.

Tichuan, agriculture sector-a ka sawi duh chu - Agriculture link road hi a guidelines kan siam a ngaiin ka hria; kan hon. pawhin min lo chhinchhiah sak sela. Hei hi thil te-reuh-te ah kan ngaiin ka ring a, mahse a lian a ni. Vawiinah hian kan pawisa hian a thawh tur dik tak a thawh fuh loh chhan hi tam takah chuan, kan agriculture link road laih dan hi a technical lo lutuk a ni. Hmanah pawh ka sawi tawh a, grade a that chuan PCC pawh a ngai hran miah lova, boulder pawh phah a lo ngai reng reng lo; kan ti nasa tawh a ni. Chutiang chuan, guidelines mumal tak agriculture link road chungchangah kan sorkar hian nei thei ila. Tuna link road kan laih hian thal khat chiah a daih; economic assets a tling lo, economic burden a ni zel. A kum lelah hmang tur chuan nuai 2-3 kan repair zel a ngai a ni. Chu chu a nih avangin, agriculture link road kan laih dan hi a guidelines kan neih a ngai. Council of Ministers te pawh hianrawn duang chhuak se ka ti khawp mai.

A dawt lelah chuan, sawhthing hi a pulung chuan hralh reng a harsa dawn a, nakum atang chuan a marketing lam, a processing lamah hian inbuatsaih a ngai tan dawnin hria a. Tin, irrigation chungchangah kan agriculture practice ah hian tui mamawh tam hliir hi kan ti ve bawk a, Irrigation Department hian an tiseng lo khawpin ka hria a. Kan thlaichin dan pattern hi thlak a hun tawh khawpin ka hria a, tui mamawh tlem deuh te kan thlan thiam a ngai tawh a. Chutiang chuan, agriculture sector-ah revolution a awm thei chauh in ka ring a ni. Buh ringawt loh deuh te pawh kan tih a ngai tawh maithei.

Demand No. 46 - Urban Development & Poverty Alleviation Department:

Tichuan, UD & PA lamah hian sawi tur a tam khawp a. Khawpui chhungah hrui inzam niai-nuai te a tam khawp a, Pu Speaker. Hengte pawh hi zawi-zawia hma kan lak a va tha em! Thil har lutuk tur pawh niin ka hre lova, a system han siam that mai khan a that mai ka ring deuh a ni. Tin, Champhai hi *tourist-destination* kan ni chho mek a, chutah chuan kan kawngte tihmam deuh te, tihmawi deuh te pawh a lo ngai dawn a. Tin, traffic jam te pawh kan nei ve tan tawh a. Chutiang bawkin junction improvement te pawh tih a ngai khawpin ka hria a. Chungte pawh chu kan hotute'n min hriatpui sela.

Chutiang chuan, side-drain te pawh thil hote mah nise privatise emaw, kan interpreneur-te ho thawh theih tawk leka kan siam te pawh a tha awm mang e, a maintenance chungchangah hian. Tunah hi chuan, *nobody-style* a ni ringawt mai a, enkawltu nei lo, fur arawn ni a, hnawkin a hnawhkhat a, khatah khan kan hre chauh thin a, attention kan pe chauh thin a ni. Chuvangin, side-drain outsourcing te pawh hi thil ho te mah nise, kan rawt a. Tin, nichina ka sawi, kawngkama hrui inzam nuaih te pawh hi ti outsource teh ang u. Thalaite tan eizawna tha lutuk a siam dawn bakah kan khawpuite a lo smart zawk ang a. Hei hi India ramah a tithei khaw awmchhun kan nih hlauh chuan, tourist ho hipna tha lutuk a ni dawn a ni.

A tawpna atan chuan, Pu Speaker, *sawhthing*-ah lut leh law law ila. A processing kha, ni e, hmun khata inchhungkhawm vak mai kha transportation issue a lian lutuk a, centralised chi vak a ni lova. *Entirnan*: region tinah hian a processing plant kan dah a ngai ang a. Sawhthing kan harvest hun hi thal, tun ang nisat veng-vawng hun anih avangin solar energy a tha a; a tih-rona te nen ti ila, truck trip 10 emaw han tih-ro chuan truck trip 2 bak a ni dawn lo tihna a ni. Transportation ah nasa takin shading a awm ang a, chutiang tur chuan a processing-a 'drying' kan tih ang chi te pawh decentralised a ngai, hmun tinah; Chawngte lam te pawh kan tih vek a ngai ang chu. Chutiang zawng chuan kal ila a approach a dikin ka ring a. Sawhthing hi kan tihfuh vaih chuan *Vibrant Mizoram* hi a lo

chhuak dawn a ni; mitin hian economics activities-ah kan nei tawh dawn a ni. Hei lo liam Mizoram economic siam thatna tur hi a awm lo a ni. *Vibrant Mizoram* kan tiam a che u; Pu Speaker, a lawmawm dawn khawp mai. Agriculture sector ah hian a production ringawt ni lovin, a marketing lamah sawhthing kaltlangin Mizoram-ah ram kan transform dawn mek a ni.

Tichuan, Hon. Minister zahawm tak Pu K. Sapdanga demand te hi 'he House hian pawmpui ila' tiin ka rawn ngen e. Ka lawm e.

SPEAKER : Tunah chuan, Member zahzawm tak Pu R. Rohmingliana ilo sawm ang.

PU R. ROHMINGLIANA: Pu Speaker ka lawm e. Vawiinah kan Minister zahawm tak tak pahnihte - Pu K. Sapdanga leh Pu PC Vanlalruata te demand sawi ve thei tura helaia ka lo awm hi ka lawm hle mai. A hmasa berin Pu Speaker, kan Minister zahawm tak Pu K Sapdanga chan Demand No. 46 ah khan, nikum budget aiin kuminah hian ₹42,003 lakh laiin a hniam dawrh mai a. Tin, Pu PC Vanlalruata chan Demand No. 31 leh No. 47 - Irrigation and water-resources ah khan nikum aiin ₹1,191 lakh-in a hniam dawrh bawk a. Tin, Argiculture & Farmers' Welfare ah hian nikum aiin ₹1207 lakh-in a hniam bawk a ni. Kha kha engnge a chhan aw? Nakin wind-up hunah min hrilhfiah thei se ka lawm ngawt ang.

Demand No. 30 - Disaster Management & Rehabilitation Department:

Tichuan, Demand No. 30 - Disaster chungchangah hian, ka bial Thorang bial hi tuilian te, kawng min te, in kang te, helaia kan tawrh ang tho hi kan tuar ve thin a, khatiang baka tawrhna pawh a tam khawp mai a. Hmanni lawka Cyclone Remal pawh kha a tuar hmasa ber kan nih ka ring hial a. Chuvang chuan, hemi chungchangah hian a hmasa berin he House kaltlang hian lawmthu sawi ka duh a, Pu Speaker. He Cyclone Remal hi Mizoram-in kan tawrh tan tirh khan ka bial chhunga Laisawral khua kha a rawn ri tan hmasa ber a, social media ah khan. Chutah chuan, Lunglei DC te an alert khawp mai a, Lunglei DC leh Secretary, Disaster Management te chungah ka lawm takzet a. Zanlai dar 12:00 ah te, dar 2:00 thleng te mengin kan in phone kual zak zak a. Telephone te a chhia a, line a tha lova, mahse tlang thei tura buaipui turin kan inngen a. Disaster chungchangah kan official te hnathawh tha kha vawiinah hian ka fak a.

Pu Speaker, chuti rual chuan, disaster tuar tam bial kan nih ti hi kan Minister-in min lo chhinchhiah sak sela. Ruah a han sur leh hlek ang a, tui a han lian leh ang a, 'in a chim' an rawn ti leh ang a. Tin, 'kawng a nal vek, buhfai a phurh theih loh; lawnga thiar a ngai' an rawn ti leh dawn a ni. Hei, tukin zingah ringawt pawh ka MLA Fund-in silpauline pick-up trip khat ka thawn thla a ni a, sawhthing leh hmunphiah kan ngah si a. Hei, lo hal hi Ni 15.3.2025 hmaa neih tur a ni a, khua a dur thin a. An hal zawh hian meikhu hian ruah a pawt thla thin tlat mai a, an huphurh em em a ni. Keini lam hian silpouline hi MLA fund atang hian kan lei nasa lutuk a; disaster lam atang hian min pe tam deuh teh u. Kan hmunphiah te ruahin a nan palh chuan, kum tluana an thawh rah kha a nan chhe vek mai dawn a ni a, an khawngaih thlak em em a ni.

Demand No. 46 - Urban Development & Poverty Alleviation Department:

Pu Speaker, Demand No. 46, UD & PA lam hi, hei, engineer te an nei ve a. An hna thawh han en hian, an engineer te hi an indaih lo hlein a lang a. A engineer lam te hi EE hovin an

awm a, heng te hi tih-len dan a awm em le? Mizoram pumpui an huap mai a, an zin reng mai a. Hna quality tha tak nei tur chuan engineer te an indaih a ngai a ni.

Demand No. 16 - Home Department:

Tichuan Pu Speaker, Demand No. 16, Home Deptt. chanah hian, kan Power & Electricity Deptt. Minister khawchhak lama zin 2nd Batallion Assam Rifles ten an lo tibuai kha a mak ka ti a, khami chungchang kha min sawifiah sak ngei se ka duh a ni. Hei hi a paw ka ti a, democracy zah lohna tawp khawk niin ka hria. Khang ho khan eng tiangin nge hremna an tawh? Nikum, kum tir lam khan first-timers ho training turin min ko thla vek a, Delhi lama Parliament-a an sawi kha niin ka hria a; khata min zirtir, vawiin thlenga ka la hriat, a tira ka pawm miah loh, an sawifiah hnua ka pawm tak chu – “*Nangni MLA thlan thar ho hi, in awmna State-ah inti lal ang che u*” tiin min zirtir ngar ngar anih kha. A tawpa a chhan an sawi chu – “Democracy a tlukchhiat hi India ram hian a hlau lutuk. Democracy tluchhe tur veng tur chuan, Elect-te an pawimawh a ni” tih a ni. Chuvang chuan, engatinge kan elect mai nilo, kan Minister zahawm tak kha khatianga Assam Rifles ten an lo tihbuai mai mai? Khatah khan eng ang chenin nge kan sorkar hian hma a lak, tih ka hre chak a ni. Mizoram zah lohna mai a ni lo, *Democracy zah lohna* ah kei chuan ka ngai tlat a ni.

Tin, Speaker, ka sawi leh duh chu, Forensic Science laboratory chungchang hi tunlai khawvel changkan zelah hian kan mamawhna a zual zel dawn a. Chuvang chuan, he lamah hian hma lak nasat hi kan ram changkanna tur chuan a van tul em. District hrang hrangah Wings ang te, a department note eng emaw, a hming te pawh kan phuah ang; khangah te khan mithiam tak takte dah zel mai hi misual man chhuahna kawngah te, thil hlui chhuina kawngah te pawh kan tangkaipui ka ring. Indawpa invuak vak vak kha a awm tawh si lo; tunlai thiamna hmangin misual a man chhuah theih tawh a nih hi.

A dawt lelah chuan, Pu Speaker, Central Jail lama kan zuk training, a hnunung bera ka zuk kal, Delhi ah training-a kan kal tuma Forensic Science laboratory leh Jail tlawh tura min tih angin, ka tlawh ve ve a ni. A pawimawh ka ti khawp mai. Central Jail office te khu a va han hlauhawm em! Office hnathawkte tan khuan a lo hlauhawm a; tin, a building khu sak that a va han tul em aw. Tin, Jail tangte an tawt lutuk; kan han zawt thin a, a khahin an khat hnur mai a ni. An sawi dan chuan, tunlai dan anga kalpui tur an han ti ve na a, jail-ah khuan a theih loh; facilities an nei tlem lutuk.

Tichuan, point dang leh chu, suahsualna rapthlak tak tak kan Zoram-a awm hi, ‘khawi atanga rawn irh chhuak nge’ tih hi Home lam hian kan chhui a hun tawhin ka hria. Pu Speaker, ‘he suahsualna titu tam zawkte hi Mizoram-a piangte nge an niha, hmun dang atang a rawn kal te?’ tih te hi kan chhui a hun tawhin ka hria.

Tichuan, Pu Speaker ka bial chhungah police station pahnih - Bunghmun Police Station - khaw 17 cover leh Lungsens Police Station - khaw 33 a cover te kan nei a. Kawng chhe em em ah gypsy pakhat ve ve an nei; siam reng ngai, nawr nun fo ngai; Khu laiah kawng a chhe si. Hei hi Budget Session hmasa ah pawh ka sawi tawh a. Min thlak sak hram teh u; four-wheel kan mamawh tih min hriatsak bawk ula. Lungsens Police Office phe chu a bang atang te’n tui a leak a, fur hi kan huphurh lutuk; computer te a chhe zel. Chuvang chuan, helai hi min rawn ngaihven sak deuh ula.

Demand No. 31 - Agriculture & Farmers' Welfare Department:

Tin, Demand 31, Agriculture chungchangah hian Pu Speaker, tun budget ah hian thlaithar leina dah a ni ta miah lova. Agriculture ah hian ₹1,207 lakh laiin nikum aiin an dah tlem bawk si a. Tunah lo an vat sup sup a, Ni 15 hmain hal a ngai dawn si a; sawhthing te an ching leh ngam dawn em? Helai hi vawiinah hian sawi chian a ngai. Thlaithar leikna he budget ah hian dah a awm bawk si lo; crore ₹350 chiah hand-holding ah dah a ni a. College ho inelna turin 'Hand-holding College Innovation' tih a ni a, hengah te hman a ngai; bank interest ah te hman a ngai. Tin, CM-special scheme package atan pawh hman a ngai. Thil dang hand-holding ah hmanna tur a tam si. Tunah mah ka bialah sawhthing a tam lutuk, in lei hneh lo lutuk a. Pu Speaker, ka bial chhung khaw tam tak zinga a khaw te deuh pakhat - Changpui hi in 100 vel lek awmna khua a ni. Tuna an sawhthing te cho vek se, quintal 2000 chuang an nei dawn a ni. Khaw dang khaw lianah phei chuan a tam lutuk; tun tumah hian in 80 chuangin sawhthing an ching a ni. Tunah hian quintal 20 chiah an la hralh thei, a hahthlak lutuk; a chawhsa quintal 700 vel la awm tal hi min lei sak vat teh u. Tin, ip chungchangah chuan, ka biala mite chuan sawhthing dahna ip kha pakhat 10/-in an pe zel a ni a, chu chu min lo chhinchhiah sak rawh. Nichinah khan question-ah a awm a, demand kan sawi dawn tho ka ti a, ka rawn sawi lang lo a ni. Tichuan collection center atanga an phurhna te kha an chawi zel a. Chuvang chuan, kg 1 ₹50/- hi chu a ni thei lo reng reng. Tunah hian ka bial chhunga ZPM te, Congress te MNF te, BJP te an khawngaihthlak lutuk. ZPM paw'n min rawn phone nasa lutuk Pu Speaker; hei hi party-thil a ni lo. Ka bial chhung mipui zawng zawng thlavang ka hauh a ni; an tan a ni ka tih ni. Tu party bik ka sawi lo e.

Tichuan, Pu Speaker, hmunphiah hi ka bial chhungah chuan a ro-in 125/-in hralh a ni a, nikum hmasa sorkar (tun sorkar rawn pian chiah) ah khan hralhna an hmu lova, an dah tawih hnek hnuk a ni. Cheng 20/- te'n an hralh a, vawiinah an la bat sakte pawh an awm; an khawngaihthlak em em. Tun tumah pawh hian chu chu an hlauh avangin January te, December ah te an kek a, sorkar an nghak hman lo reng reng. Cheng 25/-, 30/-, 50/-, 60/- te'n, a chi hrang hrangin vaiho hnenah an hralh a ni. (**Speaker:** Minute hnih in a pel a, I zo thei dawn tawh em?) Chuvang chuan Pu Speaker, hemi chungchangah hian hma chak takin min lak sak ula, keini chu sawhthing leh hmunphiah hmunpui kan ni.

Tin, Pu Speaker, a Mizoram pum huap deuh hlek thil pahnih-khat lek, khawngaihin. Sorkar liam taa RKVY hnuaiyah khan district tinah vaimim herna khawl dah tura ruahman kha engtianga kalpui zel nge a nih hriat a chakawm khawp mai. Tin, Solar-cold storage sorkar hmasain district tinah 12 bun tura tih (district 6 ah phei chuan installed tawh) kha engti angin nge hma lak chhunzawm a nih? Tin, Art & Culture-in Falkawn-a Zo-khua an neih a pan chhohna bula bengkan hriak leh vaimim herna sorkar hmasaa hmalak tawh kha engtiangin nge vawiinah hian hma lak chhoh a nih? Tin, Pu Speaker, kan Agriculture Minister zahawm takin hman ni lawkah Thingdawl-ah tissue culture tihna tur a zuk hawng a, tv ah te pawh kan lo hmu a, a lawmawm hle mai a. Kha sorkar hmasa hmalak tawhna chhunzawm a ni kha lawmawm ka ti a. Tin kha tissue culture khan alu chi tha Mizoram tan a rawn thar chhuak dawn niin a lang a, a lawmawm ka ti takzet a. Kha kha engnge vawiinah hian a kal chin? Heng te hi ka bial chhungah pawh kan mamawh ve dawn a ni a. Ka bial chhunga Zawlpui khua leh a chheh vel saw agriculture potential tha lutuk a ni a, Lunglei khawpui chawmtu a ni tih te hi min hriatsak ula.

Tin, Pu Speaker a tawpna tak tak atan, ka bial chhunga Lungsen khuaah hian BAO office a awm ve a, building tha deuh sorkar hmasa khan a sa a, mahse saw building tha deuh ah sawn BAO pawh kan nei lova, Gram Sevak pakhat chiahin min thut chillh a ni. Heihi chu min thum that sak teh u. Keini agricultur hmun atan chuan hetiang ang a indahsak hi chu a lungchhiat thlak ka van ka ti em. (**Speaker:** Khai le, minute 4 in a pel ta e.) Pu Speaker, kha kha ka sawi theih tawk a ni e. Ka lawm e.

SPEAKER : Tunah chuan member zahawm tak Pu Lalramliana Papua ilo sawm ang.

PU LALRAMLIANA PAPUIA: Pu Speaker, Ka lawm e. Vawiinah kan Minister pahnihte demand kan sawi dawn a ni a. An pahnih lakah pawh hian lawmthu sawi tur enge maw chen kan nei tawhin ka hria, tun kum khat emaw erh awrh kan kal chhung pawh hian. Tawitea ka'n sawi lan duh pakhat chu - kan Home Minsiter hi han luh khung hmasa ta ila.

Demand No. 16 - Home Department:

Pu Speaker, Hrangchalkawn hmuna Police-outpost hun rei tak function tawh lo, kawngpui laih avânga a building te tihchhiata a awm kha kan Minister hnenah leh Session-ah te hial te pawh ka lo sawichhuak thin a. Khang te kha chak takin hma min lakpui a. Tunah chuan mimal in luaha outpost a han function leh thei te hi ka lawm hle mai a, kan ngenna te min rawn ngaih pawimawh sak a. A theih ang angin tunah hian building nei lo mah ila, mimal building luahin kan han *run* leh thei ta a. MLA Fund atangin electrification leh cctv lam te kan thum chak tel ve bawk a. Chutiang chuan, sawlai hmun junction pawimawh tak outpost awm lova hnutchhiah hi a ngamawma kan hriat loh avângin, kan han *run* leh thei ta hi lawmawm ka ti em em mai a.

Hemi chungchângah hian Pu Speaker, kawngpui laih avânga thiah tak hmunah hian Outpost leng tâwk vêl sak theihin hmun a la awm a, kan Home Minister pawh hian a hmun te min enpui vek tawh a, a hre reng turah ka ngai a. Amaherawhchu, ngaihtuah a tam a; rilru ah min hriat chhuah thar sak fo sela a thain ka hria a. Helai junction pawimawh takah hian mi in luah ngai lovin outpost building neiha, Lawngtlai lam te, Siaha lam te, Hnahthial lam leh Lunglei lam lût turte a inthlun khâwmna hmun pawimawh lutuk hi police-te uluk taka an duty a ngaih rengna hmun a nih avângin a pawimawh hle a ni.

Demand sawi hun hi kan hotu leh kan senior member-te pawhin, “Duh duh thahnemngaih zâwng a sawi theih alâwm; lei leh van inkar chu a leng mai e” an tih avângin, keini pawh hei an ni advice angin kan ngaih pawimawh te kan han sawi ve leh zar zar ringawt chu a ni a; kan tisual lo turah ngai ta ila.

Rilrua kan vei em em Lunglei khawpuia Fire & Emergency Services Department hian kum rei tak chu office building kan nei tawh lo a ni. Tunah hian Saikuti Hall hnuiaia step te-tak-te ah kan inhnawh khâwm a. Tiang chuan kum eng emaw zât kan awm tawh a ni. Ka hriat dân chuan, nikum lamah khan nge Disaster Response Fund lam atangin a sakna tur fund ₹1,200 lakh bawr vel chu kan hmu tawh a. Hei hi thil dik a ni em? Khawngaihin, Home Department lam atangin engatinge tun thlenga hma lak a la nih loh? Hman deuh khan thawktu lam te nen pawh kan inbia a, Lunglei lamah te pawh lo kalin, a sakna tur hmun te an lo en a. Mahse, hruaitu leh hotu inthlâkna karah hian hmalâkna ti hian a khawmuang leh thin a, hei hi kan session zawh hian chak zâwka lo umzui ka duh dâwn a. Vawiina

department official awm te pawhin min lo hriat sak sela; kan Minister pawhin. A sum hi a awm a nih chuan, hma lak zung zung a ngai tawh. Tunah thal khawro kan hmachhawn mek a; Lunglei kan vanduai a, khati khawp khan Kangpui kan tâwk a, hman kumah pawh. Chuvâng chuan, kan Fire & Emergency Services te hi ngaihven an ngai, tihchak ve an ngai a ni. Office kaina tur mumal pêk ve thuai thuai an ngai tih hi ka vei ve em em a ni a. Hei hi kan Home Department lam ten min chhinchhiah sak se ka duh khawp mai.

Ni e, in hrethiam ang a; mahni chenchilh loh lam hi chu han sawi vak dâwn pawha sawi dân tur thiam a har avângin, chenchilhna lam area kan sawi lo thei lo a. Member dangte pawh kan nih deuh tho kha maw.

Demand No. 46 - Urban Development & Poverty Alleviation Department:

Hei, UD & PA hnuai Lunglei lamah, hei kum hnih-khat Lunglei Municipal Council-te kan han nei chho ve ta a. LMC hi inpeih tha hman mang lova Sorkar hmasa hunlaia ti deuh chûk chûk kha a ni a. Chuvang chuan, tun thleng hian a thla-bi kim lova hrin ang deuhin a than a la thu deuh tlat mai a; kan pian hun tur tak hma hian kan piang em maw ni, ka ti a. Amaherawhchu, a piang chhuak tawh a, chuvâng chuan theih ang anga kan enkawla, kan thantir a ngai ve a ni, LMC saw. A concern department leh a enkawltu lam pawhin min hriatsak sela ka duh em em a ni. Councillors ringawt chuan hna a thawh theih tak tak loh a, staff eng emaw zât an mamawh ve a ni. Tunah pawh hian hna thawka, hma la thei tur chuan kan Councillors te pawh kum lama la thalai te-te, phur tak-tak, hnathawh chak tak-tak an ni a; nikum lamah pawh ka sawi tawh ang khan. Chuvâng chuan, hnathawk theia kan thum thuai thuai a tul ka ti a. Tun dinhmunah LMC bik atân post te pawh create a ni tawh em aw? A niin ka hre deuh a. A nih chuan, heng te pawh hi engtik nge lak fel a nih ang? Kan nghakhlel khawp mai.

SPEAKER : Khawngaihin. Thingpui in chawlh a hun ta a. Member hi kan sawi zawh tir law law dawn em ni ang? (*House-in sawi zawhtir a remti a.*) Aw, sawi zo rawh le.

PU LALRAMLIANA PAPUIA: Ka va lawm ve, Pu Speaker. Ka'n sawi zawm ang e.

Tun dinhmunah pheih chuan CEO a awm a, Officer, Secretary pawh kan nei lova, AMC lam atanga attach-a dahte leh casual staff pahnih-khat te an thawk mai mai niin ka hria a. Khawngaih takin, a thla-bi kimlo deuha lo piang pawh a ni thei a, a pian hun hma deuha a lo pian avângin a than a thu deuh pawh a ni thei a. Mahse, hetiang kan nih tawh rau rau chuan, tun kan Sorkar hnuai hian kan hotute'n chak zâwka hnathawk thei tura kan siam thuai thuai ka ngenpuiin, ka thlahlel em em a ni. Kan bulah an sawi ve a, saw lam MLA nih tâkah chuan. "UD & PA enkawltu kan Minister fa-chuam in nih kha; a ngaihsak ang che u; a ngaihven dâwn che u", kan ti a. Thlamuang tak chuan an awm ve leh mai thin bawka a. Engpawhnise, kan enzui chu a tul khawpin ka hria.

Tin, sorkar liam ta nge, a hmasa zâwk kha ka chiang lova; hun eng emaw lai atang tawh khan Lunglei khawpui tâna Solid Waste Management Centre, UD & PA hnuai kan sak hi, a sak chung a rei ta khawp mai a, puiltin ve a hun tawh a ni. Engnge kan mu tan chhan hi chiang zâwka chhui zuia hma lak thuai-thuai kan thlahlel khawp mai.

Demand No. 31 - Agriculture & Farmers' Welfare Department:

Aw le, kan Minister pakhat, Pu PC Vanlalruata chan Agriculture & Farmers' Welfare-te, Irrigation & Water Resources te hi. Keini hi thingtlâng bial nei kan ni a, Tawipui tlângdung te, khawthlang zawng zawng te, Khawmawi thlengin bial enkawl nei kan ni a. Kan bial chhungah hian hmunhma tha eng emaw zât a awm a. Mizote'n agriculture lam hmasâwnna kawnga pawimawh deuh tur ka ngaihtuahnaa lo lang ve chu – water resource kan neih awm chhun chhun - lui dung te irrigation hmangin kan field-ah kan pe vek thei lova, tui mamawh ang te. Chuvâng chuan, Water Resource kan neih ang chi, lui dung leh ruam rai tha, nùl leh leilet kan siam theihna hmun te hi link road tha taka kan pawh zung zung a tulin ka hria. Kha resource kha sem darh ai chuan, a resource awmna hmun va pawh thei tur link road tha kan neih zung zung hi a pawimawh ka ti em em a. Kan bial tlangdungah Ngengpui Lui a awm a, Mat Lui a luang a. Tichuan, khawthlang lamah Phai Ruang leh Tawipui tlangdung te pawh a awm bawk a. Sawng lui zawng zawng pawh turin, Session hmasa ah pawh ka lo sawi tawh thin angin link road nei ila, chhip phurh ngai lovin motor-in tlân ve theih sela chuan, hla tak-taka hmun thate pawh an pawh thei dâwn a ni.

Demand No. 47 - Irrigation & Water Resources Department:

Thil pakhat lek, Pu Speaker - Irrigation hnuai ah hian Lunglâwn rama Ruangte Lui behchhana Irrigation project, kei pawhin department lama ka lo umzupui tawh, kan Minister paw'n min ngaihpawimawh sak viau a; khang te kha a t̄ul khawpin ka hria a. Saw ti lai resource remchang kan neih lai taka irrigation project kal m̄ek pawh kha a hlawhtlin theihna tur atâna chak taka hma min lak sak ka beisei a ni.

A tawp ber atan chuan, kan rama ka vei ve thil pakhat, agriculture kaihhnawih ah chuan – ‘organic farming hi i uar lehzual teh ang u’ tih ka sawi duh a ni. Ka bialah hian organic village, model-village siam duhna te hi ka nei a. A chhan chu, kan thlaithar hi kan fimkhur a, organic kan inngaihsan siak tan tawh a, a ngaihna hria chuan. Chuvâng chuan, a hlu em em a. Organic farming lam hi uar lehzual ta ila, sorkar leh a department-te pawh hian a theih-theihna ah chuan model-village tur te pawh min han siamsak ula a tha hlein ka hria a. Chutiang chuan, sawi zauna hman a awm leh tawh loah ngai ila; rilrua ka vei ve em avângin khalai kha a point te in ka'n sawi lang ve zawk a ni e.

Aw le, Pu Speaker, vawiina kan sawi ho kan Minister pahnihte - Minister Pu K. Sapdanga chan Demand Nos. 13, 16, 30 leh 46 leh Pu PC Vanlalruata, chan Demand Nos. 31, 37 leh 47-te hi he House hian pawmpuia passpui ngei tha ka ti a, Kei pawhin chu chu ‘ka remti’ tih ka sawi lang nghal a ni e. Ka lawm e.

SPEAKER : A lawmawm e. Tunah chuan thingpui in chawlh kan nei ang a. Dar 2:00 PM-ah kan lutkhâwm leh dâwn nia.

(Recess at 1:05 PM)

2:00 PM

SPEAKER : Tunah chuan Member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Hei vawiinniah kan Minister zahawm tak tak mai pahnihte demand kan han sawiho thei dawn a, a lawmawm hlein ka hria a.

Demand No. 16 - Home Department:

Vawiinnia ka'n sawi hmasak duh chu - Pu Speaker, Demand No. 16, Home Deptt-in a ken tel Prison te, Fire lam te pawh hi sorkar kal tawh te pawh khan kan tlemin kan ngaihthah deuh niin ka hria a. Tun sorkarah pawh hian ngaihthah chhonzawm a la ni zel a. A bik takin Pu Speaker, Prison Deptt. hi han sawi hmasa ila.

Hei, tunah hian Central Jail-a tang awm thei zat hi mi 438 an nih laiin, January ni 20, 2025 data ah khan mi 822 lai mai tang an awm a. Pu Speaker, 'Central Jail' kan tih hi tunah chuan '*Correction Center*' tia thlak te a ni a. Misualte dahna hmun tur ngawt ni lo, insiamthatna hmun tura ruahman a ni a. Chuvang chuan, kan sorkar hian Prison Department hian hma a sawn theihna turin ruahhmanna neih a tul hlein kan hria a ni.

Tunah hian Prison Department ah hian sanction post 135 a awm a, amaherawhchu, post 78 chiah hnawhkhah a ni a. Chutiang anih chuan, post ruak 57 a awm tihna a ni a. Tin, Jail Workers post 90 a awm a, tunah hian 43 hnawhkhah a ni a, post ruak la awm chu 47 tihna a ni. A paw hle mai a, Prison Department te an thawl hlein ka hria a. Hei hi kan sorkar hian ruahmanna tha tak neihpui vat a tulin ka hria a ni.

Tin, Pu Speaker, central jail kan han tlawh tum khan medical lam engnge an an kan han ti a. Health Department hian deputation-in medical officer, staff nurse 2 leh pharmacist 1 an dah a, chu chuan khumi central jail mai bakah Women Jail (hmeichhe awmna lampang cell) te, tin district jail te an la kawp vek mai a. Chuvang chuan, medical lamah pawh hian kan hnufum hlein ka hria a. Central jail a medical officer 1 leh staff nurse 2 ngawt awm lo hian, medical officer hi a harsa a nih chuan nurse tal chu pekbelh theih ni se a thain kan hria.

Tin, Pu Speaker, tunah hian Ministry of Home Affairs hnuaiia *Modernization of Prison Scheme* hmangin male-ward pawh sak zawh a ni tawh a. Amaherawhchu, approach-road tha a awm lova. Hei hi SASCI-a kan pawisa dah Mizoram pumpuia kan central jail leh kan district jail te cheithatna tur a awm theih chuan, bill tel theih ni ta se a thain ka ring a ni.

Tin, vei deuh mai pakhat ka neih chu - library an nei a, lehkhate chu a awm ve teuh mai a. Amaherawhchu, a building khu a hlui chhe takzet a, ruah tla ah pawh a him tawh lova. Tun SASCI suma central jail chei thatna turah hian library hi a tel lova, hei kan Minister hian ngaihpawimawh thei se. Khulai correction center atana kan hman tawh a nih chuan, correction center-a awmte'n lehkhateu tha an chhiar theihna tur library tha neih a tulin ka hria a ni.

Tin, an sa rate a tlawm lutuk mai a, kg ah ₹240/- in a supplier ten an chhang a, a paw takzetin ka hria. A awmzia chu, correction center kan ti a, a awmkhawmte'n vawksa, bawngsa an ei thei lo hrim hrim a, rate atang hian. Chuvang chuan, sorkar hian a rate hi a ennawnpui leh theih chuan a lawmawm hle ang.

Tin, tha em em mai chu, central jail, 'correction center' kan tihah hian industry tha deuh mai a awmin ka hria a. Mistiri leh helper thiam tak tak, kut-hnu mam leh hnathawk tha tak takte an awm a ni. Furniture tha tak tak an siam a, khang an siam a te kha jail tang, tuna

correction center-a awmte'n an thilsiam an hralh chhuahna a chanve an nei a. Nitin an thawh atangin hlawh zat tur an nei ve a, skilled worker -₹120/-, semi-skilled - ₹100/-, unskilled - ₹80/- te, heta tang hian department ah a chanve pawisa a lut a, a chanve chu anmahni account ah dahsak thin a ni. Hei vang hian Pu Speaker, ka rawt duh chu, central jail-a kut-themthiam tak tak furniture tha tak tak rawn siamchhuahte kha sorkar hian a zawrh chhuahna hmun siamsak ila a hlawkthlak hlein ka ring a ni. Tin, sorkar tan pawh revenue tha tak a nih theih bakah tuna awm mekte pawh an rawn chhuah hnua an bultanna tur sum leh paite pawh an inkhawl theihna tur a ni dawn bawk a ni.

Tin, Prison Department staff-te hlawh, an pay scale level hi a diklo lutuk mai a, hei hi sorkarin a hunlai khan a enpui ve lo nge? Tunah hian Asst. Jailor leh Jailor te hi level 7 ah ve ve an awm a. Asst. Jailor te hi Jailor-a promotion hmu tur chuan kum 10 - 15 vel an service a ngai a; level 7-a kum 15 a service hnu promotion a rawn hmu a, allowance ₹200/- vel a dawng a ni. Chutiang zelin Pu Speaker, helai ah hian sorkar hian an pay-level te pawh hi tunah hian enthatpuiin he Prison Deptt. kalphung zirchiangtu tur Home Department lam atanga din tawh niin ka hria a. Hetiang a nih ro-ro chuan, an pay level hi en-thatsaka, Asst. Jailor level 7-a an awm chuan, Jailor hi level 8 ah. Tin, tun hmaa Suptt. of Jailor level 8-a awm thin kha level 10-ah up nise, an level kha siam chhoh sak hi a tul hlein ka hre bawk a ni.

Tin, Pu Speaker, SASCI Part -I, nimin lama an sawi 'UC diklo thehluh' tihah khan a tel nge ka hre lova, Mizoram pumpuia kan jail-te chei-thatna tur ₹55/- crore dah atang hian central jail tan ₹13 crore bawr vel a awm a. Hei hi wawinah hian engnge kan an zel? He central jail chei-thatna tur tender hi chhuah a ni tawh em? Anih chuan, tunge a thawktu tura kan ruat? Wawinah hian chungte chu min hrih thei se a thain ka hria a.

Tin, Pu Speaker, Vairengte-ah hian Company Headquarters Home Department-in term hmasa MNF sorkar lai khan min dahsak a. Kan Company Headquarters hi mumal taka function tira thuam that zel a tulin ka hria a a. Ramri issue la thleng thei reng a nih avangin, chu chu kan Home Minister hian min hriatsak se. Tin, BoP ramri hrang hranga kan neihte tun aia changtlung zawka thuamthat a pawimawh hle mai a. Tin, Bilkhawthlir Police Outpost pawh a chhe tawh khawp mai a, ram pumah a chhia tih kan hriat rualin, eng emaw cheithat theihah chuan min lo ngaihpawimawh sak thei se ka lawm hle ang.

Tin, Pu Speaker, kuhva chungchang hi tawitein. Sorkar kal ta leh tun sorkar pawh indem thei kan lo awm biklo niin ka hria a. A harsa em mai a, tun sorkarah pawh tihrem kan tum viau a, mahse, a kal reng tho a. Chuvang chuan, nasa lehzuala sorkarin tan kan lak a tulin ka hria. Helai tualchhunga kan tharchhuah kuhva-te man man zawka kan hralh chhuah theihna turin dan lova lo lut te khuahkhirh hi tun aia nasa zawka kan tih a tul hle a. Hemi chungchangah hian Home Department pawhin tan a la nasa hlein ka hria a, fakawm ka ti a. Police-indaihlohna a nasa em mai a, tunah 200 lakbelh tura tih hi lawmawm ka ti a. a bak pawh lak belh theih dan a awm chuan. Finance Minister a awm lo nanga, Dy. Finance minister deuh Pu TBC-a, Adviser a awm a, ani pawhin a lo chhihchhiah theih chuan, Police lak belh leh kan ngai hle a ni.

Demand No. 30 - Disaster Management & Rehabilitation Department:

Tin, Pu Speaker, Demand No. 30, Disaster management chungchangah, Bilkhawthlir Community Hall hi a min a hlauhawm khawp mai a. Sorkar hmasa khan lungremna min pe a, lung tlem kan han rem a. Tunah hian rem chhunzawm a tulin a lang a, ruahmanna te

a awm thei a nih chuan a lawmawm hle ang a. Tin, vanduaithlak deuh main, kar hmasa tawp lam khan Vairengte-ah in pathum a kang a, mi pakhat a kang hlum a, a pawt tak zet a. He House kaltlang hian ka bial chhiat-tawhnaa kang hlumte, in chante ka tawrhpuithu kan sawi rualin, kan sorkar hian chhiat tawh chhungte hnenah ralna tur Disaster fund atangin a rang lamin min pek sak thei se. Tin, in hi nimin lam atangin sak leh tan a ni a, Bialtu MLA ka nihna angin in kang pathumte a a chung tur rangva ka tumsak a. Disaster hian heng chhiat-tawh tanpuina tura ruahmanna te chak zawka kalpuia, min pek vat theih chuan a lawmawm hle dawn a ni.

Demand No. 46 - Urban Development & Poverty Alleviation Department:

Tin, Demand No. 46, UD&PA ah hian, *urban-town* kan awm ve a, keini bialah pawh Vairengte hi urban-town area a ni a. Chutah chuan, min enkawl turin district-ah DUDO a awm a ni. Kan district-a DUDO hian nasa lehzuala a enkawl a tulin ka hria a. A power & function chhung a ni emaw, sum leh paiah a ni emaw, ruahmanna chak zawk leh thingtlang lampanga notified town ten hmasawna kan neih lehzual theihna turin thuam chak a ngai hle a ni. Tin, Aizawl-Smart City hian hma a la nasa hle mai a, heng fund te hi notified town area develop-na tura pawhpen theih dan te a awm em? A awm loh phei chuan, UD&PA Department hnuai atangin eng tin emaw kan sorkar chuan kan thiam maiin ka ring a, DUDO tihchakna tura ruahman dan te a awm theih chuan, tih kha ka sawi duh a.

Demand No. 31 - Agriculture & Farmers' Welfare Department:

Pu Speaker, point hnih-khat leka ka sawi leh duh chu Agriculture, Demand No. 31 hi. Hmunphiah hi kan tifuh lovin ka hria a. ZPM lo sorkar hma chuan hmunphiah hralhna rate a buai vak lo a. Nichina kan Opp. Leader sawi ang deuh khan, hmunphiah keh hun hi January – February a ni a, March thla chuan keh tur a awm tawh vak lo a. Research kan beih laiin thingtlang lama hmunphiah chingtute khua kan tlawhin kan zirchiang lo deuh em maw ni, ka ti a. A roa lei tih hian thingtlang miharsa tak takten a tihrona hmunhma an nei lo a, a tihrona tur silpaulin te kan han pe a, an han pho ve dul a. Amaherawhchu, zan lama buaipui te a lo ngai a; tiang reng reng khan, hmunhma a lo awm lo nen; hei hi a fuh lovin ka hria a. Kan sorkar hian ‘mipuite tan’ tiin keini bial lama a tam zawk chu a hringa hralh thin a ni a. Chuvang chuan, ‘hmunphiah kg ah 40/- aia hniam lovin sorkarin a hringin kan la ang’ ti mai ila, sorkar inrawlh tam ngai lovin, a rate control chuan vaiho hian an rawn la leh thei maiin ka ring a ni.

Pu Speaker, Agriculture ah hian, Serlui bial hi potential area tha ber a ni a. Kan Minister hi a kal tawhin ka hria a, vawihnih-vawithum. Tin, kan bial chhungah pawh hmunhma a nei a, leilet hmunpui kan ni a. A bikin Bilkhawthlir-Chemphai leilet phei khu chu chhungkaw 100 rual teh tak meuhin leilet leh sangha dil te, thali te kan chinna hmun a ni a. A kawng khu siamthat a ngai hle mai a, hei hi ruahmanna awm thei hmasaah min hre ta se. Tin, Vairengte-Sesihzau kawng khu siamthat ngei ngei ngai bawka a ni tih ka sawi duh bawka a ni.

Pu Speaker, tikhan kan Minister zahawm tak takte pahnih demand hi a tha ka ti a, ka pawmpui thu ka rawn sawi a ni e. Ka lawm e.

SPEAKER : Tunah Member zahawm tak Pu T. Lalhlipua ilo sawm ang.

PU T. LALHLIMPUA: Pu Speaker, ka lawm e. Vawiinah hian kan Minister zahawm tak takte pahnih - Pu K. Sapdanga leh Pu PC Vanlalruata te demand kan sawi thei tur hi a lawmawm ka ti hle a.

Demand for Grant 2025-2026 lehkhabu kan dawn kan han thlir atanga thil lang tha deuh ka hmuh hi sawi hmasak ka duh a. Chu chu, *office-expenditure* hi department demand zawng zawngah a hniam deuh vek mai a. Hei hi *engnge a chhan ni ang* tih ka ngaihtuah a. *Digitalization* avang te a nih theih tho rualin, department te inhuamna management ni turah kan ngai a. Chutih rual chuan, ZPM sorkarin inremchenna kan kalpui hi kumin session, financial year chho-ah hi chuan department-te pawhin min tawmpui niin ka hria a. Vawiinah hian department-te kan demand hetiangah lo lang hi hmasawmna tha tak niin ka hria a, lawmthu kan sawi a ni.

Demand No. 46 - Urban Development & Poverty Alleviation Department:

Tichuan, Demand No. 46 - UD & PA atang hian sawi tan ila. Nikumah smart-city fund atangin Pollution Control Board hnuaiyah pollution test-na tur mobile van leh eng emaw kan lei a. Tichuan, session-ah hian sawiin, 'Lunglei tan pakhat tal min pe ve rawh u' tiin ka ngen a, kan Minister te hmalaknain Lunglei pawhin kan chhawrbawk ve a. Tunah hian, Aizawl-in an buaipui ang tho hian Lunglei pawh pollution test kan buaipui ve a, hmun chep apiangah a buaithlak a ni. Tunah Aizawl pawh kan hria a, khutah MINECO-ah kan intlar nghek-nghuk a, chutiang tho chu a ni. Chuvang chuan, MPCB staff te hian Lunglei-ah thahnem-ngaihna in te an sa a, chutah chuan, MLA fund te contribute ve turin min ti a. Convergence-in Rahsi Veng ah in te-tak-te mi veranda ah kan siam a, hma kan la a. Vawiinah hemi chungchangah hian kan Minister pawhin min hriatpui ta sela - hmasawn kan ngai viau mai, Mizoram pumpui ang pawhin.

Nichinah khan member zahawm tak Pu Lalramliana Papua khan a sawi tawh a. Lunglei Municipal Council hi sawichhuah loh theih loh hi a ni ve a. A chhan chu, Lunglei Municipal Area-a kan mipui rethei zawkte harsatna hi vawiinah he House-ah hian auchhuahpui ve tul ka ti a. ZPM-sorkarah hian hmasawmna eng emaw zat kan hmuin, Minister leh Chief Minister ten hma min lakpuina tam tak a awm a. Amaherawhchu, vawiinah hian lawm a la kim thei lo a ni. Kumin LMC budget ah hian ₹704.17 lakh dah a ni a, nikum budget aiin nuai 101/- vel chuan a tam. Nimahsela, House zahawm taka ka'n sawi duh chu, hei hi full-fledge function tur chuan a la beitham hle mai a. Nichinah khan kan ngaihla tawh a, 'LMC pianto a fuh lo' tih chu Zoram tlang hriat a ni a. Sorkar hmasaah *barhluih* Municipal Council kan neih tak si-ah chuan tun sorkar hian hma chak takin kan lak a tul a, draft rules eng emaw te pawh siam ve a ni a. Mahsela, sum indaihlohna avanga pawmpui hleih theih loh thil tam tak a awm a. Chuvang chuan, vawiinah he House-ah hian kan Minister pawh kan ngen duh a ni.

Tichuan, veng thenkhat phei chu *Aigupta sabel* ngaiin tunah hian an awm mek a, an aupui mek a, sorkar hian a ngaihtuahpui a tul tak zet a ni. Tunhmaa kan awmdan ngai kha veng eng emaw zat an awm mek a. Chungte au-hla chu kan tan hriat a hrehawm em em a ni. Municipal Complex te pawh ruahman a ni a, nimahsela, hmalak erawh a har em em. Vawiinah chung te chu ka'n tarlang duh a ni.

Demand No. 16 - Home Department:

Tin, Demand No. 16 – Home-ah hian, Police housing chungchang hi nikum lamah pawh khan eng emaw zat chhia a awm thu sawi a ni tawh a. Kan in bulah a awm a ni a, a tlu sawp rem rum, rangva leh tile keh nen a bulah a awm zeizui mai a. Vawiinah hian chungah te chuan hma min lakpui a tul em em a ni tih ka sawi duh a.

Tin, hmanni February Ni 25 khan Lunglei District Jail renovation leh extension awm thei tura sorkar ruahman nia ka hriat avangin kei pawhin ka va tlawh a; hmeichhe puanthui zirna te pawh an lo hawng a. Jail-a awmte an hriselna lamah harsatna an tawk nasa hle mai a. Fund atangin toilet siamna te, duty post siamna te kan han inpe a. Tin, homeguard duty mi 15 vel an lo awm a, an awmna te ka'n en chu, a va han hrehawm dawn em, ka ti a ni. Silpaulin zar hnuaiah, thli te tleh se engtinngan an awm ang aw tih te, ngaihtuahna a kal thui hle. Guard 15 tan tui litre 1000 tanky an nei ve a, karhnih danah tui a haw lehngal. Khami ni khan Pi Zonuni, kan ward-councillor ka hruai hlauh a, aniin a fund atangin tanky te min pek belh a, a chungah pawh lawmthu he House kaltlang hian ka sawi a. Tiang chuan, quarters luah aiin Police te chuan mimal in luah eng emaw zat Lunglei khawchhungah phei chuan an awm a, an insawn chhuak mek a ni. A chhan chu slap 3 vel kha fur lai chuan a leak tluan thla thak thei a ni. Chutiang khawp chuan kan quarters, housing te saw a chhia a ni.

Demand No. 30 - Disaster Management & Rehabilitation Department:

Tichuan Demand No. 30 - Disaster Management & Rehabilitation-ah hian cyclone *remal* avang khan ka bialah pawh siamthat ngai a tam hle mai a. Kawlhawk, Vanhne, Rahsi Veng, Venglai leh Bazar Vengah te tun furah hian engnge lo thleng ang tih ngaihtuah tham a ni. Leimin awm thei tur avanga in hlauhawm tak taka awmte a awm a, MLA fund-in dawm ve bawk mah ila, dawm sen a ni lo a ni. A tul zual te hi sum awm se tih thuai thuai, tuna season lai hian a chakawm khawp mai a. Vawiinah hian kan Minister pawh ka'n ngen duh chu – Thil hmanhmawh thlak bik hi chu sum a awm chuan, tih thuai-thuai theih tura ruahmanna kan siam pawh a tulin ka hria a ni.

Demand No. 31 - Agriculture & Farmers' Welfare Department:

Tichuan Demand No. 31- Agriculture & Farmers' Welfare Department ah hian, oil palm hi rate awmsa a ni tih kan hre theuh awm e. Nimahsela, tunah hian hlamchhiah, hlam zuih deuh a ni a. Chutih rual chuan, environment effect hi oil-palm ah hian a nasa riau mai a, chu chu Zoram zimteah hian ngaihtuah tham pawh a ni. Chutihrual erawh chuan, hmalak hi zoram ang pawhin a tul ve tho niin ka hria a.

Tichuan, kan biala Buarpui ah khuan Chhawhchhi hriak herna sorkar hmasa khan a dah a, hemi chawm tur hian bialte pawh uar taka ching tura infuih a tul hle a. Chutihrual erawh chuan, department lam atanga enkawlto tur Buarpui ah hian tumah kan nei lova; khawl a inbun ve ringawt a, hengte pawh hi sorkar hian min ngaihtuah a tul em em a ni. Staff indaihlohna te hi chu thil awmsa a ni a, sawi ngai lovah dah ta ila; Lunglei District pumpuini Agriculture Department hnuaia kan mamawh em em nia ka hriat chu, Agriculture Centre din ve hi Lunglei District tan hian a tul tawh a ni. Chutah chuan kan thlaichin dan zirna ang chi te, test ngai te, vawn that ngai te, khawl hman ngai te tunlai khawvel changkang tawhah agriculture lo neihah pawh hian a tul hnem tawh lutuk a ni. Chuvang chuan, hengte hi district ang pawh hian kan mamawh ve tawh ngawih ngawih a.

Tin, *Green-Agriculture* chhim lama hmalaknaah Thorang leh Mamit lama ramngaw humhalh chungchang thu ah, loneitute an insawn zel lohna tura *Green Agriculture* hmalakna te pawh a awm mek a. Chuta harsatna kan neih chu – ASF avang te pawhin hmun ngaia sumdawna, ranvul tanpuina te pawh hi tih hleih theih loh a ni a, hengah te pawh hian sorkar ke kan pen a tul em em a ni. Tichuan, nikum 2024 Assembly-ah khan ka sawi a; Bazar Veng market shed inthlan dawna sak rup rup kha kan chhonzawm theih loh ka hlau em em a, House-ah hian ka sawi a. Tah chuan, kan minister te hmalaknain min han tihsak thei hi ka lawm em em a ni.

Pakhat chiah. Cooperation Department-ah hian Pu Speaker, an hna pangngai nia an sawi chu, ‘primary society register tawh te audit bak hi hmalakna dang vak kan nei hlei thei lo’ an ti a; chutiang chu kan Co-operation Department hmalakna anih avangin, Co-operation Department hi tihchak a tul em em a ni.

Vawiinah hian sawi tur tam tak a awm a, nimahsela, kan sawi seng lova. Pu PC Vanlalruata leh Pu K. Sapdanga, kan Minister zahawm takte demand hi vawiinah hian ka pawmpui a, pawmpui an ngenna pawh ka thlawp a ni. Ka lawm e.

(Speech not corrected.)

SPEAKER : A lawmawm e. Tunah chuan, Pu Ramthanmawia ilo sawm ang.

PU RAMTHANMAWIA: Pu Speaker, ka lawm e. Hei vawiinah kan Minister zahawm tak takte pahnih Pu K. Sapdanga leh Pu PC Vanlalruata te demand kan han sawiho thei tur hi lawmawm ka ti hle mai a.

Demand No. 16 - Home Department:

A hmasain Demand No. 16 - Home Department-ah hian, sum dah hi kum kal mek aiin ₹26,71,000/-in a pung a, a lawmawm hlein ka hria a. Hengte hi Home Department-in mamawh hrang hrang a neih kan sawi mekte tan hian tangkai takin kan hman theih ka beisei a. Hei police kan la dawn a. Kan force mite hi vanduaiana avanga nunna chan tam tak an awm tawh a; ban ngai te, pension-a chhuakte avangin post ruak tam tak a awm a. Tuna police 200 lak tur mai bakah hian kan Home Minister hian tan han la zel sela. Anni hi kan kut-ke ber rikrum thilah te, eng emaw hlekah kan hmachhuan leh kan aiawha ral hmaa dingte an nih avangin, duat pawh an ngai khawpin ka hria a ni. Mahse, kan duh angin kan duat thei lo erawh a pawh ka ti a.

Pu Speaker, hun hmasa ah te pawh kan han sawi a, Zoram pum angah pawh lirthei ah hian kan police-te hi an indaih lo em em a. Lirthei lo chuan tunlaih thil sual han umzuina leh thil hrang hrangah pawh a harsa a. Chuvangin, vehicle kan ngaihtuhsak a ngai tak meuh meuh a.

Tin, Pu Speaker, ka biala Dungtlang Police Station hi la naupang te a ni a, mamawh an ngahin tihchangtlun a ngai zel a. Staff-quarters te, security fencing te leh tul dang tam tak a la awm a. Hei hi min chhinchhiah saka hma min lak sak ka ngen duh a. Tin, Farkawn hi ramri bula awm a ni a, a ral lehlamah helin camp lian deuh an nei a. 2023 khati laia DGP han kal khan a han hmuh kha, a ngaih a tha lova. Khawtlang hruaitute ko khawmin, ‘heti ringawt hi chuan a dik thei lo’ a ti a. Farkawn ah khian police 3 vel chauh an awm a ni. Tichuan, ‘Force tam zawk dahna tur hmunhma ngaihtuah rawh u’ an ti a, an hmu thei lawk lova. Amaherawhchu, tun hnaiah remchang deuh awm thei dawnin an hre ta a, chulai chu

kan Home Minister zahawm tak hian min chhinchhiah sak tawhin ka hria a. Hei hi a ranglama min tihpuitlin sak turin ka ngen a ni.

A chhan chu, ram ri mai a ni lova, lehlamah rambuai ni bawk si a; zan khat thil thua security thilah harsatna tawk thut thei kan nih avangin, Champhai North bialtu zahawm takin a sawi ang khan khilai Champhai vel khi chu inrin reng kan ngai a ni. Kan hriat tak angin khilam atang khian thil tha tam tak, bungraw tha tam tak a lo luh laiin, kan duh loh em em ruihhlo te a lo lut a, kan buaipui em em a. Chuvang chuan, a enkawltu tur force kan tihchhah a ngai a ni, kha Pu Speaker.

Demand No. 46 - Urban Development & Poverty Alleviation Department:

Pu Speaker, Demand No. 46 - UD&PA-a sum dah hi crore ₹42 zetin nikum aiin a tlem leh bawk a. Hei hi a chhan eng nge ni ang ka ti a; pung tura kan beisei laiin a tlem ta tlat mai hi. Pu Speaker, UD&PA hnuaiiah hian 2021-a notified-town-a puan khaw 4-5 vel a awm a. Chutah chuan, ka bial chhunga Farkawn leh Khawbung tan sorkarah kan dil ve a. Amaherawhchu, a rual khan a theih loh e an tih avangin, a khaw lian zawk, mihring tamna zawk sorkarin min pe ta a. Tunah hian Khawbung tana kan dilna kha a la awm rengin ka hria a. Chung te pawh chu a remchan velah min ngaihtuah sak kan beisei a.

Tin, Covid avanga sum harsatnain min tlakbuak chhoh tak zel avangin, engmah tihphuisui leh hmalakna hemi kawngah hian vawiin ni thlengin function tak tak thei lovin kan awm a, hei hi sorkar tharah hian kan beisei leh a. A nihna tur ang taka Farkawn khua hi cheimawina leh thianghlimna lamah UD&PA ina hma a lakna thinah te hma min laksak turin ka ngen duh bawk a ni.

Demand No. 31 - Agriculture & Farmers' Welfare Department:

Pu Speaker, Demand No. 31 - Agriculture & Farmers' Welfare Department hi kum hmasa lama sum dah aia tam zawk tura kan ngaih laiin, crore ₹12 zetin nikum aiin a hniam ta zawk tlat mai a. Agriculture Department hi a pawimawh a, Mizoram mipui 70% aia tam kan inngahna a ni a. Chuti chungin kan budget-a kan dah tlem duai mai hi, hma thar lak vak kan tum lo nge, tih te pawhin a ngaihtuah theih rum-rum a.

Tichuan, sawhthing hi, Pu Speaker, tunah kan han leisak ta a, a lawmawm a. Mipuite nghahhlel a ni a,inthlan hmaa kan au-hla ah pawh khan sawhthing ching turin mipui pawh kan zirtir a ni ber a. Sawhthing ching ngai lo te pawhin theihtawp chhuahin ramhnuaiiah an riak lut a, an ching a. Vawiinah hian kan sorkar hian kg ah ₹50/- in an lei tan a. Amaherawhchu, kan lei dan a hi mipui tena an lo beisei ang nilo; *Sa tah chhuak pek* ang vel a ni a. Inleisak ni ve si, 'min lei sak lo' ti dawn se, leisak ni ve ang reng siin kan kal a. Hei hi chu sorkar ropui tak, mipui beisei sorkar kha kan ang ta lo riauin ka hria a, a pawika ti a. Han tang lehzual se ka duh khawp mai, Pu Speaker.

Thil pakhat serious deuh nia ka ngaih chu, Pu Speaker, khaw tinah Society te kan din a, a tha em em a. Khaw tam takah party induhsakna awm lovin, Society-a an inziak-lutin sawhthing kha an lei/hralh tir a ni. Amaherawhchu, ka biala khaw 6 velah chuan party dang hralh an phal tlat lo. Chumai ni lovin, ka bial khaw pakhat chuan nu-pakhat damlo a inentir a, nu-upa lam kum 71 mi a ni a. "Aizawl lama i kal vat a ngai, rang takin," an ti a. Kalna tur leh in enkawlina tur a neih loh avangin, Society hotu, ZPM hruaitu hnenah a va kal a, "Hei, ka dinmun hetiang hi a ni a, bag 2-3 tal hi chu min hralh tir ve mai rawh,"

tiin a va ngen a ni. Amaherawhchu, a va ngenna-pa khan a lo chhan dan chu, “ZPM-a i in-enroll phawt loh chuan..” a lo ti tlat! Mipui-sorkar tia kan thlamuanpui tehreng nen; hetiang rilru pu kan naute zingah an lo la awm anih chuan, Pu Speaker, an hming, an nihna leh an khua ngei pawh ka hrilh thei ang che. Chuvang chuan, ka rilruin ka han zawt chiang a, a damdawi-in kalna tur ₹20,000/- ka han thawn a ni.

Pu Speaker, heng hi kan kalpui dan tur anih chuan, eng sorkar hi nge ‘sorkar-tha, mipui-sorkar’ kan tih ang? Kan Minister ten in hriatpui lovang, mahse in nauteho an khaw lama an inhrawt dan hi chu hre rawh u, Pu Speaker. Hetiang anih chuan, ‘kan ramah Pathian ram lo thleng rawh se’ tih chu a hla dawn khawp. Kha pitar na ti lutukin, “ka thih leh ka thi mai ang; society-a ka in enroll chuan a tawh mai lawm ni?” a tih pawhin, an lei sak duh chuang lo a ni. Chu chu tuna kan ZPM party sawhthing lei tura kan tih te awmdan a ni.

Engpawh ni se la, vawiiina demand kan sawi ho hi, a sum leh paia kha a lo tlem deuh a nih pawhin a hmanna tur dik se, daihzai takin a hman theih ang a. Sum hi tam mah se, a hmanna a dik loh chuan awmzia a awm chuang lo. Pu Speaker, he sum leh pai, Demand kan sawi ho hi dik leh fel tak, rinawm taka hman anih theihna turin duhsakna ka hlan a, ka support bawh a ni e. Ka lawm e.

(Speech not corrected.)

SPEAKER : Member zahawm tak Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. Vawiiina kan Minister zahawmtak pahnihte - Pu K. Sapdanga leh Pu PC Vanlalruata te demand sawi tura helaia dinna chance ka nei hi ka lawm hle mai a.

Demand No. 16 - Home Department:

Demand No. 16 Home hi, ka hmaa lo ding tawh kan MLA zahawm takte pahnih khan central jail an ngaihpawimawh zia an rawn sawi tawh a. Central Jail hi Ni 20th January, 2025 khan Subject Committee hovin kan zuk tlawh a. Chuta ka notice hmasak bera chu, kan central jail kha leh chen repair ni tawh lo kha kan hmuh hmasak ber chu a ni a; a lo rawih tawh ropui si a.

Tin, central jail hi thil tisuante dahkhawmna in chu a ni ngei mai. Chutih rual erawh chuan, inhremna hmun ngawt nilo, miin nun dik an lo zirchhuah lehna *correctional institute* pakhat anih angin, jail inmates zawng zawngte kan mihring puite vek annih angin, nuamsa taka an chenna chu kan beiseipui phak lo ang a, mihringte tana chenna tlak erawh chu an *rights* a ni ve a, mihringte chenna tlak a ni tur a ni a. Kan zuk kal khan, a desired capacity chu 434 awm theihna tur niin ka hria a, ka sawi sual ka hlau deuh a. Amaherawhchu, kan zuk tlawh ni khan tang kha 822 an awm a ni; a let deuh thaw hlawk mai kha an lo tang a ni.

Tunah khan Home changtu minister chak tak hmalaknain a sak thatna tur sanction tam tawh a lo awm reng tih ka hriat khan, ka lawm em em mai a. An room indaihlohna te, a building himlo, hlui lutuk tak, a then chu tlu mai thei tur awm anga lang te repair a ni thei dawn tih ka hriatin, a changtu Home Minister chungah jail tang ho zawng zawng leh jail staff te aiawhin lawmthu kan sawi a.

Jail han sawi takah chuan, mahni bial lam thahnemngaih hi a na a, nimin lama zawhna hunah te khan hun ka lo hmang duham deuh hlek a, ka lo bawhpelhna ah khan ngaihdam kan dil a. Thahnemngaih hi a na lutuk ve thin a.

Pu Speaker, Champhai District Jail a rawih tawh zia leh a lo chhiat tawh zia session hmasa lamah pawh kan lo sawi tawh thin a. Room an indaihlohna pawh district jail aiin a la nasa zawk a ni. Khatiang bawh khan jail tangte chep takin an awm a. Tin, Champhai District Jail hi district pahnih, Champhai leh Khawzawl district intawm anih avangin indaihloh a na lehzual a. Chuvangin, a sak thatna tur sorkarin a sanction hi a lawmawm ka ti a, ka bial leh Champhai District pumpui aiawhin lawmthu ka sawi bawh a. Tin, jail tang kut-themthiam, an thil siamte hralh chhuaha, sum chang thei tura buaipuitu pawl *Jehovah Jireh* an awm a, an ti tha em em mai a. Jail tangte training an pe thin a, an thil thiam an siamchhuah te bazarah te an zawhsak a, sumah an chantir thin a. Chumi ina a hrinchhuah thil tha em em mai, he House zahawm taka ka share duh chu – Nu-pakhat tar tawh, hrisello deuh mai, kan tawng mawilo ni suh sela, pasal nei lo ('hmeithai' kan tih mai, a mizo-tawng chuan) a fa neih chhun, amah chawmtu tur kha jail a tang hlauh mai a ni. A jail tannaah khan a kut-themthiamna thilte kha *Jehovah Jireh* pawlin an hralh sak a, chumi pawisa chuan a nu hrisello, damlo inenkawl ngai ni bawh si kha, a sum hmuhchhuah atang chuan a chawm ve tlat mai a ni.

He thil themthiamna atanga an deh chhuahte hi a pawimawh em em a, a zirtir thin tute ho khan bungrua an duh tawka an neih kim loh avangin ka hnenah an rawn thlen ve thin a, lo puilh theih kha ka chak em em mai a. Amaherawhchu, Home Department-ah ka thlen a, an niin hrethiam tak maiin tanpuina, an bungraw leina tur an han pe hlauh mai a, an lawm em em a; an aiawhin lawmthu kan sawi leh bawh a. Khatiang khan a aia tam zawk, a aia chhenfakawm zawkin an thiam thilte kha an dek chhuak thei tawh ta a ni. Tin, Champhai District Jail awmna hi 'Jail-Veng' tiha koh a ni a, a vengtu homeguards ho quarters an neih chhun te a sakna a rei tawh avangin a hlui tawh em em mai a, sak that sak an mamawh hle mai a. Sanction hi extend leh deuh te a lo ngai anih pawhin, kan mamawhna hi kan rawn thlen pah bawh a ni.

Sawichhuah ka chak em em pakhat chu, Home Department hnuaiah hian tunah hian 'Mizoram Ex-Services League' tih a awm a. Ex- Services ho hian job-reservation 5% an nei ve a, amaherawhchu, tun hma atangin ngaihsak an hlauh ngai lo a. Tun sorkar thar atang hian hengte hi kan chanvo dik tak, kan *rights* kha kan thlen ve thin a, Home Deptt. hian min lo ngaihsak thin a, lawmthu kan sawi bawh a. Tunah hian kan MESL aiawha ka sawi duh chu, Zoram chhunga pensioners/ex-servicemen te hian Mizoram budget khawih buai miah lo, central atanga an pension an lakluh hi thlatin crore 35 ang a ni. Chu chuan Mizoram chhunga pawisa leng vel hi nasa takin a pui a ni. Chuvangin, anni hi kum 40 pawh la tling mang lo te'n an rawn chhuak a, Zoram tan hian an la pawimawh zia te hriaa ngaihsak anni hi a lawmawm ka ti a, an experience, training-a an lo pal sil tawh zawng zawng kha Zoram tan tangkai takin an rawn hmang thei dawn a. Zoram tana an contribute let ve theihna tur leh chhawr theih tur opportunity kan lo hawn sak hi a lawmawm ka ti a.

Kan police te, a hmaa kan CM te pawhin a lo sawi sual nawk-nawk thin, *kut vung ber bur, ke vung ber bur* te an lo tlem theihna turin tunah hian 'Agniveer' tih a awm a. Indian Army recruitment system thara lutte hi *Agniveer* tih an ni a, a service hun chhung hi kum 4 period a ni. Indian Army training centre hmun pawimawh lutuk maiah training tha tak neiin an lo

chhuak ang a, kum 4 chauh an service hnuah 75% chu an rawn chhuak ang a, an zinga 25% chu permanent-in an lut ang. He system thara lut hmasa berte kha kum 2022 khan an lut a, kum 2026 hian a batch hmasa ber chu an rawn chhuak dawn a ni. Hengho hi police atan an tha dawn lutuk a, sipaiah hian kum 17 - 21 inkar chiah lak a ni a, chutiang anih chuan kum 4 an service hnuah an lo chhuaha, training tha si, la thalai si, kum 25 hnuai lam hlir an rawn ni dawn a, police tan ideal lutuk an ni dawn a ni. Helaiah ex-servicemen satliah anga rawn vak mai mai lo khan, khang naupang si, training tha dawng vek si te kha kan Home Minister zahawm tak hian min lo hriat sak se, kan police atan hian an tha dawn mang e ka ti a ni.

Demand No. 31 - Agriculture & Farmers' Welfare Department:

Agriculture lama han sawi ka duh ve chu, Pu Speaker, Agriculture & Farmers' Welfare demand No. 31 leh 37, Irrigation hi ka'n sawikawp tawh mai ang a. Nichina kan sawi, Mizoram-a la awm ngai reng reng lo, sorkarin sawhthing a la lei sak ngai reng reng loh tunah a tlem berah kg ah 50/-a hralh vek theihna tura hmalakna, sorkarin a lo intiam tawh ang ngeiin hlawhtling taka kalpui a ni hi lawmawm ka ti a, loneitute zawng zawng aiawhin lawmthu kan sawi bawk a.

Tin, tuna kan lo neih danah hian han sawi ka duh chu, ka bialah khian tui laka eizawna hi kan uar bik a, sangha khawi te, leileta eizawna te a ni a. Hriat lar danah chuan, Champhai te phei chu 'Rice Bowl of Mizoram' tih hial te a ni a. Khilaiah khian tui duh khawpa a tam loh avangin, kan buh thar te a tam theih nan under-water reserve harvest tih dan tur ngaihtuah nise. Phai lamah chuan kum khatah vawi hnih te buh an thar thin a. Keini hian kum khatah vawi hnih kan thar theih lohna chhan chu, tui kham khawp kan hmuh loh vang a ni a. Tui kham khawp hi awm se chuan, kum khata tin 100 thar thin khan tin 200 a thar tawh dawn a, loneitute, buh thartute'n hlawk zawkin an lo thar thei tawh dawn a ni.

Tichuan, Pu Speaker, kan Minister zahawm takte pahnih - Pu K. Sapdanga leh Pu PC Vanlalruata te demand hi lungrual taka pass turin ka rawn thlawp a ni e. Ka lawm e.

SPEAKER : Tunah chuan, Member zahawm tak Pu K. Hrahmo ilo sawm ang.

PU K. HRAMO : Pu Speaker, ka lawm e. Ka bial lam thil ka buaipui avangin minute hnihin ka tlai a, a paw khawp mai. Pu Speaker, kan minister zahawm takte pahnih Demand No. 13,16, 30, 46 leh Demand Nos. 31, 37 leh 47 te hi a kawpin ka lo sawi mai ang a, a ngaihthlak dan min lo thiamsak ka duh a ni.

Demand No. 31 - Agriculture & Farmers' Welfare Department:

India sorkar hian ngaihdan leh duhdan a nei a. India ram ropuina hi lo neitute kutah a innghat a ni tih a chian em avangin, Agriculture leh Farmers Welfare lamah sum tam tak an dah a. Hei, nikum leh kum hmasa atang khan India ram production hi kum 2027-ah chuan, 'a let 4-in a pung tur a ni', tih policy neiin sum tam tak nen Agriculture leh Farmers lamah an tui a. Chutianga an kal mup mup laiin, "kan sorkar hi mirethei leh kut-hnathawktute thian kan ni" titute hian kumin Agriculture leh Farmers Welfare budget-a sum awmsa ngai thei lovin, an titem leh a. Hei hi engnge a chhan nia, engtingge kal an tum? Central sumah kan innghat dawn anih hmel a; Central lam an inphal viau chuan a tha a. Mahse, kan scheme siam te min pawmsak loh phei chuan, agriculture lamah hian engmah kan ni dawn lo tih chu a chiang a ni.

Chuvangin, 70% vel chu central lamah kan inngat a ni tih a chiang a, kan budget-a pawisa kan dah dan atang hian. Mahse, central lamin ‘ti rawh u’, an tih kan awih baw si loh chuan engtin nge kan kal dawn ni? Eng pawh nise, a awmsa atang hian, kan Agriculture minister hi a la thalai baw a; a tuan a thain a taima baw a, a tuipei baw a, hma pawh chak takin a la mek a, a lawmawm hle a. A hma laknaah pawh a fakawm khawp mai.

Amaherawhchu, Autonomous area atang chuan, Esopa thawnthu an sawi ngaihthlakin kan la ngaithla rih a, engmah hi kum khat chhung hian kan hnen a la rawn thleng lova, kumin chu saw lamah tan min lakpui ve deuh ka beisei a ni.

He House-ah hian *first session* kan neih khan ka sawi tawh a, ka bialah phaizawl tha tak mai, ‘Rice Bowl of Siaha District’ kan nei ve a. Kan House Leader, kan Chief Minister zahawm tak pawhin, ‘Phura leh Tam Dil chu ka hria a, ka thleng tawh a; sorkarin hma a la dawn e’, a ti a, kan lawm khawp mai a. Assurance min pe tawhah ka ngai a ni. Mahse hei, kum khat chuang a kal tawh a, engmah hma lakna a awm baw si lova. ‘Phura’ han tih hian, Phura zawl chauh nilo, a vela khua Maisa leh khaw dangte pawh ‘Phura zawl’ tih vek a ni a. Tin, a thlang deuhah Lopu te, Khaikhy te zawl tha lutuk awmna a ni a, hectare 800 vel chu a ni hrim hrim a. An theih ang tawkin an enkawl ve a, an problem ber chu, leileh nana an hman bawng leh lawi tam lutuk tawh kha an control thei tawh lo hi a ni. Lawi hi tunah khian 700 vel a awm a, a replace turin tractor a tam thei ang berah 20-30 vel awm se, ran khi ti ral se, tichuan, kum khatah buh vawi hnih a thar theih a ni. Tichuan, thlasik-thlai chin tir ila, Siaha leh Lawngtlai District chuan an ei seng lo ang. Chuti khawpa thlai tharchhuah theihna tur ram chu a ni a. Tuna kan problem ber, ran tam lutuk replace nana an mamawh em em chu *tractor* a ni, tih hi number one-ah ka sawi duh a.

Demand No. 47 - Irrigation & Water Resources Department:

A pahnihna-ah chuan, tui awmna khi metre hnih vel chauha sang a ni a, kan chhawr tak tak thei lova. Chuvangin, tuna India sorkarin policy a kalpui mek, solar-pumping hmanga leilet tui la neilote pek ang chi kha min tihsak theih chuan kan lawm hle ang, tih kha ka sawi duh baw a.

Irrigation lamah hian, Congress sorkar a tlak dawn khan central scheme atangin sum hmuh a ni a, mahse khawih hman a ni ta lova. MNF a lo sorkar a, khitah Siasih, (Mizoram chhim tawp) Burma ramria awm a ni a. Hei kan Health Minister hi chu a va thleng tawh a, MDC bye-election lai khan kan Adviser to CM pawh hi BJP beiin a rawn kal ve tawh a. Hetah pawh hian zawl tha deuh mai a awm ve a ni. Khata tang khan sorkar hmasaah khan irrigation min siamsak turin an va dil leh a, min rawn pe ngei a. Tichuan, MNF an rawn sorkar leh a, eng emaw chen chu an siam ve a ni. Mahse, a tui lakna kha, ‘lei kan laih chuan a chi lo ang; pipe-in ka la ang’ an ti a, pipe hmanga tui lakna kha ruahman a ni ta a. A pipe tur kha a thlenna a rei tawh a, tunah Lunglei ah kum 4-5 vel lai a awm tawh a. “Engatinge, pipe thlenna a rei tawh si a, kan va hmu lo ve”, an tihin, “last instalment - pipe phurh chhohna tur leh a hmuna fit-na tur labour charge tur sum kan la hmu thei lo” an ti a; pipe kha la phum lohin hei chen hi a awm tawh a ni.

Pu Speaker, saw saw central scheme last instalment nghak lovin, State sum awmsa atang hian a phurh chhoh dan a awm thei ang em? Hei, kan hma lawkah hian fur a lo thleng mai dawn si a, kan nghakhlel ve tawh bawk nen. Chuvangin, kan Minister zahawm tak

irrigation changtu hian a pipe awmsa phurh chhohna leh a hmuna fitting labour charge hi state sum atangin min ngaihtuah sak thei chuan a lawmawm hle ang.

Tin, Lomasu, Bymari, Tokalo tih velah hian chhawhchhi an ching nasa hle mai a, in khatah tin 100 te, tin 160 te an thar a ni. “Hei, in va han thar tha hlawm ve; in ei seng dawn em ni?” ka tih chuan, “E, ka Pu, ei lo ve; Tuipuah Lawngin, Burma ho an lo chho a, tin khat ₹1,000/- te, ₹1,200/- te-in an lei a, khutah Akyapah an phur thla a, an her a; a telin an rawn hralh leh thin a ni”, an ti a. Burma lam pawhin an tih theih chuan India hian engvangin nge kan tih theih loh ang, tiin, chhawhchhi herna khawl ₹25,000/- man ka sumin ka lei a, ‘tin 7 vel min rawn thawn rawh u’, ka ti a; tin khat ₹1000/- in ka lei a, ka kutin ka her ve thin a; pava 12-ah litre 1 a chhuak thei a ni. Chutiang chuan, tin sarh chu kan ei zo ve tawh; a tih chi lutuk.

Tichuan, a khawl lian zawk kan mamawh khawp mai a, tun thleng hian kan la dawng rih lo va. Lunglei bialtu Pu Papua khawl tha deuh mai sawtah hun tawp ang khan an rawn sawi a; khang te kha sawlama hmanah min pe chhawng theih lawm ni? A thlen ve leh an chhawr thei nghal dawn a; sawta hun mai mai kha a uihawm lutuk a ni. A phal turah ngai phawt mai ang.

Demand No. 46 - Urban Development & Poverty Alleviation Department:

Tin, Pu Speaker, UD & PA-ah hian sum dah hi a tam a. Ka bial, Palak bial khi a awmna a kil bawk a, UD&PA ah hian public ta tur sum a awm a ni tih pawh an hriat ka ring lo a. Min duhsak loh vang pawh ni lovin, a sum hi kan la dawng ve lo hrim hrim a; a awm tih pawh kan hriat ngai loh avangin kan la dil ve lo hrim hrim a. Hei hi anmahni department leh officer-te mawh pawh a ni lova, kan dil ngai miau lova. Ka Constituency-a khawpui ber Tipa-in an mahmawh em ema chu, ‘Field’ an ni a, a khaw thlen hma deuhah sawn kan lai ve a, tha hle tura ngaih a ni a. Amaherawhchu, tlem ruah a sur a, a chhaka in thenkhat hlauhawmin a siam tlat mai a, chung zingah chuan police quarters leh Thana te pawh a tel ve a. Engpawh nise, khilalah khian lungrem (retaining wall) siam a ngai a, a siamna tur project ₹46 lakh man vel siamin, UD&PA lama lo thethlak a tawh a ni awm e. Khi laia in chhe thei dinhmuna dingte chhanhim nan khawngaihin he pawisa hi min rawn release sak hram turin a changtu Minister zahawm ka han ngen nghal a ni e.

Demand No. 16 - Home Department:

Pu Speaker, Home kaihnewihah chuan, cenrtal jail tlawh honaah khan ka zuk tel ve a, an sawi kha a dik vek a. Kan va luh ve leh in lian tak, a main building chung a far nia sawi kha ka zu hmu ve a, tui a far nasa thin tih a chiang a. Khu khu a chim palh te a hlauhawm avangin staff te tan pawh a him lova; a ranglama sak that ni se a van tha dawn em.

Tin, a jail inmates ho khu mi 800 chuang an ni a, an chaw chhumna choka te ka’n thlithlai ve a. Steamer, an chaw chhumna pakhat a chhia a, pakhat zawk, a te chauh kha an hmang a, bel te nen an kawp a. Mi 800 chuang zing leh tlai ei tur khatianga han tih kha a hautak em em mai a. Chuvangin, khu khu a ranglama repair theih dan awm se a lawmawm hle ang a.

Tin, ka bialah hian khaw 68 awm a, chungah chuan police station hi hmun 2 ah chauh kan nei a. Tipa chu kan headquarters a nih angin police station kan nei a; a bak pahnih - khawthlang lam tan Phura ah leh, khawchhak Burma lam depah te hian min dahsak theih hram se tiin, kan Home Minister hi ka’n ngen bawk a ni e. Ka lawm e.

SPEAKER : A lawmawm e. Tunah chuan, Member zahawm tak Pu V. Malsawmtluanga ilo sawm ang.

PU V. MALSAWMTLUANGA: Pu Speaker, ka lawm e. Kan Minister zahawm tak takte pahnih - Pu K. Sapdanga leh Pu PC Vanlalruata te Demand sawi thei tura ka awm hi ka lawm hle a. Tichuan, Demand No.16-ah ka'n lut nghal ang a.

Demand No. 16 - Home Department:

Kan hriat angin kan Home Minister hian theihtawp chhuahin, thahnem a ngai em em a. Law & Order leh kawng hrang hrangah development a taka hmuh tur a awm a, a chhuanawm hle a mai a. Tunlai khawvel changkannaina ken tel information technology lo thang zelah hian, kan hriat angin kan milarte an chep em em a. Software tha tak takte lo chhuakin, cyber crime te a lo hluar hle tawh a. Chutiang chuan Lunglei lam pawhin Cyber Cell kan mamawh hle mai a; kan mamawhna hria-in Cyber Cell, Lunglei Police Station-ah min hawn sak te a lawmawm hle mai a, lawmthu ka'n sawi bawk a ni. Chu mi piah lamah, computer zirna a bik takin Chhim lam pumpui tana zirna tur SP Office ah NIELIT nena tangkawpin Computer Training Centre min hawn sak te a lawmawm hle a ni. Tin, tunah hian HPC kal tlangin Home Department hnuaiyah Police Station vertical extension kalpui mek a ni a. Hei hi hun rei tak tawh atanga kan lo vei leh mamawh em em a ni a. Hengah te pawh hian kan Minister chungah lawmthu kan sawi bawk a ni.

A dawt lehah chuan, kan hriat angin district jail sak that a ngai nasa hle mai a; ka hmaa member duhawm tak takte pawh khan an lo sawi tawh a. A bik takin Lunglei District Jail hi 1977 a sak tawh kha a ni a; kan hriat theih chinah han sak that emaw, kutthlak leh emaw a awm lova. Tuna district hrang hrang tana tih piah lamah Lunglei District Jail sak that a ni ve tur hi a lawmawm hlein ka hria a. Kan Minister hi *Samari-mitha* angah ka ngai a ni. Dan bawhchhia te sorkarin a hrem mai piah lamah, anmahni a ngaipawimawh hle a ni, tih te kha ka han sawilang duh bawk a ni.

Tin, Law & Order kenkawh chungchangah hma kan sawn hle mai a. (LPC Vice Chairman ka nihna angin *Lunglei* hi ka lam lo thei lo a) Lunglei ah te pawh conviction rate hi a tha hle mai a, hei hi kan Minister hmalakna a ni a. Tin, police a thawktute an fakawm hle mai a; he House kaltlang hian an chungah pawh lawmthu ka sawi bawk a ni.

Tichuan, ka bial chhung ka'n sawi ve lawk ang a. Haulawng ah hman atang tawhin (sorkar hun lo kal tawhah te pawh) a ni a; Police Outpost kan lo dil tawh thin a. Heng te pawh hi kan Minister-in min lo hriatsak ve leh ta se tih kha ka han sawi duh bawk a.

Lawmawm ka tih em em chu, ka thalaipui sports thei tak tak, mi in fit, mi tha tam tak police kan mamawhna karah, tuna police kan han la tur te hi a lawmawm hle a. Tin, ka lawmna tizualtu chu, technology thar hmanga tuna police fitness test an nei leh zel te hi, dan kengkawhtu tur lakna kawnga fair taka kan han kalpui te hi a lawmawm hle-in ka hria a ni.

Tichuan, Police staff-quarters, a bik takin Lunglei lampangah chei that a ngai nasa em em a, hengte pawh hi a tahtawla sum awmdana zirin kan Minister-in min lo hriat sak ve ta se. Tin, Lunglei Venghlun-a police ramah police family tam tak awm theihna bakah parking area pawh awm theihna nen building tha tak, Complex ang te pawhin sak ni ta se sawlai Lunglei District chuan kan chhawr hle dawn a ni, tih te ka han sawi tel duh bawk a.

Demand No. 30 - Disaster Management & Rehabilitation Department:

Demand No. 30-na, Disaster Management & Rehabilitation hnuai ah hian, Remal Cyclone kan sorkarin kan hmachhawn kha a ni a; khangah khan harsatna tam tak kan tawh a; MLA-te pawhin kan hisap bak bakin silpouline te kan lei a ni. Hemi kawngah hian Sorkar leh Minister hmalakna (a zawng zawng sawi lo mah ila) a fakawm hlein ka hria a. Ka'n sawi tel duh chu, ka bial chhung Zotlang petrol pump bulah kawng chhak leimin a awm a; hun rei tak, Sorkar hmasa hun atang tawh khan a ni a. Hei hi Disaster Management te leh LMC te tangkawpin hma min laksak thei ta se, tih te rilru-ah a awm a. Tin, bialtu MLA ka nihna ang pawhin, he kawng pawimawh tak hi min ngaihpawimawh sak turin ka'n ngen bawh a ni.

Demand No. 46 - Urban Development & Poverty Alleviation Department:

Tin, Demand No. 46 ah khan LMC chungchang kha ka hmaa Lunglei lam MLA-te khan an rawn sawi tawh a, a sawi ve loh theih loh a. Pu Speaker, lawmthu erawh ka sawi hmasa duh a. ₹387 lakh lai mai LMC in kan hmu a. Tin, State-special project lian tak tak 5 LMC-in a kalpui mek bawh a, hengah hian UD&PA Minister leh he sorkar chungah pawh lawmthu kan sawi bawh a. Chutihruah erawh chuan, thawktu staff-te mamawhna a nasa em em a, an indaih lova. Tunah hian sanction post 36, tin, regular post 5 dil mek a ni a. Hengte pawh hi kan Minister-in chak zawkin hma min lo laksak ta se tih te kan han sawi duh a. Tin, kan hriat angin LMC pianna ala rei lova, NREGS kaltlangin Lunglei khawpui tan hian ₹20 lakh chuang kumkhatah rawn lut thin ang a ni a. Khangte kha an bo duak a, tunah hian Lunglei ah sum leng vel a tlem em em a ni. Chungte hrereng chung chuan kan Minister pawn min ngaihtuahna hi rawn chhonzawm zel se tih kha ka'n sawi duh bawh a ni.

Tin, Solid-Waste Management Centre ka bialchhunga Pukpui bakah Tlabung-ah ₹56,99,880/- man kan neite hi a lawmawm ka tihna em em chu, *'he sorkar hian opposition bial a thliar lo a ni'* tih a lang chiang hle hi a ni. Pi Prova-i bial kha a ni a, hmanni lawkah ka zuk zin a, a hmun tur te ka zuk tlawh nghe nghe a ni. Hengah hian kan Minister a chhuanawm a, a chungah lawmthu kan han sawi bawh a ni.

Tin, Demand No. 46 hnuai ah hian, khawpui chhunga miharsa leh miretheite an harsa em em a, in leh lo an mamawhna te a sang a. Hengah hian a tam thei ang ber, mirethei leh harsa zawkte'n in leh lo an neih theihna turin hma min lak chhonzawm sak zel turin ka ngen bawh a ni.

Demand No. 31 - Agriculture & Farmers' Welfare Department:

Tichuan, Demand No. 31-ah hian, kan hriat angin crop production lamah department-in tan a la nasa hle a, bekang, chhawhchhi te leh kawng hrang hrangin tunah hian tam zawk tharchhuak tumin hma a la a. Tin, thlai chi a thlawna kan dawng thinte hi a lawmawm em em a, a changtu Minister chungah pawh lawmthu kan han sawi duh a. Tin, Lunglei-Buarpui agriculture complex-ah warehouse sak hna tender tur te a awm a, heng te pawh hi a lawmawm hlein ka hria a ni.

Tin, ka bial chhungah lut leh ila. Huisih link road ₹5,82,390/-, Haulawng-Thiltlang-Saithah link road digit pavement tur ₹55,96,100/- lai mai tender tura a awm te hi, bialtu MLA ka nihnaah Minister chungah lawmthu kan sawi bawh a ni. Chutih rual chuan, Chhipphir lampang khaw hrang hrangah pawh a ni a, a bik takin Charzawl link road kan mamawh hle mai a, heng te pawh hi min lo hriatsak turin ka'n ngen bawh a ni. Tin, FOCUS kaltlang in

district 6-ah tunah hian farmers-te tan hmalak mek a ni a. Heng te pawh hi kan lo hriat danin district dange pawh huam tura hmalak mek a ni a, a lawmawm hlein ka hre bawka ni.

Tin, kan sawhthing hi support-price kaltlanga kan lei a ni ber a, hei hi a lawmawm hlein ka hria a, ka bial mipuite pawh an lawm hle a ni. Heng kaltlang hian kut-hnathawktute'n leirem a takin an rap dawn tih a chiang hle a ni. He sawhthing kan han sawi paha Pu Speaker, ka han sawilan duh chu, (amah Pu C. Ngunlianchnunga a awm lova) ka bial chhungah *'sawhthing ip an lei'* a tih kha kan han sawichiang duh a. Tin, sorkar hmalaknaa khatiang mipuite a lei an lo awm a nih chuan, bialtu MLA ka nihna pawhin a mawh ka la ngam a, a tul a nih chuan ka rul vek ang, tih House zahawm takah hian ka puang bawka. Chutih rual erawh chuan khang thil lo tvisual palh te an awm a nih chuan, action la turin theihtawp ka chhuah ang. Information tlemin a dawng sual deuh a nih ka ring a. Ka bialchhungah society member thahnemngai tak takte an awm a, chungho chuan anmahni society memberte tan an lo inchah ve a, nakina khul chhawn leh tur thil a nih ka ring ber a. Pu Speaker, *vawkte-mawng ping* te nena han tehkhin chi chu a ni chiah chuang lo na a, kan han sawilang ve hrim hrim a ni e.

Demand No. 37 - Co-operation Department:

Tichuan, Demand No. 37-ah hian Pu Speaker, hei, Cooperative lamah pawh hma kan sawn hle mai a. Lunglei District hian mamawh lian tak district dang ang thovin kan nei a. Chung zinga ka han tarlan duh pakhat chu, Cooperative Society hian Lunglawn-ah ram tha deuh mai a nei a, ministry hmasa ah khan crore 19.64 project te submit a lo ni tawh a. 'Cooperative Inpui' tih a ni a, hei hi Lunglei District Cooperative Union hmalakna a ni a. Heng te pawh hi tun rum rumah a theih loh a nih pawhin, kan Minister-in min lo hriatsak ta se tih kan duh a ni.

Demand No. 47 - Irrigation & Water Resources Department:

Demand No. 47 - Irrigation & Water Resources hi kut-hnathawktute'n kan mamawh lian berte zinga mi a ni a, hemi kawngah kan Minister chak takin hma a la zel hi a chhuanawm ka ti a. Ka bial chhung Ramlaitui leh Thingvazau te remal cyclone avangin an tui lakna a chhe vek a. Hemi chungchangah hian Ramlaitui mipuite pawhin minister te pawh an hmu tawh niin ka lo hria a. Hengte pawh hi a theih anga rangin min bawhzui sak theih chuan ka lawm hle ang.

Awle, Pu Speaker, kan Minister zahawmtakte pahnih - Pu K. Sapdanga leh Pu PC Vanlalruata demand hi tha ka ti a, ka pawmpui a ni tih he House-ah hian ka sawi e. Ka lawm e.

SPEAKER : A lawmawm e. Tunah chuan, Member zahawm tak Pi Prova Chakma ilo sawm ang.

PI PROVA CHAKMA: Pu Speaker, ka lawm e. Kan Minister zahawm takte demand an rawn put luhte sawihona hun tha tak ka nei hi a lawmawm hle a.

Demand No. 16 - Home Department:

Pu Speaker, heta Demand No.16 - Home-ah hian cheng vaibelchhe heti zat, a tam emaw, a tlem emaw chu thu hran, kan hman thiam dan a zir a ni mai a; ka rindan chuan hei hi a tawk turah ka ngai a. Hei hi ka sawi duhna chhan chu, kan bial chhungah hian staff indaihlohna a nasa hle a. Ka zawhna kha chhanna pawh heta Home-a Deptt. demand a rawn chhanna ah

hian a tel turah ka ngai a, beiseina sang nen. Tun hi demand sawi hun a nih avangin ka rawn demand ve leh anih chu; ka bial chhung hi sawi loh theih loh a ni bawk a.

Home department-ah hian kan hriat theuh angin, Mizoram-a police station hmasa ber si hi police staff-quarters te a chhe em em a, tihchangtlunna tur session hmasa lamah pawh ka ngen tawh angin, min lo chhinchhiah sak leh se, tih hi Pu Speaker, nangmah kaltlangin kan Minister zahawm tak hi ka ngen a ni.

Tin, Tlabung ah hian tunhma chuan sub-jail kan nei thin a, tunah hian dah leh tumna a awm em tih kha nangma kaltlangin kan Minister zahawm takin a wine-up huna min chhan atan ka zawt nawn leh ni se. Tin, keini hi ramri depa awm kan ni a, border Bangladesh nena intawm kan nih avangin BoP te tih min tihchangtlun sak turin ka nge bawk a ni. Tunah hian Home Deptt. ah motor 4-wheel an mammawhna te kan MLA te khan an rawn sawi tawh a. Amaherawhchu, keini chuan 4-wheel lam ni lovin, tuia inkalpawhna tur speed boat hi kan police station-ah dah dan awm se chuan a tha khawp ang.

Demand No. 30 - Disaster Management & Rehabilitation Department:

Disaster Management & Rehabilitation-ah hian, nikum lamah te pawh chhiatna tam tak ka bialah a thleng a. Mahse, tun thlengin zangna-dawmna kan la hmulo a ni. Landslide leh fur ruahtui avangin flood nasa takin kan tuar bakah in kang te pawh kan tuar a nik. Nikum lamah kan Civil SDO khan department-ah pawh min thehluk sak tawhin ka hria a. Mahse, tanpuina tun thlengin kan la hmu lova. Chuvangin, kan minister kaltlangin a department hian hma min laksak turin ka ngen bawk a ni.

Demand No. 46 - Urban Development & Poverty Alleviation Department:

Urban Development & Poverty Alleviation-ah hian, Tlabung hi ka biala town area kan neih chhun a ni a, mahse, ‘town area’ tia sawi tlak pawh hi a ni lova, town area anihna angin fund engmah kah la hmu ve lo a. Engpawhnise, kan town area neih chhun beautification atan UD&PA lam atang hian fund min pe ve se tiin ka ngen duh bawk a. A chhan chu, Tlabung hi ‘historical place’ tia sawi a ni a, historical place anihna angin Tlabung beautification hi kan mamawh hle a. Nakin zelah tourists te pawhin an rawn tlawh ve tur te a ni a, chuvangin, a bik takin Tlabung beautification atan hian sum min ngaihtuah saka, hma min laksak ka duh a ni. Tin, *historical place* a nihna chhan pakhat leh chu, kan hre vek a, ‘Gateway of Missionaries’ tih kha a ni a, kha kha ka ngaipawimawh hle a. Chuvangin, Tlabung bik hi chu min lo ngaipawimawh saka min lo chhinchhiah sak turin nangma kaltlangin Pu Speaker, ka’n sawi nawn duh a ni.

Demand No. 31 - Agriculture & Farmers’ Welfare Department:

Tichuan Demand No. 31 hi, keima bialah chuan a pawimawh ber a. Agricultural & Farmers Welfare hi tukinah pawh kan sawi tawh a. Farming hi keini Chakmate ah hi chuan kan traditional a ni a. Ka campaign-ah te pawh a ni a, buh kan thar nasa a. Buh thar eina hun hi an nei ngai lova, a chhan chu, buh hlui kha an ei char char a, buh thar kha an ei hmian a lo hlui leh hman thin a ni. Chuvang chuan, Agriculture Minister hnenah pawh, nangma kaltlang Pu Speaker, potential area kan nihna angin buh humte pawh kan CM zahawm takin a speech-ah pawh a sawi ‘Buhhum kan lei dawn’ a tih kha, khatah khan kan bialte pawh hi min lo chhinchhiah sak se. Covid lai pawhin ka sawi tawh a, keini bial hi chu buhfai ah hian kan buai lova, kan buh tharchhuah kha kan ring a, kan intodelh a ni. Kan hmalam hunah pawh Mizoram pawna export tur pawh ni se, helai potential area hi

agricultural land atan kan develop chuan kan ti thei dawn a ni tih kha nangmah kaltlangin Pu Speaker, ka sawi duh bawk a.

Tichuan, Agricultural Water Resources-ah hian, Agriculture and Farmers ah hian Irrigation hi a rawn tel ve tho avangin, helamah pawh hian tan min lakpui se tih kha, sawi thiam lo chungin ka rawn sawi ve a ni a. (**Speaker:** Aw, a hriatthiam theih vek e, i sawi kha.) Aw le, ka lawmawm e.

A tawpna atan chuan, Pu Speaker, kan Minister zahawmtak takte pahnih demand an rawn putluhte hi rualkhai tak leh tha taka hman anih theih nan beiseina sang tak nen ka pawmpui e. Ka lawm e.

SPEAKER : A lawmawm e. Ka hriatsual loh chuan, BoP kha BSF kut ni te khan ka hria a, kan state Home Deptt. purview a ni em aw ka hre chiah lova, nakinah kan Minister-in a rawn sawi tho ang a. Tunah chuan Member zahawm tak Pu Roert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Vawiinah Minister zahawm tak takte demand kan sawiho leh tur hi a phurawm hlein ka hria a. A demand tak taka ka luh hmain kam hnih khatin, Law & Order thil te a nih avangin sawilan duh ka nei a.

Pakhatnaah chuan, Power & Electricity Department Minister zahawmtak Pu F. Rodinglana, official tour laiin a chung a Assam Rifles te'n hlei lenna leh chungtlakna nen an lo tibuai a, Zemabawk lamah te an lo dang zel a. Khatiang Mizoram-ah a thleng hi pawh ka ti khawp mai a. Kan zavai hian hei hi serious takin ngaihtuah ila, kan theihngihl miah lo turah te pawh ka ngai a. Khatihlai khan kan vaiin, Mizo hnam ang pawhin kan thinrimin ka hria a. Mahse, ka beisei angin kan sorkar, kan Chief Minister atanga kan minister zahawm tak thlavang-hauhna kha ka hmu lova, chu chu engnge a chhan ni ang aw, tih te rilruah awm a. Delhi tlang lam hlauh lutuk hi himna a ni chuang lo tih hi kan sorkar pawh hian a hriat a pawimawh khawp mai.

Helaiah hian FMR chungchang leh border fencing chungchang te pawh sawi kai hial a chakawm a, mahse ka sawi thui lo ang a. Ka sawi lawk duh erawh chu, North East-ah state hrang hrang, hnam hrang hrangte kan awm a. Kan thenawm state-a *indigeneous*, mahni hnam vei kan tribal-puite chuan an ram hung te an phal lova. An chhungkhat leh thenawmte nena an inkalpawh dalna FMR te pawh huai takin an do a. Keiniah chuan, tun Session ngeiah pawh kan Chief Minister zahawmtakin a sawi dan kha a duap deuh tlat a ni. Kha kha Delhi a zin hmasak ber tuma national media te'n an lo kawma a tawngkam atang khan kan Power minister zahawmtak pawh kha Assam Rifles te khan an zuam riau em maw ni, tih mai tur a ni a. Power Minister zahawmtak a thuam kima inthuan a PSO leh a team te khati tak maia Govt. paid employees-te'n a an lo tibuai ngam kha a pawh a, hnam ang pawhin a zahthlak a, Power minister thlavang kha na takin ka hauh a ni. Tin, sorkar leh a hruaitu chief minister ang pawhin a thlavang kan hauh tawh lo erawh chu pawh ka ti hle a ni.

Keini MLA-te hi *elected representative* kan ni a, sawi ngai lovin privilege kan ni a, ziaka privilege te pawh a awm a. Ziak ni kher lo, convention-a kan mawhphurhna avanga kan zahawmna ti mai ang, kan mawhphurhnain a ken tel humhimna te pawh kan nei a. House

chhunga kan tawngah te pawh hian privilege sang tak kan nei a ni. ‘Court case-ah a lak theih loh’ tih lam kha chu sawi pawh ka tum lova; chutiang chu MLA te, a mawl ber atanga a fng ber thleng hian nei kan ni a. Chutiang privilege nei the-thaw, he House-a kan thukhawma kan House leader leh kan CM zahawm takin ‘anticipatory bail i lak vat a tha ang’ han intih lawl-lawl ang chi kha a fuh lo ka ti a. Chu chu, kan Minister zahawm tak thlavang ka hauh rualin, kan member-pui Pu C. Ngunlianchunga chungchanga kan House Leader, kan Chief Minister tawngkam leh a thil tih dan kha a demawm hlein ka hria a ni. Tu chungah pawh thleng thei vek anih avangin, a thlen tawh lohna turin vawiinah hian ka sawi duh a. ‘*Ram rorelnaah Pathian ram kan thlen tir dawn*’ tih tawngkam a ri thin a, kha kha ram rorelnaa Pathian-ram thlentir dan tur a ni em, tih hi ka zawhna a ni a.

Kan Chief Minister mai ni lo, kan member zahawm tak takte, ZPM authority sang - Val Upa Council thleng pawh hian lo inenchiang se tha ka ti a, ram rorelnaa Pathian ram thlentir dan tur an inzirtir dan hi eng chiah nge ni? Kan Home Minister hi chu a cool dap mai, a Pa-chan pawh a chang a, ‘ZPM MLA te zinga a zatve ai tam hian CM-ah an duh zawk a ni’ an tih te hi a dik pawh ka ring a. Mipui pawh hian han buk chiah se chu, chief minister-a duh zawk hi an tam zawk daihin ka ring a. Tunah pheih chuan ‘a duhtu an pung tulh tulh’ tih te a ni leh nghal a (**Speaker:** A demand lamah aw.) Home Minister demand han sawi hian, a thatna han sawi tel ve te hi a thain ka hria, mipui demand te pawh a ni tel ang chu maw. Hachhek bial ka sawi dawn vanga ka tlawwna a ni miah lo a nia; Hachhek bialah ka’n lut duh a.

Demand No. 16 - Home Department:

Home Minister zahawm tak hi Kuhva kal vel dan chungchanga te pawh ka support thu mimal tak pawhin ka hrilh tawh a. Zawhna hmangte pawhin police facilities kan neih that tawh loh te, Hachhek bial piah mai, ka bula thu Dampa bial leh Mamit bial te pawh ka zawhin tha takin min chhang a, ka lawm khawp mai a. Hachhek biala kan police station siam that ngai tak tak a awm a, Kanhmun te khu a pawimawh em em mai a, state pathum inrina a ni a. Police case te, Excise case te pawh a tam thin a. An quarters far nasat dan te an OC pawhin min hrilh a, ‘ka lo chhinchhiah ang e’ ka ti a, kan sawi lang ve duh hrim hrim a. Remchang hmasa a awm chuan, a hmaa assurance min pek tawh kan Home Minister zahawm takin, Zawlnuam, Kanhmun leh West Phaileng-ah te police station-a motor kawh chhe lutuk, ramri bul te a ni si a. A leh lam Tripura te, Assam ten motor tha tak tak an kawh si a, ‘kan Police-te thuan chak an ngai e, ramri area-ah hian’ tiin ka sawi tawh a, ziaka chhanna pawh ka kawh a. Hei hi min lo hriat sak se ka duh bawh a ni.

Mizoram police post vacancies tam zia te kan hria a; heti chung chung a ram ralmuanga kan police te’n Mizoram an siam hi an fakawm hlein ka hria a. State danga kala zin thang deuh mai hi ka ni a, North-East State te ngeiah pawh hian ka zin kual nasa ve a; ‘State dang police-te ai hian kan police-te hi an tha thlawt a ni’ tih ka sawi duh a. An police-duty pangngai bakah anmahni fitness program leh ram tana pawimawh tih hriain police football club te dina academy tha tak an nei hi a lawmawmin ka hria a, an tana football field tha tak siamsaktute pawh an fakawm a; tunge tih erawh ka sawi lo ang a. Kan police-te tang zel turin vawiinah hian kan Home Minister zahawm tak hi Pu Speaker, nangmah kal tlangin, an police duty-te ti khaih lak chuang lova fitness lama an kal hi a ropui ka ti a, State dangte tih theih loh a ni. State dangte tih theih loh kan police-in semi-professional league-a club han nei tang reng theih te hi thil harsa tak a ni a, an chhuanawm hlein ka hria. Zampui-tlang Phuldungsei ah hian tunhma chuan Mizoram VC te an awm ngai lova, kan

hun laiin VC te kan pe a, a lawm hle a; thil tha pawh niin ka hria a. Kan sorkar thar pawh hian appreciate vein, kan hon. CM pawh ka sawipui tawh a.

Kan Home Minister zahawm tak hnenah hian Pu Speaker, nangmah kal tlangin, New Kawnpui police station awmna khu a ram pilril lutuk a, ration leh eng emaw supply bakah security thilah te pawh a fuh chiah lo deuhin ka hria a. Kan sorkar ve lai pawh khan tih tumin kan tin uai-uai hman a, Covid lai nen, sum indaih lo nen kan ti thei ta lova. Kan tih theih loh ngei mai hi kan Home Minister zahawm tak hian min han tihsak se. Zampuitlang Phuldungsei-ah police station dah ta ila, a police-te tan pawh a him zawk dawn a, ration lak leh tui chawi eng-ilo fahranah te, chumi hmang chuan Zampuitlang-a Mizote an thla a muang zawk dawna ka hriat avangin, chu chu he House-ah hian ka rawt duh bawk a ni.

Thil lawmawm tak - a hminga Sports minister kan nih ve lai khan, 'sports persons-te hamthatna tur a ni ang' tiin, hna nghet lak dawna 5% zel hi anmahni chhunga an intihsiakna hmanga lak ve tur ni sela tiin DP&AR lamah te ka'n rawt a. Khatih hun laia DP&AR changtu minister-in sports-persons te hamthatna tur rawtna te thiam taka lo dawng sawngin, 5% hi police kher ni lo, Group B hna hnanghet lakna ah pawh sports-persons te tana reservation DP&AR khan an chhuah a, hei hi tun police lakna turah hian a takin a thleng dawn niin ka hria a, a hma pawhin a lo thleng tawh a, hemi chungchangah hian lawmthu te pawh ka sawi duh a. Kan Home minister pawhin tuna police lak turah hian 5% qualified tur chi kha chu a danah khan a awm a; sports-persons te remchan dan zawng; sports-persons chu duty pawimawh tak tak national games-ah te, national level competition-a thang laklawh lai mekte pawh an awm thei a, ram rawngbawlna pawimawh a lo ni ve thei bawk si a. National competitiona khel laklawha awm, helai police-a tan duh ve, police hnalak intlansiaka tlan ve duhte tan kan Home Minister hian a bika physical test an neih theih dan tur ngaihtuah sak sela a va'n lawmawm dawn em.

A dawt lehah chuan, SASCI chungchang hi. Kum kal ta khan SASCI hnuaiah Police Deptt. in ₹50 crore hmangin hmun hrang hrangah in an sa tih ka hria a, 1st instalment bak an la hmu lo maithei a. Kan Home Minister zahawm takin min sawifiah sak theih chuan, khang atan khan UC submit a ni tawh em, tih kha. A pawimawh tak zawka chu, tun hnuaiah kan sorkar thar hma laknain jail eng emaw zat SASCI Part-I atanga sak tur te kha, a estimate leh tender te siam zawh tawh a ni em? A sum hi SNA-ah a awm tawh em? Awm nise, contractor-ah te hnenah pekchhuah a ni tawh em? A pawimawh ber chu, Home Department hian SASCI Part-I (2024-2025) tan hian UC a pe tawh em tih ka hre duh tlat a ni, Pu Speaker.

Demand No. 46 - Urban Development & Poverty Alleviation Department:

Tin, Aizawl-Smart City Project hi Home-cum-UD&PA Minister zahawm takin a enkawl chhoh dan hi a chhuanawm hlein ka hria a. Minister thenkhat sorkar hmasa hma lo lak tawh te han thinhrik deuh emaw, han tih duh loh deuh emaw te pawh a awm theih laiin, ani chuan phur takin a enkawl zui a. Hei hian mi-puitling tak a nihna a tilangin ka hria a. A result pawh kan hmu a, CM atan kan han awh em em chhan te pawh hi a ni em aw, ka ti a.

Notified-town kan bialah pahnih kan nei ve a, Kawrthah leh Zawlnuam-ah; khaw-fai lawman te pawh dawng thin, khaw-changkang leh tanpui awm tak khua ve-ve an ni a. Hengte pawh hi *notified-towns* an nih angin UD&PA lam atangin min hriatsak sela.

Demand No. 13 - Department Personnel & Administrative Reforms:

Tin, DP&AR Demand ah hian, “MPSC kan tichak ang a, MSSSB kan titawp ang” tih laiah hian, MPSC tihchak hi duh ang a ni lo deuh a ni. Assembly question-ah pawh kan hmu a, helaiiah hian thahnem ka ngai a. IAS cadre post han neih te hi a chakawm khawp mai a. Sorkar hmasa lam pawhin an ti thin a, mahse, a awlai lo maithei. DP&AR Minister chak tak, a nachang hre tak a nih ang hian, IAS cadre te hi nei ve ta ila kan sorkar-hnathawkte tan pawh chance a that leh zual bakah, Ministry kan han dawra, ‘khawi *cadre* nge i nih’ kan han ti a, ‘*Nagaland Cadre*’ te an han ti a; an parent-cadre kha tanpui an chak thin a ni, Ministry-ah thuneihna sang tak neia an thut khuan. Khang kha kan mamawh ve a ni. Khung - Home Ministry-ah te, Finance Ministry-ah te, DoNER Ministry-ah te khuan Mizoram cadre - IAS val te han thu fur se chuan, sum sanction leh thil hrang hrangah pawh kan awlsam phah dawn a. Chutiang nei thei tura MNF-in nasa taka a lo nawr thin kha han nawr chhonzawm zel a va tul em.

Demand No. 31 - Agriculture & Farmers’ Welfare Department:

Pu Speaker, thlathar chungchang hi ka sawi loh chuan a dik lo ang, Pu Speaker. (**Speaker:** Minute 4 laiin, i pel thui tawh riau mai a. Member dang sawi duhte pawh an la tam a; i duh taw ang.) A nih chuan, thlai thar sawi loin, kuhva ka’n sawi teh ang.

Kuhva hi kan bialah khuan kan thatpui a, he House-ah hian farmers te rethei vek anga sawi pawh hi, Hachhek bial avang hian a rem tawh lo niin ka hria. Hachhek biala farmers te khu an rethei vek lo a ni. Chutih lai erawh chuan, tanpui an phu a, tanpui an ngai. Price-support pawh kan ti dawn a nih rau rau chuan, kuhva pawh pek ngei ngeina tur chi a ni tih ka’n sawi duh baw a ni. (**Speaker:** Aw le, aw le; kan lo chhinchhiah ang.)

Tichuan, thlathar..... Aw, ka sawi lo mai ang; ka sawi in hlau em mai. Ka lawm e.

SPEAKER : Minute 5-in i pel tawh a, a rem bik lo e. Member zahawm tak khan min hrethiam se. House-in lungrual takin *minute 10* kan ti a, minute 10 i pel a. Minute 2, minute 4, minute 5 a ni a. Tin, member dang rawn sawi ve turte pawh an la lawm a, khangah te pawh khan insemrual thiam deuh hlek ila a tha awm e. Tunah member zahawm tah Pu H. Lalzirliana ilo sawm ang.

PU H. LALZIRLIANA: Pu Speaker, ka lawm e. Vawiinah hian Demand pawimawh tak mai, Minister pahnihte chanvoa sawina hun ka nei ve hi ka lawm khawp mai. Budget bua a lan ang khan kan minister pahnihte chanvo hi, pie chart-ah khan - Pu PC Vanlalruata chan 2.18% a ni a, Pu K. Sapdanga chanvo hi 9.28% a ni a. Bana-kaih policy kengkawhtu ber tur chanvo, pie chart-a chanvo tlem ber a ni hi ka lainat khawp mai a, sawi hmasakah ka’n nei nghe nghe ang a.

Demand No. 31 - Agriculture & Farmers’ Welfare Department:

A hmasa berin Agriculture & Farmers’ Welfare hi, nikuma BE aiin kumina BE hi nuai ₹1,208 lakh-in a tlem a; a thanna hi -5.94% a ni. RE nena a inthlauhna phei chu -5405 lakh a ni. Hei hi Bana-kaih policy, ‘kut-hnathawktu (farmers) te ‘*kan VIP an ni*’ tia, a changtu ber budget-a kan dah tlem leh ta duai si hi hriatthiam har ka ti a. Bana-kaih policy-a kan dah sum tam tak, crore 350 ah hian heng Agri Deptt. tan hian chanvo a awm ve ta vak lo mai em ni; wine leh beer siamna lamah sum tam tak hman kan tum a ni lo maw, tih te min ngaihtuah tir a.

Engpawh ni sela, ka'n sawi luh tel duh chu, kan bial chungah hian Agri-link road kan mamawh khawp mai a. Sorkar hmasaah khan sum indaih lohna nen tih mumal kan nei lo a. Tin, oil palm chungchangah hian keini hi Mizoram-a a ti tha ber district kan ni a. Tin, North East-ah pawh kan district chungah Nalzawl hi a tharchhuak hnem ber, no. 1 an ni. Mahse, a phurchhuahna duh angin a tha lo a, Nalzawl tak phei chu tunah hian PMGSY road-ah hian siam tur a ni a. A bak hmun dang tam tak a chinna kan nei bawh a. A lakchhuahna kawng hi khawngaih takin PMGSY road ni kher lo, link road ang te pawh min ngaihtuahpui ka ngen nghal a ni.

Demand No. 47 - Irrigation & Water Resources Department:

Tin, irrigation hi, keinih phei chuan *Tuidai Rain-water Harvesting* kan nei a. A budget hi ka'n thlirpui a, nikum leh kumin BE inthlahna, a negative-na hi nuai 1191 a ni; chu chu -11.54 % in a tlahniam a ni. Irrigation hi a pawimawh em em a, tuna kan project lian crore 29.4 hmanga Tuidai khuah te phei chu, tuna solar pump hmanga tui kan lakna thenkhatte chu a kang-chat tan tawh a ni. Chuvangin, district zawng zawng deuh thaw leh kan khawpui tam takah hian fur laia tui kan neih that em em dahkhawlna awm si lote, rainwater-harvesting kan uar deuh-deuh a tulin ka hria a. A changtu Minister pawh a phurin ka hria a, department pawh an phur a. He rainwater-harvesting hian ei leh in, irrigation mai piah lamah horticulture te, amusement place leh tourist place-te pawh a ni ang a; ground-water a recharge ang a, tuihna a ti tam dawn a ni. Tuna tuihna kang zel karah hengte hi a pawimawh a ni. Tin, nakinah chuan khang tuikhuah lian pui-pui awmna khua a climate thlengin a control dawn a ni. Hei hi kan uar deuh deuh a tul a, nasa takin hma min lakpui sela. Tunah hian vaibelchhe 7 vel bawr chu pawisa sanction-te pawh an hmu tawh niin ka hria a, hna han tan vat sela.

(Panel of Chairman Pu Jeje Lalpekhlua'n Chair a la a.)

Tin, office tur chungchangah pawh ka sawi tawh thin a. Kan district hian office kan mamawh tak meuh meuh a, hetiang project lian te an awm dawn takah chuan a ngai leh zual a. A office hmun hma tur chungchangah pawh theihtawpin hma kan lo lakpui ang a.

Demand No. 37 - Co-operation Department:

Tin, Co-operation chungchangah hian, *co-operation movement* te kan ti a, a pawimawhna kan hmu chho tulh tulh dawn a. Kalphung-tharah phei hi chuan 'society din' tih te kan sawi uar a, kan *work-smart* tan chho dawn niin a lang a. Hetih lai karah hian kan Cooperation Deptt. office hi thuum that a ngai khawp mai a. Experience ka neih chu, Mamit-ah society pakhat hmunphiah lei tura in register pakhat, Chakma area te a ni a. Document form bakah memorandum leh thil chi hrang hrangte nen an han tih vek hnu ah department lam atangin harsatna neuh-neuh kha a tam khawp mai a. Vawi 4-5 file return te a ni a, society pakhat in register tur khati taka a harsat chuan a buaithlak dawn niin ka hria.

Chuvangin, heihi a tul a nih chuan enchian deuh a, ease of doing tih dan te pawh kan neih kha, khatiang deuh khan a tih ran dan leh a awlsam dan te pawh zawng tlang ta i la. Tin, society tam tak a din hian a tha a ni. Kan work smart chho dawn a ni society based a hna leh project-te kan neih khan. Chu chu thingtlang mite tan pawha hmasawna tur a ni. He department hi tihlen a tha ka ti a. Chu chu kan rawn demand a ni, Mamit-ah ngei pawh hian kan pachhe khawp mai tih min lo hriatsak se la.

Demand No. 16 - Home Department:

Tin, Pu K. Sapdanga, kan Minister zahawm tak chan Home Deptt. demand hi, nikum leh kumin BE enin ₹2,670/- lakh ngawtin a pung a, chu chu 3.2% a ni. Forensic Science budget a pung a, Homeguard tihchangtlunna tur te a awm bawk a, a lawmawm ka ti a. Jail hi 'correctional centre' tiin kan la hmang thiam chiah lova. January Ni 20, 2025-a Subject Committee te'n central jail kan zuk tlawh khan, kan thian thenkhatte pawhin an rawn sawi a. A capacity mi 438 awmna turah mi 822 an awm a ni, kan kal lai khan. Tunah chuan an pung leh tawh maithei; sang dawn an tling tawh mai thei. Chutiang khawpa tawt a ni. Room pakhat kan tlawh phei chu mi 29 bawr an awm a, bathroom pakhat an ring a. Inthiarna pakhat chauh, a ngaihna awm lo a ni. Khatiang khan room tinah damlote an awm a, an buai ve em em a ni.

Tin, medical facilities kan han en a, doctor pakhat leh staff-nurse pahnih; khatiang kha an dinhmun a ni, mi 800-1000 dawn enkawltu tur; round-the-clock tak takin hna an thawk a ni. Chuvang chuan, a deptt. khuti laia awmchilh tute pawhin, 'hei hi a committee lam pawhinn nasa takin min lo ngaihven pui teh u' an ti a, chutiang chuan tun chho ah pawh khan recommendations eng emaw zah siamin kan han theh lut a ni a. Khangte kha ngaihpaawimawh a tha khawp mai. Mi 1000 dawn eitur siam mup-mupnaa an chawchhumna hmanruate a thalo khawp a, zing dar 3 atangin rawngbawl a ngai tawh thin a ni. Chutiang dinhmunah chuan an ding a, an lainatawm khawp mai.

Jail chei thatna tur tunah hian SASCI ah crore 55 hman tur an awm a, hnathawh tan thuai-thuai ni sela. A thawhtan hma hian UC te hi kan lo submit tawh mai em, tih te chu kan hriat phak thil a ni lova. Mamit District pawh he, a thawmthatna tur a'n awm te hi lawmawm ka ti a crore 4.53 kan nei dawn a ni. Kan district jail pawh ka hman chang chuan ka tlawh ve thin a, football te, voleyball te, tv te kan pe a, arsa eitur leina tur te pawh kan pe thin a. Tin, an chapel sakna tur te pawh MLA fund atangin ka pe tawh a ni. Tunah hian waiting-shed sakna tur min dil leh mek a, 'lo nghak lawk rawh u; tunah hian SASCI hnuai ah hna thawh tur a awm a, heng an rawn thawh hunah tha deuh law-lawin, an mahni hmanrua leh fund te nen tangkawpin tih kan tum dawn nia' ka ti a.

Tin, Pu Chairman, kan Minister pawhin min lo chhinchhiah sak sela; ministry hmasa ah khan sum indaih loh avang leh kawng hrang hrang avang tein Mamit 4th IR headquarters sak (expansion) atan ram leina tur ruahmanna file vawihnih kan kal tir a, sum awm loh avangin 'regretted' in a rawn let a ni. Chu chu sorkar hmasa ah khan eng emaw neuh-neuh, khuti lai Rengdil ah sorkar hmasa lam daih tawh atanga IR headquarters ang deuha lo riruutna lo awm tawh khan ti-ti a titam a. Amaherawhchu, Mamit-Luangpawl Veng ah 4th IR Hqrs. atana tihfel thawkhat tawh a awm bawk a. Pu Chairman, a hmun hi an chep mai bakah remchang em em, kha ram chhungah khan mimalin ram an nei a, hei hi an awt a ni. Heng te hi kan rawn move tha leh dawn a, khawngaih takin minlo hriat sakin, min han tihfel sak se, tih kha ka ngen duh a ni.

Tin, Lengpui Police-outpost ministry hmasa ah 'awm se' kan tih, Airport awmna hmun a ni a, an mamawh a ni; eng emaw rikrum thil te pawh a awm thei avangin, out-post a hminga neih ve an duh em em a ni. Hei hi tuna hian kan sorkar hian min tih tlang sak theih se ka duh khawp mai a.

Demand No. 46 - Urban Development & Poverty Alleviation Department:

Tin, UD&PA chungchangah hian, an budget hi a tlahniam duai mai a. (**Chairman:** Kan duhtawk dawn tawh em? Hei, member dang la sawi duh te an awm a.) UD&PA hi a pawimawh a, district-a UD&PA te hi tihchangtlun deuh ni se; tin, an financial power pawh tih tam deuh ni sela. Bill nuai 5 ang vel han release theihna power te han nei thei ve sela a awlsam thlak khawpin ka ring a. Tin, Mamit playground UD&PA project atangin sorkar hmasaah khan leveling te, fencing te, pavilion te, side-drain te tih tawh a ni a, a grass phah hi min han complete pui thei se tiin ka ngen bawk a.

Demand No. 30 - Disaster Management & Rehabilitation Department:

Pu Chairman, Disaster management hian a demand-a budget a chan tur a sang hi a lawmpuiawm a. A hming ang deuh hian rikrum thila budget han siam pawh a har maithei a. Heta experience ka neih pakhat chu, ka bial Khantlang khuaah in kang a awm a, engmah chuh hman lohvin. Chu chu a document te kan submit ve nachungin, an dawn tur ang an dawng ta nge, ta lo pawh engmah ka hre lova. A kum lehah pawh engmah dawn an la nei lova, chutiang chiah chuan sabereka-khuang kaihin mi pathum hnawlin an thi a, chung te pawh chu claim a ni a. Khang ho khan an hmu zo ta vek nge chu ka hre lova, eng emaw chu a awm chuan ka hria a. Chuvang chuan, an claim anga an hmuh theihna tur chungchangah pawh hian rang zawka district authority leh a deptt. te hian action hi la hma thei sela, tih kha kan ngenna leh duhthusam a ni e.

Tichuan Pu Chairman, vawiin kan Minister pahnihte - Pu K. Sapdanga leh Pu PC Vanlalruata te department chan demand te hi ka pawmpui a, ka rawn thlawp a ni e. Ka lawm e.

CHAIRMAN : Kha, hun kha kan han induhsak deuh hlek a, kan inthlak kual deuh avang khan. Tunah chuan, Aizawl South-II bialtu, Pu Lalchhuanthanga ilo sawm ang.

PU LALCHHUANTHANGA: Pu Chairman, hei vawiinah hian kan minister pawimawh tak takte te pahnih demand kan sawi mek a.

Demand No. 31 - Agriculture & Farmers' Welfare Department:

Demand No. 31, Agriculture ah hian lut nghal ila. Ei leh bara kan intodelh hi a pawimawh a, kan la intodelh thei lo reng mai laia hi han sawi hmasak ka duh a. Agriculture ah hian sum tam tak kan seng tawh a, amaherawhchu ei leh bara kan la intodelh lo hi engnge a chhan ni ang aw, tih te ka ngaihtuah thin a. A chhan bulpui ber nia ka ngaih chu - Agriculture link-road hi ni berin ka hria a. Link-road hi a that loh chuan, kan thlaiharte phurhchhuahna kan harsat a. Tin, tunlai khawvelah lirthei tel lo chuan thil engmah a tih tak tak theih loh a ni. Chuvangin, kan link-road thar kan neihsate han tuai thar deuh thain kan hria a. A thar kan siam thei lo anih pawhin, kan neihsa ho talte hi chu han tuaihnun deuh hleka, a-fur a-thala kal theih tura buatsaih a tulin ka hria. Pu Chairman, kawng reng reng hi chhe thang bik a awm a ni; km 10-a hian km chanve vel bak hi a chhe thang hi a awm vak lo. A chhe thang lai taka hi kan enkawl chuan, kawng kha a-fur a-thalin a kal theih mai a, kawng hmun hnih-thumah a chhiat avangin kha lai hmun kha kan thleng thei lova. Chuvangin, kan link-road te hi ngaihsak deuh hlek a tulin ka hria.

Tin, sum harsatna avanga kan link-road te jeepable a nih theih loh pawhin two-wheeler tal kal theihna a pawimawhin ka hria. Two-wheeler hmanga feh theihna tur kawng duan hi a harsat ka ring lova. Tin, two-wheeler hi feh nan leh ram kal nan chuan kan hmang nasat

tawh avangin, jeepable kan lai theilo anih pawhin two-wheeler tal nise tih kha kan minister hian lo hria sela.

Hei, kan Agriculture minister hian Cooperation Deptt. a chang tel hi a inhmeh ka ti a. Hetah hian kan Minister hian Cooperation leh Agriculture Department kal kawp dan hi nasa lehzualin ngaihtuah ta sela, ei leh bara kan intodelhna tur kawng thui tak a thlen theiin kan ring a ni.

Demand No. 16 - Home Department:

A dawt lehah chuan, Demand No. 16 - Home hi, hei ka bialah hian MAP 3rd Batallion an awm a, helai ah hian thil han sawi tur ka ngah khawp mai a. Kan hun kal tawh term hmasa lamah te Home Deptt-a kan police-te ngaihtah an lo ni rei tawh khawp mai a. Tunah hi chuan police quarters leh engkim mai hi a tla bal em em vek mai a ni. Tunah hian Mualpui - 3rd MAP-a quarters 16 chu luah tlak loh leh luah ngam loh a awm a ni. Helai hi han sawi uar deuh hlek ka duh chhan chu, a hmun hi a tha a, a laili a.

CHAIRMAN : Lo ngaichang lawk la. Hei, kan allot time kha dar 4 a ni a, a zo mai dawn a. Engnge House kan ngaihdan; kaltlang pui zel tha kan ti em? (*House-in kal tlangpui zel a remti a.*) Aw le, sawi zawm rawh le.

Hmun laili tak si, hmun-biru tha deuh a ni a, hmunawl zau tak te pawh an nei a ni. Chuvangin he 3rd Batallion MAP hian potential a nei tha khawp mai a. Pu Chairman, ECI in election a buatsaih a, MP te, MLA election te. Khangah khan security force ten helai hi transit camp ah te an hmang a ni. Chu chang a ni lova, Independence Day te, Republic Day te lawmnaa State pawn atanga parade contingent lo kalte pawhin thlen nan hmang thin a. Chu bakah chuan, a chheh velah RG Stadium te, R. Dengthuama Hall te a awm bawk a; heng Mizoram Police Sports meet angah te pawh helai hmun hi an hmang tang kai em em a ni. Chuvang chuan, helai hmun hian potential a nei tha a. Chutih rual erawh chuan, barrack te an nei mumal lova, an barrack te pawh tun hmaa sak tawh, a bang dap te a ni a. Tin, mess-building te pawh an mamawh em em a ni. Chuvang chuan, Mualpui - 3rd MAP hi kan enkawl that a ngai a; State dang mithmuha kan hmel lanna te pawh a nih avangin, ngaihtah chi a ni lova. Tin, sawi ang khan, a hmun a laili a, a fianrial tha a, a zau bawk a. A ram te pawh fencing han tihsak hram dan awm se a tha awm mang e, ka'n ti deuh a ni.

Demand No. 46 - Urban Development & Poverty Alleviation Department:

Demand 46 - UD&PA ah hian, ka bial Aizawl South-II hi veng-thanglai kan tam khawp mai a. Tun tum Local Council inthlanah pawh khan Local Council, Tlangnuam West a ding thar a. Chutiang bawkin Local Council thar neih tum veng pahnih-pathum an awm bawk a. Chungte avang chuan UD&PA kaltlanga hmasawna hi kan bial hian kan mamawh hle mai a. Tin, Kulikawn-Ngaizel pheih te pawh chhimlam kawtchhuah pawimawh tak a ni nachungin a tawpin, enkawl a hlawh lo em em mai a. Term hmasaah te khan ka sawichhuak thin a, inthiarna mumal pawh a awm lova, henglai hmun te han phiat fai tur pawh mi tumah detail an ni ngai lova. Hei hi UD&PA lam hmalakna tur nge nia AMC lam, ka hre chiah lova. A enga pawh chu ni seng, a inzul tho a. Chuvang chuan, Pu Chairman, hei hi kan Minister hian min enpui deuh sela. Veng-thanglai kan tam a, mamawh kan ngah em em mai a. Chuvangin, UD&PA minister hian South-II bial hi min rawn hre thei deuh se a tha khawp ang.

Demand No. 30 - Disaster Management & Rehabilitation Department:

Tichuan, Disaster lam hi Pu Chairman, nikum lama cyclone *Remal* avang khan harsatna tamtak kan taw k a, kan bial - South II leh South III te a tuar nasa ber pawl niin ka hria a. Hengah te pawh hian hmalakna tur tam tak kan nei a, kan hmabak hi a ko viau mai a. Tunah hian kan Minister duhsaknain eng emaw hna chu kan han hmu ve nain, kan duh khawp lo hle mai a, khawngaih in he Aizawl South II bial chhunga kan harsatnate minrawn hriatpui sela. Tih tur tam tak kan neihte a rang thei lama min han tihsak theih chuan a lawmawm khawp ang.

Tichuan Pu Chariman, kan Minister zahawm tak tak pahnihte demand hi tha ka ti a, ka thlawp a ni e. Ka lawm e.

CHAIRMAN : Hun a hmang thiam hle mai. Vawiina hun hmang thiam ber record a break-in ka hria; a lawmawm hle mai. Tunah chuan, Dampa Bialtu MLA, Pu Lalrintluanga Sailo ilo sawm ang.

PU LALRINTLUANGA SAILO: Pu Chairman, ka lawm e. Vawiina kan minster pahnihte chan demand kan kan han sawiah hian a hmasa berin -

Demand No. 16 - Home Department:

Demand No.16 - Home hi ka'n luhchilh nghal duh a. Chumi hma chuan, hei jail tang kan tichhuak hnem hle mai a, (chumi recover-na chu a ni pah fawm ang a) vawiina kan Home Minister-in SASCI atanga 55 crore ngawt mai jail tang chhuah leh tawh lohna tura a building sakna tur a pe hi ka congratulate hmasa duh a. Chutih rual chuan, he Demand No.16 hnuaija jail chungchang hi han luhchilh ka duh a. Members panga lain an han sawi a, amaherawhchu, a building chungchangah an han buai a. Kei chuan a building lam kha ka sawi dawn lova, Pu Chairman.

Helai Mizoram Prison Manual Bung 4, clause 4-ah chiang takin a inziak a - *'Duty pakhatin tang paruk a veng tur a ni'* tih a awm a. Tuna kan practice mekah chuan, jail tang 165 hi warder pakhatin a veng a, kan indaih lo hle mai a. Hei hi kan Prison minister hian khawngaih takin min lo chhinchhiah sak se. Mizoram ah tunah hian jail 10 kan nei a, Pi Prova bial Tlabung a sub-jail kan nei thina kha a function tawh lova. Hengah te hian crime a lo pung a, communication gaps avang te pawhin dah leh a tha lawm ni?

Central Jail-a warder post 90 awmah 43 filled-up a ni a, 56 vacant post a ni a. Chutiang chuan, lumettu post pahnih awmah pakhat mah an awm lo a. Tin, Aizawl Jail ah hian Asst. Jailor sanction post pahnih fill up miah loh a awm a, Pharmacist post pakhat awm pawh dah a ni lo baw k a. Tin, warder post 25 awmah 17 filled-up niin, 8 kan nei lova; Driver kan nei miah lo baw k a, pakhat sanction a ni a; Lumet kan nei lova, sweeper pakhat mah kan nei lo baw k a ni.

Chutiang zel chuan, District Jail Lunglei-ah hian Pu Chairman, Asst. Jailor post pakhat awmah kan nei lova, pharmacist kan nei lo baw k a. Tin, warder post 22 awmah 20 chauh kan nei a, vacant post 2 a awm a. Lumettu post pakhat sanction post awmah luahtu an awm lova, Peon pakhat mah kan nei lo baw k a. Serchhip jail ah hian Asst. Jailor kan nei lova, LDC post 1 awmah pakhat mah kan nei lova; Warder post 16 awmah 11 filled-up a ni a, 6 kan nei lova; Peon sanction post 2 awmah pakhatmah kan nei lo baw k a.

Chutiangin, Siaha ah hian Jailor pakhatmah kan nei lova; LDC kan nei lova; Pharmacist kan nei lo bawk a. Warder 16 awm turah 12 kan nei a, 4 filled-up loh a ni a. Rider kan nei lova, lumettu kan nei lova; Sweeper pawh kan nei bawk hek lova. Chutiang zêlin, Saitual Jail-ah hian neih mumal kan nei lova. Superintendent kan nei lova, Jailor kan nei lova, Asst. Jailor kan nei lova, UDC kan nei lova, Pharmacist kan nei lova, Chief Head-Warder kan nei lova; Head Warder 2 awmah pakhatmah kan nei lova, Warder post 4 awmah kan nei lo bawk a. Tin, driver kan nei lova, Group-D post kan nei lo bawk a ni.

Kolasib-ah hian Jailor post pakhatmah filled-up a ni lova, Asst. Jailor post kan fill-up lova, LDC pawh chuti tho chu a ni a. Warder post 15 awmah 13 kan nei a; Driver kan nei lova, Sweeper kan nei lova, Peon kan nei lo bawk a. Chutiang zêl chuan, District Jail, Lawngtlai jail ah hian Warder post 28 awmah 7 chauh kan nei a, 21 vacant posts a awm a; Peon post 2 awmah kan nei miah lova, Sweeper kan nei lo bawk a.

Champhai-ah hian, warder post 16 awmah 12 kan nei a, Driver kan nei lova. Tin, Mamit ah hian Asst. Jailor kan nei lova, Warder post 24 awmah 11 chauh kan nei a, 17 vacant post a awm a. Nurse kan nei lova, Peon kan nei lo bawk.

Heng ka'n sawi duhna chhan chu - vawiinah hian a tak taka hnathawk hna-hniam hoa hi sorkar hmasa-hmasa leh ațangin Pu Chairman, kan fill-up mawh khawp mai a, kan Minister chak tak hian hei hi min ngaih pawimawh sak se ka duh hle mai.

Chutih rual chuan, Mizoram ah District 11 kan nei a. Pu Chairman, i bial ka'n sawisak lawk ang che a. Hnahtial leh kan Dy. Govt. Chief Whip bialah hian jail kan nei lova, a dang zawng district 9-ah kan nei vek a. Heng hi fill-up dân awm se a țha khawp mai. Chutiang chuan, hma chak takin la se ka duh khawp mai. A chhan chu, jail tang kan tlân chhuak a, Ministry mualphona a ni țhin a. Chuvâng chuan, khati zâwnga țan lâk kha a pawimawh hle a ni.

A dawt lehah chuan, ka bial ah ka'n lut zuai ang a. Ka sawi ngun tawh a; a changtu pawhin a hria a, Kanghmun hi. Ministry hmasa pawha cabinet sanction awm tawh, Covid avânga fill-up theih loh kha a ni a. West Phaileng police jurisdiction hi a thui em em mai a, Rawpuichhip, hetah Ailawng, Reiek, South Sabual thleng a ni a. Helai khaw 14 piah lamah Dampa bial ni lo khaw 2-3 a cover bawk a. Chuvangin, Kanghmun Police-outpost hi khawngaihmin min ngaih pawimawh sak thei ula ka duh khawp mai.

Chutih rual chuan, nichina members-te sawia ka ngaih pawimawh em em chu, nikum November thla khan kan P&E Minister kha helaia min venghimtu tura dah Assam Rifles te'n an lo harass a. Kei, vai hi ka haw khawp mai a, Aizawl-a ka awm lo kha pawl ka ti khawp mai a; awm ila chu ka va tlân pheih ang ka ti a. Minister, car flag chhunga chuang, pilot-guard pawh nei captain velina an duh duha an lo tiding kha, han in *zâwng-man* hi ka châk khawp mai a; ka awm lo kha an vannei ka ti ngawt mai. Ka thin a rim tak zet a ni, tih ka sawi duh a. Chuvâng chuan, kan hawn ve leh kan Opp. leader ho hian thuchhuah kan rawn siam a nih kha. Hnam issue thil a ni a, pawl, party sawi lova hma kan lâkna tur chi a ni a. Ka duh aiin sorkar lam kha an che muang deuh ka ti a, vawiin thleng hian. Khang te kha tun session neih hmasak berah hian official resolution-a rawn lût tlâkah ka ngai hial a ni. Democracy ramah hi chuan khati deuh țaha kan kal a nih loh chuan, sipai chu an â tung mai a. Chuvâng chuan, khatiang kha thleng tawh lo se ka duh khawp mai a, Pu Chairman.

Demand No. 31 - Agriculture & Farmers' Welfare Department:

Tichuan, Demand No. 31 ah hian kal ila. Kan Minister hi a smart khawp mai a. Amaherawhchu, thil hriat loh tam tak a awm ve a ni tih erawh chu pawm sela a thain ka hria a. Ka bialah sorkar hmasa atang khan warehouse pahnih buatsaih niin, tuna kan minister in-charge hian a rawn sawi fel tawh a; tukin zing thleng khan min rawn bia a. Hmunphiah hi kan thian thenkhatte pawh khan "A ro in kan hralh ngai lo", an ti a. Keini bial leh Thorang-ah hi chuan a ro vekin kan hralh ve thung a. Khang warehouse te kha kan nei lian hle a; Pukzing-ah leh Marpara-ah awm a. Vawiin thleng hian a leitu lama hi kan intir kan intir a, an la kal lova. Vawiin chawhma te khan Bangladesh-ah kg-ah taka 65/-in an lei a ni; chu chu Indian currency chuan ₹55/- ang a ni a. Khang kha hma min lakpui ula, accommodation tha tak Minister in-charge Pu Chatea zarah a pho rona hmun nen kan nei tha a ni. (**Member:** An la hawng lo em ni?) La hawng lo; mahse, hawn kher loha hman theih vek a ni. Hawna chaw eikhawm kha a hek mai mai. Chung lam atanga order hi naute'n an umzui loh chuan in hming a tha fo lo ang, tih te hi pawm ve teh u.

A dawt lehah chuan, link-road hi hei, SASCI sum tam tak kan sorkarin a hmu a ni tih kan hria a. Kut-hnathawktute tan a pawimawh ber chu *link-road* a ni. Tunah hian link road atan hian ka MLA fund hi ka hmang tam khawp mai a. Ti hian kan Agriculture Minister smart tak hian keini bial te pawh la rawn zir chiang se a thain ka hria a; chutianga tan la turin ka'n sawm duh a. ;

Tin, oil palm hi... (*Warning bell a ri a*), Pu Chairman ka zo tep e. Oil palm hi kan chin tam a thain ka hria; ram pumah a theih loh pawhin Mamit leh Kolasib District angah hi chuan tanlak a ngai a. Hmanni lawkah Malaysia-ah kar khat chamin ka han zin a. Kan zin chuan Kuala Lumpur Airport atanga khawpui panna km 55 a ni a; a kawng tluanin oil palm kan hmu a. Chutiang khawp chuan tan lakna a nih rualin, rubber lamah pawh tan an la a. Hei hi an development backbone te pawh a ni a. Helai ah hian tan kan lak ve a pawimawh hlein ka hria a. Amaherawhchu, tun hma sorkar kal tate khan research based-in engmah an lo ti lo a. Tlang rama cheng kan ni a, kawngpui thlangah oil palm kan ching tan a, a fuh lo khawp mai a; ka bial Lallen ah te pawh. A rah kg 10 chuang te an han tilum a; Ekhai! A rah khat chhar tur khan nileng tha te a ngai a. Chuvangin, 'kawng chung zela tih chi a ni em' tih te kan Minister hian zirtir sela a tha khawp ang a; zawl a nih loh chuan, a lum palh khan buaithlak tak a ni. Khatiang lam te kha farmers ten an hriat loh hi kan zirtir a tha ang a.

Demand No. 46 - Urban Development & Poverty Alleviation Department:

UD&PA - Demand No. 46 hi, kan thiante sawi ang khan ka biala West Phaileng hi *notified-town* a ni a. Hei hi kan Minister hi minlo hriatpui se khang notified town te tana *unqualified development* ang chi kha a awmin ka hria a; criteria fel tak awmin, khangah khan tan rawn la deuh turin ka ngen duh a.

Demand No. 13 - Department Personnel & Administrative Reforms:

Pu Chairman, a tawpnan, Demand No. 13 hnuaija jail chungchang nen pawh a in relate hlein ka hria a, DP&AR hi. A chhan chu state dang te pawh kan en ve nual a. (**Chairman:** Minute 2 a pel tawh a.) Minute 2 chiah ka sawi ang, bial thil kha, Pu Chairman.

Jail enkawltu kan General neiha hi *Inspector General of Prison* a ni a, staff dang zawng zawng chu uniform ha vek an ni a. A hotu bera Civil Service kan dah lai tak hi kan ennawn

a tha awm mang e aw ka ti a; DP&AR leh Home Deptt. tea minister ni kawp hi kan nei khât a. Mizoram Police Service te hian han thutchilh ve sela a inhmeh zawk awm mang e ka ti a.

Tin, Mizoram-a kan DC post hi IAS Cadre post ah a awm ta vek em ni? Harsatna, a bik takin keini ang bialah te kan tawh fo chu, disaster thilah te kan DC (hnam dang) hnenah direct-in kan VC-te mawlmang takin an kal a Ttawng thiamlo tak takte an ni ve a. DC kan post a nih pawhin hengah hian ngaihnathiamna thui tak nei chungka kan kal a tha awm mang e, tiin rawtna ka'n siam a ni.

A tawpna tak tak atan chuan Pu Chairman, wawiinah hian kan police-te kan thuam chakna atana pawimawh tam tak a awm ang a. Chutih rual erawh chuan, kan demand ah hian motor lama harsatna an neih te a lo lang lo hi chu pawh ka ti a. Kan fund te pawh hi a then chuan kan hmangin ka hria, term hmasa ah khan. Police Deptt. mamawh leina tur ang chite pawh kha; chutiang chuan tan lak nise la. Keini ang bial inkarkik deuh mai, communication gap nasa tak avanga harsatna awm, crime tam tho siah hian vehicle tha kan mamawh bik a ni.

Vawiinah hian, in rinloh deuhin kan Minister-te pahnih demand hi thinlung takin ka pawmpui e. Ka lawm e.

CHAIRMAN : Tunah chuan, Aizawl West-III bialtu Pu VL Zaithanzama ilo sawm ang.

PU VL ZAITHANZAMA: Pu Chairman, ka lawm e. Vawiin ang demand sawihona hunah hian mahni bial chhung sawi nan hun kan hmang tam hle thin a; wawiinah pawh kan ngaihla tam malh malh viau mai a. Tun tum chu kei, lawmthu sawina hun atana hman kan rilruk deuh a ni. Lawmthu sawi tur ka ngah hle mai a.

Demand No. 31 - Agriculture & Farmers' Welfare Department:

Demand No. 31 - Agriculture leh, Demand No. 37 - Cooperation te hi a inhnaih bawk a, kan sawipawlh nawk nawk ang a. Tun hmain Cooperative Movement ah hian hun rei deuh mai Pu Biakliana hnung ka lo zui tawh a. Cooperation Department hi sawi hlawh lo tak thin a ni a, House ah te hian. Vawiinah ka MLA-pui duhawm tak tak mi 3 laiin an rawn sawi ri tawhin ka hria a, eng amah hmain ka lo lawm ve em em ringawt a.

Mizoram Argriculture Marketing Board (MAMB) chuan Aizawl District Cooperative Societies Limited chu sawhthing funna Lino-bag supplier atan a hmang a, bag khat ₹10/- in an pe a. He Society hi Agriculture Marketing Board in bag supply tura a tih avangin an lawm hle a, an aiawhin lawmthu te pawh kan sawi ve nghal ni ta sela. Bana-kaih (hand-holding) scheme hmanga kut-hnathawktute chawikanna tur hmanraw pawimawh takah Mizoram Cooperative Apex Bank hman a ni bawk a. Tin, Collection Center ah Primary Society eng emaw zat hman tangkai anni bawk a. Chuvang chuan, wawiinah hian hetiang taka kan flagship programme zarah kan society te tangkai taka hman anni hi lawmawm ka ti a, keimah ngei pawh hi Cooperator zinga ka tel ve avangin, an aiawhin lawmthu kan sawi duh a ni.

Demand No. 37 - Co-operation Department:

Cooperative Movement hi han sawi rik takah chuan, duh angin Mizoram-ah a la hlawhtling lo hle a, a chhan hi sawi dan a inanglo nual ang a. Tun sorkarin thlai thar lei chungchanga

hetiang taka Cooperative Societies te a hmgang tangkai hi he movement kal zel tan thil tangkai tak a nih kan ring a ni. Ram changkangah cooperative movement hi a hlawhtling tlangpui a; an changkan vanga hlawhtling nge nia, an hlawhtlin vanga changkang tih hi inhnia theih tak chu a ni maithi e. Amaherawhchu, 'an hlawhtlin vanga changkang' tih hi ka pawm lam a ni a. Tlem kan sawi ri hram duh a.

England ramah chuan Consumer Societies te nasa takin an hlawhtling a. He Society hmgang hian retheihna atangin an inkhaichhuak a ni a. German ramah Credit Society an hlawhtlinpui hle a; Zofate hian engnge kan hlawhtlin pui ve dawn chu ka hre chiah lova. Cooperative movement hi a bul atanga kan thlir chuan retheihnain a hrin, tanpuitu pawh an hmuh tawh lohna hmunah miharsate'n mahni leh mahni inkhaichhuak tura an din pawl a ni a. Sorkar zar zo tura din a ni lova, tanpuitu hmuh zawh loh avanga lo piang, retheihnain a hrin a ni. Chuvangin, Mizoram-ah pawh hian Zoram dung leh vang han thlir hian cooperative movement hlawhtlinna chu a tlangpuiin rambuai kum 1967-68 bawr vela society din, vawiin thlenga hlawhtling kha an tam viau reng a ni.

Nichina kan ngaihthlak tak ang khan, Cooperative Department hi cooperative movement tichak tur chuan tihchangtlun, tihchak a ngai tih kha kan ngaihthla tawh a. Hetia han ngaih mai hian an hna hi hautak vak lo anga a lan lain, cooperative societies, State level leh primary societies sang chuang zet Mizoram hmun hrang hrang ramri kil tak taka mite, *entirnan* - Vanbawng ah society pakhat a awm a, khithah Zokhawthar ah, sawtah Saiha ah leh hmun hrang hrangah khatiang pan khawma, an accounte te audit tur kha chuan hna hi a hautak a. Audit statement siam tura an paper mamawh ringawt pawh a tam thamin, duat an ngai hle a ni. Sorkar flagship programme - thlai thar lei kawngah society-te tangkai taka hman anni hi lawmawm ka ti a, ka lawm hle a ni.

Demand No. 47 - Irrigation & Water Resources Department:

Demand No. 47, Irrigation hi sawi tur tam tak a awm ang a. Tihchak a ngai; kut-hnathawktu (farmers) te harsatna lian ber chu, *tui-lak* hi a ni. Tui duh tawh hman tur an neih chuan an thlai thar a lo tha ang a, hnathawh a nuam ang a, an lawm dawn a ni.

Demand No. 16 - Home Department:

Pu Chairman, Demand No. 16, Home ah hian ka'n lut leh ang a. Police Headquarters hi kan bial chhung West-III-a awm a ni a, naupan tet atanga inthenawm kan ni a. Mipui nen tun dinhmunah kan thawh hona a tha a, zalen takin kan awm ho a. An chet danah te sawisel tur kan nei lem lo. Tunah hian he department hi tihchak tum mek a lo ni hi lawmawm ka ti takzet a, Police thar eng emaw zat lak belh a ni dawn a, tha ka tihpui hle a. Hei bakah hian a dangte pawh lak belh zel tul turah ka ngai a ni.

Tin, kan sawi thin a, tun hma opposition lam kan nih lai pawh khan an quarters thatloh zia te leh thawmthat a ngaih zia te vawiin thleng pawhin kan la ngaihthla a. Amaherawhchu, tuna ka hmuh chinah an in bul lawk headquarters compound ah te quarters tha tak tak an sa tan mek a, reilo te ah hmun dang pawh an thuam tha zel turah pawh ngai ta ila; tuna an chet dan en hian a lawmawm thawkhatin ka hria a, lawmthu kan sawi bawh a ni.

Demand No. 30 - Disaster Management & Rehabilitation Department:

Demand No. 30, DM&R hi kan tangkaipui takzet tih kan ngaihthla a, sawi leh tho ila. Cyclone *Remal* ah khan an tangkai zia kan hria a. Kan bial chungah pawh leimin a tam a,

in tam tak, damloh hritlan pawh tawh se motor-a han inphurh chhuah theihlohna kawng block a tam em em a ni. Chutah chuan, a hmun ngeiah rawn enin, lei-minin kawng a block chung pawha kea kalin kan hmun hmata min rawn enpui a, lirthei kal theih lohnaah kea lo kalin, leimin te min enpui a, min tanpui a, kan lawm tak zet a ni. Tui luanna kawr min siam sak a, lei min tur lung remin min dawh sak a. Chuvangin, DM&R Department lakah hian kan lawm a ni.

Demand No. 46 - Urban Development & Poverty Alleviation Department:

A tawp berah chuan, Pu Chairman, Demand No. 46, UD&PA hi, Aizawl mipuiin mamawh kan neih apiang kan thlenna department a ni a, an tel lo hian Zawlkhawpui hi kan awm theilo a ni ber mai. Hall kan mamawh a, tuiluan kawr (side-drain) siam kan ngai a, kawng ko lungrem a ngai a, kawng tam takin kan harsatna min sutkiansak thin a, kan lawm hle a ni. Hetih lai hian ka rilrua thil pakhat awm chu, bawlhhlawh paih kawngah te inzirtir kan la ngai hle mai; mipuiten thu kan awih a ngai. Kawngpui lunlai eng emaw zatah hi chuan sweeper kan mamawh belhin ka hria a. Mipuite thuawih inzirtir a ngai hle a ni.

Vawiina kan Minister zahawm tak takte pahnih demand kan sawiho hi tha ka ti e. Ka lawm e.

CHAIRMAN : Tuirial bialtu MLA Pu K. Laldawngliana ilo sawm ang.

PU K. LALDAWNGLIANA: Pu Chairman, ka lawm e. Vawinah kan Minister zahawm tak takte pahnih - Pu K. Sapdanga leh Pu PC. Vanlalruata te demand sawi hona hun tha tak mai kan nei hi ka lawm tak zet a ni.

Demand No. 16 - Home Department:

Demand No. 16 – Home Department hi ka sawi hmasa duh a. Budget ka'n thlir a, hmasawna a tamna hi ₹2,670.11 lakh a ni a, a lawmawm khawp mai a. Hei hi salary te, wages te, a tula hman tur a ni a. Hmasawna tur, kan ram mamawh police lak belhna tur a ni tih kan hria a, a lawmawm ka ti hle mai a; Police kan lak thar tur hi ram mipuiin kan mamawh a. Chuvang chuan, tha tak leh fel takin, dik takin an lak ka beisei a ni. He kan lak atang hian ...

(Hon. Speaker takes the Chair.)

Pu Speaker, ka sawi tan chiah a nia aw. He kan lak thar atang hian keini biala Mualvum Batallion-ah pawh hian Police kan indaih lo hle mai a. Hei hi rambuai a awm apianga kan mamawh awmna hmun a nih avangin, helai hmuna tan pawh hian min lo hre ve reng dawn nia. Mualvum hi sorkar hmasaah pawh khan staff-quarters te, a kalkawng te theih ang tawkin hma an la a. Amaherawhchu, tunah hian sak that ngai, repair ngai, siam ngai tam tak a la awm a, min lo hriat sak turin kan sawi lang tel duh bawh a ni.

Hei, Kawnpui Police Station pawh hi hmanni lawk khan a building te min han saksak bawh a, lawmthu ka sawi duh bawh a. Pu Speaker, Minister zahawm takin kan mamawh tak mai, 'Serkan Police Outpost pawh buaipui mek a ni' a ti a. Hei police lak belh hunah chuan Outpost pawh min rawn hawn sak ngei ka ring a, kan lo nghakhlel hle a ni tih kha kan sawilang tel duh bawh a ni. Tin, police kan neihchhun te hian fitness lam hi kan mamawh

khawp mai a, chu chu an kalpuiin ka hria a. Hemi kawngah hian a ai nasa leh uar zawka an kalpui a tul hlein ka hria a ni.

Pu Speaker, kan hriat angin kuhva-ro dan loa lo lut khuahkhirhna hi khirh leh zawka kalpui a tul hle a.

District jail kan mamawh zia kan sawi a, henga hmalakna a kal mek hi a lawmawm khawp mai a. Tha taka an kalpui ka beisei bawk a ni. Mizoram Police Act, 2011 siam that a hun tawh hle tih hi ka'n sawilang tel duh bawk a. Police kan indaih loh viau lai hian PHQ-ah hian kan ram mamawh em em mai SP (Narcotic) te, SP (Cyber Crime) te hi post awm si lovin police a rem rem hi kan pawt a ni a. Hengte hi kan mamawh si a, create ila, Unit hrana siam a tul lo maw, ka ti a. Tin, heng lama a thiam bikte pawh hi lak a tul lo maw kan ti deuh bawk a ni. Chungte pawh chu kan Minister hian min lo chhinchhiah sak se. Tin, kum-hlui thlah zan kha ka'n sawi kai duh a ni. Kan khap a, kan khap hneh tak tak si lova, kan han man thul vel a. Hei aia ngaihtuahna zau zawk sengin, a hunbi, a darker emaw, a hmun emaw siam mai a tha lo maw aw, tih te kha ka rilruah a awm bawk a ni.

Demand No. 13 - Department Personnel & Administrative Reforms:

Pu Speaker, Demand No. 13 - Personnel & Administrative Reforms hi kan budget ka'n thlir hian, a tamna hi ₹20.25 lakh a ni a, a lawmawm khawp mai a. DP&AR kaltlang hian sorkar hian Consultant, sorkar-hnathawk pension tawh site hi tunhnaiah hian kan la em, ka hre lova. Engatinge kan re-employ leh thin? Kan lo reemploy a nih chuan, engnge a chhan, tih te hi min hrilhiah bawk se la. Officer awm sate kha hman mai theih anni em; an rintlak lo em ni, te ka ti deuh a ni. Tin, service hrang hrang MCS te, MPS te, MSS te leh a dang te pawh kan sawi thin a, *Secretary* hi an tam lutuk a, an post te pawh, department te-reuh-te te hi an la a. Secretary post te tihlem tumna te a awm em; tin, a aia hnuai zawk service hrang hrangte paw hi lak belh tumna a awm em? Tin, Administrative Reforms hi policy mumal taka siam tumna a awm em, tih te pawh ka'n hre duh bawk a ni.

Demand No. 46 - Urban Development & Poverty Alleviation Department:

Demand No. 46 - UD&PA chungchang hi, a budget han thlir hian a tlemna ringawt pawh hi a tam angreng khawp a, ₹4,203/- lakh lai a ni. Chuti chung chung chuan keini bial hi kan vannei khawp mai a, kan Minister chungah lawmthu ka sawi duh a. Kawnpui-ah ngawt pawh hmun 9: - Bualpui - hmun 2 ah, Thingdawl - hmun 3 ah te hma min laksaknaah lawmthu ka sawi a. Khangte kha min lo hre chhonzawm zel la ka duh bawk a ni. Pu Speaker, *notified-town* 28, Urban Local Body hi Aizawl leh Lunglei-ah chauh kan la nei a. Sorkar hian Urban Local Body neih belh tumna a nei em ka hre duh bawk a. UD&PA hnuai Urban Poverty Alleviation lamah hian tan a ngai hlein ka hria a, kan ngaihpawimawh zual pawh a tulin ka hria a. Hemi kawngah sorkar hian hmalak tumna kan nei em tih te min hrilh thei bawk se.

Tin, Aizawl Smart City Limited-ah hian project tihhlawhtlin tam tak kan nei tawh a. Khang tih hlawhtlin hovah khan post construction management policy emaw, enkawltu tur kha kan siam a ni em; tin, central sorkar atang hian kalpui zel phal a ni em tih te pawh hi kan hre duh deuh hlek a. Tin, Lunglei Town enkawltu tur 'Lunglei Municipal Council' din hi an duh vak lo anga sawi te a awm a; a fuh vak lo em maw ni, ka ti deuh a, ka ngaihtuahna a tithui ang reng khawp mai a. Hemi chungchang hi zir chian deuh a tha mang e, ka ti deuh hlek a ni.

Tin, PAHOSS chungchang hi, a sum kha k-deposit-a dah mai niin ka hria a. Hei hi thil dangah hman a ni ta nge, ka hre lo va; khawpui tana tih kha a ni bik a. Kan khawpui Aizawl leh Lunglei Municipal chhunga parking atan te hian hman theih a ni em, khang te kha? Tin, kum 2024-2025 chhunga central scheme hrang hrang atanga Mizoram-in engzat nge fund kan hmuh tih te ka hre duh bawk a ni.

Demand No. 31 - Agriculture & Farmers' Welfare Department:

Pu Speaker, Demand No. 31 – Agriculture & Farmers' Welfare Department hi sawi ka duh leh a. Mizoram mipui, kut-hnathawktute inngahna department pawimawh tak mai a ni a. Tichuan, budget kan han thlir vang vang a, a tlemna hi ₹1,207.26 a ni. Amaherawhchu, heti chung chung pawh hian kan bial chhunga hmalakna pawimawh tak mai kan Minister zahawm tak khan Thingdawl-ah tissue culture hmangin Alu chi hrisel tak siam chhuahna tur kha min hawn sak kha a ni a. Hei hi kan ram tan mellung pawimawh tak, MNF sawrkar laia lo ruahman kha a ni a. Scientist te phei chuan an lo sawi uar khawp mai a, Pu Speaker, *North-East pum chawm thei tur* a nih thu kha an sawi a ni. Hei hi hmalak chhunzawm zel tumna a awm em, tih te pawh ka hre duh bawk a.

Tin, Mizoram Agriculture Marketing Board kaltlangin sawhthing, hmunphiah te hi a bikin kan sawilang duh a; aieng leh hmarcha te hi chu lei tur a awm mang lova. Chuvang chuan, sawhthing leh hmunphiah chungchang hi 'dinglam leh veilam' ti te khan kan insawi a, tunah hian an lei mek a ni. Zau taka sawi ngai niin ka hre lova, kan zawhna tur zawk chu, a lei lohna chhan, a fel lohna tam tak a awm tih a chiang a, helam atangin an sawi a; hmundangah pawh a chiang a ni. Ka hriat duh zawk chu, sawhthing leh hmunphiah te hi chin chhunzawm tir zel kan tum em; sorkar hian lei zel kan tum em, Kum 2028 sorkar chhung hian? tih kha. Kut-hnathawktute'n kan nghahhlelh em em, pawimawh tak leh tha em em tur kan tih loh a awm a. Hei hi Pu Speaker, kan Minister hian lo chhin chhiah sela; *crop-insurance* din hi a tul tawhin ka hria a ni.

Demand No. 37 - Co-operation Department

Demand No. 37 - Co-operation Department hi, kan hriat angin Mizoram-ah Co-operation Department hi department upa tawh tak mai a ni a, a ram pumah hian State-level society hi 13 an awm a, Primary Co-operative Society a in register ringawt pawh 1274 an awm mek a ni. District 7 ah hian officer-in a enkawl a, District thar 3 - Hnahthial, Saitual, Khawzawl-ah te hian an office tur sak vat a ngai a, officer-te'n an enkawl ve a ngai a ni. District dang Autonomous District Council 3 – Siaha, Lai leh Chakma Autonomous te hi chu a hranin an inenkawl a ni.

Tunah hian kan budget 2023 te, 2024 leh tun 2025 te hi ka han thlir a, a tlem zawng zelin kan dawng emaw tih laiin tun tum hi, Pu Speaker, ₹260.5/-in an up hret a, hei hi a lawmawm ka ti a. Amaherawhchu, hmasawna tur lam hi budget-ah hian a awm chiah chuang lo a ni. State Level Co-operative Society hi 13 lai - MIZOFED, MCAB, PIGFED, MAHFED, MSCU, MAHCO, MULCO, SERIFED, POULTRYFED, WOMENFED, HOUSEFED leh ZO MULTI-MEDI FED te kha an ni a, Chairman te kha kum 5 chhung tana thlan an ni a. heng Chairman te hi kan sorkar-ah hian engnge an status; Protocol-a an dinhmun dik tak hi Pu Speaker, hriat a chakawm a.

Tin, Pu Speaker, theih ang tawkin society ten hma lain ke an pen a, an thang chho ve mek zel a. Chutih laiin, audit fee ah hian problem lian tak a awm a. Audit fee hi tihlem hret theih dan a awm em?

A tawp bera chuan Pu Speaker, Co-operative Development Council hi *Act* awm tawh a ni a, tun aia changtlung zawk leh tha zawka ke kan pen theihna tur hi kan Minister pawh ka sawipui tam tawh khawp mai a, RCS chungchang te pawh. Hei hi ngaih pawimawh theih ni se tih kha ka sawi tel duh bawka.

Tichuan, kan Minister pahnihte demand hi tha ka ti a, ka pawm pui e. Ka lawm e.

SPEAKER : A lawmawm e. Tunah Member zahawm tak Pu W. Chhuanawma ilo sawm ang

PU W. CHHUANAWMA: Pu Speaker, ka lawm e. Hei, kan Minister pahnihte chanpual kan sawihoa hi, mihring-nunhona atana pawimawh tak demand a ni a, a pawimawh hle a. Hetiang sawiho thei tura ka awm ve hi ka lawm hle a ni. Ka taksa chak lohna avangin ni 2 lai House-ah ka awm thei lova. Demand sawi hunah sawi tam lo mah ila, ka ngaih pawimawh avangin ka rawn tel ve a ni.

Demand No. 46 - Urban Development & Poverty Alleviation Department:

Vawiin kan Minister-te demand kan sawihona hi MLA-te'n kan demand kan sawi ve hun ni ta berin ka hria a. Chuvangin, kan bial theuhte thahnemngai takin kan sawi hlawm a. UD & PA lam te, Home lam te kan sawi a, police lak belh turah lawmthu te kan han sawi hlawm a. Tichuan, demand an rawn sawia thil rawn inziak zawng zawng kha a tha em em vek a ni. Tun tum 2025-26 Demand hi kum thar (nakum) ah dam tea kan awm chuan ZPM sorkar hmel lanna tur a ni tawh dawn a; a hma kum te kha chu *year of consolidation* te a lo ni a, duh angin hna thawh te a lo har a. Tuna mi hi dik taka kan hman zel chuan Mizoram hmel a danglam dawrh dawn niin ka hria.

Tichuan, kan district thar pakhat Khawzawl District chhunga khaw lian ber dawttu chu (ka bial Tuichang Constituency chhung ni lo mahsela) Kawlkulh a ni a. Notified town a la ni lova, kan Minister zahawm tak (a changtu) hian hei hi min lo chhinchhiah sak se ka duh a. Biate te hi kan Constituency chhung ni lo mah sela, Khawzawl District chhunga awm tho an ni a. Notified-town ni tawh heng - Khawhai te nena tehkhin chuan Kawlkulh hi a lian zawk a, In 800 chuang fe an ni. Chuvangin *notified town*-a rinluh ngei ngei chi niin ka hria a ni.

Demand No. 16 - Home Department:

Tichuan Demand No. 16, Home Department chungchangah hian, Khawzawl District hi district thar ngang a lo ni a, SP Office pawh hi Ni 18.2.2019 khan hawn a ni chauh a. Khawzawl-Dinthar Veng ah mimal In luaha a bul tanin, tih nawk-nawk a ni a. Tichuan GAD in SP Office sakna tur Khawzawl-Zuchhip Veng a Modern Middle School defunct tawh hmun kha a pe a, sak hlan a nghahhlelhawm hle mai a. Tichuan, chu school hlui ve tawh takah chuan SP Office kalpui mek a ni a, duh angin room pawh a tam tawk lova, inkhualtelem a la ang viau a ni. Chuvangin, hmanhmawh a ngai khawp mai. Tin, SP te, Addl. SP te, DSP leh OC te pawh quarters a la awm loh avangin mimal In te an luah a. Chuvangin, tuna kan dinhmun hi chu a la ho hle mai a. Amaherawhchu, sorkarin an In luah man chu a tum thung a ni.

Tin, Khawzawl PS Complex-a quarters awm te hi an hlui em em tawh a, sak that an ngai hle a ni. Chuvangin, hei hi khawngaihin min lo chhinchhiah sak sela. A chhan chu, hei thal arawn ni leh dawn a, nakinah disaster lam an buai te a hlauhawm a. Chuvangin, sak that hun lai tak a ni a; se-bo hnu a se-kawng kan khar hma hian han tih a duhawm hle mai.

Khawhai Police Outpost tur hi *Zawhna & Chhanna*-ah pawh khan kan inzawt tawh a; Home changtu Minister zahawm tak min chhanna kha a ngaihthatthlakin, a lawmawm ka ti hle a, a chhanna kha Luka ziak tluka chiang niin ka hre deuh a. Chuvangin, Khawhai, khaw sawm vel awmnaah hian an mamawh em em tawh a ni.

Tichuan, Khawzawl luh hmaa Tuisenphai Police Outpost hi a chhun zan zawm, 24 hours duty-na a ni a, Dan bawhchhiatna leh thil thalo an man ngun em em a ni. Chuvangin, helai hi a pawimawh em em a, tih changtlun a ngai a; mi 5 tal duty awm reng thei tura kan thuum chak a ngai khawp mai.

Demand No. 30 - Disaster Management & Rehabilitation Department:

Tin, DM&R chungchanga sawi duh kan neih leh chu, PMGSY kawng laih khan New Chalrang kawngchhak meter 40 lai mai a timin vak mai a, a min zel lohna atan hmanhmawh taka hma lak vat a ngai a ni. Tin, Khawzawl khawpui chhunga Vengthar market awmna hi *sinking area* a ni a. Hei hi fum-fe taka zirchianna a awm lo nge ni, Hunthar lei tlahniam ang deuhin a kawngpui (highway) lai tak hi kumtin mai hian a tlahniam ve deuh ziah a. Thalah an han chhung khat a, kawng an han la mar leh a; fur arawn ni a, a tlahniam leh thin a ni. Hei hi khawpui laili tak a ni a, Khawzawl Vengthar chu kan hre vek ang a, sumdawnna hmunpui hmun laili lai a ni a. Chuvangin, a chhiat zau zel loh nan mithiamte ruaia zirchian ni se; check-dam nena tih reh chi nge, chiang deuha zir a ngai awm e. Hei hi a pawimawh khawpin ka hria.

Demand No. 31 - Agriculture & Farmers' Welfare Department:

Tichuan Agriculture lam demand ah hian; hei, lehkha phekkhat pawh hi keu har ka ti a, a demand number te ka sawi lo a nih pawhin min hrethiam a ni ang chu. Chawa intodelh hi, sorkar hmasa lam tawhah khan *kum 3 chhunga zobuha intodelh* te kha an sawi a. A intodelh dan kalkawng, a formula taka kha kan la chiang lo deuh nge ni. A formula nia ka hriat chu, tuna kan Agriculture Minister zuanzang tak hnu aia zobuh an han lei khan kut-hnathawktute an phur thar em em a. Chuvangin, sawhthing hi kan thlai hriatthiam, kumkhat chhunga thar awk theih, (dawhthei lo tak kan ni kan ti dawn nge) vawikhata tih tawkkhampang thiam chi kan ni a. Chuvangin, sawhthing te hi a kg zawnga tam hma a lo ni a; heng ringawt ti lovin buh chinah te hian in concentrate ila. Hetianga man man taka kan la chhunzawm zel a nih phei chuan, buha intodelh hi chu kan awlsamin ka ring a ni.

Chamdur lam saw ka la kal ve lo na chu, Mizoram chhung tlangramah hian potential area a tam hle mai a. Buh chin theihna, leilet siam theihna hmun kan neihte hi siam zo ta vek ila, mithiamte sawi ka hriatah chuan, "*Mizoram-a mihring let khat chuawng pawh hian min rawn belh sela, chutianga kan buh thar chu kan ei seng lovang*" an ti hial a ni. Chuvangin, Pu Speaker, hei hi a pawimawhin ka hria a, buh thar hi lei chhunzawm zel tha ka ti a, Chamdur leh khawthlang lam bial leilet siam theihnaah te pawh siam zel tha ka ti a.

Pu Speaker, Khawzawl-Dendun to RO tuikhur, agriculture link road km 6 vela thui pawimawh deuh a awm a, Tuichang Lui behchhanin leilet phai hmun li-ah a awm a ni.

Chutah chuan tuikhur tha deuh deuh 3 a awm bawk a. Tin, chu hmunah chuan RO village te, Khawzawl khawpui a tam zawk (a phel phawk ang vel) ah te chuan eizawn nan an hmang a ni. Chu hmunah chuan a link road chu a awm tawh a, amaherawhchu, *all-weather road* a nih loh avangin, fur-thala kal theih turin PCC flooring emaw tala min siam sak theih chuan a lawmawm ngawt ang. A chhan chu, leileta siam theih ram a la tam em em mai a; chutiang te a nih pheih chuan, helai bial hi chu kan changkang dawrh-dawrh dawn tihna a ni.

Tin, Sialhawk te, Tualte te pawh sawi a chakawm khawp mai. Helai bial hi mi-taima bial an niin ka hria. Lalkhuihthei an ching nasain, an thar nasa em em a. Tin, tomato te, sapthei te an thar nasa em em bawk a. Chuvangin, kan Minister hian khatiang zawng zawnga tihdan tur hi min hriatpui ka ring a ni.

Aw le, Pu Speaker, tuna kan kan Minister pahnihte demand rawn putlul hi ka thlawp a, pass ngei ka remti a. Kan MLA te, kan zavaiin kan demand theuh te kan sawi ve niin ka hria a, Pu Speaker. Ka lawm e.

SPEAKER : A lawmawm e. Dar 5 a hnai ta a, hriselna te a inchen lo thei a. Member sawi duh ban phar kan la awm nual mai a. Tin, kan Minister ten an la wind-up dawn a, hun eng emaw chen chu kan la awh dawn tihna a ni a. Refreshment hi, dar 5 a ri tep a; kan han ei phawt ang a kan lut khawm leh dawn nge, dar 6 te chu thleng ila kan ti zawk? Engnge kan duh dan le?

PU LALCHHANDAMA RALTE, OPP. LEADER: Pu Speaker, la sawi turte thlirin dar 5:30 hian kan sawi zo ang em aw ka ti a. Kan luhkhawmah kan Minister pahnihte hian wind-up zawk sela a tha ang em? Dar 5:30 ah te chuan kan bang ngei ang a, heta tang hi chuan; a hnua han sawi leh ai chuan wind-up lamah khan kal ta ila. I veilam atangin Dr. K. Beichhua leh keimah hi kan la niin ka hria a, I dinglamah mi pahnih bak an awm tawh lo em? Aw, pali an la awm a nih chuan, I rorelna apiang kha a tha mai e.

SPEAKER : Break phawt mai ila, dar 6 ah kan lut khawm leh dawn nia.

(Recess at 4:56 PM)

5:30 PM

SPEAKER : Tunah chuan, Member zahawm tak Dr. Lorrain Lalpekliana ilo sawm ang.

DR. LORRAIN LALPEKLIANA CHINZAH: Pu Speaker, ka lawm e. Vawiinah kan Minister chhuanawm tak Pu K. Sapdanga leh Pu PC Vanlalruata te demand kan sawi hi thei hi a lawmawm ka ti a; chuta tel ve thei tura hun min pek avangin, a hmasain lawmthu ka sawi a ni.

Kan minister-te hmalakna chhuanawm ka ti a, kan sorkar hian kan mipuite tan theihtawp a chhuah a ni tih vawiinah hian Pu Speaker, he House kaltlang hian ka sawi duh a. Hun a tlem em avangin thil hrang hrang sawi lovin kan district leh ka bial mamawh te han tarlan ve ka duh a.

Demand No. 16 - Home Department:

Demand No. 16, Home ah hian, kan Minister chhuanawm tak Pu K. Sapdanga hmalakna hnuaiia kan ramin hmasawna leh muanna a hmu mek hi lawmawm ka ti a. Jail sak thatna tur crore 55 lai mai he department hnuaiia sanction a rawn ni hi lawmawm a, kan Minister chungah pawh lawmthu ka sawi a ni.

Kan bial leh kan district chhung mamawhte/demand-te tlem han sawi lan ka duh a. Lawngtlai district-ah hian police indaihlohna a nasa hle a, kan district cover hi khaw 548 a ni a, international border hrula awm khuate nen. Chuvangin, police leh IR police te kan mamawh belh nasa hle mai a. Lawngtlai District-a police an rawn dah te hi thla 1-2 lek an awm hnuah hmun danga sawn let leh an ni thin a, hei hian indaihlohna a tizual a. Hun lo awm turah pawh kan Minister-in hei hi min hriatsak se ka duh a ni.

Lawngtlai District-in LOC kan neih hi a tlem hle a, district cover zau leh lian kan nih angin, district te zawk anga LOC pek kan ni thin hi min ennawn saka, sum lamah duhsak deuh kan ngai a. Sawi tak angin, international boundary bula awm kan ni a, rikrum thilah chet chhuah a ngaih fo thin avangin kan police-ten sum indaihlohna avanga harsatna an tawk fo thin a ni. Lawngtlai - Thingkah 3rd IR panna kawng hi vawiin thlengin black-topping a la ni lova, a kawng a chhoh avangin furah harsatna nasa tak an tawk thin a, ngaih pawimawh thei ni se a thain ka hria a. Tin, he kawnga ram neitute nena harsatna awm hi chinfel vat ni se tiin vawiinah hian ka ngen bawk a. Tuna an kawng hmanlai bakah Thingkah kawng atanga luh chhohna, polytechnic building bul kaltlanga kawng kal hi chei that ni se a thain ka hria a. Police IR hmunpui luhna leh chhuahna kawng pakhat chauh hman hi security kaihhnawih thilah pawh a him lovin ka hria a, hei hi min ngaih pawimawh sak turin kan Minister-te ka ngen bawk a ni.

Tin, an quarters-te pawh ruahtui a far nasa a. Hmanniah an Commandant nen kan inkawm a, department-in sum an neih ang tawk te pawhin an han siam ve a; Amaherawhchu, an sum neih te a beitham avangin harsatna kan tawk nasa hle a ni, tih te pawh ka han tarlang a. Kan Commandant a fakawm a, an harsatna pawh kan Minister-in min hriatpui turin ka han ngen bawk a. Kan district chhungah police quarters thalo leh luah tlak loh tam tak a awm a, a hmunah te pawh kalin, campaign lai te pawhin kan va lut a; a thalo takzet a ni. Kan Minister pawhin hei hi min ngaih pawimawh sak se duh bawk a.

Tin, Sangau khua hi kum 200 tling tawh, hmun pawimawh tak a ni a; Burma ramria awm a ni. Hetah hian police awm an tlem hle a, OC tiamin mi 11 chauh an awm a ni. Helai hmunah hian raltlan an tam a, ruihhlo leh smuggling a hluar hle bawk a. VIP leh tourists-te'n Phawngpui tlang te, Saisihchhuah te, Chawngkhupa Bethel hmun te an tlawh chamchi a. VIP an kal chang te hian security pek an ngai a, hei hian indaihlohna te pawh a tizual thin a. Chutiang chuan, Bualpui NG-ah te pawh police staff indaihlohna a nasa em em a. Archhuang khua hi Myanmar atanga kan ram lo luhna hmun pakhat a ni a, hetah hian police beat post kan mamawh hle a ni.

Heng area ka lo tarlanah te hian police indaihlohna a nasat avangin harsatna tam tak kan tawk thin a. 2019 khan Saisihchhuah-ah police outpost dah tura tih a ni a, order pawh tihchhuah a niin ka hria a. Mahse Pu Speaker, vawiin thlengin hei hi a takin a la function lova, kan Minister hian a taka a function ngei theih nan hma min laksak se ka tih le mai.

Lawngtlai West lama Zochachhuah te, Bungtlang South te pawh police indaihlohna a nasa hle tih ka han tarlang duh bawk a ni.

Demand No. 30 - Disaster Management & Rehabilitation Department:

Demand No. 30 - Disaster Management & Rehabilitation chungchanghian ka bial chhunga harsatna tlem han tarlan ka duh a. Pu Speaker, 2024 July thla tir khan Sangau-Dinthar Vengah lei tlahniam awmin, in 45 - RCC building 22 leh assam-type building 22 te a effect a. Hemi chungchang hi July Ni 8-ah Sangau BDO-in Lawngtlai DC-ah report pein, July Ni 9-ah kan DC-in DM&R Director hnenah report a pe chhawng a. Pu Speaker, i phalnain, bialtu MDC Pu Hrekunga nen DM&R Minister hmuin DO letter pawh kan pe nghe nghe a, geologist min tirh sak turin kan ngen a. October Ni 22, 2024 khan geologists-ten a hmunah enfiahin sorkarah pawh report an pe tawh nghe nghe a ni. Dinmun hlauhawm taka ding a nih avangin tuihawk luankawr siam turin 71-RCC ngen an ni a, tunah hian siam mek a ni. Helai hmun veng tur hian pawisa tam tak sen ngai a nih hmel a, kumin fur tlak hma ngeiin sorkarin hma min laksak turin he House kaltlang hian Pu Speaker, ka ngen a ni.

Tin, Lawngtlai-III Salem Veng-a sinking area hi hun rei tak tawha ta awm a ni a, DPR pawh siamin submit fel vek tawh a ni a. Hei hi chhungkaw tam tak tan harsatna leh mangangna thlentu a ni a. Kan Minister ngei pawh a hmunah te kalin thil awm dan a hmunah a enfiah a, a hma lama hma min laksak turin vawiinah hian kan Minister pawh ka ngen duh bawk a ni.

Tin, Lawngtlai West bialtu Pu C. Ngunlianchunga'n a lo sawi tawh ang khan, AOC Veng-a KMMTTP Road, District Hospital thlang zawnah leimin hlauhawm tak a awm a, min belh thei reng dinmunah tunah hian a awm a ni. Chuvangin, kan district hospital tan hei hi a hlauhawm a. Lawngtlai District hmun hrang hrangah kawr hlauhawm tak tak chhiatna thlen thei tam tak a awm a, department lam hian survey te neiin hma min laksak se tiin kan Minister ka ngen duh bawk a ni.

Demand No. 46 - Urban Development & Poverty Alleviation Department:

Pu Speaker, Demand No. 46 ah hian, Lawngtlai District-a UD&PA Department hi District Project Officer hnuaiyah tunah hian an awm a, staff 4 chauh an nei ah 2 te chu NLUM staff an ni a, a dang 2 hi Housing-For-All staff an ni a. An indaihlo hle a, staff min dah belhsak turin ka ngen bawk a. Tin, district 7-in DUDO an nei a, keini hian District Project Officer neiin SDO-in min enkawl a, district administration mai bakah hna dang tam tak a kawp avangin a indaih lo hle a. Chuvangin, DUDO kan district hi min pea min thuamchak turin vawiinah hian kan Minister ka ngen a.

Tin, Lawngtlai khawpuiah bazar kan nei tha lova, bazar tha kan neih theih dan turte pawh min ngaihtuhsak turin ka ngen bawk a. Solid-Waste Management construction Lawngtlai atanga km 10 vela hlaah kalpui mek a ni hi kan Minister chungah lawmthu ka sawi a. Amaherawhchu, Engineer-ten monitoring fund an nei lova, construction site a hlat deuh avangin harsatna an tawh a; hei hi min ngaihtuhsak thei se tiin ka ngen bawk a ni.

Demand No. 31 - Agriculture & Farmers' Welfare Department:

Pu Speaker, Demand No. 31 ah hian ka sawi duh chu, Kan sorkar hmalaknain sorkarin sawhthing a lei hi a lawmawm ka ti a. Ka bial chhungah pawh Sangau te, Siachangkawn

leh Lawngtlai vela kan loneitute, kut-hnathawktute'n an thlai tharte an hralh thei hi a lawmawm ka ti a. Tin, Lawngtlai khawpuiin chakkhai kan lakna ber Tuiphal-zau hi Agriculture Department hian min ngaih pawimawh sak lehzuat turin ka ngen duh a. Helai zau hi potential nei tha tak a ni a. Hman deuh khan Dawnfawh te pawh tharin, sum tam tak an lalut a, kei pawh a hmunah kalin ka han enpui a. Helai hmunah hian PCC approach road te, tui-kawng siam te leh lei-lehna hmanrua tur tractor an mamawh hle a ni. Tin, Chamdur project kan sawi thin a, Chamdur project hi '*Rice Bowl of Mizoram*' ni thei khawpa potential nei tha a ni a. Kan sorkar hian engchen nge hma lakna a neiha, tih puitlin ngei a tum em, tih te ka hre duh a. Tihlawhtling ngei tur pawhin kan Minister hi ka ngen bawk a ni.

Tin, oil palm hi Lawngtlai District-ah chingtu thahnem tak kan awm a, India rama edible oil indaih lohna ngaihtuahin, potential tha tak kan nei a. Amaherawhchu, processing unit a hlat avangin kut-hnathawktute'n harsatna nasa tak an tawh a. Patanjali Company in Lawngtlai District-ah unit din a tum hi a lawmawm ka ti a. Vawiina kan Minister hian he processing unit hi a hma lama din a nih theihna tura hma min lo laksak turin ka ngen duh a.

Tin, kan Ministry hian Agriculture & Allied Sector a ngai pawimawh hi lawmawm ka ti a. A bik takin tunah hian Lawngtlai District-ah staff indaihlohna a nasa a. Tunah hian LDC pakhat chiah an nei a, UDC, Assistant, Accountant an neilo a ni. Technical Staff pathum kan nei a, kan block zawng zawnga awm tir tur pawhin staff kan indaih lova. Chuvangin, heng staff indaihlohna te hi min hriatsaka, hma min laksak turin kan Minister hi ka ngen a ni. Tin, FOCUS hmangin agriculture lam nasa taka tihchangtlun a ni a, mahse, vawiinah hian a tawp ta a. Hengah hian hma lak zawm tumna a awm em tih ka zawt duh bawk a ni.

A tawp berah chuan, Sangau hi AEO awmna thin niin, staff-quarters te pawh a lo awm nual tawh thin a. Mahse, tunah hian quarters te hi luah tlaka lawi a awm lova, a ram vek tawh a. Tunah hian Block Agriculture Officer dah a ni tawh a, building leh staff indaihlohna avangin a hmunah an thu thei lova. He Sangau station-ah ngei an thut theihna turin kan Minister-in hma min laksak se, tiin ka ngen bawk a ni.

Aw le, Pu Speaker, kan Minister pahnihte - Pu K. Sapdanga, leh Pu PC Vanlalruata demand kan sawiho hi a tha kan ti a, pass ngei a nih theih nan ka thlawp e. Ka lawm e.

SPEAKER : Tunah chuan Member zahawm tak Dr. K. Beichhua ilo sawm ang.

DR. K. BEICHHUA: Pu Speaker, ka lawm e. Vawiinah kan Minister zahawm tak tak pahnihte demand kan sawi mek a, kei pawh a chungah lut nghal mai ila.

Demand No. 13 - Department Personnel & Administrative Reforms:

Demand No. 13 - Personnel & Administrative Reforms hi department pawimawh tak mai a ni a. Kalphung-thar sorkarin administrative reforms thar kan siam dawn an tih, a chahbi chu a ni dawn a ni.

He department hi sorkar inrelbawlina leh services a awmte tan chuan 'kan radar' ti ila, kan tihsual ka ring lova. *Pakhatna*-ah chuan, 'recruitment rules' leh 'service rules' kan tihte hi tun hma chuan a fuh lo, dik lo tia sawi a awm thin a, tunah hi chuan a dik tawh turah ngai ila. Chutih laia ka sawi duh chu, department tam takah hi '*General, without Soldier*' tih

ang deuha tun atanga rei lotea awm tur hi tam tak an awm tawh a ni. Kum tin combine service kan conduct a, a lawm awm lutuk; conduct zel ang. Chutih rual chuan, technical department lama kan mamawh ngawih-ngawih kan mithiam tam tak an tel lova kan kal theih miah lohna department tam tak, *entirnan* - Health Deptt. ah doctor tam tak kan mamawh; mahse, a ngheta thawk lo chuan thingtlang PHC ah doctor tumah an awm duh tawh lo. Heng te hi conduct hleitheh lovin kan awm a. AH & Vety te, PWD te pawh chu ti bawk; technical department tam tak hi service la hlei theih lovin a awm a ni. Senior ho lah an pension zung zung tawh mai si a. Pu Speaker, heng te hi ngaihtuah chuan a lungchhiat thlak ka ti a ni. Ka demand hi ram pum demand a ni; ka bial demand chauh a ni lo. Chuvangin, helai hi ka sawi duh a ni.

Pahnihna-ah chuan, Pu Speaker, ka experience chinah Secretary atanga a hnuaihngung deuhte ngaihtuah hian Director te, Secretary te, department-a *transfer and posting* mumal lo lutuk avang hian, kan Secretary ten thil te zirin an tui dawn chauh a, department dangah sawn anni leh thin a, hei hi sorkar hian a tuar em em a ni. Chumi piah lamah chuan, tunah MLA kan ni a –Public Account Committee (PAC)-in meeting te kan ko a, ‘hmanni lawka rawn lut ka ni a, engmah ka hre lo’ an han ti te chu, a bei dawn thlak a ni. Chuvang chuan, *transfer and posting* ah hian political party thlirna ang ngawta thlir lovin, ‘kan ram tan eng hi nge tha ang’ tiin DP&AR kaltlang hian hma ila teh ang u.

Tin, Pu Speaker, All India Service kan ngaisang a, a ngaihsanawm bawk. Kan ramin a mamawh kan ti; kan fate kan naute lut se kan duh. Chutih lai chuan, Mizoram hian All India Service cadre hran neih hi kan duhna a rei tawh. Mahse, tu-sorkar mahin kan la ti thei lo. He kalphung-thar sorkar hian engchen nge hma a lak tawh, tih pawh kan hriat a tha hlein ka hria.

Pu Speaker, chutiang chuan *major-head* 2070 hnuai *object-head* 40, *Award and Prizes* ah 2024-2025 ah khan sum dah a ni a, mahse 2025-2026 atan hian dah a ni ta lova. Hei hi engnge a chhan ni ang; kum kal mekah pek tur an awm si a? Kum lo kal leh turah pawh pek tur an awm dawn lo tihna em ni, he lawman hi? Pu Speaker, hei hi a changtu Minister hian tun kum lo kal turah hian awm dawn lo angin inlarna a hmu nge; hei hi min chhang ngei se a thain ka hria a ni, Pu Speaker. Hei hi DP&AR bika pawimawh deuh nia ka hriat chu a ni a. A dangah pawh, District administration reforms ah te pawh hei hi a pawimawh hle dawn a, Aizawl chauh reform hi a tawk miah lova. Department tenaute DC awpna hnuai, DC office-a beh tir mai te pawh hi a tulin ka hria, an department te heta tangin engmah kan pe tak tak thei si loh chuan; staff mumal an awm lo bawk nen. Heng te pawh hi ‘administrative reforms’ kan tihah ah hian rilruah nei ila. *Entirnan*: I&PR hi hmanna kan sawi tawh ang khan, officer a awm a, clerk an awm lova, driver an awm lova; a building a chhe em em a. Hengte pawh hi kan run hleitheh lo a nih chuan, DC Office-ah attached-in awm se a tha mai lawm ni, tih pawh rilru ah ka lo nei a.

Tin, Pu Speaker, sorkar-hnathawkte promotional avenue inthlau lutuk te pawh hi a ngaihawm awm a ni. Heng te pawh hi uluk taka en ni se, tiin kha ka rawt duh bawk a. Administrative Reforms kan ngaihawmawh viau lai hian, department tana kum 2024-2025 RE-a sum ruahman aiin kumina ruahman a tlem ta daih mai te hi, ‘sum tlem zawkin kan manage thei ang’, an ti anih ka ring a, mak ka ti hle a ni, Pu Speaker.

Demand No. 16 - Home Department:

Home Department ah hian Pu Speaker, nikum lamah khan he sorkarin resolution a rawn putluh FMR leh border fencing chungchang kha House kan pass a. Kan sorkar hian khatah khan engchen nge hma a lak tawh tih kha kan Home Minister hian min react nghe nghe se a thain ka hria a. Tin, *Object Head 72*-ah khan engmah dah a ni ta lo va; Home hnuai Building & Infrastructure lamah hian tun kum lo kal turah hian hmalak tumna a awm lo nge, hei hi engnge a awmzia? Tin, *Object Head 51*-ah Motor Vehicle a awm a, heta sum dah hi a tlem hle a. Tun kan dinhmun ngaihtuah hian thingtlang lama kan police station-a motor awmte a chhe em em mai a. Nikum lam khan ka bial Siaha police station-a thawkte misual uma chhuak tur an motor running start a ngaih avangin an misualte an tlanbo vek hman, tih te a ni a; chutiang dinhmun a awm chu kan ni a. Chuvang chuan, helai kan budget en hian a thlaphanawm ka ti a ni. Tunlaiah misualte hi hriamhrei changkang tak tak nen, motor tha tak takte nen an tal tawh si a. Chuvang chuan, kan police lamte pawh hi thumthat an pawimawh hlein ka hria.

A tlangpuiin tuna kan demand hi 2024-2025 RE aiin a hniam vek a, nakin RE ah te a sang leh vak si ang tih erawh a hlauhthawn awmin ka hria. Tichuan, tuna police 200 chuang kan lak turah hian, hmanni khan recruitment lam ka zawt a, Mizoram pumpui hup turin hmun 4-ah kan la dawn tih a ni a; Aizawl-ah 2, Khawzawl-ah 2, Lunglei-ah 2. Pu Speaker, hei hi rationalize deuh hlek a tha lo maw? Chhim lam tan Lawngtlai-ah ti ula, Siaha leh Chawngte lam atang pawhin panna a hnai a. Duh dan phei chuan district tinah conduct ni se. Chu chu sorkarin a tlin lo anih pawhin Aizawl-a 2 awm kha Lawngtlai-ah pakhat min lo dah sak ta ula, chutiang chuan helam atanga police intlar turte tan a awlsam deuh zawk dawn a, tih te rilru-ah a awm a. Tin, police recruitment-a compassionate ground 5% tih hi, a nih dan tur dik tak 5% hi kan la thei ang em tih te min react bawk se.

Tichuan, ka bial lam sawi ve ila. Siaha ah hian police an indaihlo em em a. Khawpui senior-most anih angin, cctv te kan mamawh ve khawp mai a, hei hi min dah sak thei se tih kha ka ngenna ni ta se. Kan SP Office hi UT hun laia sak a ni a, a rawp tawh e mem a. Siaha police te chuan ral leh misual aimahin ruah leh thli an hlau zawk a ni. Tlang panga awm a ni a, a building leh staff-quarters te a chhe bawk si a. Chu chu kan dinhmun a ni a. Chuvang chuan, kan Home Minister zahawm takin hei hi min lo hriat sak se tih kha ka ngenna a ni a.

Demand No. 30 - Disaster Management & Rehabilitation Department:

Tin, Pu Speaker, Demand No. 30 - Disaster Management & Rehabilitation Department chana ka ngaihpawimawh em em chu, ranvulh hi kan ram hi pi leh pute atang tawhin kan economy, kan inghahna ber a ni a. ran hri hi a leng zeuh zeuh a, epidemic kan tawng fo a. Tunah pawh African Swine Fever vangin kan tuar nasa a. Heng te hi kan sorkar hian *disaster*-ah a puang niin ka hria a. A lo la puang lo a nih chuan, puan ni se, compensation inpek dan kawng te pawh a awm tur a ni a.

Tin, ka bial Siaha, New Colony-III veng a sinking area hi mithiam geologist te nen vawi thum lai kan en tawh a. A awmdan hi mihring cancer vei ang hi ka chan a. Zawwi-zawwiin a tlahniam ang a, kan inrinloh lai engtik ni ah emaw chuan Siaha hmun 1/5 hi chu a pil dawn tih a ni a. Helai hi khawngaih takin min lo ngaihven sak se tiin Disaster Management & Rehabilitation changtu hi ka ngen bawk a.

Demand No. 46 - Urban Development & Poverty Alleviation Department:

Urban Development & Poverty Alleviation ah hian Pu Speaker, District Capital ho pawh hian he department hi kan ngai hle tih min lo hriat sak se. Aizawl hi Mizoram kan khawpui ber a ni a, Aizawl chauh hi Mizoram a ni lova, District Capital-te pawh hi UD&PA mamawh vek kan ni. Kan District Capital bikah hian UD&PA kutthlakna hmuh tur hi tun hnaiah hian a vang khawp mai.

Demand No. 31 - Agriculture & Farmers' Welfare Department:

Tichuan, Demand No. 31, Agriculture & Farmers' Welfare hi Pu Speaker, 2024-2025 leh 2025-2026 te RE leh BE khaikhin hian, he department hian loneitu, agriculture hmanga eizawngtute tan beiseina a hawnsak tlem hle niin a lang a ni. 2024-2025 BE pawh hi han thlir ila, 2025-2026 BE nen a inthlauhna pawh a tam hle a ni. Hei hi a tlem zawngin a kal ta a ni ber a. Hetiang zel a nih chuan, he department hi a zuih ral zel ang a, a tawpah chuan a bo mai te a hlauhawm a; kut-hnathawktute tanpuina tur channel a ni ve bawk si a. Chuvang chuan, kut-hnathawktu ngaipawimawhtu he kalphung-thar sorkar hian engatinge Agriculture budget hi heti zawnga a siam tak, tih hi ka zawhna a ni.

Bana-kaih (Hand-holding) scheme, he sorkar policy pui ber hi Demand No. 31 ah hian tarlan a ni lo deuh tlatin ka hria a; hei hi lo enchiang ta se a changtu hian. D-A-H tih, election hma leh election hnu pawha kan sawi len em em, mahse heta a rawn lang tlat lo mai hi, kut-hnathawktute hi tawngkam chauhin kan hmangaih em, tih hi. Kalphung-thar sorkar hian D-A-H tih hi, D-A-H lovah a chantir ta zawk em ni, tih hi he budget atanga ka hmuh dan a ni.

Tin, Agriculture Infrastructure lama hmasawna hi kan hmu viau dawn lo a ni tih te pawh he demand atang hian a hriat a, capital expenditure lam hi hmuh tur a vang viau mai a. Pu Speaker, he demand khawilaiah chiah hian nge agriculture hmasawna tur a awm, tih kha. BE rawn ti tamtu ber chu *Object Head 31 - Grant-in-Aid General* hi a ni a. Heta kan estimate te hi kan hmu lo anih ngat pheih chuan a beidawnthlak dawnin ka hria a ni. Chuvang chuan, heng zawng zawng ngaihtuah hian, a puk lamah hian tan kan la nasa dawn hlein a lang a ni. Tichuan, kan Agriculture Minister ka zawh duh chu - khawi lai *Head of Account* atang hian nge sawhthing, hmarcha, hmunphiah, aieng te hi sorkar hian lei a tum, tih hi.

Co-operation lam hi sawi tur a tam viau naa, hun ka hmang zo tawh si a. Pu Speaker, thuawih takin ka'n thu phawt ang e. Ka lawm e.

SPEAKER : A va lawmawm em! *'Insum theihna hi Thlarau rah a ni'* tih a nih kha maw. Tunah chuan, Member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka lawm e. Chawhma lamah khan ka sawi tawh a; tuna ka diar khim hi *Mara-hnam diar* a ni.

Demand No. 16 - Home Department:

A hmasa berin, Demand No. 16, Home hi nichinah Pu Nguna khan a rawn sawi nual tawh a. Lawngtlai West lam hi a area a zau a, South Bungtlang ah hian Police Station dah ngei-ngei a ngai. Hei hian Vaseikai leh CADC lam, Longpuighat te a vil kawp pha dawn a ni. Helai hi hnam tin inchen-pawlhna a nih avangin, BSF an ring deuh chawt a. BSF ho lah hi an discriminatory viau mai a. Chuvangin, Parva-ah Outpost a awm a ngai a ni. Tin, South

Bungtlang hi police station-a siam ni ngei bawk sela. Tin, Pu Zira bial leh Pu Rintluanga bial chuan chung Tut chhaklam zawng, Tlawng thlang si hi, helai tlangdung phehi hi kan khaw tlangdung a ni a, Police outpost pakhat mah a awm lova. Hei hi a pawimawh ka ti khawp mai. Tin, ka bial Biata-ah Bungzung atangin term hmasa khan MLA Pu Papua leh Pu Chama ten MLA fund hmangin kawng an lai a, motor tlan pawh a nasa a. Kuhva-ro leh zu te pawh khawtlangin an lo man a. Chuvangin, hetah hian outpost a pawimawh hle bawk a.

Tin, Tripura ramria New Kawnpui outpost nikum khan ka tlawh a, a building a chhe lutuk. Tuna Pu Beichhua sawi ang khan, ral aiin thli a hlauhawm tawh zawk. Chuvang chuan, hei hi thawm that ngei ngei ni sela. Tin, police hrim hrim hi kan ngah lo lutuk a, engah pawh hian han sawi ila, 'chutah a pawimawh' han ti ila, 'kan indaih lo' tih zel a ni a. Hei, Finance Minister vawiin niah hian a awm lova, a puibawmtu ka bulah a thu a. Finance lam hi thilphal deuh teh se; police hi kan ngah a ngai. Traffic police-te hi an khawngaih thlak lutuk; an hah lutuk. Aizawl ah hian (a zat chiah ka hre lova) 300 vel an awm niin ka hria a, hei hi 500 tal ni sela, Lunglei ah 200 vel; tiang khan district headquarters hrang hrangah. Pu Speaker, ka ngaih pawimawh chu, i dinglama mi leh i veilama mite hian '*district capital*' kan ti nulh nulh tawh mai a. District hian capital a nei lo a nia. '*District Headquarters*' tih ni sela, matric pass chin hi chuan a thain ka hria.

Tichuan, hei thingtlang lama police outpost-a police motor te a hlui ang reng hlawm a, hengte pawh hi ngaih pawimawh a ngai; an POL te pawh pek tam deuh theih dan awm sela. Sawi tak ang khan, police hi kan nei tlem lutuk a ni. Chuvang chuan, police recruitment lamah hian finance hi han thil phal deuh sela, police hi lak belh deuh teuh a ngai, hmun tinah hian. Kan Home Minister hi ka fak khawp mai a. '*Pawisa-siamna Gate*' kan tih mai thin, '*kar khat i duty lo ang, an tih chuan, tap zawih-zawih mai*', an tih ang te kha reform vek tawh a ni a. Pawisa indilna mai mai ang kha tihbo vek a ni tawh a. Kuhva-ro te pawh hi a la awm, a la kal tak na a, tunhma ang kha chu a ni tawh lo, a tlem tawh a ni. Tuna langsar taka phurh zut-zut chu, sawhthing chauh a ni tawh. Chuvang chuan, police hi thuam chak an mamawh em em a ni. Tin, police bakah homeguard hi tihtam deuh theih ni se; an hlawh te a tlem a, a hautak lo zawk a. Tin, ban nghal tawp mai theih annih avangin, discipline hi an vawng tha deuh zawkin ka hria. Chuvangin, homeguard hi tih tam deuh theih ni sela a tha viauin ka hria.

Demand No. 31 - Agriculture & Farmers' Welfare Department:

Tin, Demand No. 31 - Agriculture hi member tam takin an rawn sawi tawh ang khan, link road kan mamawh tam a. Tunlaih chuan 2-wheeler tala feh theih anih loh chuan kan thatchhe ang reng tawh a, nun a lo changkang tawh bawk a, kan lo no deuh tawh nen. A bik takin khawthlang lam hi kan la pachhe viau a, link road siam hi min lo hriatsak se.

Demand No. 47 - Irrigation & Water Resources Department:

Tin, Irrigation hi hmun tam tak leilet siam theihna ni si, tui awmlo vanga fur lai chauha buh chin theih, ka bial te pawh a ni vek a. Heng hi irrigation anih avanga brick rem pet-peta lak kher tum lo sela, a pump zawng te pawhin ti ta sela. Lui atangin tlangchhipah pump chho sela, a let thla leha kha, *entirnan*: kan bial kan kal apianga kan tlan pelh thin Mat kam, Serchhip, CM bial lama ram thate pawh tui awmluh vanga siam theih loh vek a ni. A bakah luikam te, leilet te pawh tunlaih technology thar youtube-a kan hmuh 'rum-pump' an tih ang chi energy-free pumping tha tak takin a siam theih a. Chuvang chuan, helam pang hi department pawhin uar deuh deuh se.

Demand No. 46 - Urban Development & Poverty Alleviation Department:

Tin, Demand No. 46 - Urban Development & Poverty Alleviation ah hian ka ngaih pawimawh em em chu Aizawl veng mawng lam leh district headquarters tin pawh a ni a; district headquarters ni kher lo pawh, Mizote hi chuan kawng siam hmasa lovin in kan han sa phei tawp-tawp a, chutah, a pawh turin a karah kawng kan han zawng phei leh a, a rem lo a rem lovin. Heng hi duan sa chi niin ka hria. Smart City hian a khawpui laili lam chauh hi focus lo sela, a mawnglam, a smart lo tak lai, city ve si, city mawng lam smart lo lutuk laite hi vei a thain ka hria. Khu, Maumual te pawh kan la bawh duh ang; Ramhlun, Zemabawk, Thuampui helipad hnuai phei awl zawng zawngte hi kawng lo duan sa vek ni sela, Smart City hian helam pang hi kalpui tam se a thain ka hria.

Tin, hei, fur a ni leh dawn; Aizawl leh district headquarters khawpui lian leh hmuntinah, kawr tuihawk dum ngek-nguk rawn luangchhuak ziah tur hi thal lai hian lo clean ni sela. Hei hi AMC chan tur nge ni; furah chuan hmuh-hreawm tak tak tuihawk dum ngek-nguk a tam leh dawn. Hengte hi lo inhma-khua a tha viauin ka ring. Tin, hei hi Aizawl Smart City hnuai nge, traffic signal light tur an bunna hi a rei tawh em em a, engtikah nge kan hman theih dawn le? Hengte hi kan traffic tawt dan nena han en hian light system hi kan mamawh a, traffic duty an indaih bawk si lova. Chuvang chuan, light system hi tih theih ni se; helai Assembly thlang lawka Governor gate bul, zanah traffic light awm lova kal hian a hlauhawm lutuk a ni. Tin, Pu Speaker, refugee kan enkawl dan te pawh hi mumal deuh hleka kalpui a ngai. Anmahni thu thua sorkar paw hrilh mang lova camp dangah te emaw, hmun danga lo insawn daih te emaw hi an awm fo niin a lang a. Hengte pawh hi enkawl that ni se a tha hlein ka hria.

Tin, UD&PA hnuai ah hian Kolasib-Diakkawn Bazar sak thar tur niawm tak a ni a, hei hi sorkar hian a tichhuak thei dawn tawh em? A bialtupa lah saw zawhna zawt thei lovin sawtah sawn a thu mai si a, ka'n ngaihven sak deuh a ni.

Tichuan, kan Minister pahnihte Pu K. Sapdanga leh Pu PC Vanlalruata te demand hi tha ka tiin, ka thlawp a ni e. Ka lawm e.

SPEAKER : A lawmawm e. Tunah chuan Member zahawm Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e.

Hei, demand kan han sawi a, kan tui tlang khawp mai a. Mahni bial kan sawi theuh mai a, kha khan rampum chu a huam chu a ni der mai a. Chutih rual chuan Chalfilh bial leh Kolasib lam hi anlang ve lo tak ngial dawnin ka hria a. Pu Speaker, in bial kan han lam hmasa ang a, hun ka pelh hlek erawh chuan in hriatthiam ka beisei a.

Tichuan, 'district capital' tih kha Pu Muanpuia khanin a hau a, ka'n chhan teh ang. 'Traffic light crossing' tih kha a ni bik lova, 'pelican crossing' a ni, kha kha. Nakinah chuan a sawi dik tawh turah ngai ang.

Demand No. 16 - Home Department:

Aw le. Tichuan, kan Minister zahawm tak Pu K. Sapdanga chan Demand No.16-in bul ka'n tan ang a. Hei kan member-pui zahawm tak takte'n kan experience an sawi den-den

a. Hmanni ah Central Women Jail te kan zuk tlawh ve a, ka vawikhat kalna a ni a. Chutah chuan a thawktute'n vertical extension tih tur te min lo kawhhmuh a, ha-hipin ruahmanna kal mek te an lo sawi a, a lawmawm khawp mai a; a changtu Minister chungah pawh lawmthu kan sawi a. Tichuan, a building leh thil dang dang, a staff chungchang te pawh an sawi nasa tawh a. Kan rawn vei haw deuh mai chu, a bial-tupa pawh hi ka hrilh tawh a, Pu TBC-a member zahawm tak hi. A kawng zawka khu, hei court te'n an han kal a, nu-nau chhangchhe tak maiin an han inphur a, motor-ah te an sawh nasa a. Khulai khu a fel lo hle mai a, ngaih pawimawh hmasakah te nei sela. A panna kawng a pawimawh a ni, tih lai hi ka'n sawi tel duh a ni.

Demand No. 30 - Disaster Management & Rehabilitation Department:

Tichuan, Demand No. 30 - DM&R hi, kan hriat angin tlang rama awm kan ni a, kan leilung chang tak tak karah changlo tak takte, a muala tawlh mai theite, a tlangchhip atanga rawn liam mai theite a ni a. Tun kan chhiat tawhah khan a chiang hle mai a, che theia kan rin loh te pawh kha ruah khan a rawn tlang fai titih deuh mai a, a rapthlak em em mai a. Chutiang rama cheng kan nih avang chuan, anni hi rikrum, vanduaina thila kan nu leh pa, kan inngahnate anni a. Chuvang chuan, nichin lama member zahawmtakte'n an sawi tawh ang khan thuam chaka, an mamawh sum leh paite pawh ngaihtuah sak ni se a tha dawn hlein ka hria a.

Chung bakah chuan, 'SMDF' kan tih Mitigation Fund hi mitigate tak tak nan kan mamawh nasa si a. Chuvang chuan, helamah pawh hian thil phal deuh theih ni se. Tin, district-ah te pawh hian fund hi hman mai tur te hi han awm thei se la, 'ready-fund' pawh kan ti aniang chu, chung te chu kan mamawh em em a. Engtikah nge vanduaina, chhiatna a thlen dawn kan hriat loh avangin, khatiangah khan hman mai theih, pekchhuah mai theihin lo awm sela. Tin, administration course-te pawh hi neih leh turin National Disaster Management Authority lamah pawh hian tan lak leh theih dan te hi awm se la ka ti hle mai a; thahnemngaih thil thuah ka han tarlang a ni.

Tichuan, cyclone *Remal*-in Ni 28th May vela min nuai khan kan Minister-te, kan Chief Minister te leh midang dangte an rawn lang tak tak a, thahnem an ngai em em a. A hnu thlengin min bawhzui puiin, kan dil angte min pe a. Tin, tuna kan DC te pawh cyclone *Remal*-in a tihchhiat bawhzuina/siamthatna kawngah an tang em em a. Chutihruah chuan, bial pakhat chauh sum tur a nih bik loh avangin, kan indaih hleithei lova. Vawiinah office-ah kan bial atanga cyclone-in a tihchhiat, *natural disaster* dik tak mai siam that lehna, rem that lehna thil hrang hrang, khang kha tih hmabakin office-ah lehkha a intiang er-ur mai a, sawngte saw a rang lama tih theih ni sela. Fur thlen hmaa kan tih loh chuan chhiatna nasa zawk thleng thei dnhmuna ding mek kan ni a. Khawngaihtakin, a changtu Minsiter-in Aizawl South-III hi min rawn hre zui sela, a tul angin hma min lak sak se a lawmawm hle ang.

Demand No. 46 - Urban Development & Poverty Alleviation Department:

Tichuan, Demand No. 46 ah hian, khawpuia hmeichhiate dinhmunin a hma a lo sawn theihna tur skills training te an ti nasa thin khawp mai a, chutah chuan tun aia nasa zawkin kalpui theih se ka ti hle mai a. Pathian-in talent a pek tha tak tak, kut-themthiamna hmanga ei zawna hi mahni inchung lum atanga tih theih te pawh tam tak a awm a. Chutiang chuan khawpuia cheng hmeichhiate dinhmun economically-a an lo that leh zual nan heng te pawh hi lo uar deuh deuh sela.

Tin, Urbanisation lam hi, kum 2011 census-a a lan danin *Urban Area* kan tihah hian mi cheng 52.11% hi kan awm tawh a. Chuvang chuan Urban Governments lamah hma kan laka policy mumal leh felfai tak kan neih a pawimawh hle mai a. Hemi kawngah hian a changtu Minister te, department te pawh lo tang sauh sauh se kan duh tak zet zet a ni. Tin, chung atan chuan Pu Speaker, 'urban infrastructure' kan tih hian (a saptawnga sawi ngai deuhte a awm a) sanitation te, transport te, housing te, urban economy, urban safety kan tih te zawng zawng hi a huamin ka hria a, heng lamah hian theihtawp kan chhuah a ngai a. Sum leh pai pawh a tul angin, mamawh ang zelin a changtute lamin lo ngaihtuah sela, hengah hi chuan ren vak lo sela, 'mipui tan a ni' tih kha min hriat sak leh se a tha awm e.

Tichuan, SIPMIU lam hi a kal mek te, an hnathawh tawh te kan hria a. Hei, Aizawl East lamah hian ka hriat sual loh chuan sewerage treatment hi kan ti a, an hmang tawhin ka hria a. Hei hi kan Minister zahawmtak hnena ka zawh duh chu - A bial bik pawh sawi lovin, Aizawl South lamah hian hemi sewerage treatment hi tih tumna a awm ve em; a plant hi dah ve theih a ni em; hmalakna te pawh an nei em tihte kha hriat te pawh a chakawm a, remchang a tih leh min chhang sela a tha awm e.

Tichuan, Aizawl khawpui-ah hianin bio-digester, pilot project tunah hian a kal mekin ka hria a. Chutah chuan hemi bio-digester hmangin mihring tana natna hlauhawm rawn tichhuak lo tura lo sawngbawl dan, a thlichhia lo tih ral zel danah hian eng chen nge hma kan lak hriat a chakawm hle mai a. Hei hi keimahni *man-made disaster* a nih leh palh te a hlauhawm hlein ka hria a. Chuvang chuan, heng bio-digester lamah hian engchen nge hma an lak tawh tih pawh kha ka zawhna ni nghal sela.

NULM te, Swachh Bharat Mission te leh thil dang dang UD&PA hnuaiah hian sawi tur a tam hle mai a, Pu Speaker. NULM hnuaiah khawpuia mi-harsa damlo kanna kan kalpui meka hi, hei aia chak leh huam kim leh zuala kan kalpui theih pheih chuan thil duhawm tak a ni a; mi-harsa zawkte chhawktu tur a ni a, kan nghakhlel hle a. Tluang takin lo ti zel sela, hei aia nasa leh chak zual zawkin hma lo la zel turin duhsakna pawh ka han hlan tel a ni.

Demand No. 31 - Agriculture & Farmers' Welfare Department:

Tichuan, kan Minister zahawm tak, Pu PC Vanlalruata chan Demand No. 31, hei hi nichin lamah Agriculture & Farmers Welfare kan ngaithla a. *Welfare* a nih angin, keimahni kut-hnathawktute, farmer-te hamthatna tur a ni a, kan hria a. Chutihruah chuan, Pu Speaker, hei ni e, he House zahawmtak chhungah pawh hian kan sawi nasa khawp mai a. A vawikhatna a nih dan te, kan hralh leh kan lei, kan support pek danah dik tawk lo, fel tawk lo te pawh a awm niin a lang a. Chungah te pawh chuan incident tlem-tlem a han awm te kha kan han sawi-vul vak thin nangin, sorkar hian theihtawp a chhuah mek a ni, tih hi kan hriat tlan a thain ka hria a. Ram hruiatu kan nih avangin kan thusawi hmanga midang han tihhnual deuh te emaw, beiseina siam lo zawnga kan tih palh hi ka hlau thin khawp mai a. Chuvangin, sorkarin theihtawp a chhuah a. A changtu Minister hian a tuipei a, a tui-chilh a, a taima a, theihtawp a chhuah a. Mipuite, a bikin kut-hnathawktute lo chi-ai lo se a thain ka hria a.

Tichuan, Session hmasaah te pawh kan lo dinpui tawh a. Hei Aizawl South III-ah sawn kan dil angin Agriculture wholesale market min lo tihhlawhtlin sak a, crore 5-a sak tur a ni a; a hmunah Melthum kan thlang a. Kan Minister chungah pawh lawmthu ka sawi a. Tichuan, Mizoram chauh a ni lova, khawvel kalphung reng rengah thawhrimna hi chu tupawhin an nei deuh vek tawhin a lang a. Kan thawk rim tlang a, pi leh pu atanga rim taka

thawk thin kan ni a. *'Kawla-ni-chhuak-chhiarin'* tih te pawh kan tawngkam a ni a, vartiana atanga zan mut dawn thlenga thawk thin; mahse, a famkim lohna chu, kan thawk smart tel hi a ngai a. *Work-hard* ah hian kan tawp a, *work-smart* lai hi a ngai tel tawh a; chulam hawi chuan kan kalpui tha hle mai a.

Nichina kan sawi tawh, kut-hnathawktute'n an thlai an thar a, eng eng emaw an han nei a, hlawhtling tak takte pawh an awm a ni. Amaherawhchu, a phur chhuahna leh transportation cost te avangin a tawpah chuan kan thlai tharte, kan theirah tharte a to lo thei lova, *'mizo-thilsiam chhuah chu a to; mizo-kutkawih chhuah chu a to'* tiin, keimahni bawh hian kan sel leh thin a. Chuvang chuan, transportation lamah link road te, ring road leh thil hrang hrangah te pawh thahnem ngai takin tun aiia chak leh zual, zau leh zual hian kan Agriculture Minister hian hma min lak sak sela.

Demand No. 47 - Irrigation & Water Resources Department:

Tin, Irrigation lamah hian Hlimen leh khaw hrang hrangah te chuan thal-thlai an ching nasa em em mai a. Amaherawhchu, kan hriat angin tuilam a harsa a, chuvang chuan irrigation changtu pawh hian theitawp min han chhuah pui leh sela. Hemi drip-irrigation ang chi te emaw, zauin a an intawm theih tur tuikhuah siamna emaw te hi phal takin min han pe sela, a bak chu kan lo inbuaipui chhunzawm mai ang a. Agriculture Minister-in a hma chhawp hrang hrangah te pawh a tihlawhtlingtu leh amah lo thlawptu nih hi kan chak em em a, chung te pawh chu min lo hriat pui sela.

Tichuan, he Damand tha tak tak, tangkai tak tak turte hi vawiinah hian lawm takin ka pawm a, 'pass ngei ni se' tiin ka thlawp a ni e. Pu Speaker, ka lawm e.

SPEAKER : Le, Member zahawmtak, Pu TBC Lalvenchhunga ilo sawm ang.

PU TBC LALVENCHHUNGA: Pu Speaker ka lawm e. Vawiin nia kan Minister pahnihte - Pu K. Sapdanga leh Pu PC Vanlalruata te chan demand te hi han sawi loh chu ka ui si a; member-te sawi ang khan Demand a ni bawh a, kan bial chhung demand sawi ve ngei ka duh si a. Kan bial hi vawiina kan chai mek hian a huam bik em em a. Aizawl khawpui han zauhna tura hmunhna la plan tur lai leh hmasawnnain a la hrut tur a ni a.

Demand No. 30 - Disaster Management & Rehabilitation Department:

A hmasa berah chuan, khutiang khawpa challenging bial kan nei a. Aizawl khawpui chhawk zangkhai thei road-networking tha te kan mamawh em em a, chutiang kawnga kan hriat tur chu, *geographycal challenges* kan nei nasa a. Cyclone *Remal*-ah pawh khan ka bial chhungah chhiatna tam tak kan tawh a, in leh lo chante, a zavaia chhiate, in chhiat avanga khawtlang anga buaina tawkin, thlanmual phei chu hmun thum ah ngawt kan buaipui a, khang zawng zawngte; tin, vawiin thlengin fur lo awm tura huphurh awm tak takte pawh kan nei a.

Chutih mek lai chuan, DM&R lama kan hotute'n min ngaihsakin, kan bial chhunga harsatna kan tawh - Chawnpui thlanmual te, Chawlhmun thlanmuan te, Luangmual thlanmual te pawh min rawn dawmsak leh dawnin ka hria a, lawmthu ka sawi lawk a. Ainawn Veng panna, Zonuam lama chhiat kan tawhna Luangmual lamah te, a bik takin Remna Run mual sir a hungna bang han peh heu-huau te khu fur leh pek a la huphurh awm khawp mai a. Min tihsak tawhnaah kan lawm em em rualin, hmabak kan la nei lian hle mai a. Khuarel chhiatna

thu-hla ah te, a mitigation plant lamah pawh min duh uluk sak hle se ka duh a. Hmasawna lo thang zel turah kan duh emaw, duh lo emaw kan minister leh kan department hotute'n kan bialah eng eng emaw te minrawn hnawhsak zel a, khung khu hma thui tak nena min enkawlpui ka ngen duh bawka ni.

Demand No. 46 - Urban Development & Poverty Alleviation Department:

A dawt lehah chuan, UD&PA hnuai khawchhung plant te, Smart City hnuai hnathawh mek awmte leh SASCI reform hnuai kan Chief Minister sawi tawh ang khan an performance, reform tih nasat avangin crore 400 the meuh mai kumin chhungah pawh kan hmu tih ka hria a, a lawmawm ka ti em em a. Kan bialah pawh hmachhawp kan nei lian em em mai a, fur kan huphurh em em chhan pakhat, tun tumah hian luikawr hlauhawm deuh-deuh laite pawh minrawn siam sak dawn niin kan lo hria a, a hmasain lawmthu karawn sawi lawk bawka. Heng kan lui dung kawr leh kan bial chhunga harsatna lian tham thlen mai theihna te kan hruaitute'n minrawn ngaih pawimawh sak dawn niin ka hria a. Aizawl extension-a kan mamawh urban planning hnuai road network ka bialah kan nei thei dawn niin ka lo hria, a lawmawm tak zet a.

Vawiina budget han en mai chuan, 'hma in va sawn lo ve' tih a awl dawn khawp mai a. Mahse, han en chet-chet chuan, UD&PA hnathawhte a hrawin a lian tham em em mai a, works department tihawm tak pawh niin ka hria. Kan bial mipuite'n kan la mamawh em em, *Aizawl khawpui chhung e* ti lo chuan, veng tinah kacha-road kan la nei fur a, electric ban la thlen lohna leh street light mamawhna khawpui chhung ni siah ka la ngah em em mai a. Mamawhte kan thlen te min lo ngaithlak sak a, hmabak a la tam a. Kumin chhungah eng emaw chen mitigate-a hma min sawnpui ngei kan beisei a ni.

Demand No. 13 - Department Personnel & Administrative Reforms:

A dawt lehah chuan Demand No. 13 - DP&AR, Personnel & Administrative Reforms hi, ka lo ngaih pawimawh em em thin leh ngunthluk taka ka lo en ve thin, sorkar kalphung tidanglam awrh theitu anni a, an performance-te enin leh an hmabak chhawpte department website atangin kan lo thlir a, chhungah chuan lawmthu sawi ve ka duh a. Thawktute leh a minister, a bik takin e-governance lama hmalakna hrang hrang - leave application management system an tlangzarh thei te, regulation leh rules te strict zawka kan kal theihna tur, sorkar kalphung siam theihna tur chi te, mipuiin samkhai zawka kan dawr theihna tur *right to public service*-ah te, service 192 ngawt mai an han declare thar leh thei te, scheme-ah *one time voluntary scheme* an han siam thei te. Heng bakah hian sorkar kalphung *periodical review* neih theihna tur Fundamental Rules 56 (J) CCS Pension Rules 48 an han tlangzarh te, Office Memorandum tichhuah an han chhu zui char char te, OM - Prohibition on proxies (aikal lak khapna dan) te, kan sorkar 'kalphung-thar' kan tiha danglamna nasa tak kumkhat chhung leka he department-in arawn thlen te, sorkar hmelhmang tidanglam tura hmalakna zawng zawng te. Tichuan, sorkar-hnathawh leh service association tena sorkar an dawr dan chungchang Office Memorandum circulation hi la zau leh zual thei sela, inhriattir nawn awn-awn ila; politician te, mimal te, sorkar-hnathawkte, service association-te kan inkungkaih dan te pawh hi awmze nei dan hnuai ni thei sela, hengte hian rorelna a siam fel deuh deuhin ka ring a ni.

Austerity measure sorkarin a lakna kawngah te pawh DP&AR hian a thawh hlawk em em a, household MR entitlement ennawn kawngah leh hnathawh kawnga awlsam zawka hnathawhna tur *Spartan* hman a ni te, e-PAR te pawh a tira individual anga awm property

return thlengin online-in access zung zung theiha siam a ni te leh engkim mai administrative reform hmanga an hmalakna a fakawmin, a lawmawm ka ti em em a.

Tin, kan la nghahhlel em em e-Office pawh kumin hian a rang lama kan hmuh theih pawh beisei ila. Hei hian *'file kalmuang, sorkar-hnathawkah kan beisei a phal lo'* tih mipuite kan auna thin, a thawka te ngei pawhin file kalmuan chhunga kan sawi thin tam takte pawh ennawna hmalak mek a ni a. Hemi kawngah hian tawite han quote kan duh chu, *Central Secretariat Manual of Office Procedure* kan en chuan chiang em emin Chapter VI, section 27-ah khan, "minister kal tur tur a nih chuan, file hi hmun thumah chia, fourth-place ah khan thutlukna a thleng tur a ni" tih a ni a. "Secretary approval ngai a nih chuan, level hnih chia a kal tur a ni" tih a bawka. Chutiang bawkin "Director requirement a nih chuan, single level entry-in approval a kal tur a ni" tih a ni a. Kan la hmang thei lo nachungin heti lam kawngah hian hma kan lak deuh deuh ka duh a. Kan file movement hi mipui pawhin kan hriata, hei hi office procedure, *manual*-a inziak anga kan hmuh theih ngei hi ka nghakhlel em em bawka. Hmabak kan la nei niin ka hre ve a, chu chu ka sawi leh duh bawka.

Demand No. 16 - Home Department:

A tawp berah chuan, Pu Speaker, kum hlui kal taa kan Home Minister hmalakna kan ngaihthlak tawh ang khan, a lawmawm em em a. Hemi kaihhnawih department, ka bial chhunga awm Women Central Jail chungchangah police-te administration efficient zawka kan kal theih chuan, heti lo zawnga kan kal theih ka la beisei fan a. Kum 2022-a kan report enah hian sanction hi 942 per lakh, (mihring nuai khatah 942) sanctioned a ni a, bond strength hi 674 per lakh a ni. India ram average hi mihring nuai khatah police 155 a ni a, keini chu a let 5 (nga) chuanguin kan la tam a ni, geographical location-a kan mihring enkawl, kan mangement-a hi hei ai hian la efficient thei sela. Hei hi kum 2022 data a ni a, hemi hnu hian police 285 zet compassionate ground-a lak a ni tawh a, tunah pawh 300 dawn a lak a ni leh dawn niin ka hre bawka ni. Khangte avang khan kan management leh kan tihna turah khan, kan prison data ka neih hnuhnun berah hian, jail tang 1671 an awm a, a capacity hi 1386 a ni a. Hei hian a entir chu - *'Kan society hi a him lova, a hrisel lo a ni'* tih hi. Hei hian sector dang hrang hrangtea kan hmalakna tur a tichiang lehzual niin ka hria a, ka han sawi lang hram a ni.

Kum 2022 (latest bureau data) atanga kan lakchhuahah chuan, conviction rate pawh hi sang tak a ni a. Kum 2022 ringawtah pawh Mizoram-ah mi 2260 convict an ni. Chu chu Assam tel lovin North East state dang paruk belhkhawm zat aia tam Mizoram ah convict kan nei a ni, kum khatah. Kan jail tang te, kan crime rate te hi Manipur, Nagaland leh state dangte aiin a let sawm chuanguin kan tam vek thei a ni. Kan data hnuhnung berah hian 3587 the meuh mai FIR thehluh a ni a, chu chu 'a rapthlak' kan ti dawn nge; state-ralmuang ber ni si. Police ratio ngaihtuah chuan Nagaland leh Jammu & Kashmir pawh kan khum hneh viau a ni. Helai hian rilru a la lian em em mai a.

Hei bakah, kan police-te mental health chungchang pawh kan data neihah hian a lang chiang viauin ka hria a. Bureau data hnuhnung berah India ramah suicide case hi 12.4% a ni a, a rate-ah kan awm pha chia-chia a, India ramah hian *average* kan ni. North East state zingah keini aia sang chu Tripura leh Sikkim chia an ni, suicide rate-ah pawh hian. Kum 2022 khan nos. of suicide 153 teh meuh mai an awm a, hei hi a dik em ka hre lo a. Chungte en chuan kan mental health (kan rilru hriselna) thleng pawh hian kan khawtlang hi a him em em lova, hmasawna tur kan la nei tam em em a ni, tih lai kha kan stress ve leh hram duh a.

(**Speaker:** Minute 2-in a pel ta e.) Mizoram leh department dangah pawh hian hmabak kan la ngah zia kha ka han tarlang ni sela.

A tawpna tak tak atan chuan, Urban PS rate-ah hian kan la chhe em em mai a, India ramah phei chuan mihring singnga chuangin police station pakhat kan la intawm a ni a. Nagaland leh Arunachal Pradesh-ah te phei chuan urban-ah mi 8000 velin police station pakhat an intawm a ni. Keini chu singnga chuang kan ni a. Ka bial chhungah khuan kan mamawh ve tawh khawp mai a, Vaivakawn atang khuan a zu hla tham si a. Mizoram-a vote tam ber dawttu kan ni a, mihring population-ah pawh khuti khawpah urban lian kan bialah khuan Police station pangngai kan mamawh ve em em a ni.

Pu Speaker, vawiina kan Minister Pu K. Sapdanga leh Pu PC Vanlalruata te demand kan sawiho hi a lawmawm ka tiin, ka pawm a. Tha taka hman a nih theih nana pass ngei turin ka rawn thlawp a ni e. Ka lawm e.

SPEAKER : A lawmawm e. Tunah chuan, kan Opp. Leader kan sawm dawn ang a. Minute 8-ah warning kan ti kha a ni a. Ani hi chu minute 10-ah warning kan ti ang a, minute 12 chhunga khung leng turah i beisei ang aw. Ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Vawiinah kan Minister pahnih, Pu K. Sapdanga leh Pu PC Vanlalruata te demand kan han sawi a. Department pasarih zet kan sawi avangin minute 10-ah kan leng lo tlangpui a, tlan zawr zawr te a ngai a. Department tam takte pawhin duh anga kan luhchilh hman loh pawhin min hriatthiam kha a ngai a. Kei phei chu a theih hram chuan department zawng zawng han lam kim hrim hrim kan duh deuh a. Chungah chuan in hriatthiamna pawh kan ngen lawk a.

Demand No. 16 - Home Department:

Tuna kan han ngaihthlak tak, Demand No. 16 - Home Department hi, a budget BE hrim hrim hi kum kal lai leh kum lo kal turah hian pung angin a lang a. Mahse, RE han en hian, duhsak an ni lutuk lo em aw ka ti a. A bik takin budget head 22 - *Arms & Ammunition*-ah hian kum kal laia kan sipai raldo turte cheng nuai 100 silai mu leina tura dah anih laiin, kuminah nuai 50 chauh a ni ta hi, kan sipaite kan thumna hi tlabal deuhin a lang a ni.

Hei, kan Home Minister chanvo hi Mizoram, kan ram, kan hnam kan himna, a mi chengte inngeih taka kan khawsak theihna tura nu leh pa chan changtu an ni. A bik takin kan hnam issue thil lian tham, ramri chungchangah Mizoram delegation te pawh kan thenawm Assam nena inbiakna a awm dawn niin kan hria a. Chutah chuan Mizoram-in engnge kan ken dawn tih te leh heng - Uniform Civil Code te, Free Movement Regime te, Protected Area permit chungchanga central-in thu leh hla thar an neih te chungchangah kan Home Minister han ngen duh ka nei a. Ram leh hnam issue-ah hian i vei lama thute hian ngaihtuahna dang kan nei ngai lova, ram leh hnam kan dah number-one thin a. Mipui-sorkar ni tur anga kan inngaih lai hian heng issue a awm changa kan inkalkhalh thin hi a dik lovin ka hria a. Thenawmte nen kan inbe dawn a ni emaw, tun issue angah hian kan thenawm state-te chuan All-party meeting te kovin an sawi hova, All-party delegation te pawh an kal an ti a. Chutih laiin, vawiin thlenga hetiang sawiho tura meeting koh a la ni lo hi, kan Home Minister hian ngaihtuahna thar lo hmang sela.

Tin, he ram, he hnam himna atan kan ngaihtuah thin - Kan inhman-tangkai thiam hi kan ram tan a that ka rin avangin, tuna kan hmabakah pawh hian kan Home Minister pawh hian ngaihtuahna zau zawk han seng sela, constructive idea tha tak tak kan nei ve thin a ni tih kha min lo hriatsak ka duh a ni.

A dawt lehah chuan, tunhnaiah ka ramah crime maksak tak tak a tam sawt viau mai a. Kan police-te pawhin theitawpin an umzui a, hnuhma chhui kawngah pawh an fakawm khawp mai. Chuvangin, kan police-te hi modernize leh zual an ngai hle mai. Heng kawngah hian, a bik takin Home Department-a thawktute zan mu pawh tuah hleithlei lovin, mi tlemtein nasa taka an beihna kawngah an hah hle tih pawh kan hria a. Chutihruah chuan, kan tawngkam leh kan thiltihah pawh fimkhur a ngai telh telh tih lanna chu, sorkar hmasaa kuhva tawlh chungchangah kan Home Minister kal ta te pawhin theihtawp chhuahin an bei a. Mahse, smuggling thil chu duh angin a tihtawp mai theih loh a, mipui beisei pawh kan pha lo mai thei. Amaherawhchu, sorkar thar a lo awm a, thla khat chhunga tihreh tumin kan han insawi a. Vawiin thlengin kuhva tawlh hi nasa takin a kal reng a ni tih hi zoram-mipuite hian kan hria a ni.

Hemi chungchanga kan Home Minister hnena zawhna ka neih chu - Vairengte-a police venna hnuaiah kudama kuhva bag 500 dawn zet, illegal-a an tawlh an mansa a bo thei kha, vawiinah hian chhuichhuah a ni tawh em; khatah khan tute nge inhnamhnawih tih mizo-mipuite'n kan hre duh a. Khami chungchanga kan Home Minister-in sawi theih a neih chuan, nakinah a sawi ka duh khawp mai.

Pu Speaker, Home Department hi a lian a, vawiin chu Prison lam an vannei ber niin ka hria a. Kan Subject Committee ten an zu tlawh a, kei pawhin Prison lam tawitea han sawi ka duh chu - kan Jial Warden te'n an ration money hi an counterpart-te dawn zah an dawng lo a ni. Midang chuan ration money-ah ₹1,000/- an dawn laia ₹850/- chauh an dawng bik hi, uniform cadre tho an nih avangin duhsak ve an ngai a ni.

A dawt lehah chuan, kum thar lawm dawn zan December Ni 31-a halpuah hal chungchangah ram pumah debate lian deuh a awm a. Kan Home Minister kaihhraina hnuaiah 'tuman halpuah hal loh tur' tih a ni a. Hmanniah khan a chhanna kan ngaithla a; mi eng emaw zat case te pawh kan siamsak a ni. Kan sorkar hian zanlaiah kumthar lawmmana halpuah hal loh hi kalpui a la tum niin a lang a. Hemi chungchanga rawtna ka neih ve duh chu - hetiang hun zanlai dar 11:30 - 12:30 inkarah hi chuan tlemin inthlah dul ve deuh ila; mipui eng emaw zatin kumthar lawmna atana halmawi hal hun an hman ve duh lai hi chuan thlah zalen deuh a tha lo em ni ka ti a. Damlo harsatna tawh chhungkuate pawhin khang hun, sorkarin *zero-hour* hun bikah kha chuan an chhungkua lo insiam fel ve deuh tura kan tih loh chuan, hetiang hunah hian tul lohah crime bawhchhia kan siam kan siam a, kan thenawm leh state dangah miin an hal chuai-chuai bawh si a. Hengah hian ngaihtuahna thar hman a tha ka ti a. Tin, kan police force-te an tlem avangin VDP leh khawtlangah YMA ten an tanpui a, anni hote nen hian thawhhona tha zawk kan neih a tul ka ti khawp mai.

Demand No. 13 - Department Personnel & Administrative Reforms:

A dawt lehah chuan, DP&AR changtu hian min chhan ka duh chu, *'The Mizoram Special Voluntary Retirement Scheme, 2024'* hi, tuna kan hman, sorkar-hnathawh thawh hleitheih lo leh eng emaw harsatna bik neite enzuina tur atana kan siam hi han sawifiah deuh se

thain ka hria a. He dan hi kan hmang tan tawh em? A bik takin, retirement scheme hi special deuh hleka kalpui dan turah hian eng benefit nge a ken tel, tih te pawh kha hriat a thain ka hria a.

Tin, DP&AR atang te pawhin a ni a, *posting and transfer* kan kalpui dan hi awmze nei leh mumal deuh zawka kan kal a tha ka ti a. Ngaihsual duh chuan ngaihsual theih lek lekin tunhnai ah hian, a bik takin kan service langsar tak MCS huangchhungah pawh, sorkar hmasain kan CM leh Dy. CM ten anmahni puitua an hman tur PS atan sorkar-hnathawk an duh zawng an la a. Sorkar thar a lo ni a, party affiliation pawh nei reng reng lo kum khat chhungin vawi 3-4 sawn an ni ringawt mai te hi a dik dawn em ni aw, ka ti a ni. Party worker pawh ni lo sorkar-hnathawk an ni a, hetiang chuan an security a tha lo lutuk; hmun dangah pawh a ni. Tunhnaia Police *posting and transfer* ah te pawh eng emaw, political transfer anga lang thei awma hi a dik lovin ka hria. Sorkar-hnathawkte anmahni enkawltu sorkarah an rawn bet te kan ngaih-kawiha kan en he chuan, mihring hi a fuh loh theih avangin, kan sorkar-hnathawkte security hi a tha lo deuhin ka hria a ni. Chutah chuan, DP&AR hi sorkar-hnathawkte hotu an nihna hi kan minister hian a hriat ka duh a ni.

Demand No. 30 - Disaster Management & Rehabilitation Department:

A dawt lehah chuan, DM&R ah hian, mitigation fund hi hmang turin engnge a criteria; thingtlang lamah te pawh hian an hmang ve thei em tih kha ka zawhna ni ta sela. Tin, kan bial leh kan speaker bial lamah te pawh a ni ang a, lawmthu ka sawi duha chu - nikum lamah khan rial atla vak mai a, inchung rangva tam tak a tichhia a, DM&R te an rawn che a, an ti tha hle mai a. Amaherawhchu, ban a insei hleih deuh thin a, kan report dawn dan a fuh tawh lo nge ka hre lova. Heng kawngah hian a bialtute eng party pawh ni ila, ram rorelna tiho kan ni a; thawh ho deuh hlek loh hi chuan a buaithlak thin a. Harsatna tawh theuh theuh hi khawkhath ah hian an thil dawn leh hamthatna awmah hian ban a insei hleih deuh thin a. Heng kawngah hian fimkhur a tul hle mai.

Demand No. 46 - Urban Development & Poverty Alleviation Department:

Demand No. 46 - UD&PA hi, *notified town* kha tunah hian engzah chiah nge kan neih tih ka hre duh a. Chutih rual chuan, notified town te'n a hamthatna an neih mekah ha bik takin Urban development huang chhunga ah hian kan State Capital te leh District Hqrs. te bakah notified town te ah hian sum hi kan hmang em? Ka bial Darlawn hi *notified-town* a ni ve a, MNF kan sorkar lai khan eng emaw zat chu kan han dah lut a. Tunhnaiah hian UD&PA sum hi kan dawng ta lova, heng te hi a lo lut ve dawn em?

A dawt lehah chuan, nimin piaha kan CM in helaia a thusawi 'SASCI hnuaiah sum crore 12 vel Bawngkawn - Durtlang road cheina tur a awm' a tih khan, leitan thlen hma in awm atanga by-pass road thleng, Durtlang Hospital gate bula chhuak kawng a awm a, chumi panna tur sorkar hmasain kawng a laih kha a chhuak tep tawh a awm a. Hei hi tangkai tak tur a ni a, telve theih a ni ang em? Tin hei Zodin cinema hall thin kha sorkar hmasa atang khan multi-car parking atana siam a ni a, an zo har tawh khawp mai a. Engtikah nge zawh kan tum dawn?

Demand No. 31 - Agriculture & Farmers' Welfare Department:

Demand No. 31 Agriculture lam hi, hei a changtu minister hi ZNP a nihlai atanga theih-pa-tawp leh rinawm taka lo beichhoh a ni a. Agriculture hi kan ngai pawimawh viau dawn nia kan hriat laiin, budget ena a tla hniam nasa em em mai hi kan khawngaih a, kan house

leader hi awm se ka duh a. Agriculture, kut-hnathawktute hmangaih ber anga kan insawinaah hian vawiin niah hian, a dawhthleng ah sum kan dah tlem lutuk hi. Agriculture link road te kan mamawh tam em em; bial tinah MLA zawng zawngin kan sawi hlawm. Mahse, chutiang sum chu dah tam si lova SASCI-ah te tal sum pek tam tum ta ila; kut-hnathawktute'n an thlaithar phurh chhuahna tur kal kawng te hi a pawimawh khawp mai. Thlaithar lei tur marketing board-ah Minister hi by-designation in *chairman* a ni a. Sawhthing chung changah kan marketing board chairman hian 'a vaia lei zawh vek a tum' a tiha kha, helaiah hian a sawi nawn thei ang em? A chhan chu, tunah hian thar tura kan tih hi engzat percent nge chawh a nih tawha, engzat nge lei leh thei tura kan in beisei, tih te kan zawt bawk a.

Tin, thil pakhat kan hriat hi a dik em min han hrilh fiah sak se. Sairang-a buffer stock khu kg ah ₹35/- in kan hralh a, ZPM-worker pakhat thil tithei deuh hian buffer stock atangin a lei chhuak teuh a, truck-in, khawiah emaw a kalkualpui a, thingtlang atangin tual chhunga hralhin a rawn hralh leh tih te hi thudik a ni em, kan minister hian min sawifiah sak ka duh a. Tin hmannah Sailam leh Chamring vela sawhthing enchhinna atana kan lei, Kolkata Reliance Company ten 'a felfai tawk lo' an ti a, chutah chuan kut-hnathawktute kan dem vak a, House ah kan sawi a. Amaherawhchu, kan House-leader ber khan a neitute lam tan zawng khan a la sawi si a; engnge dikna ber? Kut-hnathawktute tv-a an kawmna kan lo en a, dik tak leh felfai thei ang berin an ti a; a karah thil chihnih - primary society pakhat leh sorkar deptt. an awm tawh a. Hetianga harsatna a awma kut-hnathawktute kan dem vak vak hi a tha lovin ka hria a ni.

Demand No. 37 - Co-operation Department:

Demand No. 37 - Co-operation ah hian, State-level cooperative society hi engzat nge kan neih ka hre duh a. Thlaithar lei leh hralh chung changah hian co-operative society thar kan din nge nia? Khaw thenkhatah society tha tak tak awmsa a awm laiin society thar kan din a, party pakhat intithu deuh kha an awm a. East Tuipui bialtu sawi ang khan, kan thlaithar lei chungchangah pawh primary society kalphungah party anga inthlah-thlakna a awm ngai lova, hetiang thil awm thei hi a tha lovin ka hria a ni.

Demand No. 47 - Irrigation & Water Resources Department:

A tawpna berah chuan, Demand No. 47 - Irrigation & Water Resources Deptt. ah hian - kan tui-hna te a tlem tial-tial a, harsatna kan tawk chho mek a. Chuti karah chuan, PHE leh Irrigation Deptt. te hi tui chungchanga an thuneihna hi then fel a ni em? Tui chungchanga thuneitu hi a eng department zawk hi nge? A chhan chu, thil tam zawkah hian PHE an rawn in tithu a. Irrigation hian eng chinah hian nge thuneihna a neih? Reilote ah tui inchuhin department leh department pawh hi kan la buai thei dawnin ka hria a. Chung kawngah chuan agriculture hi kan inngahna lian a ni a. A bik takin Irrigation nena tang dun tur annihna laiah duhsak leh duat an tulin ka hria a ni. An demand, an pawisa hman tur kan han titem tial-tial te hi a dik lovin ka hria. Kan Chief Minister, Finance changtuin sum a dah khawmna (a khawnpui) ah khan a dah tam bawk a, helai hi han duhsak thei deuh se tiin ka'n ngen sak a ni.

Sawi tawh ang khan, i vei lama thute hian constructive criticism kan kalpui thin a. A theih phawt chuan sorkar hian kan mipuite tan tha ber an pek theihna tura thawhpui kan inhuam reng a. Anmahni an inhawn phawt chuan, kan theihna ang zawng zawngin kan pui thei a ni tih hriain heng, kan minister pahnihte demand pawh hi phur takin kan pass-pui dawn a.

Chutah chuan sum leh pai awm chhun chhun te tangkai taka an hman ka duh sak baw k a ni. Ka lawm e.

SPEAKER : A lawmawm e. Kha, kan Opp. leader khan a sawi a, jail kha kan ngai pawimawh tlang viau mai a. Amaherawhchu, ani khan ‘prison’ a rawn ti a; tin, a hming te pawh hi ‘Jail’ ti tawh lovin, ‘Correctional Center’ tih te hi sawi nan hmang uar deuh ta ila, tih rawtna te pawh kha a tha khawpin ka hria a. A chhunga awmte kut-themthiamna thil nalh tak tak, thil tha tak an siam a, hengte hi ‘promote chhoh zel a va tha ve’ tih kha, hei Skill Development changtu minister hi a awm lova, a beng a lut viauin ka ring a ni.

Tin, Pu K Hrahmoa’n chhawhchhi a sawi kha, chhawhchhi hriak hi a tlawm lo ania; khang te kha rilru ah a lo lang deuh a. Tin Pu W. Chhuanawma khan, ‘Khawzawl ah chatuan leimin ang deuh kan nei’ a ti a; hei, kan Dy. Speaker nen hi chuan naupang-thuawih deuh ang hian kan thu a, bial tan han sawi ve hi kan dinhmunin a zir chiah lo deuh a. Sawi ve ne-nawa - kan bial Phullen ah hian lei-tlahniam a awm ve a, kha kha Disaster changtu minister khan min lo chhinchhiah sak ve theih chuan.

Hei, kan Panel of Chairman, Pu Jeje-a khan, ‘Pu Chhuanthanga kha record a siamin ka hria’ a ti a; khatah khan tunge hun hmang thiam kan hre chak deuhin ka ring a. Hun hmang thiam ber bottom 3-te chu - Pi Prova Chakma – min. 8, sec. 44; a dawtah Pu Muanpuia Punte - min. 8, sec. 45; a dawt lehah Pu Chhuanthanga - min. 9, sec. 50 hmangin, a hun a hmang zo lo a ni. Top 3 kan hriat duh hrim hrim chuan (Opp. leader kha chu time hranpa deuha pek anih avangin, dah tha ta ila). Top 3-te chu - Pu Robert Romawia Royte - min. 15, sec. 25; pahnihnaah Dr K Beichhua - min. 14, sec. 48; pathumna Pu Lalrintluanga Sailo - min. 14, sec. 15. A bengvar thlakin a hlimawm khawp mai, vawiin kan discussion chu.

Tunah chuan, Minister zahawm tak Pu K. Sapdanga, kan sawihona te windup-a, sawifiah ngai a tih te sawi fiah in, a demand te house a pass rawn dil tur nghal, rawn dil nghal turin ilo sawm ang u.

PU K. SAPDANGA, MINISTER: Pu Speaker, Ka lawm e. Demand ka pharhnaah khan demand No. 13 - Personnel & Administrative Reforms tana sum dah zat ka lo sawi dik lo palh a ni awm a. ‘Sing’ tih leh ‘sang’ tih kha ka lo lam pawlh deuh tih ka’n hre hnuhnawh a, a paw ka ti a, House ngaihdam ka dil a. Nakinah pass ka dil hunah chuan figure dik tak rawn sawi ka tum dawn a ni.

Aw le, kan Speaker rawn sawi ang khan, member 26-in an sawi a; zawhna leh rawtna 15 ve-ve member pahnihin an rawn siam baw k a. Ka lo chhinchhiah a, rawtna leh zawhna a vaiin 186-te hi kan chhang hman turah ngai ila. Zawhna a ni a, membrete’n an hriat duh a ni miau a; a dawtah windup note kan la chhiar chhuak dawn a, phok 16 lek a ni a. Nge ni, wind up note kan chhiar zawk mai dawn; chu chu membrete thu-thu ni se? (**Dr. K. Beichhua:** Pu Speaker, ziaka inchhan mai te pawh kan tih dan fo thin a ni alawm.)

SPEAKER : Kan zawt baw k si a; kan ngaithla leh peih si lo chu a ni maw. A tha e. Engpawh nise, kan minister hian a ngaih pawimawh zual kha han react se la. A bak chu, ziak te pawhin ti ila a tha ang e.

PU K. SAPDANGA, MINISTER: Aw le, Pu Speaker. A vai chuan chhang lo mai ila. Ni e, ngaih pawimawh zual zuk thlan chhuah thiam a har khawp mai a.

Kan Opp. leader khan keima chungchangah, ‘kuhva tawlh hi thla khatah kan ti bo vek ang’ tih tawngkam hi hman atang khan min sawikhum a, ka chhang duh lem hlei lova. Khawiah mah hian ka la sawi reng reng lova. A record te an lo nei anih chuan, khawngaih takin minrawn pe sela a tha in ka ring a. Kuhva chungchang ka sawina record ho hi ka nei deuh vek a; party office-a February Ni 13 (em maw ni) a ka sawi te pawh kha ka’n ennawn leh thin a. ‘Thla khat chhungin kan tibo vek ang’ tih lam khan ka lo sawi reng reng lova. Hei hi chu lo a sawi tawh thinte khan, ‘kan hresual palh a ni’ in lo tih ve mai ka duh deuh a ni e.

Hei, zawhnate hi a vai hian a pawimawh a. Amaherawhchu, member senior-in ‘ziaka in chhanna a tha e’ a tih ang khan, demand note ah hian lut mai ila. Amaherawhchu, zawhna leh rawtna kan siamte a lo tel lo palh a nih chuan, a mimal pawhin kan kan dil thei a.

Demand No. 13 - Department of Personnel & Administrative Reforms:

Department of Personnel & Administrative Reforms hi tam takin Transfer & Posting emaw chauh khawihtu ah kan ngai a ang thin a. Sorkar leh a chhunga thil awm zawng zawngte vengtu - *First and last line of defence for Government* kan inti a, hawihhawmna aiin dikna hmachhuanna hmun a ni. Miin min ngaihdân tur aiin min hmuh dân vên a ngai. Chuti chung chuan duhthusama tha work-force structure reforms erawh a la awm thei meuh lo.

Sorkar-hnathawkte finna leh thiamna tih hmasawmna te, zalên leh phûr taka an thawh theihna tura boruak siam te, rorêlna tha lang tlang (ethical-principles) nei tura thawktute kaihhruai te, Sorkar mi tha ber berte hip luha, thawktute thiamna leh theihna tihpun te, eirukna laka fihlim tura vên te, vantlâng tâna tangkai Sorkar siam te hi DP & AR tinzâwn leh a tum chu a ni. DP&AR hnuaiah hian wing hrang hrang a awm a, chung wing hrang hrangte hnathawh dân chu:

a) **General Service Wing:** Hei hi notification te, office memorandum te, recruitment, service rules te duangtu a ni. Central Sorkar-a *Ministry-a Personnel, Public Grievances & Pensions* kalphung milin State-sorkara hnathawkte inrêlbâwlina tur a duang chhuak thin. A langsar zual pathum han tarlang ila-

1) *Periodical review of government servants:* hi India Dânpui Fundamental Rules 48-ah a awm sa a. Central-ah leh State tam takah chuan an lo hmang daih tawh a, Mizoram-sorkar hian kan lo hmang ve lova. A hmang hmasa pawl phei chuan 1960-ah khan an lo hmang tawh a ni. Kan Sorkar a lo din (Ni 21.8.2024) khan hman turin thupêk a siam ve ta a. *Periodical review of government servants* hi inhremna a ni lova. Fundamental Rules 56 (j)-ina a sawi dân chu - “*Public Interest* a nih phawt chuan, sorkar-hnathawk ni si, hnathawk thei tawh si lote chu thla thum aia tlêm lo hriat lâwk tira, sorkar hna atanga chawlh tir tur. Hriat lâwk tir kher lova chawlh tir duh dân chuan, chawlh tir atanga thla thum chhung hlawh leh allowance pêk zui tur” tih a ni.

Group A leh B officer bik kum 35 an tlin hmaa sorkara lûtte chu kum 50 an tlinah (anmahni kum tak taka kha kum 50 a tlinah) thawk chhunzawm zêl tlâk an nih leh nih loh endik (review) tur a ni. A bak zawngte chu kum 55 an tlin hunah review tur a ni.

He dân hi hman dân chuan Dân leh Hrai mita tlin ngei a ngai a, Judicial Scrutiny ða tawh tak a awm a ngai. Hleilenna a tel thiang lo a, Sorkarin thupêk tunah chuan a chhuah tawh a. Thla thar April aþang hi chuan department tin ten *periodical review* an neih ngei-gei a hun dân ta a ni.

- 2) *Fairness and transparency in public appointments*: Tun hma aþangin sorkar-hnathawkte appointment pêk dânah hian belhchian dânllo a tam hle. Kum tling lo leh kum over tawh lâk te, recruitment dân tlawhchhan nei loa appointment pêk te a awm ðin. Hetiang hi Constitution Article 14 leh 16 kalh tlat a ni a, political power-a chin fel mai chi a ni lo.

Illegal leh irregular appointment a awm tawh loh nan sorkar leh a pêngehte hnena inhrilh nawna Ni 09.10.2024 khan Office Memorandum chhuah a lo ni tawh a, klphung dik zâwk kawng kan zawh tawh turah ngai ila.

- 3) *Public Service exam-a Optional Subject chungchâng*: State dang te kan han zir Chiang a. Optional paper hman an lo tlem tawh hle mai a. UPSC Civil Service Exam-ah la awm mahse kan State dinhmun en in optional paper tih tâwp hi a ða zâwka hriatna a awm a. Council of Ministers-in a ngaihtuah turin buatsaih mêk a ni.
- 4) Civil Services - All India Service te, Central Service te, State Civil Service te enkawltu *Head of Department* a ni. Promotion, training, transfer and posting service matter-te ah mawh an phur a.

Mizoram Sorkar hnuaiah IAS post 37 kan neih zînga 29 luah a ni a, IPS post 24 kan luah kim a, IFS post 19 kan luah kim bawh a. MCS post 254 kan nei a, 195 luah a ni. Separate Cadre of All India Service hi state-puitling kan nih aþang khan kan hruaitu hmasate'n an lo nawr ðin a. Tuna kan Sorkar pawh hian chu chu chhunzawm a tum a. Council of Ministers ngaihtuah turin buatsaih mêk a ni.

- b) **Administrative Reforms Wing**: Sorkar department-a post fill-up, promotion, post creation, deresignation, upgradation, post siam ðat leh endik hna khawihitu a ni. Hna tam tak zînga a zualpui chauh han tarlang ila:

Dan dik lova muster-roll chhawr leh 'thlarau MR' kan tih mai te chhuichhuak tura mawhphurhna pek anni a, Work Department ah te bul tan a ni. Chhui a harsa hranlo nain, chhui tur erawh a tam dawn viauin a lang. Aikal tih tawp chungchanga hma latu a ni. Council of Ministers thukhawmin Ni 20.12.2014-a a pawm *Special Voluntary Retirement Scheme* chu Mizoram Gazette ah Ni 21.01.2025 khan notify a ni a, Member zahawm tak hriatchian duh neite pawh khan he notification hi lo chhiar ni sela, keia sawi ai chuan a fiah zawh awm e. He scheme hi *CCS Pension Rules* leh *New Pension Scheme* hnuaiah voluntary retirement tura service nei tling lo, mahse sorkar-hnathawh thei tawh si lote voluntary-a an chhuahna tur a ni.

Sorkar kum kal mekah hian ARW-in *direct recruitment* hnalak phalna a pek 1780 a awm a, *Provisional Employee basis* chhawr phalna a pek 570 a awm bawh. Tin, *contract basis* chhawr phalna pek 165 an awm bawh.

- c) **Good Governance & Training Wing:** Sorkar-inrelbawlna tha a awm theihna tur te leh awlsam zawk leh tha zawk kalphung ngaihtuah te, sorkar-hnathawkte training buatsaih te hi Good Governance & Training Wing mawhphurhna a ni. SPARTAN chu kum tina sorkar hnathawk ten ACR/PAR online hmanga an submit theihna a ni a, SPARTAN kan hman tak hnu hian ACR bo a awm ta ngailo a ni.

CPGRAMS – Mipuite'n an lungawilohna sorkar laka an thlen theihna a ni a. Grievances lo lutte chu a concerned department ah thawn thin a ni. *Mipui Aw* – kan state pual liau-liaua mipuite'n sorkar laka lungawilohna online a an thlen theihna a ni a, Ni 16.02.2024 khan Chief Minister-in a hawng a. *Mipui Aw* kaltlangin department hrang hrangah grievance 392 dawn a ni a, 336 chinfel a ni tawh a ni.

- d) **Right To Public Service Act, 2015:** Sorkar hnathawk ten chak zawk a hna an thawh theihna tur a ni a. 2015 atang khan a hmingin hman a ni a, mipui ten kan la hmelhriat lo hle. Tun sorkar tharah hian khauh zawka hman tum a ni. Chhan tha tawh awm lova hna tikhawtlaitu chu ₹500 - ₹5000 thleng chawitir theihna dan a awm a ni.
- e) **Administrative Training Institute:** ATI ah hian kum 2024-25 chhung hian sorkar-hnathawk mi 5504 hnenah training pek a ni. Secretariat Service Wing – MSS te, Stenographer leh MSS hnuaiyah Assistant grade-te enkawltu a ni.
- f) **Mizoram Public Service Commission:** DP&AR hi MPSC nodal-department a ni a, MSSSB thiah tak bungrua kha MPSC in a khawm a, post 21 transfer-in 5 dah belh a ni. Kumin chhungin DPC vawi 252 an thu a, post 570 recommendation an siam tawh. Kumin chhunga direct recruitment a buatsaih dan chu: – Group A & B Gazetted post 86, Group B Non-Gazetted post 239 a ni. Group B Non-Gazetted Examination hi MPSC Examination Center Aizawl-ah leh District Headquarters zawng zawngah te neih a ni a, hei hi a vawikhatna a ni a, chhunzawm zel tum a ni.

DP&AR bik hi a tlang han kawm dawn ila. Harsatna tawh langsar deuh deuh te – DP&AR hi sorkar goal chhuah palh tur vengtu a nih avangin, fimkhur, uluk leh fekfawn taka hnathawh ngaihna hmun a ni. Sorkar-hnathawk zingah rinawm leh sorkar tana asset tling tam tak an awm a, a tam ber pawh an ni zawk. Mi tlemte mahni hmasial, hotute hnena thu dik tawh lo hrilh duh an awm thin a, hotute'n dawnsawn dan thiam pawh a ngai. DP&AR pawh hi mihring awmkhawm ve tho kan nih avangin kan hre dik famkim lo ang a, thurawn kan mamawh reng. Chutih lain pressure vanga goal kan chhuah fo chuan siphurtu chu sorkar tho a ni ang a, a tuartu chu mipui kan ni ang.

Thawktute *transfer and posting* khawih dawnin posting history uluk taka zirchian phawt a ni thin. Hard-posting leh soft-posting te, administrative exigencies te, service efficiency te, chumi hnuah individual problem te a en tel thin. Post ngaia rei tak thut leh reilo te thut hi a thalo ve-ve. Transfer chungchanga hotu sang rawih ching leh eng pawl emaw pressure pun ching an awm thin. Chung mite chu thawktu tha an ni ngailo. A tulna hmun apianga awm tura sorkara lut kan ni hi hriat reng tur a ni. Pressure control hnuaiyah good-governance a awm ngai lo ang. Mimal harsatna benghup san tur a ni lo a, mahse, public interest dah chungnun ber tur a ni.

Nikuma ka Budget speech ah khan District Administration Sub-Division leh Block Administration-ah infrastructure tih-changtluna, mipui tana service tih-awlsam kha ka sawi a, vawinah pawh sawinawn leh ka duh a. Member zahawm tak takte'n ka ngaihndan minrawn tawmpui tih ka hria a, ka lawm em em a ni. Mipuite leh political leader-te thleng pawha kan hriatsual palh fo chu - department zawng zawngte'n district headquarters ah district office hawn kan tum hi a ni. Civil administration atan district 11 ah kan inthen tawh a, sut leh thu a awm lo a. District Headquarters zawng zawngah district office neih hi department te hian kan mamawh lem lo; mamawh pawh ni ila state sum dinhmun in a tlin lo. District inelna atan office inneih ngah siak ang chi hi hmasawna rahbi ni lovin, leiba tipungtu mai a ni; inelna chi a ni lo. Sorkar department chungah pawh mahni minister te fuihpawha, minister chak anga lantir tumin thudik tawk lo hrilha nawr tir vak chin hi thil tha lo tak a ni a. Chutianga nawr theih minister nih pawh chu a tha chuang lo. A tawp a tuartu chu kan zavaiin kan ni.

India rama State te ber pawl leh pachhe ber zinga mi kan ni chungin Head of Department leh Head of Secretariat kan invuah danah kan lo thilphal uchuak hle tih State dangte dinhmun atangin a hriat theih a, 'Public Interest aiin Cadre Interest, State Individual Interest te kan lo dah chungnung zawk a ni awm mang e' tih mai tur a ni. Siamthat pawh a la tul ngei ang. Sorkar-hnathawk kan tam tih hi kan pawm a ngai; hnathawk tak tak tlak lem loh kan tam tih pawh pawm a ngai baw. State dang tam tak aiin *population/employee's ratio* ak kan sang zawk a, *national areas* ai pawha kan sanna department a tam. Department zawng zawngte ka chah duh chu - post siam belh lam ai chuan a thawk mekte tuaihriamna lamah tan ila phawt ang u. Officer tinte kan len-thlak a rual theih nan hna semrual ngam nih a tha. Minister, MLA te pawh fuihpawrh theih ni lovin, kan department chhunga a tak ram dai ngam ni ila; a tul phawt chuan *Rationalization of Post* te pawh hi i kalpui ngam ang u.

Tunlaia India ram hot-topic chu – *'Kar khatah dar 70 - 90 thawh loh chuan ramin hma a sawn thei lo'* tih te pawh a nih kha. Keini hian dar 9 - 5 kan thawh hian chawlh kar khatah darkar 40 chauh kan thawk tihna a ni. Mizoramah hian precedence thalo a tam tawh hle a, precedence tha lo hi chu chhunzawm kher tum lo ila. Kalphung-thar, kalphun- tha siam turin kan zavaiin hotute, thawktute leh mipuite kan tanho a ngai. Thil thalo zawk a ni tih kan hriat tawh chu, thil thalo baw. tih nan tan chhanah hmang lo ila, kalphung-thar zawh duhna thilnung thar nei turin mitin ka sawm a ni.

Demand No. 16 - Home Department:

Home Department hnuaiah hian Mizoram Police, Prisons, Fire & Emergency Services, Mizoram Home Guard & Civil Defence, Forensic Science Laboratory leh Sainik Welfare & Settlement te an awm a ni. Home Department mawhphurhna tlangpui chu, Mizoram leh mipuite an ralmuanna tura Law & Order kenkawh te, International leh Inter-State ramri enkawla venhim te, State pawn atanga himna zawnga Mizoram a lo lut te enkawla chhawmdawl te a ni.

Home Department hnathawh tlangpui:

2024 July, Ni 1 khan New Criminal Law hman tan a ni. CRPC kan tih te kha BNSS - *Bharatiya Nagarik Suraksha Sanhita* tiha thlak a ni a, IPS kan tih kha BNS -*Bharatiya Naya Sanhita*; IES/IEA kan tih te kha BSA - *Bharatiya Sakshia Adinyam* ti tea thlak a ni. Chu chuan tlem-tlemin criminal law-ah a rawn ti danglam nghe-nghe a ni.

Home Department hi Mizoram Police Service enkawltu a ni a, MPS Officer recruitment te, an promotion leh transfer te a buaipui thin. Tunah hian MPS mi 8 lak thar ten training an nei mek a, kum 2025-ah hian 8 dang lak belh leh tum a ruahman a ni. Assam nen ramri buai chingfel turin August Ni 9, 2024 khan Aizawl-ah inkawmna *Goodwill Mission* neih a ni a, April thla lamah hian official level-a inbiakna neih chhonzawm leh tura indawr mek a ni. Member zahawm takte sawi angin, zau zawka inrawnna te pawh neih tum a la ni ang chu. Ramdang atanga himna zawnga rawn kalte enkawltu tur 'High Level Committee on Indigenous Displaced People' din a ni a, a khat tawkin an thukhawm thin. Tuna kan dinhmun chu Myanmar atanga mi 33,505, Manipur atangin mi 56,033, Bangladesh atangin mi 2217, an vaiin mi 41,355 (chhiar laia kan number neih) an ni.

Ram pawn atanga kuhva rah tawlh ruk dang turin Police check-gate 11-ah police-te an duty reng a, kum 2024 chhung a kuhva rah tawlh ruk man zat chu 20,645 bags a ni. Kumin January - February thla chhungin 2593 bags man a ni leh tawh. Kuhva sawi laiin Vairengte daia kudam tam takah khuan tunah bag sing chuang a awm mek a, tih-ral theih a ni. Court-in a dispose tawh a, Kolasib DC kutah a deh-ral dan a awm a, a duh ang anga deh ral tura thupek a ni.

Krismas leh Kumthar vuakvet leh Diwali lai a halpuah hal khapna thupek kenkawh a ni a, mi-nawlpuiin an zawm tha hle. Hemi kaihnawihah hian thubuai 55 ziah-luh niin, mi 68 man an ni a, mi 62 case siam sak an ni bawh. Krismas leh Kumthar lo awm turah khap chhonzawm tum a ni.

Mizoram State Human Right Commission din tura hmalak mek a ni a, State-Level Police Accountability Commission leh District Level Police Accountability Commission te dinna tur notification siam a ni tawh. National Human Right Commission leh Criminal Law thar phut angin Directorate of Prosecution din tura hmalak mek a ni.

1. Mizoram Police: Mizoram Police Hqrs. hnuai district 11-ah District Executive Force (DEF) an awm a, Armed Batallion 8 kan nei bawh. Unit dangte chu - Traffic, CID (Crime), CID (SP) leh Security te an ni. Hei hi ka sawinawn leh duh - Police mamawh apiangin phone no. 112 dial-in englai pawhin police-te an biakpawh theih; Police bakah Fire Station leh hospital te biakpawh nan pawh hei hi a hman theih a ni.

Mizoram Police-te fitness tihpun nan Ni 5.8.2024 khan *45-Minutes for All ranks of Mizoram Police Programme* rampumah a ruala hman a ni a, minute 45 chhung a hu-hova tlan a ni a, thupui chu - 'Train to Excel' tih a ni. Unit zawng zawngte'n kar tin physical fitness program hi neih thin a ni a, neih chhonzawm tura tih an ni. Tun hnai ah hian ennawn a ngai deuh ni awma sawi a ni.

Mizoram Police-in harsatna a tawh mek chu - hmun tina office leh quarters sak-that ngai tam lutuk hi a ni. Kan memberte'n kan bial theuh kan mitthla a, hei hi thudik tak, a sawi pawh kan sawi tam ber kha a ni. Housing atan SASCI hnuai ah crore 50 kan dawng a, a tul zual pawh a daih lova, dawn belh zel beisei a ni.

Police lak mek a ni a, SI - 25; ASI - 20; Constable - 259 lak tum a ni. Tunlai hian qualify turin an intihsiak mek a ni.

Kumin chhungin ruihhlo crore 173.22 man hu man a ni a, a kaihhnawihah mi 338 lakah thubuai 250 ziah-luh a ni. Phalna lova zu lalut mi 205 man anni a, thubuai 143 ziah-luh a ni. Kumin chhungin silai chi hrang hrang 33, silaimu 1,20,178, maxine 41 man a ni a, *Arm Act leh Explosive Act* hnuaiyah mi 54 thubuai siamsak anni.

Cyber Crime PS ah thubuai 33 ziah-luh tawh a ni a, mi 23 man anni tawh bawk. Bum chingte kut atangin lakh ₹92,60,000 lai hmuh-let a ni.

Police Station, Police Outpost, Beat Post thar hawn leh MHA atanga Border Police Station din tura nawrna te a nasa a, hei hi uluk leh hmanhmawh taka bawhzui tum a ni.

Criminal Justice hnuaiyah thawktu peng hrang hrang – police te, Court te, Forensic Science Laboratory leh Prison te, computer leh internet kaltlanga inthlunzawmna - *inter-Operable Criminal Justice System* siamin, crime and criminal tracking network system ah dah-luh mek a ni.

2. Prisons: Prison Department hi dan bawhchhiate hremna mai ni lovin, nun kawng dik an zawh theihna tura thawktu a ni. Tunah hian Prisons hnuaiyah jail 10 a awm mek. District 8 sakna tur SASCI sum crore 55 hmuh a ni a, hna tan thuai tum a ni. Open Jail leh Probation of Offender hi Mizoram ah *introduce ve a hun tawh em* tih zirchian mek a ni.

3. Fire & Emergency Services: Fire & Emergency Services hnuaiyah hnapui ber chu, kangmei laka mipui leh bungruate venhim a ni. In sa tur leh a mamawhte'n Fire – *No Objection Certificate* an duh thin a, tha tamtak senga lak pumpelh nan online-a pek theihna tur portal siam a ni a, January Ni 9, 2025 khan tlangzarh a ni.

Ni 31.1.2025 khan D&MR leh Forest Deptt. te tangrualin a vawikhatna atan Aizawl-ah *Model State Mob Drill on Forest Fire* neih a ni. February Ni 10, 2025 khan kang-me ven beihpui thlak hapta hman a ni. March Ni 5, 2025 khan ZMC Falkawn-ah *Table-top - Mob Drill Exercise on Fire and Earthquake* neih a ni. Modernization of Fire atan 15th Finance Commission hnuaiyah NDRS component atangin crore 40 ruahhman sak kan ni a, detailed proposal peih tep a ni.

4. Mizoram Homeguard & Civil Defenses: Mizoram Homeguard & Civil Defenses hnuaiyah hian mi 1168 an awm mek a, district tinah inzarpharhin DC bungalow lel office, District Jail leh Bank venhim-hna an thawk mek a, a tulna apiangah Mizoram Police-te an pui a, tunah hian hmun 85 ah an duty mek a ni. Homeguard volunteer ration money kum 2023 April thla atanga tih tawp tak chu July 2024 atangin Mizoram sorkarin ₹850/- in a pe leh tawh a. ₹850/- hi kan member ten kan sit deuh a, amaherawhchu, a sit deuh tute kha a tihtawp-rawttute kha an ni ve bawk a. Chuvangin, ₹850/- hi kan tlin tawkah ngai ila, lungawipui tum ila a tha awm e. Rifles Allowances pawh ₹40/- pek thin kha ₹100/- a tihsan sak an ni. Mizoram sorkar hi India ram chhungah Homeguard volunteer-te hlawh pe tha ber zinga mi kan ni.

5. Forensic Science Laboratory: Forensic Science laboratory hnapui ber chu, pawikhawihna khawl hmanga endik hi a ni. Kum 2024-25 chhungin pawikhawihna hmun 76-ah case 1317 leh case kaihhnawih sample chi hrang hrang 9806 exam a ni. Eng case pawh ni 30 chhungin expert report tihchhuah thin a ni a, he *zero-pendency* hi tun thlengin vawn

that a la ni. Zoram Forensic Science Laboratory hian Integrated justice system project 2023 atang khan a takin a kalpui a, India rama project kalpui hmasa ber a ni. Expert report reng reng paper hmang tawh lovin ICJS portal-ah upload nghal zel a ni a, hei hi India ram pum tan pawh thil chhinchhiah tlak anih chhan chu, a ti thei hmasa ber leh a ti chhun Mizoram hi kan la ni. Central sorkar atanga *Modernization for Forensic Capacity Fund* 100% Central funding hmangin Mobile Forensic Vehicles 10 lei thar a ni a, helaiah hun tlar a ni a. ‘Engatinge motor thar hman loh a van tam ve’ tih zawhna a tam em em mai a. Chu chu Centralin a thlawna min lo pek, hman tura ruahman mek a nih chu. December, 2024 thleng khan fingerprint record 7853 lai data base-ah dah luh a ni tawh a, District Mobile Forensic Unit hi Aizawl, Lunglei leh Champhai ah te din a ni. Kan Member zahawm takte zawhna leh rawtna kha hei hian a rawn chhang awm e. District dangah pawh a tahtawla din zel beisei a ni ang.

6. Sainik Welfare and Re-settlement: Hei hian ex-servicemen leh an chhungte chhawmdawl-hna an thawk thin a. Mizoram hnuaruk Group B, non-gazette chin hnuai lamah sipai bang tan 5% reservation dah thin a ni. Indona hmuna nunna chante hriatrengna tur War Memorial neih mek te hi uluk taka chei thin a ni a. Tuna Aizawl War Memorial awmna hmun hi a chep bakah a rem lo em em mai a, War Memorial thar siamna tur zawn mek a ni.

Demand No. 30 - Disaster Management & Rehabilitation Department:

DM&R Department in a thawh hrang hrang leh a hmalakna tura ruahmanna a siamte tawi te te in han tarlang ila: -

State-Disaster Risk Management Fund hi Finance Commission in a tum, a pek leh a ruahman a ni a. Sum ruahmanna 90% chu Sorkar laipuiin a tum a, 10% chu state tum a ni. Sum hman dan pawh ruahman sa a ni a, a pumpui atanga 80% chu chhiatna tuarte tanpuina atan hman tur a ni. Chu chu State Disaster Response Fund a ni a, 20% chu chhiatna thleng thei laka invenna atana hman tur a ni leh a, ‘*State Disaster Mitigation Fund*’ tih a ni. *Entirnan:* 100/- nei ta ila, 80/- kha tanpui nan, 20/- kha invenna. Chu chu a ruahmantu Finance Commission-in a hman dan tur a ruahman dan chu a ni.

State fund dinhmun hi 16th Finance Commission-in kum 5 chhung, 2021-2026 atan Mizoram sum a ruahman dan chu - Chhiatna tuarte puihna atan ₹229.06 crore leh chhiatna laka invenna atan ₹57.40 crore a ni. Kum kalta khan relief fund atan crore ₹48 crore dawn a ni a, Mitigation fund atan ₹12 crore dawn a ni.

Cyclone Remal: Nikum May Ni 27 & 28 khan Cyclone *Remal* vela avanga chhiatna a thlen khan nunna chan 34 an awm a, mimal-vantlang in leh lo tam tak a chhia a. Kawngpui te, khawchhung kawng te, feh kawng te hmuntam takah a chhia a, tuilianin tui-pump khawl te, electric khawl te a chhia a, electric leh tui-ah harsatna namen lo kan tawh a nih kha. Heng chhiatna thlengah te hian Natural Disaster Response Force te, State Disaster Response Force te, District Disaster Management Authorities ten enfiah-hna leh chhawmdawl-hna an thawk a. Para-force te, tlawmngai-pawl te, zirlai pawl leh kohhran thlengin chhawmdawl-hna thawh a ni. District hrang hranga DC leh department ten chhiatna thlen dan a hmunah an en a, an chhut a, Memorandum siamin Ministry of Home Affairs, Govt. of India-ah sum dil a ni a. Home Ministry chuan ₹64.14 crore a rawn pawm a, beisei zat hmun li-a then hmun khat vel a ni. ₹7.56 crore National Disaster Response

Fund atanga hmuh a ni a, a bak ₹56.58 crore chu State Disaster Response Fund atanga hman tura rawn ruahman a ni. Heng sumte hi hmuh a ni tawh a, district hrang hrang leh sorkar department chhiatna tawh hrang hrangah pekchhuah a ni tawh nghe nghe.

Chhiatna a thlen palha lo hmachhawn dan inzirtirna *Training leh Awareness* lamah DM&R Department-in a buatsaih dan tlangpui chu - MAP leh IR Battalion 8-ah Disaster Response Force din a ni tawh a. Battalion 7-ah training phase 2 neih zawh a ni tawh, training la pek loh 4th IR-ah pawh pek thuai tum a ni. Kum 2024 chhung khan *Quick-response team* district pathum - Serchhip, Hnahtial leh Khawzawl-ah te training pek a ni a, district dangah chhonzawm zel tum a ni. Synod Nursing College te, Apollo School of Nursing leh Regional Institute of Para-Medical & Nursing Sciences (RIPANS) zirlaite hnenah training pek a ni bawh. Ni 25th February atanga Ni 7th March chhung khan tui-tla chhanchhuah leh tui-tla zawn dan *scuba-diving* training mi 18 neihpui a ni a, hetiang training hi vawikhat neihna a ni. Institution remchang dangah pawh QRT dinin training inpek zel tum a ni. *Youva Apada Mitra* scheme hnuaiah Mizoram chhunga district 5 - Lunglei, Champhai, Kolasib, Serchhip leh Mamit ah te NCC te, NSS te, NYKS te leh Bharat Scouts & Guide thalaite hnenah training pek tura ruahman a ni a, thalai 1130 hnenah zirtirna pek tum a ni.

Vawkpul hri (ASF): Sorkarin vawk-pul hri hi kum 2024 chhung atan *state-specific disaster*-ah a puang a, ASF vanga thite ralna tur ₹ 480 lakh chu state-disaster respond fund atanga dah a ni.

Sate-level Mock Drill: November Ni 14, 2024 khan State-level mock exercise on landslides, floods, fire and disaster in Mizoram chu district tinah hlawhtling takah neih a ni.

Demand No. 46: Urban Development & Poverty Alleviation Department:

UD&PA hnuaiah budget controlling authority 2, Director, UD & PA leh Programme Director, SIPMIU a awm a, Aizawl-Smart City Limited pawh he department-a tel hi a ni. Urban local bodies-te tan administrative department a ni a, AMC leh LMC te tan urban local-body grant leh grant-in-aid te chu UD & PA department hnuaiah pek a ni.

Kum 2024-2025 chhunga hmasawmna thawh tawhte: Integrated Command and Control Centre chu zawh fel a ni tawh a, case hrang hrang 380 chinfel nan hman a ni. Damdawi-in lian 8 hnenah 5G ambulance pek a ni a, Aizawl Civil Hospital-ah khawl chi hrang 26 pek a ni a, MRI khawl pawh a lo thleng tawh a, bun thuai beisei a ni. Damdawi-in bawhlawh bik sawngbawlina tur *Bio-medical Waste Treatment Plant* chu Tuirial-ah peihfel a ni a, April 2025 (thla leh) atangin hman tan tawh tur a ni. Aizawl khawpuiah solar - LED street light 6000 chuang dah a ni a, hmun pawimawh zual laiah solar minimas 60 zet bun a ni bawh. Mizoram Badminton Centre National Standard Zuangtui-ah peih a ni tawh a, hawn mai theih a ni. Thosai field, Siaha-ah artificial turf phah a ni a, Multipurpose Community Centre, Zonuam-ah peihfel a ni tawh bawh.

Project lian tham thawh mek te:

Tunah hian project lian tham 43 thawh lai kan nei a, project cost belhkhawm chu ₹435 crore a ni. Kan sorkar hnu hian hmatar lakna tur project thar tan theih mai 119 neih leh a ni tawh. Mizoram khawpui hrang-hrangah tui-luan kawr tha siam tum niin Aizawl khawpuiah tan phawt a ni ang a, SASCI hnuaiah ₹61 crore neih a ni tawh a, hna pawh tan theih thuai beisei a ni. Khawpui dangah hma lak chhonzawmna atan ₹42.5 crore pawh

hmuh fel a ni leh tawh. Faina lama hmalakna leh hma chhawp, bawlhhlawh tawih theilo sawngbawlina tur material recovery facility chu Industrial-growth Centre, Luangmual-ah sak mek a ni a, official-in ‘Luangmual’ tih a ni na a, Tanhril ram a mi a ni; kumin chhunga zawh hman tur a ni. Hualngo hmunah *Construction and demolition of waste-processing facility* sak mek a ni a, tun atanga reiloteah zawh thuai beisei a ni.

Faina kawngah YMA nen thawhhona tura inbiakrem a ni tawh a. September 2024 atangin AMC leitha kg-nuai chuang hrall chhuah a ni. Mizoram khawpui 28-ah bawlhhlawh sawngbawlina hmun mumal tak din vek tura hmalak a ni. Tui hman hnu fel fai taka sawngbawl anih theih nan *Used-water Management* project kalpui a ni bawk. Member-te zawhna - kan khawpuiah leh sub-town-ah te hian bawlhhlawh sawngbawlina din tum a ni em tihte kha a rawn ri nawk nawk a, helai hian a chhang awm e. Aizawl chhuah lamah ekin thli sawngbawlina sewerage treatment plant Chite vengah siam tawh a ni a, local council pakua-in an chhawr mek a. Aizawl tlak lam veng pakua chhawr tur tunah hian plant dang ₹39 crore-in siam mek a ni a, heng hi pilot project a la ni a; Aizawl south lamah te pawh kan la siam ang chu. City-beautification Contest kalpui a ni a, district headquarters pakua-te an inel mek a, ruahmanna nei tha pathum hnenah an ruahman anga an thawhna tur ₹50 lakh pek an ni ang. Tui intur hniang hnar nei tura hmalakna SIPMIU hnuaiyah Aizawl khawpui tan tui lak belhna project *Augmentation of water Supply and Construction of 37 ml de-water Treatment Plant (phase-III)* December Ni 23, 2024 khan commission a ni a, tui pump nghal a ni. AMRUT 2.0 hnuaiyah PHE department nen tang dunin Zoram khawpui hrang hrang 19-ah water-supply project ₹105 crore hmanga thawh mek a ni.

Aizawl-Sustainable Urban Transport Project hnuaiyah mipuite veivahna tha leh nuam zawk atan *comprehensive mobility* plan chu zawhfel a ni tawh a, public transport atan ropeway system pawh a hman theih tura uluk taka zir chian mek a ni. Thenzawl hi ‘Peace City’ ti a sawi a ni a, peace city concept note siam a ni a, sorkar-laipui dawr mek a ni. *Mizoram Urban Area Building Regulations, 2024* chu kuminah notify a ni a, *Aizawl Municipal Corporations Building Regulations* pawh amend a ni. *Mizoram Urban and Regional Development Bill* chu he House hian tun session-ah khan a passed tawh a, heng dan siamthat kawngah kan thawh that avangin 2023-2024 leh 2024-2025 chhungin SASCI hnuaiyah *incentive* ₹655.5 crore sanction kan dawng tawh a ni. Department lamah chuan SASCI hnuaiyah reform tih that vanga incentive sum haichhuak tam ber niin kan inhria. Khawpui mi retheite chawikanna *Housing For All* hnuaiyah hian census town 23-ah beneficiary mi 36,789 an awm a. ₹398 crore chu beneficiary te hnenah sem chhuah tawh a ni a. Beneficiary mi 20,443 te, In sa zo tawh an awm a, khawpuia mi-rethei ten lei rem an rah ve theihna turin *Deen Dayal Upadhyaya Grameen Kaushalya Yojana* (National Urban Livelihood Mission) kalpui a ni a, mi 22,324 hnenah skill training pek tawh a ni. Mi 8,543 te chuan cashment an hmu tawh a ni.

Mizoram hi 52% khawpuia cheng awmna a ni a. Khawpui 28 kan nei mek a, heng khawpuite hmasawna leh a chhunga cheng miretheite chawikan hi UD & PA Department mawhphurhna a ni. State changkang ni turin tan kan la mek a, he kan tum ram thleng tur hi chuan kan khawpui te hi eizawna hmun pui *Growth Centre* an nih a ngai a ni. He chona lian tak hi UD & PA Department chuan kan hmachhawn mek a ni. Hma kan lakna hrang hrangte House zahawm taka ka thawhpui ten tha hnem ngai taka min sawipui avang leh min pawmpui dawn avangin lawm thu ka sawi a.

Tichuan, Pu Speaker, heng ka demand-te –

<i>Demand No.</i>	<i>Department</i>	<i>Amount in ₹</i>
13	Personnel & Administrative Reforms	4,35,05,000.00
16	Home	8,60,76,50,000.00
30	Disaster Management & Rehabilitation	78,37,31,000.00
46	Urban Development & Poverty Alleviation	3,30,25,94,000.00
TOTAL		12,73,74,80,000.00

te hi min pawmpui turin ka rawn ngen e. (**Speaker:** Khawngaihin; Demand No. 13 kha han chhiar nawn leh teh.)

Pu Speaker, Demand No.13 - Personnel and Administrative Reforms - ₹4,35,05,000/- a ni e.

SPEAKER : Aw le, a lawm awm e. Tunah chuan Minister zahawm tak Pu K. Sapdanga'n a demand te –

<i>Demand No.</i>	<i>Department</i>	<i>Amount in ₹</i>
13	Personnel & Administrative Reforms	4,35,05,000.00
16	Home	8,60,76,50,000.00
30	Disaster Management & Rehabilitation	78,37,31,000.00
46	Urban Development & Poverty Alleviation	3,30,25,94,000.00
TOTAL		12,73,74,80,000.00

House-ah pass a rawn dil ta a. Remti apiangin, 'Remti' ti ula. Remti lo kan awm chuan, 'Remti lo', ti ula. (*House-in pass a remti a.*)

A lawm awm e. Minister zahawm tak Pu K. Sapdanga demand chu House-in lungrual takin a pass ta a ni. (**Pu K. Sapdanga, Minister:** Pu Speaker, ka lawm e.)

SPEAKER : Aw le, tunah chuan Minister zahawm tak Pu PC Vanlalruata, kan sawiho tak te rawn wind-up turin leh sawifiah ngaite rawn sawifiahin, a demand te House ah pass rawn dil sela.

PU PC VANLALRUATA, MINISTER: Pu Speaker,

Demand No. 31 - Agriculture & Farmers' Welfare Department:

Ka member-pui mi 26 laiin in rawn sawi hlawm a, ka lawm hle mai. Demand No. 31 atang hian tan mai ila, 'Agriculture Department' tih thin kha June, 2024 khan 'Agriculture and Farmer Welfare Department' tiin kan sorkar hotuten kan dilna min phalsakin thlak min phal sak a, waviinah hian he House kal tlang pawh hian lawm thu ka sawi a ni.

Kan budget hi Demand No. 31-ah dah a ni a, *Major Head* pahnih - Crop Husbandry leh Research leh Education-ah te then a ni a. *Revenue Head* ₹1,91,10,60,000/- leh *Capital Head*-ah hian FOCUS 2.0 atan ₹10,000.00 te dah a ni bawk a. Pu Speaker, Agriculture hnuaih hian CSS hi kan ngah khawp mai a, a ngah berte zinga mi kan nih ka ring a, 13 lai kan nei a, chungte chu Umbrella pahnih - Krishonnati Yojana 'KY' kan tih leh 'PM-

RKVY' kan tihah te hian then an ni. Kan member-te *for information*-ah tawite tein kan hmalaknate hi han sawi ka duh a. Kan member-puite zawhna kha Minister Pu K. Sapdanga tih ang deuh khan a rem laiah ka rawn chhang ang a, kan chhan loh erawh chu nakinah a wholesale deuhin kan chhang mai dawn nia.

Chutiang chuan, KY Scheme hnuai hian CSS 9 zinga 7 hi Agriculture & Farmers' Welfare hnuai kalpui a ni a. PMRKVY hnuai hian Scheme 6 kalpui mek a ni. Kum 2025-2026 atan RKVY DPR based ah allocation Central atangin crore 15.38 kan hmu tawh a ni. Central Sector Scheme pakhat KVK hi kan kalpuina a rei tawh a, kan kalpui chhonzawm zel a. Nichin khan Lunglei West bialtu Member zahawm tak khan a rawn sawilang a. Tunah hian District te a lo pian takah hian Champhai KVK thin kha Khawzawl-ah a awm a, Lunglei KVK kha Hnahthial-ah a awm bawk a. Tin, Saitual hi district thar a ni a, KVK an la nei lo bawk a. Tunah hian District pathum KVK la neilo tan dilna ICR ah te kan thlen tawh a, tunah hian process mek a ni a. A hmunhma tur enfeltu turte pawh an awm tawh a ni.

Central Scheme pawimawh tak tak PM-KISAN scheme te leh Crop Insurance scheme PM-Fasal Bima Yojana (PM-FBY) kalpui chhoh mek a ni a. Group Insurance hi nikum lamahte pawh khan cheng nuai 5 lai kan dah tawh a. Amaherawhchu, cropping season te a lo nih loh tak avang khan tunah hian ruahmanna thar te kan siam a, hmalak mek a ni.

Tin, Digital Agriculture pawh hi CSS hnuai tho a ni a, a hnuai hian *Developing Agriculture Infrastructure in Mizoram* chu kalpui mek a ni. He Digital Agriculture Project-in tum ber chu, Mizoram Agriculture system tana digital ruhrel siam a ni. *Digital Agriculture* kalpui nan tun budget ah hian cheng nuai 1,822 dah a ni.

Agriculture extension, Agriculture Technology Management Agency (ATMA) scheme hi agriculture reform kalpuina tura duan a ni a, district 8 ah Project Director 8 an awm a ni. He Scheme in a tum ber chu agriculture technology tha zawk leh hmantlak zawkte loneitute hnena puanzar leh ngaihtuahpui a ni. State Agriculture Management & Training Institute (SAMITI) hi ATMA peng pakhat a ni a. hetah pawh hian hmalak mek a ni.

National Food Security & Nutrition Mission chu Ddistrict hrang hrangah kalpui mek a ni a. He scheme in a tum ber chu Agriculture thlai bik – cereal, pulses, coarse cereals leh millet te technology tha zawk hmanga thlai thar tih tamna tur a ni. Central Sorkar-in 2025-2026 atan allocation ₹3.03 crore min pe a ni. Member thenkhatte'n oil kha in sawi a; National Mission on Edible Oil hnuai hian kum 2025-2026 allocation ah ₹21.44 crore hmuh tawh a ni a. Bukvannei-ah Godrej-in oil palm processing factory an din mek a. Tunah hian Liapha, Lawngtlai District-ah Patanjali nen inremna kan siam tawh angin he processing unit hi buaipui mek a ni. Tunah hian kan chin tawhte, a bik takin chhim lamah phei chuan processing unit a awm mai loh avang khan kan farmerte'n harsatna lian tak an tawk a, Kolasib District-a rawn inphurh phei kha an tan a hautak hle tih kha member zahawm tak Pu Ngunlianchungpa pawhin a rawn sawi a. Khang harsatna sutkianna turin tunah hian Liapha-a processing pnit hi buaipui mek a ni.

Nation Mission on Edible Oil, oilseed hi Central hian a ngai pawimawh em em a. India ram hi oilseed ah hian kan intodelh lo nasa em em a. Tunah hian tel-antam kan tih te, be kang te, chhawahchhi te, nihawi leh badam-ah te hian tunah hian hmalak mek a ni a, a

herna khawl pawh hmun eng emaw zatah bun tawh a ni a. La commission lohte pawh kan nei a ni. Edible oil-seed kan tih heng tree-borne oil lamah hian Mizoram-ah hian chengkek kan kalpui ve a. Tichuan, kan farmers te hian eng hi nge ching se tha ang; eng thlaite nge kan ram boruak mil tur ti tein Pathian hnenah ka thlen ve thin a. Tun kan Sorkar tirh khan ka office-a ka thut lain thil pakhat ka rilru a lo lang thut a awm a - chu chu *Tung* hi a ni.

Tichuan, Serchhip-ah tung her thin Pu Rualzaa ka han phone a, a hmalakna te ka han zawh khan, Tung chin dan tur leh hmalak dan tur a sawite kha tha dawn riaua hriatna hriatna ka nei a. Tung hi tunhma NLUP hnuai ah pawh kan lo ching tawh a. Amaherawh chu, a market a awm loh avangin kan sam fai leh vek tawh a. Mahse, tunah hian India ram hian Tung oil hi a mamawh khawp a hmuh loh avangin khaw chhak lam atangin a import nasa em em a ni.

Tichuan, tung chin hi a chi dawn riaua ka hriatna avangin he hmalakna tree borne-oil hi AMFU hruaitute survey te ka neih kual tir a. Chutiang chuan, a chite kan zawng a, foreign atang te kan han chah a. Amaherawhchu, Kolkata ah a tang ta hlauh mai a, nikum lam khan kan chintir hman ta lo a. Tung ching duh chhungkaw eng emaw zat kha kan hmu nghal a, mahse, a chi a awm loh avangin kan chintir thei lo a ni. Kuminah erawh chuan a chite kan han ngaihtuah a, khaw tam takah hmalak a ni a, Saitual leh Serchhip District ah bul kan han tan dawn a ni a. Tin, ka biala Hualtu-ah te pawh kan ching dawn a ni. Department hmalaknain *active plantation* te kan ti a, tiang chuan bul kan han tan thar dawn a ni. Tung hi tunah a demand a thain, kan ram leilung mil a ni a. Farmer pakhat pawhin thlai dang reng reng, lakhuihthei a ni emaw, eng thlai pawh nise, patling hian tin 2 hmun bak aia tam hi a vil theih loh a ni. Tung erawh chu kum 5-ah a lo puitlin chuan, patling hian a zauh zel ang a, tin 20 - 30 hmun pawh mi malin a vil theih avangin, hei hi farmers te tan a tha hle dawnin ka hria a ni.

‘Mission Organic Value Chain Development for North-East Region’ kan ti a, hei hi organic farming buaipuina lam a ni a, mizo-hmarcha, sawhthing, aieng, lakhuihthei leh sapthei chinah te hma lak a ni. Tunah hian Fest-4 kan kalpui mek a, Service Provider-3 kan nei a. FPO hmun 11 kan thlangchhuak a, tunah hian hma an la dawn mek a ni. Sapthei pawh tih thar leh kan duh chhan chu, tunhnaiah kan Chief Minister hian a phurpui a, Delhi a zinna ah te a keng a, kan Prime Minister hote pawh a zu leitir a, a tui an ti hle mai a. Chuvangin, sapthei hi han tih thar leha, kan ram bikin a mil, state dang ram chin ve theih loh te a ni a. Kan ram tana Pathian min pekah kan ngai deuh avangin systematic taka sapthei chin thar leha, a grade A te state danga han thawnchhuaha, a grade B leh C-te han processing kha kan rilru ah alang a ni.

Annual Action Plan - *Best Scheme* ah hian Soil health & fertility ah 2025-26 atan central atangin allocation crore 4.5 hmuh a ni tawh bawk a ni. Tichuan, Flat Area Development kan tihah hian kum 2025-26 atan allocation crore 9.5 hmuh a ni bawk. Sub-Mission on Agriculture Mechanization pawh kalpui mek a ni a. Kum 2025-26 atana allocation crore 12.31 kan nei tawh bawk a ni. ‘*Per drop, more drops*’ an ti a, kum 2021 atang khan State-nodal department-ah Horticulture dah a nih avangin horticulture te nen kan ti ho zel a, a total scheme financial outlay atang hian tunah 40% Agriculture-in kan chang ve a. 2025-26 atan crore 22.27 kan nei mek a ni. Agro-forestry hi scheme thar a ni a, 2023 - 2024 a bul tan chauh kha a ni a. 2025-26 ah hian allocation crore 3.5 kan nei bawk a ni.

Memberte'n in rawn sawi NEC project sorkar hmasain a lo tih tawh Development of Potato Seeds Farming Mizoram, tissue culture – *pickle-rooted cutting* chungchanga kan sorkar hmasa hmalakna, hetiang an lo kalpui hi a lawmawm ka ti a. Kan sorkar tharin kan chhunzawm a, hma chak takin kan la chho a; tun December Ni 19, 2024 khan kan hawng ta a ni. Amarawhchu, a thawktu lam indaihlohna avangin a bul kan la tan tak tak thei lova, a thawktu tur thar lak belh kan han dil chho ang a, kan chhunzawm thuai thei turah ngai ila. Tunah hian aeroponic ystem pahnih siam a ni a, kan kaltluan chuan, alu chi kum khata kan siamchhuah theih chi hi nuai 5 vel kan beisei dawn a ni..

ICAR nen tangkawpin India Oil-palm seeds research West Serzawl-ah kum 2015 khan bul tan a ni a,. Tunah hian Oil-palm phunna ram hectare 15 ah kung 2000 kan nei mek a, Spouted seeds nuai 5 vel siamchhuah theih kan inbeisei a ni. Hei hi kan siamchhuak thei anih chuan, Mizoram-in kan mamawh bak te state-pawnah hralhchhuaha sorkar revenue siam thei turah kan inngai a ni. Sorkar hmasa hmalakna a ni a, a ropui ka ti a, kan chhunzawm zel dawn a ni e.

Tichuan, *Green Act Project* kan nei leh a, Global Environment Facility-in a thlawna min rawn siamsak a ni a. Hemi hnuaiah hian Dampa Tiger Reserve, Mamit District leh Wildlife Sanctuary, Lunglei district bul hnai khaw 38-ah hmalak a ni a. He Green Act Project-in a tum chu, hemi huam chhungah farmers ten harsatna hrang hrang an tawh te leh heng sanctuary hnaih khuate kan environment tichhe lo zawnga hmalakpuina project a ni ber a, hei hi tunah hian kalpui mek a ni.

PM-Kishan hi kum 2019-ah khan tan a ni a. Kut-hnathawktute he portal-a an in register chuan thla 4 danah cheng ₹2000/- leh, kum 1-ah cheng ₹6000/- an dawng thei a ni. Tunah 2024-25 ah hian kan farmers nuai 1,23,524 ten he scheme hi an chhawr tangkai hle mai a. An pawisa dawn hi avaiia belhkhawmin crore ₹33,64,72,000 a ni. Tin, hei bakah hian central scheme thar - *National Mission on Natural Farming* hi a la thar hle mai a, hei pawh hi kan kalpui chho dawn bawk a ni.

Tin, sawhthing lei chungchang te, farm link-road chungchang te leh thawktu indaihloh chungchang te kha, tunah hian link road eng emaw zat RDF-30 hnuaiah crore 19 leh tlem min rawn pe ve a, tunah hian hmalak mek a ni a. Tin, SASCI part-1 ah kumin atan crore 31 leh tlem min pek kan beisei a, proposal te kan siam tawh a ni.

Bial tin hian kan mamawhna a, dilna pawh a rawn lut hnem narawh a. Tunah hian eng emaw zah percent kan dah tha a, MLA bial tinah hma han lak te pawh a chakawm khawp mai a. Amaherawhchu, duh angin fund kan hmu thei lova, central-ah te pawh kan la dil chho mek ang a. Engtik ni emaw ah chuanin, a zawng zawngte chu fulfilled theilo mah ila, farmers te mamawh zual te chu la intihsak thei turah kan inngai a ni.

Tin, kha Pi Prova-i te khan zawhna a rawn nei bawk a. Kan office hawn thara staff kan la dah theih lo hi a buaithlak em em a. Sorkar ah kan dil thin mah ila, kan Sorkar sum leh pai harsatna avangin duh angin thil a tih zung zung theih lova, min lo hrethiam hram hram ula. Tan kan lo la viau a ni.

Tin, sawhthing lei chungchang Pu Ramthanmawia rawn sawi kha, a tahtawla lei anih avangin kan primary society te hian a party-zawnga an thlir ka ring lova. Tunah hian society

in chawh tur chin bitukte an siam a; tuna kan lei tam ber hi chu Congress-pa leh MNF-pa sawhthing a ni tlat. ZPM-te hi chhungkaw harsa tete-te kan nih avangin sawhthing han chinna tur nei lo tam tak kan awm a. Chuvangin, ‘ZPM-in sawhthing kg ah ₹50/-in a lei dawn’ tih khan, a phur ber ber chu MNF-pa leh Congress-pa te an ni a; sum leh pai te an lo nei bawk si a. (**Speaker:** BJP-pa an tel ve lo em ni?) BJP-pa pawh an tel ve ang.

Demand No. 47 - Irrigation & Water Resources Department:

Tichuan, Demand No. 47 - Irrigation & Water Resources hi, kum 2025-2026 chhunga Irrigation & Water Resources Department te BE hi crore 91.26 a ni a, kum 2024-2025 an BE crore 103.18 aiin 11.55% in a tlahniam a. A chhan chu, kum 2024-2025 BE kha NABARD-ah tarlan a ni a, kuminah hian tarlan a nih loh avangin a tlem ta a ni. Hnathawhna tur sum hman tur *Capital Head* atan crore 77.16 ruahman a ni a, hei hi budget pumpui atanga 84.54 % a ni.

Department hnuaiia scheme hrang hrang budget thara thawh turte han tarlang ila. Surface Minor Irrigation (SMI) Scheme, PMKSY - *Haar Khet Ko Paani Scheme* hnuaiia project kal lai chhunzawmna tur leh, project thar 35 thawhna tur crore 44.44 dah a ni a. Tin, Ground-Water Irrigation Scheme hnuaiia project 13 thawh zawh tawh a ni a, hemi thawh zelna tur crore 22.22 dah a ni bawk. Flood-management program – *Anti-Erosion Scheme* thar kalpuina tur lakh 50 dah a ni a, hetah hian project kal lai mek - Brahmaputra Board pawmpui thlap Anti Erosion Scheme-3 kan neih te chu - Tuipui-Champhai te, Tuiphalth North Vanlaiphai leh Chitetui-Vairengte te an ni. Hengah hian 100% Brahmaputra funding kan beisei a ni.

PM-KUSUM - Ministry of New and Renewable Energy atangin solar panel pump farmer-te hnena subsidy pek turin kan dil mek a. Amaherawhchu, hei hi memberte pawhin in dil tih kan hria a. Kan contract te hian kan duh anga chakin hna an thawk thei lo deuh niin kan hria a, chu chuan a pawt khaw tlai deuh a, pawt kan ti hle mai a. Kum 2025-2026 atan a hranin crore 10 kan dah bawk. Rationalisation of Minor Irrigation Statistics hnuaiia hian Minor Irrigation census leh Census of Water-bodies te hlawhtling taka kalpui a nih theih nan Research Officer awpna hnuaiia kalpui mek a ni a, 1.4 lakh budget-ah dah a ni.

Mizoram budget pawna hmalakna pawh kan nei ve nual a, kan department hian a thena zawng tal han hailet ve kha a tulin ka hria a. Tui kan neih ang angte renchem leh daihzai taka hmang tur chuan mumal taka chhinchhiah a ngai a. (RTDS) - Real-time Data Acquisition System hi lui 17-ah Automatic Water Level Recorder 22 bun a ni tawh a ni. Hei bakah hian Automatic Weather Station hmun 10 ah bun a ni bawk a. Ruahtui tam lam tehna ARG-27 bun a ni bawk. Satellite kal tlangin CE office-ah hengte hi a lutkhawm zel a, a data pawh National Water Reformative Centre-ah kan thawn thla leh thin a ni. Hei hi a tangkai hle a ni. India ram pumpui Water resources data te hi awmzenei taka enkawla, sorkar leh zirna-in ten an mamawhna hman theih turin Shared-Water Informatic Centre din a ni a. Hei hi Council of Ministers meeting chuan approval min pe tawh a, National Hydrology Project advance-a hman tur crore 59.93 ruahman pawh central-ah thehluh tawh a ni e.

Kan hriat theuh angin Tlawng Lui hi fur lai pheih chuan a lenn thut-thut thin avangin harsatna kan tawk a, nunna tam tak pawh kan chan tawh a ni a. Chutiang laka invenna tur Tlawng Lui-ah *Early Effect Warning System* hmun 8-ah bun mek a ni a. Bairabi Hmar

Veng leh Chhim Veng te, Sairang, Lengpui, Bairabi kai leh Sihhmui ah te, hmun 8-ah tui liana invenna tur kan bun mek a ni.

Tin, IIT, Roorkee nen hian kan department kan thawk dun nasa hle mai a. Kan tui-hna te a lo kang chaha tui-hna te tipung zel tur hian research ang deuhin Lamchhip-ah te, Sailam ah te, Sihphir ah leh Dialdawk ah te kan lo kalpui tawh a, heng kan zir chianna atang hian result tha tak mai kan nei a. Tlawng Lui tui-hna tihpunna tur Springset Management Project 3 - lower, middle leh upper ah Brahmaputra Board-in approval thlap tawh kan nei a, DPR buaipui turin IIT, Roorkee bawh hi consultant atan ruat a ni. Department kan lo inzir tawhna atangin kan Tlawng Lui hna te pawh a lo pun ngei kan beisei a, tih hlawhtlin ngei kan inbeisei a ni.

Mizoram-ah chhum lo chat lova tui hman tur kan neih theihna turin Mizoram-State Water-security Plan chu National Institute of Hydrology, Roorkee te nen buatsaih a ni. Ruahtui khawlna tur tunlai hian a pawimawh hle mai a, Mizoram hian ruahtui kan dawng nasa a, ruahtui khawlna tur project pakhat sorkar hmasa khan a lo buaipui tawh a, Tuidai-Mamit ah MLA Pu Zira te hian hma an lo la a, lawmawm hle a ni. NABARD hnuaiah a khuahna tur sum leh pai pawh kan tifel tawh a, hma kan la chho mek a. Chutiang kan tih theih chuan khulai area-a kan farmers ten nasa taka an chhawr tangkai bakah, rain-water kan lo khawlkhawma kha in tur leh ei turah pawh khulai bial ten an hmang thei dawn a ni. Tin, kan lo khuah chuan, recreational atan pawh a chang thei dawn a; multipurpose a ni dawn a ni

Tin, Murvapar-Serchhip ah *Multipurpose Rain-water Harvesting Dams* siam leh tum a ni a, hei hi bialtu MLA Er. Ginzalala te nen thawk hovin hma kan la chho a, a lawmawm khawp mai. Tin, *Sustainable Dams project for Water-security and Community Development at Mat River*, Mat Lui khuaha hmalak tum a ni bawh a, hei hi Chief minister nen hma kan la ho a ni. Chief Minister bial vek Buangpui-ah hian *Dual-mini dams Project at Vantawng* hi project siam mek a ni bawh a. Heng hi kan chief minister hmalakna a ni a, central ah NBCC-te nen indawrin NBCC hotute'n 'Mizoram-ah project kan lo buatsaih anga i thawk ang u hmiang' an ti a, chumi bawhzui kal zel chu a ni a. Tunah hian heng a thar pathum ah hian NBCC leh department te thawkho turin hma kan la a, project te pawh kan buaipui chho viau a ni.

He House zahawm tak hian *'The Mizoram Water Resources Management & Regulation Bill'* a lo pass tawh a, kan Opp. Leader khan zawhna kha ka'n sawifiah lawk ang a. Water resources chungchanga thuneitu ber Mizoram State Water Resources Council, Chief Minister chair-na hnuaiah din nghal a ni. Department-te thuneihna inchuh ngai lovin he council hian thuneihna a nei a, tui indaih lohna chungchanga hmalakna tur, 'Mizoram Water Policy, 2020' kan nei tawh bawh a ni. Pu Speaker, Agriculture leh Irrigation Department-te pawh thawm nasa zawk neiin kan inkokhawm a, meeting te kan nei tawh a. Kan hmalakna reng reng hi kan farmer-te welfare vek a anih avangin department-pahnihte hnathawh hi mi thuhmun tan thawk kan nih avangin, zaikhata luan za hi a tul hle a. Department pahnihte inpawh taka hmala turin meeting te kan lo nei tawh a, la neih chhoh zel tum a ni bawh a. Kan farmer te tan thil tha zawk, ropui zawk ka beisei a ni.

Demand No. 37 - Co-operation Department:

Demand No. 37 - Co-operation Department hi pawimawh tak, farmers te thuikhawmtu a ni a, Mizoram ah Primary co-operative society 1273 record kan nei a, kan record zawng

zawng hi a nung vek tawh lo mai thei a, a thi tawh, nung tawh lo te pawh a lo awm mai thei a ni. Kan Opposition leader khan ‘Co-operative federation union engzatnge’, a tiha a, tunah hian 13 kan nei mek a ni. Mizoram ah pack 91 a awm mek a, NABARD leh Apex Bank ten heng kan pack te hi min enkawlpuoi a a chaklo deuh te enkawla, a thar hawn te pawh min buaipui zel a, an chungah lawmthu ka sawi duh a ni. Computerization of pack kalpui mek a ni a, phase-I ah tunah hian pack 25 computerise kalpui mek a ni. Thil chhinchhiah tlak tak pakhat chu - kum 2022-2023, 2023-2024 chhung khan co-operative society sector atangin crore 21.35 sorkar revenue ah hian chhun luh ve a ni. Cooperative Deptt. department te-reuh-te in min hmuh thin mahse, hei, hna ropui tak sorkar tan pawh kan thawk ve reng a ni. United Nation Organization pawhin cooperation pawimawhna hriain kum 2012 kha ‘International Year of Cooperative’ tiin a lo puang tawh a, kum tam a kal hmam kum 2025 khan UNO bawkin ‘International Year of Co-operative’ ah a puang nawn leh a a, kan lawm hle mai. UN meuhin co-operation pawimawhna hriaa hetiang a puang hi kan lawm hle a ni.

Central Ministry pawh hian Co-operation hi a ngai pawimawh hle mai a, *Sahkar Se Samridhi* - Prosperity from Co-operation, ‘Co-operation kal tlanga hausakna’ tih thupui neiin hmalakna thar tunah hian a duang mek a ni. Mizoram ah pawh Co-operation kaltlanga hmasawna a lo thlen ve ngei theihna turin State-level ah Chief Secretary chair-na hnuai ah State-Cooperative Development Committee din a ni a, district tinah DC Chair-na hnuai ah District Cooperative Development Committee din a ni baw a ni. Ministry of Co-operation chuan Co-operation kaltlanga hmasawna a lo thlen theih nan co-operative te zingah tan rualna - Cooperation among cooperative a ngai pawimawh hle mai a, Mizoramah pawh *Co-operation among co-operative* campaign hawna NABARD Mizoram RO leh RCS office-te nen SIRD office Durtlang ah Ni 5th December 2024 khan ka hovin kan han hmang baw a ni. India ram pumpuiah *two-tier system* kalpui bank sector State zingah Mizoram Co-operative Apex Bank Limited chuan lawmman pakhatna November, 2024 khan Hon. Minister Cooperation-in a lo hlan tawh baw a. Kan chhuang hle a, vawiin ah hian House-ah kan sawi chhuak duh baw a ni.

Pu Speaker, Co-operation Department hi mite hriat hlauh loh ni mah ila, kan farmer-te leh kan kut-hnathawk thingtlang mite tan hian *department chenfakawm* tak a ni a. Tunah hian sorkar thar chuan society-te hman tangkai kan han tum tan ta a ni a. Kan thali-thar lei *hand-holding* policy-ah pawh tunah hian society a tam thei ang ber hman kan tum a. Amaherawhchu, sawhthing concern deuh bik a nih avangin, kan society neih sa tam tak te hi kha lama lo la tui lo deuh an ni a; a then phe chu kan la hmang zui lo a. Chuvangin, a thara din a ni a. Tunah hian kan *hand-holding* policy hnuai thlai thar lei kan han kalpui takah hian primary level-ah society 600 chuang teh meuh mai kan din ta a ni a. Heng society kan din mekte hi tuai hnuma, society puitling tak, *registered society* ni tura tuai chhoh kan tum a ni.

Chutiang chuan, secondary collection centre-a cluster society-te pawh hi MPAX anga kalpui sorkarin a tum mek a, chutiang tur chuan sorkarin hma a la dawn a ni. Nakin lawkah chuan Cooperation Department hi Mizoram sorkar hnuai department zawng zawng zingah pawh mite hriat hlauh leh ngaihsan ni tur khawpin tunah hian kan buaipui mek a ni. Chuvang chuan, *I te ber tawp lo e*’ tih kan hriat thin ang khan, Cooperation Department hi nakinah chuan a la parvul zel dawn a ni.

Tin, Agriculture Department budget tlakhniam chhan zawhna kha - kum 2024-2025 Agriculture & Farmers' Welfare budget pumpui hi ₹20,31,79,600 a nih laiin, kum 2025-2026 budget chu cheng ₹1,91,00,70,00... (a nuai zawngin ka lo sawi laklawh a) A inthlauhna hi ₹12,07,26,000 a ni a. A chhan tlangpui chu - kum 2024-2025 Agriculture Department hnuai external aided project – Foster Climate Resilience and Farming System in the North East (FOCUS) ah khan ₹6320 lakh dah a ni a, kumin 2025-2026 budget-ah FOCUS 2.0 atan hian ₹1 lakh chauh dah a nih tak vang a ni. Tin, kum 2024-2025-a Agriculture Department - NABARD hnuai infrastructure asset atana ₹13,83,84,000 dah a nih laiin, kuminah hian budget-ah sum dah a ni lo a ni, tih kha ka chhanna ni se.

Tin, Pu Speaker, kan department hian thil thar han puanchhuah tur kan nei a. Central sorkarin '*Public-private Partnership for Integrated Agriculture Value Chain Development*' tih a rawn siam thar a. A la thar viau a, nikum December, Ni 20 khan lehkhawh pawh kan hmu chauh a ni. He scheme thar hnuai hian kan thali-tharte public-private partnership in value chain development kan kalpui thei dawn a. Tuna kan thlai thar kan han buaipuite nen pawh hian a inmil viau a. Kan tawngtai chhanna central lampang hian min rawn pe ah te pawh kan ngai deuh a ni. Hemi hmang hian tunah hian UP chuan Potato-Value Chain Development leh Maize-Value Chain Development an thelut tawh a, an pawm tawh a ni. Keini pawh tih ve thuai tumin hemi atan hian a committee din tura tul angte pawh ngaihtuahin kan indin chho mek a ni.

Tunah hian 16th Finance Commission, Govt. of India hnuai hian '*Establishment of Modern Terminal Market in Mizoram*' tih crore ₹200 project kan han thelut ve chhin a ni a. Mizoram-ah regulated market kan la neih ve loh avangin hei hi regulated market dinna tura ruahman a ni a. Hetiang hi kan nei thei a nih chuan, agriculture market ah hma sawn ngei kan inbeisei a. A zarzotu tur chu kut-hnathawktute bawh an ni dawn a ni.

Tin, Pu Speaker, FOCUS kha a tawp a, tunah hian thar thawh leh mek a ni a. Kan beisei dan chuan FOCUS 2.0 hnuai hmalakna tharah hian market access, enterprise development, value-chain, agriculture productivity leh climate resilience-te ah hian hma lak tum a ni a. Tunah hian kan thleng thui ve viau tawh a, Central lamin ministry panga – Niti Aayog, External Affairs, Agriculture & Farmer Welfare leh Tribal Affairs ten he project hi min pawmpui tawh a. Department of Economic Affairs Screening Committee chuan February 28, 2025 khan approval min pe tawh bawh a ni. FOCUS 2.0 project design tur hian iFAT team mithiam rualte March 31, 2025 hian lo kal an tum bawh a ni.

Pu Speaker, ka sawi tawh ang khan, zawhna zawng zawng kan chhang seng loah min ngaihsak ta tho ula. Eng emaw hriatfiah duh kan neih chuan kan la inzawt leh thei turah pawh ngai i la.

Heng ka Demand-te : –

<i>Demand No.</i>	<i>Department</i>	<i>Amount in ₹</i>
31	Agriculture & Farmers' Welfare	1,91,10,70,000.00
37	Co-operation	17,77,24,000.00
47	Irrigation & Water Resources	91,26,70,000.00
TOTAL		3,00,14,64,000.00

Avaiin ₹3,00,14,64,000.00 hi he House zahawm tak hian min pass pui turin ka rawn ngen e.

SPEAKER : Aw le; tunah chuan Minister zahawm tak Pu PC Vanlalruata'n heng a demand te –

Demand No.	Department	Amount in ₹
31	Agriculture & Farmers' Welfare	1,91,10,70,000.00
37	Co-operation	17,77,24,000.00
47	Irrigation & Water Resources	91,26,70,000.00
TOTAL		3,00,14,64,000.00

A vaiin cheng 3,00,14,64 ,000.00 chu House-ah pass a rawn dil a. Remti apiangin, 'remti' ti ula, remti lo kan awm chuan, 'remti lo' ti ula. (*House-in pass a remti a.*)

A lawmawm e. Kan Minister zahawm tak Pu PC Vanluata demand-te chu House-in lungrual takin a pass ta a ni. (**Pu PC Vanlalruata:** Pu Speaker, ka lawm e).

SPEAKER : Aw le. Tikhan vawiin atana kan business chu kan zo ta a. 13th March, 2025 (Ningani) naktuk chawhma dar 10:30 ah kan thukhawm leh dawn nia.

Sitting is adjourned (8:32 PM)